



Шоиримиз Эркин Воҳидов 60 ёшга тўлиши муносабати билан унинг “Олтин девор” комедияси ўзбек тилида 1000- марта намойиш этилгандан сўнг, 1001- марта урдучада Покистоннинг йирик маданий маърифий шаҳри Лаҳор театрлар комплексида 1996 йили саҳналаштирилган.

Шу муносабат билан Дадаҳон Нурий томонидан ишланган ушбу портрет уч кун давом этган томоша тақдимотида саҳнани безаб турган.

(Хозир Исломободдаги “Лог-вирса” – Халқ ижодиёти Марказининг “Арт Холл” тасвирий санъат галереясида сақланмоқда.)

Дадаҳон НУРИЙ

Изтиҳоб

(Маънавий-ахлоқий бадиа-роман)

Тошкент – 2017

Дадаҳон Нурий буюк адаб Абдулла Қаҳҳорнинг кенжаси шогирдларидан ҳисобланиб, у кишининг оқ потиҳасини олган ёзувчи.

Шунингдек, сал кам олтмиш йил мобайнида ардокли шоиrimiz Эркин Воҳидовнинг яқин ука – шогирди бўлиб, ёнида юрган. Ва устоз ҳаёти билан боғлиқ кўплаб воқеаларни мунтазам равишда “кундалик”ка тушириб борган.

Бу китобда шулардан олинган айрим “парча”ларгина мавзу сифатида фойдаланилди.

МУАЛЛИФДАН

Баъзи таниш-билишларим “Сиз кейинги йиллар ичидаги “жанговарлик”ни ўзаро шахсий “рақобат” мавзуига айлантириб, асарлар ёзмоқдасиз. Шубҳасиз, “ғаним”ларингиз ҳам кўпайиб қолди. Қўрқмайсизми? Ё, бу кексалик аломатими?” деб савол берадиган бўлиб қолишиди.

Мен, уларга шундай жавоб қайтаргум келади; узоқ йиллар давомида ўша “рақиб”лар, “бошқачароқ” йўналишда ижод қилишга “илҳомлантириб” қўишиди. Ахир, Абдулла Қаҳҳор айтгандилар-ку, “Илҳомсиз ёзилган асар-чала туғилган чақалоқ” деб... Тўғри, асл башарасини очиб қўювчи бу мавзу кимларгадир ёқмайди, ғазабини қўзгайди... Телефон орқали, баъзан “чопар” юбориб, кўпчилик олдида қилинадиган огоҳлантириш-қўрқитувларни қўяверинг! Яқиндагина бир “ёзувчиномо” бойвачча китобимни босиб чиқарган ноширга мени “йўқ қилдириб” юбориш учун адвокатга юз миллион пул (?) (сўмми, долларми номаълум) берганини айтиб, “энди унинг ёнига сен ҳам қўшилдинг” дебди, очикдан-очиқ дағдаға билан.

Баъзан ўлланиб қоламан; ўтган асрнинг 70 йил, айни ёзида бошланиб, Термиздан Ҳарбий десанд ташланмагунча, қарийб бир ой давом этган “Бойсун – Сайроб уруши”да кутилмаган тасодиф орқали ўлим чангалидан кутқарилган; Покистоннинг Пешовор худудида Толибонлар ёғдирган ўққа чап бериб, омон қолган; Ҳиндистоннинг Жамму ва Кашмир штатидаги “Азад Кашмир” сепаратчи гурӯҳлар қўлига тушиб, бир амаллаб уларни “инсоф”га келтирган; яна, шу мамлакатнинг турли оқимдаги коммунистлар қўлида бўлган, Керала штати чангальзорларида яширин ҳаракат олиб борувчи “Маочи”лар томонидан отилган “жанговар қурол”- учига илон заҳри суртилган тиғли бамбук таёғи зарбидан, ўзини хандакка ташлаб, жон

сақлаган; Шри-Ланкадаги Тамил-Илам айирмачи жангарилар “қопқони”га тушиб, бир амаллаб қутулиб қолган (булар ҳақида Аҳмаджон Мелибоев ёзилганидан ҳам ваҳималироқ қилиб, тақриз эълон қилган) мендай шўр пешона ҳаётига энди, келиб-келиб, “ўзимиздан чиққан”лар таҳдид солаётгани қизик-да!

Тўппа-тузук одамлар гўё менга меҳрибончилик қилгандай, “қўйинг, шуларга тенг бўлманг, улар ёмон одамлар” дейишиади. Қаранг, “ёмонлар” ҳоҳлаган номаъқулчилигини қиливерсин, биз тинчгина томошобин бўлиб юраверайлик, дегани эмасми, бу! Унданам ачинарлиси, ҳаётда унда-мунда учраб турадиган шу хилдаги нокаслар билан ёнмаён, ҳамнафас бўлиб яшашни ор билмаганлардан нима кутиш мумкин? Мени мана шу кўпроқ ташвишга солади.

“Кексалик аломати”га келсак, юқорида эслатиб ўтилган устоз Абдулла аканинг “Ҳар-бир ижодкор ўз замонасдининг тарихчисидир. Айниқса, ёши бир жойга етгач, қўлни по-клаб, кўрган-кечирган бор ҳақиқатни дафтарга “қоралаб” қўйиши лозим” дея айтган сўзлари ҳамон қулогим остида.

Шунинг учунми, кўплаб азиз ва мұтабар устозлар, айниқса Эркин Воҳидовдан олган сабоқларим ҳаққи, юрагимдаги гапларнинг бир қисмини қофозга туширишга жазм этдим. Булар менинг шахсий фикрларим. “Рақиб”лар қандай тушуниб, қабул қиласи, уларнинг виждонига ҳавола.

Дарвоқе, замон, давр ўзгармоқда. Ҳамма бандаси ҳам “Беайб-парвардигор” эмаслигини шаккоклик қилмай, тан олиб яшаш пайти келмадими...

Фан ва адабиёт бузук одамлар қўлига тушиб қолса, бирорларга ёвузлик қилиш куролига айланishi мумкин. Фақат саҳоватли кишиларгина маърифатни юксакликка кўтариадилар.

Даниэл ФОНВИЗИН

СҮНГГИ НИДО

Яқинда, “доруломон” шўро даврида ҳам пок эътиқоди, халқининг бахт-саодати йўлида заррача ўз сўзидан қайтмаган, ўзбекнинг ардоқли фарзанди бўлиб келган ва шу кунларгача “шеъриятилизмнинг фахри ва ғурури” (О.Шарафиддинов), “Ўзбек халқи, адабиётимиз, маънавиятимизнинг беназир намоёндаси, комил шахс, дунёни теран англовчи юксак қалб эгаси, буюк ҳазрат Навоийдан кейин ҳар бир қалам аҳли орзу қилиб, етолмай келган мақом мартабасига мушарраф бўлган зот” (Анваржон қори Турсунов), “Барча адабиёт аталмиш эзгулик мухлислари ни ғам-андуҳ уммонига ғарқ этиб” (И.Ғафуров), бутун халқимизни қайғуга солиб, шоиру замон аталмиш Эркин Воҳидов абадият макони сари рихлат этди.

Шоир хонадони билан Чифатой қабристони оралиғи ўн чақирикимни ташкил этса, шунинг уч чақирими минг-минглаб одамлар оқими билан тўлиб тошди. Шоир тобути кўзларига ёш инган навқирону кексалар елкаси узра худди саркаш уммон мавжи аро сузуб бораркан, беихтиёр ул зоти шарифнинг “Айрилиқ они яқиндур, карвон кетар сўнгги зангин чалиб...” мисралари одам вужудини тилка-по-

ра қилиб, қулоқларинг остида эшитилаётгандай бўлади.

Назаримда, Тошкент қўчалари Абдулла Қаҳҳор вафотидан кейин бу қадар маърифий жудоликни ўз бошидан кечирмаган эди.

Ҳазрат Анвар қори таъриф этганларидек, ҳеч иккиланмасдан айтавериш лозим, Навоий бобомизнинг содиқ ва муносиб фарзандига қиёслагудек бир азиз инсондан айрилдик. Она ер ўз бағрига олди. Охиратлари баҳайр, жойлари жаннатда бўлсин дея, дуолар билан кўнгилларга таскин беришдан бошқа иложимиз йўқ.

Ўлим – барҳақ. Яратган олдида биз бандалар ожизмиз.

Лекин шунга қарамай, юракни аламли савол ўрттайверади; наҳотки, одам умри шунчалар қисқа? Ҳали устоз узоқ йиллар яшашлари керак эди-ку!

Шу ўй-хаёллар билан тун ярмидан ошди ҳамки, уйкум келмади. Беихтиёр бундан уч йилча аввалги, шоир ҳаётидаги энг шодумон кунлар кўз олдимда гавдаланиб кетди. Эркин акани намангандилар хўп яхши кўришарди. У кишининг ҳам Намангандага меҳри бошқача эди. Аксар “Укангиз Содиқоннинг бир тегирмон сув шовуллаб оқиб турадиган боғини соғиниб кетдик, уловни йўлга шайланг”, деб қолардилар. Ҳар сафар ғоят дилбар, сұҳбатижон инсон, адабиётшунос олим Раҳматилла Иногомовни ўзимизга ҳамроҳ қилиб олардик.

Йилда бир маротаба, айни ёзнинг уч ҳафтасига чўзиладиган бу сафаримиз фақат “ижодий” ҳисобланиб, ҳеч кимни безовта қилмаслик, ҳатто шахмат билан ҳам «чалғимаслик» шарти қатъий қилиб

қўйилар, аввалдан келишиб олинган “Кундалик тартиб”га оғишмай риоя қилинарди.

Бунинг натижаси ёмон бўлмасди. Айниқса, Эркин ака завқ-шавқ билан ишлаб, ижод дафтарини қўйма сатрларга тўлдириб қайтардилар. (Уларнинг айрим “қоралама”ларини ҳамон ўзимда сақлаб юраман).

Кейин, маълум сабабларга кўра, Эркин ака ва у кишининг бошқа кўплаб ҳамқалам дўстлари учун Қамчиқ довони “берклиби” қолгандай бўлди. Ва бу ўн йиллардан зиёдга чўзилди.

Ниҳоят, Наманган аҳли бутун табиат олами баҳорий латофат қўйнига бурканган кунларнинг биррида ардоқли шоир ва унинг кўплаб ижодкор тенгдошлари ҳамда шогирдлари йўлига гуллардан поёндоз ёзиб, кутиб олдилар.

Икки кун давом этган “Адабиёт байрами” Наманган давлат театри биносида катта тантана билан якунланаркан, вилоят ҳокими Баҳодир Юсупов қайта сўз олиб, шундай деди:

– Эркин ака, биз наманганликларни кўпдан бери соғинтириб қўйдингиз. Энди номингиз билан боғлиқ ҳар қандай тадбир-тантана мана шу юзлаб ўз муҳлисларингиз орасида Сиз файз киритиб ўтирган кошонадан бошланмаса, хафа бўламиш!

Юзларидан нур ёғилиб турган шоир қаддини расо туттанича салобат билан сахнага чиқиб, ҳаммага эҳтиром юзасидан таъзим этганида, бутун зал оёққа қалқди.

Шунда орқа қаторда ўтирган аёллардан бири-нинг овози қулоғимга чалинди:

– Эслаяпсанми Моҳи, институтни битираётган

йилимиз Эркин ака билан учрашув бўлганди. Ҳеч ўзгармабдилар-а!

– Балки, ундан ҳам ёшарибдилар, дерсан. Айтганларингни қайтариб ол, кўзинг тегмасин, тағин!

Устоз мен илк бор учрашган ўсмирилик чоғларидаёқ ҳамма ҳавас қилиб, “кўз теккудек” кўркам ва ўқтам навқирон йигит эдилар. Унга тикилган кўзлар қайноқ юракка илҳом баҳш этар, ёш шоир ижодини бардавом эксакликка кўтаргандан қўтариб бораради.

Ҳар қандай нур ортида соя бўлади деганлариdek, ғайрли нигоҳлар ҳам йўқ эмасди. Шоир халқ орасида қанчалик ардоқли бўлмасин, бу “кўланка”лар унинг боши узра гоҳ ошкора, гоҳ пинҳона пайдо бўлиб турарди.

Айниқса, кейинги бир ярим йилга яқин вақт давомида оғир бетоблик азобини тортиб, умрлари “айрилиқ” остонасида турган пайтлар ҳам ўша қора шарпалар “исканжа” сиртмоғини бўшатмай, шоирнинг то сўнгги нафаси чиққунича унинг қутлуғ номини “ўчириш” ҳаракатидан қайтмадилар.

Худо шоҳид, буларнинг барига ўзим гувоҳман... Ана ўша “шарпалар”дан бир-иккитаси қузғундай марҳум тобути атрофида изғиб юрганини кўриб қолдим. Ҳатто, бирорининг юраги ёмон бўлиб, “тез ёрдам”да қаёққадир олиб кетишди.

Мен шуларни кўз олдимга келтираман-у, ногаҳон вужудимни титроқ босиб, йифидан ўзимни тиёлмайман. Нарироқ қўшни хоналардаги болам, келиним, набираларим эшитиб, безовта бўлмасин деб, эшикни ичкаридан танбалаб қўйганман, бошимни парёстиққа буркайман.

Бир пайтлар шоир Мұхаммад Юсуф вафот этганида кечаси билан ўзини тутолмай, ўкраб чиққан навқирон йигит, укам Құчқор Норқобул ёзғанларини ўқигандим. Мана, энди 75 ёшымда шу күргилик менинг бошимга тушиб турибди. Йигит киши йығламасин дея, таскин гап айтадилар. Лекин ёши бир жойга бориб қолган қария-чи?! У нима қилсин...

Ўзимни тутмоқта ҳаракат қиламан. Қани, энди иложи бўлса!

Тонг саҳарга яқин кўзим илиниб қолибди. Бир маҳал елкамга қўл қўйиб, қачонлардир “менинг укам, ҳам акам – иккиси ўзингсан”, деб айтган Эркин ака турғанмиш. “Ука, қўй! Куюнаверма, ўзингни асрар! Мана, менам азобу уқубатлардан қутулдим. Бошқа бирорлар ҳам мендан қутулгани рост бўлсин. Лекин нолийдиган жойим йўқ. Яхши яшадим, ардоқда бўлдим. Шунинг ўзига шукур. Анави “майда-чуйда” гапларнинг бари ўткинчи. Унут. Хайр укам”.

Азот бошимни кўтардим. Юзларим ёстиққа ёпишиб қолгандай жиққа ҳўл.

“Ука!” Қарийб олтмиш йиллик “Ака”нинг менга шу алпозда мурожаат этишини узоқ йиллар давомида жуда-жуда кутгандим, буни хоҳлардим ҳам. Лекин, у киши доим отимни айтиб чақирав, баъзи-баъзида бироз ғашимга тегадиган “дўстим” ҳам деб, қўяр, “ука” сўзини камдан-кам, бехосдан айтиб юборарди.

Чиндан ҳам мен Эркин аканинг туғишганидай яқин бўлиб кетган “ука”си эдим; ўн уч ёшимда болалар газетасида босилган сатрлари остида “Эркин Воҳидов” ёзуви бор шеърни ёд айтиб, (ҳозир Намангандаги Абдулла Қаҳҳор номидаги) мактабимиз миқёсида оғизга тушганман. Ҳеч эсимдан

чиқмайди, ҳар доим шеър ёд айтишни овозимни баралла қўйиб “Эркин Воҳидов шеъри” дейишдан бошлардим.

1955 йили Наманганга ташриф буюрган мусиқа мутахассислари имтиҳонидан ўтиб, Тошкентга шу соҳа бўйича ўқишга келдим... “Сквер” деган шаҳар марказидаги сердарахт боф четида жойлашган, ердан одам бўйи баландроқ, йўғон тахта зиналар орқали чиқиб бориладиган, бир нечта хоналардан иборат болалар газетаси биносини истаб-сўраб, топиб келганман. Мулламуҳамедов деган озғиндан келган, баланд бўй, кўзлари мовийроқ киши мени газета бош муҳаррири ҳузурига олиб кирган. Қўлимда икки йилча аввал менга худди мана шу ердан юборилган, “Ёш мухбирга эсадлик” сўzlари ёзилиб, тагига “Ғани Жаҳонгиров” исм-фамилияси билан имзоси қўйилган хат бор эди. Бош муҳаррир жуда меҳрибон, ширин сўз одам экан. “Мен Эркин Воҳидовнинг “Укамнинг жангига” шеърини ёд била-ман. Ўша кишини кўрмоқчийдим” дедим-да, шеърни ёд айтиб бердим. Икковларига хўп маъқул тушди. Шунда Ғани aka “Абдувоҳид, янги чиққан китобчангиздан бу йигитга беринг ва адресини ёзиб олинг”, деди.

Мусиқа билим юртимизга келиб, бирга ўқийдиган болалар, ҳатто устозларимнинг айримларига юпқагина, сарғиш муқоваси устида африкалик, хитой яна қандайдир чет эл болаларининг Кремл қизил юлдузига ҳавас билан қараб турган ҳолатдаги суратлари чизилган шеърлар китоби (номи эсимда қолмаган) билан унинг ички варағидаги менинг номимга муаллиф томонидан ёзилган дастхатни кўрсатганимда ҳаммаларининг ҳаваслари келган.

Ҳатто фортеپъяно бўйича муаллимимиз Евгений Шварц домла китобдаги шеърлардан бирига мусиқа ҳам ёздилар.

Ундан ҳам қизифи, орадан бир ҳафтача вақт ўтгач, шоир Абдувоҳид Мулламуҳамедов 17–18 ёшлардаги кишини бошлаб, ўкув даргоҳига кириб келди ва мени “Эркин Воҳидов” билан таништирди.

Шундан кейин у кишининг ҳам муҳлис, ҳам шогирдига айландим. Кейинроқ, Эркин ака музика билим юртимиз жойлашган Оқтепа мавзеидаги жамоа хўжалиги ҳудудидан томорқа олиб, иморат қура бошладилар. Бу бизнинг янада яқинроқ акаука бўлиб кетишимизга туртки бўлди. Шу орада биринчи “лирик қисса” китобим босилиб чиқди.

Мана, энди ўртага жудолик тушди-ю, қариб олтмиш йилдан зиёд вақтдан бери устоз – маслаҳатчим, суюнчиқ акам бўлиб, бағримни тўлдириб келган ўз жигаримдан айрилиб ўтирибман.

Бу инсонни узоқ йиллар кузатиб, камдан-кам одамда бўладиган олий мақом фазилат – оғир-босиқлик; сабр-тоқат; ҳеч қачон бирон киши устидан нолиб, шикоят қилмаслик; ёмон, ғаламис бўлса ҳам, ҳар қандай одамнинг фақат яхши томонларини топиб, гапириш; бирорга заррача ёмонликни право кўрмаслик; сухбат-у лутф-карамада ўзи пок, сўзи пок, дили пок доноларга хос теранликни кўрганман.

Рұхлар ҳамиша уйғоқ ва ҳар нарсадан воқиғ деганларидек, бугунги биринчи кечаёқ тушимга кириб, қулоғимга чалинган сўзлар кимларга, нималарга ишора?!

Дарвоқе, бундан салгина олдин Эркин ака ётган беморлик каравоти ёнида кичик варақ қофоздаги “Сўнгги сатрлар”дан бирига кўзим тушиб қолганди:

Кимдир мени ёқтирмай қолса,
Үчириса исмим қатордан.
Не қайғум бор!
Номлар саналса,
“Ва бошқалар...” ичидә борман.

Бу сўнгги нидолар замирида қандай сир-асрор яширинганди?

Оташин, ҳам дардли шеърлари билан оғизга тушган Фарида Афрўз хоним устоз вафот этган айрилиқнинг биринчи куниёқ фарёд уриб, қуйидаги мисраларни юрақдан тўкиб солди:

Ҳеј, шоир, бас, шеър ёзма, тўхтат.
Пичоқ бориб, сувакка етди.
Энди не деб ёзсанг ҳам ёлғон
Эркин Воҳид оламдан ўтди.

Бу, заҳарли нишини уриб қўйиб, шоир тобути устида мотамсаро нутқ сўзлаётган, афсус-надоматлар билан шеър битиб, ўз қилмишларини оқпамоқчи бўлаётганларга қаратса айтилган аччиқ ҳақиқат нидоси эмасмикан!

Ҳа, “Шоир оламдан ўтди”, “Пичоқ бориб, сувакка етди”. Энди қачонгача ёлғонлар билан ўзимизни, бошқаларни ҳам алдаймиз? Ҳақиқатни айтиш пайти келмадими?!?

Дарвоқе, улуғ шоиримизнинг сўнгги нидосида ҳам юракдаги армон бўлиб қолиб кетган ҳақиқат қўнғироқларининг сўнгги саси нимадан дарак бермоқда?

Унга жавобни эса, бир неча йил олдинги воқеалар силсиласидан излашга тўғри келади.

ШОИР ВА ЭЛЧИНИНГ БАШОРАТЛАРИ

Эркин аканинг машхур “Олтин девор” комедияси саҳнага чиққан пайтлар, чет эл мамлакатларига нисбатан қўлланадиган муносабатлар “дўст”-“но-дўст”лигига қараб белгиланар, бу шўро сиёсатининг азалий қонун меёрига айланиб қолганди.

Жумладан, аллақаердаги кичкина Куба деган давлат “доҳий”лари қўшиқларда куйланар, у ердаги халқ “озодлик армияси”нинг командос революционерлари ҳаёти ҳақида мактабларда ўқитиларди. Ёнгина миздаги ахолисининг сони “дўст” кубаликлардан қарийб қирқ баробар кўп, катта давлат Покистон хусусида эса, халқимизнинг кўпчилиги умуман аниқроқ тушунчага ҳам эга эмасди. Ҳатто, (исломий) мамлакат номига ҳадеб урғу беравер-маслик ҳақида пинҳона кўрсатмалар бериб туриларди.

Шундай бир пайтда томошобинлар орасида тезда машҳур бўлиб кетган “Олтин девор” комедиясининг бош қаҳрамони Мўмин чол томонидан “Покистон” сўзи ўзбек саҳнаси бўйлаб жаранглай бошлайди. Яъни, Мўмин чол чет элда билим олиб қайтган йигит Матлабга қараб: “Мана, сен дунёning кўп жойларини кўргансан. Булар нимани қўрибди? Покистонни ҳам кўрмаган-ку” деган сўзларни айтади.

Маъмурлар бунга анча қаршилик қиласидилар. Эркин акадан “Покистон” ўрнига “Куба”, ҳеч бўлмаса “Хиндистон”ни алмаштириб беринг, деб илтимос қиласидилар.

У киши “Покистон” учун “жавобгарлик”ни “ўз зимаси”га олиб, ҳатто “Тилхат” ёзиб беришга тайёрлигини айтиб, “маслаҳатчилар”ни бироз “ноқулай” аҳволга солиб қўяди. Улар ён беришга мажбур бўладилар.

Эркин ака ўшанда келажакни ўйлаб, башоратомуз йўл тутган эканми, йиллар ўтиб, “Олтин девор” Покистон саҳнаси томон йўл олди.

Бунинг ҳам ўзига хос қизиқ тарихи бор; Москвага Покистон Ислом республикасининг янги элчиси бўлиб келган Абдул Саттор жаноблари ўз миссиясини Заҳириддин Муҳаммад Бобур қадамжоларини зиёрат қилишдан бошлаш ниятида эканлигини айтиб, Тошкентга, каминага телефон қилди.

– Ҳеч қандай расмиятчиликнинг хожати йўқ. Рафиқам билан шахсий меҳмон сифатида борамиз. Иккимиз номимизга таклифнома юборсангиз, бас. Ҳозир бунинг йўли осон. Дарвоқе, анча аввал Сиз ҳақингизда Файз Аҳмад Файз соҳиб гапириб бергандилар, адресни ҳам ўша кишидан олгандик, – деди-да, қўшиб қўйди, – Иложи бўлса, “Улуғбек хазинаси” асари муаллифи билан ҳам учрашиш ниятимиз йўқ эмас.

Демак, Москвага келган янги элчи анча ўқимишли, адабиётдан ҳам яхши хабардор одам.

Ўзбекистон Ёзувчилари Уюшмаси раиси устоз Одил Ёқубовга Москвадан қўнғироқ бўлганлиги ҳақида гапиргандим, устоз бироз ўйланиб қолди.

– Аллақаердаги ишларни қўзғаб юрасан, – дея бироз замзамали гап қилиб қўйди-да, қошларини чимириб, ярим жилмайиш билан сўради, – у одам “Улуғбек хазинаси”ни қанақасига ўқиган бўлиши мумкин?

– Ўтган йил асарни Москва “Прогресс” нашриёти томонидан босилган ҳиндийча нашридан парчалар ўқиб бергандим-ку, ўзингизга!

– Элчи ҳинччани ҳам биладими?

– Муомала тили бир. Фақат ёзуви бошқа. Ҳиндарлар “диванагари” алфавитидан, мусулмонлар эса, худди илгари бизда бўлганидек, араб ҳарфидан фойдаланиб, ёзишади.

Котиба телефон қилиб, Ўзбекистон Ташқи Ишлар Вазирлигини улаб берди. Одил ака Вазир Сарвар Олимжонович билан қисқагина суҳбатлашиб, ҳозир олдингизга боради, деди.

Сарвар ака биз ўйлагандай жуда жиддий эмас, оддийгина киши экан. Ҳатто, кексагина аёл олиб кирган чойдан бир пиёла қуиб узатди ҳам. Мен Абдул Саттор жанобнинг телефон қилгани ҳақида гапириб бердим. Иш осонгина ҳал бўлди.

Меҳмонни дўстим Хожиакбар Шайхов билан ҳеч қандай расмиятчиликсиз кутиб олдик. Уйда меҳмон қилдик, Бобур юрти Фарғона Водийсини айлантиридик, Самарқанд, Бухорони кўрсатдик.

Элчи жанобнинг сафари охирлаш куни Ёзувчилар Уюшмасининг катта мажлислар залида учрашув белгиланиб, бунга алоҳида тайёргарлик кўрилди. Учрашувга зал тўла одам йигилди. Саҳнадаги устига қизил алвон ёзиб, олдига гуллар қўйилган узун столга файз киритиб, чет эллик эрхотин меҳмонлар ҳамда “юқори” идорадан келишган ўзимизнинг “расмий”лар ўтиришарди.

Абдул Саттор соҳиб дипломатия бўйича олий таълимни Америкада олган бўлиб, “Шаҳаншоҳ Бобурнинг давлатчилик русуми” деган мазмунда, биз-

нинг лаҗжа билан айтганда “диплом иши” ёқлаган ва шу мавзуда кўплаб Халқаро илмий анжуманларда маъруза қилган экан.

Мезбон шулар ҳақида тўхталаракан, Одил ака номини тилга олиб, мен шундай катта ёзувчила-рингиз билан рўбарў турганимдан хурсандман, деди. Асарнинг кўп таҳсинли томонларини мақтаб гапирди.

Сўнг “Улуғбек хазинаси” муаллифига қараб:

– Шундай гўзал роман учун Сиз жанобга раҳмат айтиш билан бирга, ундаги кичкина, шу билан жиддий хатолик ҳақида ҳам икки оғиз гап айтиб ўтмоқчиман. Сизларнинг Оллоҳ назари тушган юртингиз кўп дину диёнат уламоларининг киндик қонлари тўкилган кутлуғ даргоҳдир. Шу юртнинг фарзанди Хожа Аҳрор Вали ҳазратлари ҳақида гапирадиган бўлсам, буюк фалакиёт даҳосининг ўлимига ул зотнинг ҳеч қандай алоқаси йўқ. Ваҳоланки, биздаги аниқ маълумотларга кўра, ҳазрат Хожа Аҳрор Улуғбекдан кейинроқ яшаб ўтганлар. Агар китобнинг навбатдаги нашрида шу тарихий ҳақиқат ҳисобга олинса, Сиздан беҳад хурсанд бўлардим...

Меҳмоннинг бу сўзлари ўз асари ҳақида фақат мақтовли сўзлар ёзилганини ўқиб, эшишиб юрган ёзувчига бироз малол келгандай бўлди-ю, лекин, буни сездирмади.

Жаноб элчи нутқини давом эттириб, Файз Аҳмад Файзнинг “Халқларни сиёсатдонлар эмас, адабиёт бир-бирларига яқинлаштиради” деган сўзини мисол келтирди-да, зални тўлдириб ўтирганларга қаратади:

– Сиз, қалам ахли, күпроқ мана шунга эътибор бериб, покистонлик ҳамкасбларингиз билан ижодий ҳамкорликни йўлга қўйишингиз керак. Мен бунга ҳар томонлама ёрдам беришга тайёрман, – деб туриб, кутилмаганда, – тўғри, Москва билан Тошкент ораси анча йироқ, унча-мунча эзгулик ишларини осонлик билан ҳал этиб бўлмайди. Лекин иншооплоҳ, озгина вақт ўтиб, халқларимиз худди Бобур давридагидай яна-да яқин бўлиб кеташади. Борди-келди алоқалар қайта тикланади. Бунинг учун узоқларга бориб, сарсон бўлиб юришларингизга ҳожат қолмайди. Ҳамма ишлар шу ернинг ўзида – янги очилажак Покистон элчихонасида битказилади, – деб юборса бўладими.

Ҳеч ким хаёлига келтирмаган, унинг устига, юқори минбардан туриб айтилган сўнгги бу “қалтис” гап меҳмон “хурмати учун” бу ерга ташриф буюрган баъзи раҳбарият орасида безовталик уйғотиб, бир-иккитаси сахнани тарқ эта бошлади. Кимлардир уларга эргашмоқчи бўлганди, ижод ахли орасида анча обрў-эътиборга эга академик Матёкуб Кўшжонов қаршисидаги микрофонни қўлига олиб, “Дўстлар, бу меҳмоннинг ўз фикри. Айтди-кўйди. Бизга тиқишираётгани йўқ. Меҳмон ҳурмати, ошкораликка ҳам кенгроқ ёндошайлик-да”, деган сўзидан сўнг минбарда ўтирганлар орасида бироз ҳаяжон ҳовури босилгандай бўлди.

Барibir Ёзувчилар Уюшмасидай даргоҳнинг юқори минбаридан туриб айтилган гап – отилган ўқ бўлиб, акс-садо бермасдан қолмади; жаноб Абдул Саттор рафиқаси билан шу куннинг кечки пайтига иккита тадбирни яъни, элчи буюк шоир Назрул

Ислом ҳақида достон ёзган Эркин Воҳидов билан; Ясина Бону эса, “Улуғбек хазинаси”дай асарни яратган ёзувчининг табаррук ёшга бориб қолган оналари билан учрашувни режалаштирган эдилар.

Бироқ, Одил акадай катта ёзувчи ҳамда Уюшма раисини кимдир “юқори”га чақириб, анча “пуй-палоғлаган” шекилли, у кишининг “ананғни”лаб сў-кишидан, меҳмон кутадиган кайфиятда эмаслигини дарров англадик.

Ясина бону билан учрашув Хастимомда – Ҳожи-акбарнинг волидалари муҳтарама Муяссар ҳожи Она ҳузурларида амалга ошириладиган бўлди.

Қарангки, орадан озгина вақт ўтар-ўтмас, Абдул Саттор жаноблари қилган башорат амалга ошди.

Покистон биринчилардан бўлиб, Ўзбекистон Мустақиллигини тан олди.

Биринчи бўлиб, “Исломобод-Тошкент-Исломобод” рейси бўйича Халқаро самолёт қатнови йўлга қўйилди.

Чет эл раҳбарларидан биринчи бўлиб, Покистон Бош Вазири жаноб Навоз Шариф Тошкентга ташриф буюриб, мамлакат элчихонаси очилиш марсимида шахсан иштирок этди.

УЗОҚ ВА ЯҚИН ПОКИСТОН

Кўпчиликка маълумки, мустақилликка эришишдай қутлуғ кунлардан анча аввалроқ Покистондаги йирик савдо-тижорат компанияларидан саналмиш Табани компанияси Тошкентда ўз оғисларини очиб, Ўзбекистон билан ҳар томонлама кенг савдо-сотиқ ҳамкорлигини йўлга қўйганди. Унинг Бош директори Ёқуб Табани хўп маърифатли одам бўлиб, Абдул Саттор жаноблари қилган орзуларга биринчилардан бўлиб тамал тошини қўйган, ҳомийлик тадбирлари ўтказиб, икки мамлакат қалам аҳли орасида ижодий ҳамкорлик ришталари уланишида кўп хайрли ишларни амалга оширганди.

Кейин эса, Покистон ўзбекистонликлар кўз ўнгидаги бутунлай янги бир қиёфада намоён бўла бошлади.

Қарангки, салгина наридаги Дехли шаҳрига беш минг километрча йўл босиб бориб, Москва рухсатини олгач, яна Тошкентга қайтиб, у ерда тўхтамай, Ҳиндистон пойтахтига бориларди. Дехлидан уйга қайтишда ҳам чотаноқ остидан қўлни юбориб, қулоқни қашишдай, аҳвол шу, эди.

Қўшни мамлакат шундоқ ёнимизда бўлиб, унинг Бош шаҳри Исломободга Тошкентдан бир соату ўн беш минутда учиб бориш мумкинлигини кўпчилик билмай юрган экан.

Давлат тузуми гарчи “Исломий” бўлса-да, кўчалардаги машиналарнинг қаришиб ярмидан кўпроғи хотин-қизлар қўлида. Турли халқаро ва ички йўна-

лишлар бўйича ҳаракат қилувчи учоқларни ҳам bemalol аёллар бошқараётганликларининг гувоҳи бўлиш мумкин.

Бироқ, парламентда улар сони эркакларнига нисбатан анча кам. Аммо, шунга қарамай, иккни йилча аввал мамлакатимизга ташриф буюриб, ҳамкасби Неъмат Аминов билан ижодий ҳамкорлик алоқалари ўрнатган, ўз халқи орасида “Покистон Чехови” номи билан машҳур сатирик ёзувчи ҳамда шифокор доктор Юнус Баттнинг гапига қараганда, аёллар минбарга чиқиб, нутқ сўзлашса борми, эркаклар учун “сичқоннинг ини минг танга” бўлиб кетармиш. Бу гапда жон борлигига ўзим бир-икки марта гувоҳ бўлганман.

Шунинг учунми, бизнинг ўзбек аёллари ҳам фоллиқда улардан қолишмасликларини билдириб қўйиш мақсадида ўзаро борди-келдини авж олдириб юборишид. Бир-бирлариникида меҳмон бўлиб, ҳамкорликда турли маданий-маърифий тадбирлар ўtkаза бошлишди. Ҳатто, хотин-қизлар масаласи бўйича Давлат министри бўлган хоним эътиборидан ҳам четда қолмади.

Қарасак, биз ижодкорлар улардан ортда қоладиган. Аввалдан “ғойибона” эмас, бақамти ўтириб қилган мулоқотлар орқали танишлигимиз бор поқистонли ҳамкасларни меҳмонга таклиф этдик. Улар хузурида бўлдик. Ўзбекистон Ёзувчилар Үюшмаси билан “Бутунпокистон Адабиёт гилдияси” орасида ижодий ҳамкорлик режалари тузилди.

Шуни алоҳада таъкидлаб ўтиш керакки, ҳинд яримороли мамлакатлари ичida адабиёт, санъат, маданият ҳамда китоб нашри – полиграфия

соҳасида ягоналиги билан ажралиб турувчи қўхна Лаҳор шаҳрида Хинд-Пок халқларининг аллома шоири мақомига эга, бир неча бор меҳмонимиз бўлган Файз Аҳмад Файз лойиҳаси (дизайни) асосида бунёд этилган Ал-Ҳамро театр комплекси бор. Унинг ҳар бири мингдан зиёд томошабинга мўлжалланган хашаматли заллари доим театр ишқибозлари билан тўла бўлади.

Айниқса, комедия асарлари намойиш этиладиган “Комеди Ҳолл” томоша залида кўпроқ ёшяланглар билан гавжумлиги одам диққатини тортади. Чипталар нархи анча арzon. Талабалар учун белуп ҳам дейишади.

Биз Ўзбекистон мустақиллиги арафасида бир гуруҳ ўзбек ижодкорлари жаноб Ёкуб Табани томонидан уюширилган навбатдаги “маданий сафар”имиз чоғида шу театр мажмуасида ҳам бўлиб, урду тилидаги жуда қизиқарли комедия асарини томоша қилгандик. Унинг мавзуи қайсиdir томонлари билан узоқ йиллардан буён ўзбек саҳнасидан тушмай, томошобинларни ром этиб келаётган Эркин Воҳидовнинг “Олтин девор”ига ўхшаб кетарди.

“ОЛТИН ДЕВОР” ШАРОФАТИ

Қарангки, орадан озгина вақт ўтиб, “Олтин девор” комедиясини Ўзбекистонга ташриф буюрган покистонлик ижодкорларга кўрсатдик. Томоша меҳмонларда катта таассурот қолдирди. Айниқса, Неъмат Аминов билан яқинда навбатдаги Бухоро сафаридан қайтган доктор Юнус Баттнинг “Бу айнан биз боп, олтин васвасасига тушганлар учун сабоқ бўладиган асар. Ҳеч иккиланмай Ал-Ҳамрода саҳналаштириш керак”, деган ҳаяжонли сўзлари деярли ҳаммага маъқул тушди.

Бу мавзу ҳақидаги гапни Тошкентдаги Покистон элчихонасида бўлиб ўтган гурунг чоғида элчи Шавкат Али Шайх ҳам қўллаб-қувватлади.

Шундан кейин элчи жаноблари Тошкент Шарқшунослик институтининг етакчи ҳиндшунос домлаларидан, Ҳиндистон, Покистон мамлакатларида узоқ вақт ишлаб келган Ансориддин Иброҳимов иккимизни ўз ҳузурига чақирди. У кишининг таклифига кўра “Олтин девор”ни Покистонда саҳналаштиришга оид ишлар режасини тузиб, тайёрладик.

Сўнгра Ўзбекистон Ёзувчилар Уюшмаси раиси Жамол Камол билан алоқа боғлананиб, элчи комедия муаллифи Эркин Воҳидов икковларини “бир пиёла чой”га таклиф этди.

Жаноб Шавкат Али Шайх Шарқ мумтоз адабиёти намуналаридан яхши хабардор шоиртабиат одам

эди. Сухбат шеърхонлиқдан бошланиб, ниҳоят гап асосий мавзуга келиб тақалди. Эркин ака бу режадан беҳад мамнун эканлигини айтиб, фақат комедияни эмас, мустақил Ўзбекистон адабиёти намуналаридан илк маротаба кенгроқ миқёсда по-қистонликларни хабардор этиш лозимлигини гапиракан бу, бир йилча муқаддам Тошкентда им-золанган “Ўзбекистон – Покистон орасида ўзаро маданий ва адабий алоқаларни ривожлантириш” ҳақидаги шартнома бандларига мос тушишини ҳам такидлаб ўтди.

Элчи завқи жўшиб:

– Ваҳ-ваҳ, – деб қўйди-да, худди шу фикр ўз ҳаёлидан ўтиб турганини айтиб, шоир қўлини қаттиқ қисиб қўйди.

Эркин ака сўзида давом этди;

– Назаримда, Покистонда бизнинг буюк шоиримиз Алишер Навоий асарлари ҳали кенг тарқалмаган бўлса керак. Ул ҳазратнинг руҳини шод этиш учун ишни айнан шу буюк зот ижодидан бошлаш лозим, деб ўйлайман.

Жамол Камол қўшимча қилди:

– Бундан шундоқ Покистон билан Ўзбекистон оралиғидаги мамлакат худудида мангу уйқуда ётган Алишер Навоий ҳазратларининг руҳлари шод бўлиши муқаррар.

Элчи лутфли жавоб қайтарди:

– Бу ҳам айни юрақдаги гап бўлди. Доно подшоҳлар ўз саройларида бекорга шоирлардан маслаҳат олиб турмаганлар.

Шу куннинг ўзида Покистон элчихонаси ҳамда Ўзбекистон Ёзувчилари Ююшмаси ҳамкорлигида

Иброҳим Ғафуров, Ўткир Ҳошимов, Аҳмаджон Мелибоев, Абдусаид Кўчимов, Хуршид Дўстмуҳаммад, шоира Хосият Бобомуродова, Тоҳир Қаҳҳорлардан иборат ижодкорлар рўйхати тузилиб, уларни ижодий ҳамкорлик сафари билан Покистонга юбориш режаси ҳам тузиб олинди.

Адабиёт ва санъатнинг жонкуяр ҳомийси бўлиб танилган Покистондаги фавқулодда ва Мухтор элчимиз Наим Ғойипов янги ҳамкорлик режалари бўйича ташриф буюрган биз ижодкорларни хурсандчилик билан кутиб олди.

“Бутунпокистон Адабиёт Гилдияси” раиси Фахр Замон жанобларини ўзбекистонлик ҳамкаслари билан таништиаркан, икки мамлакат ўртасида ўзаро адабий-маданий алоқаларни кенгроқ йўлга қўйиш масъулиятини шу хайрли ишлар бўйича ноизир Ҳолмирза Тошмирзаев зиммасига юклади.

Томонлар келишувига биноан, Ансориддин иккимиз “Олтин девор”ни сўзма-сўз таржима қиласидиган бўлдик. Анча аввалроқ таклифимизга биноан ўз оиласи билан меҳмонимиз бўлиб кетган Исломободлик ёзувчи, “Гора паблишарс” нашриёти бошлиғи Тоҳир Аслам Гора Тошкентта келиб, комедияни бадиий таҳрирдан чиқариб беришга розилигини айтди. “Олтин девор”га сўнгги сайқални доктор Юнус Батт берадиган бўлди.

Икки ой деганда комедия қиёмига етиб, таҳрирдан чиқди. Уни аввал китоб ҳолида чоп эттириш зарурати туради. Чунки Ҳиндистон, Покистонда драматик асарни ҳам худди бадиий асарни ўқигандай қизиқиб мутолаа қилишади. Шунга қараб, сахнага ҳам тезроқ йўл топади.

“Олтин девор” Покистонда “Гора паблишарс” нашриётида урду тилида Шавкат Али Шайх жанобларининг “Сўзбоши”си билан босилиб чиқди.

Бу, қўшни мамлакатда шоиримиз Эркин Воҳидов томонидан ўртага ташланган “Мустақил Ўзбекистон адабиёти кунлари” ўтказишга қўйилган илк қадам эди.

Шу муносабат билан режа бўйича биз энди амалга оширадиган ишлар қўйидагича эди:

- 1. “Олтин девор”ни Ал-Ҳамронинг “Комеди Холл”ида саҳналаштириш;**
- 2. Буюк ўзбек шоири Алишер Навоийнинг “Ғазаллар” сайланмасини урду тилида чоп этиш;**
- 3. “Ўзбек ёзувчилари ҳикоялари антологияси” китобини босиш;**
- 4. Ўзбек сатирик ёзувчиси Неъмат Аминовнинг “Темирчидан қолган тиллолар” қиссаси ҳамда ҳажвий ҳикоялар тўпламини покистонлик ҳажвиёт мухлисларига тортиқ этиш;**

Биз томондан тақдим этилган ушбу асарларни урду тилига ўгириб, китоб ҳолига келтириш албатта осон иш эмасди. Айниқса, ҳазрат Навоий ғазалларини илк маротаба диди нозик ғазалгўй покистонликлар кўнглига ёқадиган даражада улар ҳукмига ҳавола этиш анча мушкул вазифа эди, албатта.

Бу масалада Эркин акага мурожаат этгандик, у киши 70- йиллар Дехли университетининг профессори тилшунос ва машҳур адабиётшунос олим

доктор Қамар Раис билан ҳамкорликда ҳиндустонийда “Тошкент армуғони” номли ўзбек шеъриятидан “гулдаста” китобини илк бор Ҳиндистон пойтахти Дехлида чоп этишга тайёргарлик кўриш чоғида Алишер Навоий ижодига “қизиқиш” бўлгани, ўша пайтлар ҳинд-урду яъни ҳиндустоний тилларининг ғоят билимдони сифатида икки мамлакатнинг юксак “Устад” унвонига сазовор бўлган Раҳмонберди Муҳаммаджонов билан Қамар Раис ҳамкорлигида Навоийнинг анчагина ғазаллари таржима қилинганини айтдилар. Бундан биз яхши хабардор эдик. Ҳатто, буюк Навоий томонидан қўлланилган айрим ташбехларга Эркин аканинг ўзлари изоҳ берганлари ҳақида ҳам билардик.

Айни ўша пайтда Қамар соҳиб Тошкентдаги “Ҳинд маданият Маркази”га директор этиб тайинланган эди. “Марказ” билан осонгина алоқа боғланди.

Қамар соҳиб урдучага ўгирилган ғазалларнинг анчагина қисмини асраб-авайлаб, алоҳида папкага жойлаб қўйган экан. Шулар Алишер Навоий қуллиётининг асосини ташкил этадиган бўлди.

Ўзбекистон Ёзувчилар Уюшмасига Покистон элчихонаси томонидан қилинган мурожаатга у ерга яқинда сайланган раҳбар ҳали “янгилиги” учунми, аниқ бир жавоб бўлмади.

ХАЙРЛИ ИШ ЖОНКУЯРЛАРИ

Ансориддин Иброҳимов иккевимизни Исломободдаги элчихонамиз масъул котиби ҳамда ўзаро маданий алоқалар бўйича нозир Тошмирза Холмирзаев кутарди.

Ниҳоят, айтилган вақтда етиб келдик. Эртасига ёқ Покистон маданият ишлари Вазири Кишвар Наҳид хоним ҳамда Фаҳр Замон жаноблари билан учрашиб, амалга ошириладиган ижодий режаларни келишиб олдик.

Кишвар хоним ҳар бир сўзимизни қоғозга тушириб олаётган, ўзининг масъул котиби қирқ ёшлар чамасидаги кишига буйруқнамо гап қилди:

– Рамазан соҳиб, меҳмонларни кутдириб қўй-маслигимиз керак. Бош Вазирга тақдим этиш учун бажариладиган барча ишларни бандма-банд ёзиб, менга тавсиянома қоғози тайёрланг.

– Хўп бўлади, хоним!

Вазирлик биносидан чиқар эканмиз, Тошмирза aka бизларга қараб деди:

– Шавкат Али Шайх соҳибининг маслаҳати билан яхши тайёргарлик кўриб келган экансизлар. Хонимга ёқди. Энди иш жўнашиб кетади. Бу аёл бир сўзли. Бошлиган ишини охирига етказмасдан қўймайди.

Панҷоб Покистон Ислом республикасининг ўз ҳукумати, ўз парлументи, ўз бошқарув тизимла-

ри бўлган тўрт штатнинг энг йириги ҳисобланади. Бутун мамлакат аҳолисининг қарийб 70 фоизига яқини, яъни ўша пайтдаги Россия аҳолисига тенг келадиган қисми шу ерда истиқомат қилади. Иқтисодиётнинг асосий негизи бўлган оғир ҳамда енгил саноат, қишлоқ хўжалиги бу ерда ўта тараққий этган.

Қадимий Лаҳор штатнинг марказ шаҳри ҳисобланаби, Покистоннинг санъат ва маданият пойтахти деб ҳам юритилади. Кўпдан-кўп Халқаро анжуман ва маданият фестиваллари, марказий ҳукуматнинг асосий тадбирлари шу ерда ўтказилади.

Бизларни Лаҳорда Покистоннинг машҳур адабиёт номаёндаларидан икки бор Ўзбекистонда меҳмонимиз бўлишган Ота ул Ҳақ Қосимий, Амжат Ислом Амжат, доктор Юнус Батт, Насим Чоудхурилар кутишарди.

Тоҳир Аслам Горанинг “Тойото” машинасида йўлга тушдик.

Ҳайратланарлisisи, бизнинг Лаҳорга қиладиган сафаримиз олдидан шу ерда чоп этилувчи йирик адабий журналларидан бўлган “Ружҳанат” ўз саҳифаларида ўзбек ёзувчиларининг покистонлик адаблар билан амалга ошироқчи бўлаётган ҳамкорлик режалари ҳақида “Тошкентдаги Покистон элчихонасидан олинган хабарларга асосланиб” мақола эълон қилган, ҳатто доктор Батт соҳибнинг “Олтин девор” китобига тақризи ҳам чиқкан экан.

Ҳамкасларимизнинг кайфиятларидан шу нарса маълум бўлдики, бизни ўйга толдириб келаёт-

ган рўйхатдаги китоблар таржимаси масаласида ҳеч қандай қийинчиллик туғилмайди. Ўзбек тилидағи Абдулла Қаҳҳордан тортиб Носир Фозиловгача бўлган ўн беш ёзувчи қаламига мансуб асарларни ўқиб, мазмунини сўзма-сўз айтиб турилса, ёки оҳанрабо тамасига тушириб берилса, бас.

Бундан ташқари, ўзбекчани дурустгина биладиган исломободлик ёзувчи, шоир ва публицист Изҳор ул-Ҳақ бир нечта “Ўзбек ҳикоялари”ни урдучага ўгириб, газета-журналларда чоп эттирганидан Ансориддин икковимиз хабардор эдик.

Изҳор соҳибни Тоҳир Аслам “топиб берадиган” бўлди.

Яна, Юнус Батт (Неъмат Аминовдан эшитган бўлса керак), йил охирида “Олтин девор” муаллифининг 60 ёшга тўлиши муносибати билан комедияни ўша санага бағишлаб саҳналаштириш кераклиги ҳақида гапириб қолди, Бу “янгилик” ни Кишвар Наҳид хонимга айтган экан, жуда яхши фикр деб, қўллаб-қувватлабди.

Хуллас, ишларимиз бароридан келиб борарди.

Исломободга қайтиб, яна бир хушхабар устидан чиқдик; Кишвар хонимнинг Тошкентда тузилган Ўзбекистон-Покистон адабий-маданий алоқаларга оид Шартномага кўра амалга оширилмоқчи бўлаётган тадбирлар ҳақидаги “Маълумотнома”си Бош Вазир Навоз Шарифга маъқул тушиб, ўзбек адабиёти намуналарини китоб ҳолида чиқариш, “Олтин девор”ни саҳналаштириш билан боғлиқ барча сарф-харажатлар ҳукумат маданият Вазирлиги томонидан таъминлансин дея, буйруқ берибди.

Исломободдан Тошкентга бир неча бор келиб-кетишимизга тўғри келди. Ҳар келганимизда таржима матнларини ҳижжалаб солиштирамиз, кимларданdir маслаҳатлар сўраймиз... Айниқса, ҳазрат Навоий китоблари хусусида Азизхон ака (Қаюмов), Суюма опа (Фаниева)ларнинг эшикларини қоқавериб, безор қилиб юбордик. Эркин аканинг ҳам анча-мунча вақтларини олдик.

Ниҳоят, “Куллиёт” қайта-қайта кўрилиб, тайёр ҳолга келди.

Навбатдаги китобларни ҳам саҳифама-саҳифа кўздан кечириб, ноширлар қўлига топширганмиз. Бу томондан энди кўнглимиз тинч.

ХАЙРЛИ ИШГА ТҮСИҚ

Энди олдимизда “Олтин девор”ни саҳналаштириш билан боғлиқ асосий масала турарди.

Келишувга кўра, асарни саҳнага қўядиган бош режиссёр Ўзбекистон томонидан бўлиб, бу масъул вазифани машҳур режиссёр Баҳодир Йўлдошев ўз зиммасига олганди.

Бизлар учун юртга бориб келиш Қамчиқ довонидан ошиб, Фарғона Водийсига келиб-кетишдай оддийгина иш бўлиб қолганди. Ўзи, аввалги ёзгандаримдан биласиз, самолётда учишдан ўлгудай қўрқардим. Бу ёғига “Бир бошга – бир ўлим” дея таваккалчилик қилишдан бошқа илож йўқ эди.

Яна “девор ошиб”, Тошкентга келдик.

Лекин, “Девор”нинг бу томонида ташкилий масала бобида омадимиз унчалик бароридан кела-вермади. Энг аввало, Баҳодир аканинг оталари қаттиқ бетоб ётганликлари ҳақида хабарни эшишиб, Каттақўргонга бордик, кўнгил сўрадик.

Ниҳоят, машҳур режиссёр бизга “хайрли тадбир кечикмасин, бу ишни Мақсад ака Юнусов уddyalай олади. Омонлик бўлиб турса, мен ҳам “ёрдам”га етиб борарман” дея, маслаҳат берди.

Биздаги маҳкамаларда ўз хизмат вазифасига худди шўро давридан қолганидек, ўта эҳтиёткорлик, тўғрироғи, хадик билан қарайдиганлар анча-мунча экан. Маданият ишлари Вазирлигига стол қучоқлаб

ўтирган катта-кичик амалдорлар кимлардир нимадир деганми, бизларга ишончсизроқ назари билан қараётганлари шундоқ сезилиб турарди. Ансориддин икковимизда-ку, “қофоз” бор эди. Номи таникли режиссёр Мақсуд ака Юнусовга келганды, шунчаки түрт-беш қатордан иборат “машхур режиссёр хайрли ишни бажариб келиш учун кетяпти” деган мазмунда “йўлланма қофози” ёзиб беришдан бош тортишиди.

Бундан оқсоқолнинг фифонлари фалакка чиқиб:

– Роса қулоққа шилпилдоқ осадиганларга кунимиз қопди-ку! Энди бу ёғи “ўзи келар ёр-ёр, ўзи кетар ёр-ёр” бўларкан-да! – дедилар-у, беихтиёр ўқинч оҳангода, – узоққа чўзилган сўққабошлиқдан сўнг қўёнлик келинойиларингга уйланиб, энди бағримга шамол тегай деганда, шуни ҳам кўп кўриб, “командировкасиз” қаёқларга олиб кетяпсанлар! – деб, бўталоқдай бўзлаб қолдилар.

Бир пайтлар телевидениеда бу акахон билан бирга ишлашганмиз, шунинг учун унча-мунча ҳазил гапларни айтишга ҳаддим сиғарди.

– Етмиш ёшни қоралаётган Сиздай отахон келинойини ёстиқ қиласизми? – дегандим, гурунгдошимиз индамай қолдилар.

Хуллас, ўша пайтлар Ўзбекистон Республикаси Олий Мажлисининг Халқаро ишлар ва парламентлараро алоқалар қўмитаси раиси мақомидаги юқори лавозимни эгаллаб турган Эркин Воҳидовдай одамга мустақиллик даврида чет элда биринчи ма ротаба намойиш этишга тайёрланаётган “Олтин девор”нинг бosh режиссёри ўзгарганлиги ҳақида маълумот бердиг-у, бир ойдан зиёдга чўзилган

сансоларликлар хусусида ҳеч нарса гапирмадик. У кишини безовта қилгимиз келмади.

Сафар олдидан бизни ҳаммасидан ўтиб тушадиган яна бир ғавғо кутиб турганидан бехабар эдик. Тўғрироғи, уни ўз бошимизга ўзимиз орттириб олдик.

Покистонда топилиши қийин бўлган тўрқовоғу, милиция полковниги кийими, мисгарлик асбоб-анжомларидан тортиб, капири қозон-товоқ, эски самовар, калиш-маҳсиларни қўшиб ҳисоблаганда “театр реквизитлари” бир аравадан зиёдроқ чиқар, худди Қашқадарёдаги машҳур Чияли бозорига қараб йўлга чиққан боққолларнинг ашқол-дашқолига ҳам ўхшаб кетарди. Буларнинг ҳаммаси Тошкентдаги Покистон элчихонасининг бир нечта ходимлари томонидан ҳеч қандай монеъликсиз саломёт юхонасига жойланди.

Элчихонада масъуллик вазифасини бажарувчи Офтоб соҳиб ишларимизда омадлар ҳамда оқ йўл тилаб биз билан хайрлашаркан, бироз афсус оҳангиди:

– Бу ердаги Ёзувчилар Уюшмасидагилар покистонлик ҳамкаслари билан ҳамкорлик қилишса бўларди. Ҳеч қандай жавоб ололмадик. Олдин алоқаларимиз яхши бошланган эди, – деди.

Мен:

– Ҳозир бизнинг “Гилдия”да раҳбар ўзгарган. У киши ҳам обрўли ижодкор. Ҳаммаси яхши бўлиб кетади, – дея унинг кўнглини кўтарган бўлдим.

Нима сабабдандир “Тошкент-Исломобод” рейси уч соатга кечиктирилиши эълон қилинди.

Бекорчидан худо безор деганларидек, Ансо-риддин иккимизнинг ҳаёлимизга бир фикр келиб

қолди. Буни Мақсуд акахон ҳам маъқулладилар. Имкониятдан фойдаланиб, Уюшма раҳбарини янги лавозим билан табриклаб, шу баҳонада амалга оширилаётган хайрли ишлардан хабардор этиб, оқ фотиҳа олиш мақсадида уч киши таксиға ўтиридик.

Ҳар тугул янги раҳбар ўз хонасида экан.

Мен бу одам билан қарийб ўн бир йил девордармиён қўшни бўлиб яшаб, феъл-атворини яхши билардим. Баъзи ижодкорларга хос кайфияти тез ўзгурувчан эди. Шунинг учун “ичкари”даги вазиятга қараб, шерикларимни чақирадиган бўлдим. Улар котиба қиз олдида қолишли.

Икки ёнбошию орқа томони бўртма суюнчиқли қилиб, қора чармдан ясалган айланма шоҳона курсида виқор билан ўтирган “қўшним”га аввал салом бериб, раислик мартабаси билан табрикламоқа оғиз очгандим, қўлини мен томон нуқиб, гапиришга қўймади.

— Яхшиям ўз оёғинг билан кириб келдинг. Йўқса, милиция қидирув эълон қиласарди. Аввало, биздан беркитуқча маданият Вазирлигидан “Командировка” ёзиб беришни талаб қилишга нима ҳаққинг бор? Сенлар ўзбошимчалик билан хоҳлаган чет мамлакатга бориб, ваъз айтадиган, у томонларда уюштириладиган қандайдир шубҳали йигинларда адабиётимиз номидан гапирадиган, ҳатто асарларимизни хуфия йўллар билан яширинча сотадиган бўлиб кетгансанлар. Билиб қўй, энди мени бу ерга сенга ўхшаганларнинг “фаолияти”га чек қўйиш учун “хў-ў... “юқори”дан юборишган. Уюшмадан, шахсан менинг рухсатимсиз адабиётга аралашишга ҳақларинг йўқ. Мустақил Ўзбекистон хоҳлаган

ишни қилаверадиган, кириб-чиқиб кетаверадиган бедарвоза подахона эмас. Қулоғингга яхшилаб қуиб ол – “қора рўйхат”ни мана шу топда, сендан бошлайман! – деди-да, телефон гўшагини кўтарди, – Барно, менга зудлик билан аэропорт бошлиғи Рўзматовни ула!

Турган жойимда нима қилишимни билмай, қотиб қолдим. Хаёлимдан чақиндай бўлиб “Наҳотки, ишларимиз чаппасига айланиб кетса”, деган фикр ўтиб турганди, айни шу пайт қабулхона эшиги қия очилиб, котиба Барнонинг ярим гавдаси кўринди:

– Аэропорт бошлиғи чет элда экан, эртага кела-дилар дейишди, – деб қолди.

Ичимда: “Тилингга шакар, Барно” деб, қўйдимда, вужудимда қандайдир енгиллик ҳис этиб, ўзимни ташқарига урдим.

Шерикларим қия эшик ортидаги дағдағадан но-хушлик дарагини анлагандай, ҳовли рўясида туришган экан.

– Тинчликми? – дея мени саволга тутди Мақсуд aka қўшқават кўзойнак остидан кўзларини бежо тикиб.

– Тинчлик. Шунчайин ғавғо, – дедим ўзимни бе-парво тутишга ҳаракат қилиб.

Йўловчи машинада аэропорт томон кетиб борарканмиз, Мақсуд aka ўзларини безовта қилаётган яна бир гапни қайтардилар;

– Командировкасиз кетяпмиз, у томонларда ҳам бошимизни қотиришмасайди...

– Қайси томонларни айтаяпсиз, оқсоқол? – дедим.

– Ўша, Покистонни-да!

– Сизни у томонларда ҳеч ким безовта қилмай-

ди, қилолмайди ҳам. Чунки, Ўзбекистондан продюсер Мақсуд Юнус жаноблари келармиш деб, мамлакат маданият ишлари Вазири Кишвар хоним, кўзлари тўрт бўлиб кутяпти!

Бу гапдан ҳамроҳимизнинг кекса кўнгиллари жўш уриб кетгандай бўлди.

— Оҳ, оҳ, номнинг гўзаллигини қаранг! Шунга яраша... хўп кетворганми...

Ансориддин:

— Унданам ўтади, — деди-да, “огоҳлантириб” ҳам қўйди, — лекин муомалани эҳтиёт бўлиб қиласиз, Покистон аёллари билан ҳазиллашиб бўлмайди.

Ўртада енгил кулгу кўтарилиб, дилхиралик нари кетгандай бўлди.

“ОЛТИН ДЕВОР” ЖАМОАСИ

Исломобод – Ҳимолай тоғлари этагида бунёд этилган замонавий, шунингдек дунёдаги пойтахт шаҳарлар ичидаги энг навқирони ҳисобланади. Лойиҳа тарҳини Европанинг машҳур мутахассислари чизишган. У ерда асосан марказий давлат маҳкамалари, вазирликлар, кўплаб маъмурӣ бинолар жойлашган. Аҳолисининг асосий қисмини давлат муассасалари хизматчилари ташкил этиб, 500 000 дан ошмайди.

Шу шаҳарда тўрт кунча бўлиб, “Олтин девор”ни саҳналаштириш билан боғлиқ амалга ошириладиган барча ишларни режалаштириб олдик. Бизнингча “Ташкилий қўмита”га “Олтин девор” жамоаси” деган расмий ном берилди. Демак, шу атама асосида фаолият юритамиз.

Асосий “иш жойимиз” Лаҳор шаҳрига жўнашимиздан олдин Холмирза aka бизни ўзлари истиқомат қилиб турадиган апартамент – уйга меҳмонга таклиф этдилар. Ва... дастурхон ёзилган кенг хонадаги ойнаванд шкаф ичига қўйилган китоб муқоваси устидан нурли нигоҳини тикиб турган Навоий бобомизнинг чеҳрасига кўзимиз тушди-ю, ҳайрат билан хонадон соҳибиға қарадик.

– Наҳотки?..

Тошмирза aka:

– Ҳа, бу ерда “ўйчи ўйлагунча, таваккалчи ишини бажаради” деган ақидага қаттиқ риоя қилишади, –

деди-да, қўшиб қўйди, – Китоб сотувга чиқиб, “Файз Аҳмад Файз роуд” – шоҳкӯчасидаги дўконлардан бирига келган экан, дарагини эшитиб, иккита сотиб олгандим. Биттаси элчихонада.

– Эртага биринчи навбатда ўша китоб дўконига борамиз. Қолганмикан?

– Бир нарса дейиш қийин. Покистонда саводхонлик жуда юқори даражада бўлмаса ҳам, кўпчилик китоб ўқиуди. Бу ерда қолмаган бўлса, китоблар кони – Лаҳорга кетяпсизлар-ку! – деди мезбонимиз.

Нонуштадан сўнг, эрталаб Исломободнинг марказий шоҳкӯчаларидан бири “Файз Аҳмад Файз роуд”га бориб, Навоий “Ғазаллар” куллиёти сотилиб кетган, деган жавобни эшитдик.

Ўша куни тушдан сўнг “Олтин девор” жамоаси га хизмат кўрсатиш учун Маданият Вазирлиги томонидан ажратилган, барча қулайликларга эга япон автобусида уч юз чақиримча наридаги Лаҳор шаҳри томон йўлга тушдик.

Ал-Ҳамрода яқин боғ-роғли “Жимхона” қароргоҳидан ажратилган алоҳида хосхоналарга жойлашдик.

Бизларни пешвоз чиқиб кутиб олган, бир неча кун аввалроқ Исломободдан юборилган вазирлик вакили Сажжод Ҳайдар комедия қаҳрамонларининг “урду”ча ролига танлов-конкурсида қатнашиш учун ҳозирлик кўраётган артистларнинг деярли барчаси шу Лаҳор шаҳридан эканлигини бош “имтиҳончи” акамизга айтаркан, ҳаммаларида “Олтин девор” китобидан борлиги, шунингдек комедиянинг Тошкентдан юборилган (Ҳамза номли ўзбек Давлат

академик театри артистлари ижро этишган) телевидео тасвири туширилган ўзбекча кассета артистларга бир неча маротаба қўсатилганлигини алоҳида таъкидлаб қўйди.

Ролларни ижро этишга давогарлар кўпчиликни ташкил этар, биргина Мўмин чол образига “ишқивоз”лар сони саккизтадан ошарди.

Танловни ўтказиш жойи қилиб, Покистон ва чет элларда мўйқалам устаси сифатида номи машхур бўлган, ананавий тасвирий санъат ҳамда “модерн” услубида кўплаб шоҳ асарлар яратган Шокир Али мемориал уй музейининг катта зали белгиланган экан. (Покистонда маданий-маърифий тадбирлар бундай кутлуғ даргоҳларда ўтказиш анъана тусини олган.) Бориб кўрдик, рассомнинг хилмаяхил “жанр”да чизилган суратлар галереяси бизда катта таассурот қолдирди. Айниқса, залнинг кенг ва ёруғлиги, бунинг устига, сахнаси ҳам борлиги Мақсуд акага ёқиб тушди.

“Олтин девор” жамоаси учун ажратилган ҳар куннинг ҳар соати ҳисобли эди. “Продюсер соҳиб” бунга қатъий риоя қилишни бошқалар қатори “ишбоши” Сажжод Ҳайдар соҳибдан ҳам талаб қиласарди.

Шунга қарамай, мезбонларимиз, айниқса Маҳмуд Али Бҳаттий бошлиқ “Покистон – Ўзбекистон дўстлик жамияти” Лаҳор бўлими фаоллари ҳафтанинг дам олиш куни – жумани турли учрашувлар, матбуот, телерадио мухбирлари билан сұхбат, прессконференциялар ўтказиш куни деб белгилашганди.

Комедия учун роллар танловини бошлаш ара-фасида мамлакатдаги энг йирик матбуот органи “Жанг” газетаси таҳририятига таклиф этишди. Бош муҳаррир Ҳасан Ризвий жаноблари ва ижодий ходимлар билан мустақил Ўзбекистоннинг келажаги ва ҳозирги адабий, маданий жараён ҳақида қизиқарли давра сұхбати бўлди.

Марказий Покистон телевидениеси “Машҳур ўзбек шоири “Эркин Воҳид номини драматург сифатида янада сарбаланд кўтарган” “Олтин девор” комедиясини илк бор Покистон театр ишқибозлари дикқатига ҳавола этиш учун тайёргарлик кетаётган” лиги ҳақида биз билан сұхбат мақомида маҳсус кўрсатув намойиш этди.

Шокир Али “Мемориал уй-музейи”да бошланган “танлов” ўн беш кунга чўзилди. Биттагина “Мўмин чол”ни покистонлик саккизта машҳур комик артист орасидан “топиб олиш” учун Мақсаду акамиз эртадан кечгача икки кун вақт сарфладилар.

Хуллас, энг сўнгги натижа шундай бўлди; МЎМИН – таниқли комик актёр Аслам Рао; АБДУСАЛОМ – актёр ҳамда машҳур театр режиссёри Анжум Аёз; ҲУРИНОСО – машҳур театр ва кино актрисаси, шунингдек кўплаб китоблар муаллифи – ҳикоянавис адига Убайдад Сайид; ОҚСОҚОЛ – кекса устоз актёр Назир Ҳусайн; ҚИЛИЧБЕК – Нурул Ҳасан Малик; САИДМАЛИК – Имтиёз Аҳмад; НОДИР – Аржум Шаҳзод Аҳмад; ДИЛОРОМ – Шамоила Канвал; МАТЛАБ – Салмон Бҳатти каби иқтидорли актёрлар ҳамда ШАФОАТ, ЗУҲРА, ДОКТОР ролларига “Олтин девор” орқали саҳнага илк маротаба “йўлланма” оладиган йирик театр

санъати коллежи талабалари Тоҳира Имом, Биндия Сайид, Нуъмон Али Саидлар имтиҳондан мубаффақиятли ўтдилар.

Икки ҳафтага яқин давом этган “читка”дан сўнг сўзлар тўла манода ёд бўлди. Яъни, асар қиёмига етди.

Ана шундан кейин “Олтин девор”нинг асосий машқлари аввалдан тузилган режа бўйича АлҲамро мажмуасининг “Комеди Холл” саҳнасига кўчирилди.

Ҳар бир кўриниш манзарапари электр ёритгич ва техник воситалар ёрдамида “жонли” ҳаракат билан билан синовдан ўтказилди.

Катта саҳнанинг салобати босдими, айниқса ёш актёрлар ҳаяжонланишар, ўзларини эркин тутишмас, ҳаракатлари суст, сунъийроқ чиқарди. Бу Мақсад аканинг асабини бузар, айниқса “Мўмин чол” (Аслам Рао) “ўзига хос” образ яратиш ўрнига машҳур актёр Фани Аъзамовга тақлид қилаётгани учун у кишидан кўп дакки эшитарди. Бошқалар ҳам “қуруқ” қолишмасди.

Шу орада Кишвар хоним Исломободдан шахсан ўзи бир неча марта учеб келиб, бизлардан хабар олиб кетди. Шарт-шароитимиз билан қизиқди. Машқни кузатиб, Мақсад акамизни “Бҳайжан-бҳайжан” (“акажон-акажон”) дея кўнгилларини кўтарди. (Уларни илк бор таништирганимизнинг ўзидаёқ хоним катта акасининг оти ҳам Мақсад эканлигини айтиб, “продюсер соҳиб” билан “ака-сингил”лигига ишора қилган, бу оқсоқолимизга хўп ёкиб, тушганди.)

Мана шуларни ўйлаб, кўз ўнгимда ўзимизнинг вазирлиқда ўтирган, ҳатто ўрнидан туриб, алик

олиб, икки оғиз илиқ сўз айтишга ҳам фаҳми етмайдиган (шўроча “тарбия”нинг касри бўлса керак) амалдорвачча танбаллар гавдаланиб кетади. Уюшма раисининг кимларгадир орқа қилиб, улар номини айтиб, бақирганлари қулогим остида жаранглаб кетгандай бўлади. Беихтиёр, “Мустақилликни қўлга киритдик. Бироқ, ҳеч нарсанинг ташвишини чекмай, фақат ўзини, ўз тинчини ўйлайдиган бундай дунёбехарлар билан бирон рўшноликка эришиб бўлармикан?” дея ўзимни ўзим саволга тураман. Жавоб тополмай, қийналаман.

ЖИДДИЙ СИНОВ КУНЛАРИ

Барибир Мақсуд акамизнинг кайфиятлари баҳор ҳаводай ўзгарувчан эди. Бир – ундоқ, бир – бундоқ! Шунга қарамай, комедия кундан-кун сайқал топиб бораётганини тез-тез актёрларга қараб, “шабаш-шабаш” (яхши-яхши) деб қўйишларидан билиб олса бўларди.

Кейинги пайтларда режиссёrimiz жаҳлларини чиқараётган сабаблардан бири Нуъмон Али ўзига бириқтирилган кичкина, бироқ анча аҳамиятли, “Олтин девор”га ўзига хос яна бир кўтарингки руҳ бағишлайдиган “доктор” ролини эплай олмаётгани эди.

– Фирт хом, лапашангсан, – деди акахон қўлларини Нуъмон Алига бигиз қилиб. Сўнг Сажжод Ҳайдарга ўгирилди:

– Бу ўзи, гуруҳимизга, сизларнингча “жамоа”-мизга қандай кириб қолди, билмайман! – Кейин елка қисиб, худди айбдор бизлардай Ансориддин иккимизга қараб, дашномли оҳангда, – таржима қилсаларинг-чи, – дедилар.

Мен у кишини бироз шаштидан тушириб қўймоқчи бўлдим:

– Ўзингиз тўрт киши ичидан танлаб олганингиз шу бўлди. Энди бирон гап айтинг – таржима қилайлик.

– Ҳа, гап шу: эплолмаяптими – эплолмаяпти! Лапашангми – лапашанг! Бошқасига ўзgartирмасак,

спектакл “провал” бўлади, шармандамиз чиқади! Айниқса, Эркинжон келадиган бўлса, у кишининг олди-да!

– Максуд ака, – кейинги пайтларда “жамоа”миз ишбошиси Сажжод соҳиб ҳам унча-мунча “ўзбекчалаб” гапиришга ўтганди, – Сизнинг ҳукмингиз – ҳукм! Бу ролга мос тушадиган тажрибали артистлар жуда кўп бу ерда. Топамиз.

Ўттиз ёшлардаги кўринишидан беозоргина Нуъмон Алига қараб ачиниб кетдим. Энди бирдан уни “жамоа”дан чиқариб юбориш...

– Менинг бир фикрим бор, – дедим, аввал Сажжод Ҳайдарга, сўнг Мақсуд акага қараб, – комедия тақдимотига бир ярим ҳафта вақт қоляпти. Бу Нуъмон жининг лапашанглиги ҳам ўзига ярашган “фазилат”. Ахир, жиннихонанинг дўхтири-ку! Бунинг устига, анча қадрдон бўлиб қолдик, йўлинни топиб, шу ролни ўйнашга “мажбур” қилиш керак.

Бу сўзимни дарровгина Ансориддин ҳам маъқуллади.

Мақсуд ака бошни қашиб, қўшқаватли кўзойнакни бурун учидан юқорироқ сурисиб кўйдилар-да, худди рақибини мўлжалга олиб, ҳамлага шайланаётган боксёрдай “доктор”ни саҳна ўртасидаги ёзуғлик катта галам устига чорладилар. Нуъмон Али қўрқаписа у кишининг рўпарасига келди, буюринг, хузур, дегандай мўлтираб тикилди.

– Ҳой, менга қара! Мана шу туришингда бироз “жон” бор, – дедилар акахон сал юмшагандай, сўнг унинг елкасига қўл қўйиб, тушунтира кетдилар, – Энди яхшилаб эшиш; сан дўхтирсан! Анқовларга қарайвериб, ўзинг ҳам “мундайроқ” бўп қолгансан,

— манглайга бармоқни “бигиз” қилиб, тираб кўрсатдилар-да, сўзда давом этдилар, — Тўғрироғи, жиннисан! Покистонда ҳам жиннилар бор бўлса керак! Кўргандирсан? Ана ўшаларнинг ўлгудай қўрқоқ, довдирроғисан ҳам! Перевод қилинг, Ансо-риддин...

— Энди, бу ёғига қулоқ сол; Мўминга укол қилдинг-у, унинг бақириб юборганидан ўзинг қўрқиб кетиб, юрагинг ёмон бўлиб қолди, умбалоқ ошиб тушасан. Ҳеч бўлмаса, мана шу ҳолатни қилиб бер, ўлиб қолмайсан. Бирон жойинг лат еса, хотининг бор-а, унинг олдида ўзим жавоб бераман! Тушунтиринг, Сизам! Ёнини олгансиз!

— Хотинини ўртага қўймай, яхшилаб тушунтираман, — дедим.

Нуъмон Али ҳам бу, продюсер соҳибнинг охирги огоҳлантириши, агар айтганини қиёмига етказиз бажаролмаса, иш чатоқ бўлишини сезиб қолди шекилли, қўлидаги баҳайбат шприц билан Мўмин чолга укол қилганидан сўнг оҳ-воҳу қичқириқдан “бехуш” бўлиб, шунақанги йиқилиб бердики, кўзойнаги икки газ нарига учиб кетди. Микрофонлар ҳам ишлаб турган эканми, “гу-уп” этган овоздан қариyb минг кишига мўлжалланган томоша зали ларзага келгандай бўлди.

Акахон чопиб келиб, кўшқават кўзойнакни манглайга тираб, Нуъмон Али устига энгашди:

— Ҳой, менга қара, бирон еринг лат емадими! Э, хайрият-ей... Яна қайтарамиз. Энди чашмангни тақмай тур...

Шундай қилиб, “йиқилиш” бўйича Нуъмон Алининг кундан-кун маҳорати ошиб бораверди.

ОЙБЕКНИ КҮРГАН КИШИ

Бир куни Нуъмон Али ўз ролини қойиллатиб удаалаётган пайтда томоша залига қўлида асо тутганий қария кириб келди-да, олдинги қатор ўриндиқлардан жой олди. Актёрлар бирдан жимиб, худди Хизирга кўзлари тушгандай, ҳайрат билан зал томон қараб қолишди. Нуъмон Али “машқ”ни тўхтатиб, ўзларига хос эҳтиром рамзи сифатида ёзилган кафтларини пешонаси узра ҳаволатганича таъзим бажо келтириб қўйди. Биз ҳам Ансориддин билан шундок рўпарамизда ўтирган таниш сиймога кўзимиз тушиб, бироз ҳаяжонландик.

– Бу одам ким?! – дея норозироқ оҳангда биздан сўрадилар режиссёrimиз “нега халақит бериб ўтирибди” дегандай.

Аввал Ансориддин, унга эргашиб бошқа актёрлар сахнадан тушиб, қария атрофини ўраб олдилар.

Мен оқсоқолимизни сал четроққа олиб, тушунтириш бердим.

– Бу зот ҳозирги замон Ҳинд-Пок урду адабиётининг тирик классига деб тан олинган, икки мамлакатда номи ардокли ёзувчи Аҳмад Нодим Қосимий бўладилар. Сиз ҳаёти ва ижоди ҳақида ҳужжатли филъм яратган Ойбек домла 1949 йили шу мамлакатга қилган сафари пайтида “Нодим Қосимиининг уйида меҳмони бўлдим”, деб “Покистон кундалиги”да ёзиб қолдирган.

Мақсуд ака қанчалик “инжик” табиат одам бўлмасин, барибир ўта маърифатли эди. Бобур каби кўпдан-кўп сиймолар ҳақида бадиий-хужжатли филмлар аратган-ку, ахир.

Ҳозир ҳам кўзлари чарақлаб кетгандай бўлди:

– Қизиқарли факт-ку! Табаррук одам экан, қўлларини олиб қўяйлик.

Машҳур адиднинг ташрифи ҳақида хабар эшитган театр маъмурларидан икки-уч киши дарров томоша залига кириб келдилар. Чўзинчоқ столга дастурхон ёзилиб, салқин ичимликлар қўйилди. Қисқа давра гурунгига жаноб Қосимий Ўзбекистоннинг машҳур шоири қаламига мансуб комедия саҳналаштирилаётганлиги ҳақида хабарни телевизор орқали эшитиб, бу ерга қадам ранжида этганлиги сабабини қўйидагича изоҳлади: бундан салкам эллиқ йилча олдин машҳур шоир ва ёзувчи Ойбек билан Карабидаги ҳовлимда учрашиб, мана шундай кунлар келишига умид боғлагандик. Шунга етказганига шукур...

Адид машқ “саҳнаси”дан бир “парча”сини қизиқиб кўрди. Сўнг Мақсуд акамизга муваффақиятлар ти-лаб хайрлашаркан, Сажжод Ҳайдарга:

– “Жамоа”нгизнинг барча аъзоларини ўғлим ва бир неча қаламкаш дўстлар билан “Ризқ-рўз” ресторанида дастурхон ёзиб, кутамиз. Кеч соат еттида! “Индиан тайм” бўлмасин! – дёя, таъкидлаб қўйди.

Одатдагидек, репитициядан кейин бироз мизғиб дам олдик.

Ташқаридан сигнал овози келди. Демак, пешонасида “Олтин девор” жамоаси” деган ёзуви бор

улови билан ҳар доим хизматимизга шай ҳайдовчи қувноқ йигит Холик “туринглар, кетдик” деяпти.

Елкага сочиқни ташлаб, ярим яланғоч бўлиб олган акахон менинг устимга келиб, нолиган овозда:

– Шу зиёфатлари ҳам жонга тегди. Буларнинг овқат ейиш-у едиришдан бошқа ишлари йўқми, дейман! – дедилар.

– Бизни ҳазилакам одам таклиф қилмаяпти! Ойбекни меҳмон қилган киши-я!

Акахонимизнинг бироз шаштлари пасайди:

– Тўғри гапирасиз, боя айтганимдек, ҳақиқатан табаррук инсон. Ёши нечада? Ҳаракатчанлигига қараганда...

– Икки йилча олдин “Ойбек изидан” Покистон бўйлаб йўлга тушиб, учрашганимда “тўқсон бешни қоралаяпман”, дегандилар.

– Бу томондан ҳам табаррук. Энди... қуруқ бормасак дейман; битта зарчопон бор, дўппи, белбоғи билан. Чамадонда турибди.

– Қўёнда кийдирилган куёвчопонмасми?

– Йўғ-е, олтмиш ёшимда “Телефильм”чилар елкамга ташлашган.

– Хуллас, бу фикрингиз дохиёна, устоз. Мен ўтган сафар оддийроғини кийдиригандим. Энди зарчопонни “Олтин девор” жамоаси” номидан деб, ўзингиз кийдирасиз.

– Қандай бўларкин?

– Зўр бўлади, ишонаверинг.

Бизларни хашаматли ресторон эшиги қаршисида Қосимий соҳиб ёшлари анча ўтиб қолган, лекин хушрўйгина, бардам, Фотима-Зухралардай бир-

бирига ўхшаш қизлари, ўғил-набиралари бўлса ке- рак, уч-тўрт ўрта яшар кишилар билан кутиб олиб, ичкаридаги алоҳида хонага бошлади. Тўкин да- стурхон атрофидан Амжат Ислом Амжат (негадир у кишининг доимий ҳамроҳи – Отаул Ҳақ Қосимий кўринмасди), исломободлик Изҳор ул Ҳақ, доктор Юнус Батт, Тоҳир Аслам Гора яна бир неча бу- гунги мезбон оқсоқол адигнинг яқин шогирдлари бўлмиш ижодкорлар жой олишганди.

Дарвоқе, ҳозирги замон Покистон адабиёти- нинг энг кўзга кўринган, қўшчинор намоёндалари- дан ҳисобланувчи Отаул Ҳақ Қосимий, Амжад Ис- лом Амжадлар тенгдош, бир-биридан ажралмас қадрдон оғайнилар ҳам! Келбату барвасталиқда- ку, ойна рўпарасида туриб, андоза олишганми, дейсиз. Лекин улар ижод бобида бутунлай “теска- ри” қалам тебратишади.

Отаул Ҳақ Қосимий машҳур ёзувчи, публицист, драматург бўлса, Амжад Ислом Амжад донг та- ратган шоир! Лекин улар орасида катта баҳсларга сабаб бўлиб, ҳеч тугамайдиган яна бир муаммо бор. Бу БОШ масаласи бўлиб, Юнус Баттга анча- мунча илҳом бахш этиб туради. Гўё мамлакатнинг икки зўр ижодкори қайсиdir соя-салқин гўшада дам олиб ётганда, тиниб-тинмас чумолилар учун байрам бўлармиш. Яъни Ота ул Ҳақ жанобнинг шип- шийдам бошларида сирпанчик учиб, шоиру замоннинг қалин соchlари орасидаги соя-салқинда ҳордиқ чиқаришармиш...

Бу хилдаги гап илк маротаба устоз Саид Ах- маднинг Дўрмондаги дала-ҳовлисида покистонлик уч ҳазилкаш “ҳамкасб” – Отаул Ҳақ Қосимий, Ан-

жад Ислом, Юнус Баттларнинг ташрифи муносабати билан масаллиғи Неъмат Аминовдан, қозонтовоқ ҳамда “хизмати” хонадон соҳибидан бўлиб, дамланган ош ҳисобига ёзилган дастурхон устида бўлиб ўтганди.

Амжад соҳиб ўша кунларни эслаб, нима сабабдан бугун дўсти ёнида эмаслигини қуийдагича таърифлади: “пешонаси ялтироқ одамнинг ишини доим худонинг ўзи ўнглайди, деганлари рост экан. Оғайним чет элга БОШ олиб, аниқроғи, Норвегия давлатига Покистоннинг БОШ элчиси бўлиб кетиб қолди. Кечагина телефон орқали гаплашдим, ҳаммаларингизга салом, деди”.

Қизғин давом этган гурунглар мушоирага уланиб кетди. Сўнг шу кечага ташриф буюрган машҳур хонанда Ахтар Бегум Бобурийлар салтанатининг Ҳиндистондаги сўнгги ҳукмдори, ажойиб шоир Баҳодир Шоҳ Зафар, ўз ғазалларида “туркзодаман” сўзини ғурур билан кўп қайтариб, “Таги-тахтим Самарқанду дехқон қароғиданман” деб, ёзган Мирза Голиб (унинг шеърлар китоби Эркин Воҳидов таржимасида босилиб чиққан) ғазаллари билан қўшиклар ижро этиб, кўнгилларни хушнуд этди.

Ниҳоят, дастурхонга фотиҳа ўқилиб, отахон мезбон Нодим Қосимий соҳибга ўзбекча сарпо кийдирдик.

Худди шу пайт нарироқдаги стол атрофи ни тўлдириб ўтирган бир тўп шўх, қўҳлик қизлар (қайсиdir дугоналари туғилган кунини нишонлашга йиғилишган талабаларга ўхшашарди) кўлларида китоб, ён дафтарлар билан атрофимизни ўраб олишди, дастхат ёзив беришни илтимос қилишди.

Самина деган қиз сумкасида ўзининг бир жилдик шеърлар китобига кўзи тушган Амжат Ислом:

– Бу ерда ўзбекистонлик адиблар бор, дастхат матнини улар ёзишсин, кейин ёппасига қўл қўямиз, – деди.

Ансориддин ёзди. Китоб муаллифи бошлиқ бизлар имзо чекдик.

Навбат доктор Юнус Баттга келгач, у ўзини тутиб туролмади.

– Манавини қаранглар, – у китоб зарварагини кенг очиб, атрофдагиларга ундаги муаллиф суратини кўрсатди, – дунёда қизлар китобини бағрига босиб юрадиган шоирдан баҳтли одам бўлмаса керак. Биз бечоралар нима қиласардик, ўлим ҳукмига ҳам фатво бериб, имзо чекишдан бошқа иложимиз йўқ, – деди-да, гажжақдор қилиб қўл қўйди.

Ўртада шодон кулги кўтарилди.

ОҚСОҚОЛ “ОТДАН” ТУШДИЛАР

Сажжод Ҳайдар аслида Бош Вазирликдан бизга хизматкор-чакидар эмас, ишбоши қилиб юборилган. Ўзи ҳам театр санъати бўйича илмий даражадунвонига эга. Шу соҳанинг магистратурасини тугатиб, ҳатто у ерда бир неча йил дарс ҳам берган. Шунинг учун биз “орқали” акахонга баъзи маслаҳатлар бермоқчи бўлади. Акахон эса, “ўз ишини қилсин, менинг ишимга аралашмасин”, деб жеркиб берадилар.

Режиссёр қанақа одам бўлишига бир пайтлар Тошкентдаги машҳур театрда ишлаб юрган пайтларим кўп гувоҳ бўлганман. Бош режиссёр Гинзбург умуман ўзбек тилини билмасди. Унинг бирдан-бир театр директоридан ҳам устунлик мақоми – ленинградда туғилиб, Москвада ўқиб, Ўзбекистонга ишга юборилганида эди. Шу одам ўзбекча спектаклларни саҳнага қўйиш асносида актёрларга эркак демай-аёл демай бақиради, сўкинарди ҳам. Пайти келганда шаштидан тушиб, йиғлагудай бўлиб, кечирим сўрарди. Яна бир қизиқ тарафи наманганча “лаҳжа”да гапирадиган (ўша ерда туғилган) Юсуф Қандинов деган администратор-ишбошининг машқ – репитиция пайтлари саҳнада пайдо бўлиб, бериб қоладиган маслаҳатларига қулоқ тутарди.

Бу, ўзимизнинг Мақсаду акани эса, бир нарсага кўндириш ўлимдан қийин. Сажжод Ҳайдар поки-

стонлик томошабинлар дидига мос slab, комедия-нинг айрим диалогларини охиста қўйилган мусиқа фонида бериш, ёки ҳеч бўлмаса, битта қувноқ лапар қўшиғи киритиш маслаҳатини кўп айтарди. Акахон эса “Олтин девор” мусиқий драма” бўлиб кетишига мутлоқ қарши эди. У кишига бизнинг тушуниришлар ҳам кор қилмасди.

Ниҳоят, ўртага Кишвар Наҳид хонимнинг ўзи аралашди-ю, отдан тушгандай бўлиб, Сажжод Ҳайдарга:

– Қани, ўша мусиқа билан лапарингни бир кўрсат, – дедилар.

Эртасигаёқ Сажжод Ҳайдар бир гуруҳ аломат кийимлар кийиб, булоқи тақинчоқлар таққан бир-биридан қўхли қиз-жуонларни бошлаб келиб, продюсер соҳибга рўпара қилди. Сезяпмиз; акахоннинг кекса кўнгиллари қайта туғён уриб, бу жаннат гуллари қаердан келиб қолди, дегандай Сажжод соҳибга бир қараб қўйгандилар, у ёнида турган узунбўй, ўзи ҳам қиз-жуонларга ўхшаб юзига сал упа-элик суртиб, оро берган олтмиш ёшлардаги одамга ишора қилиб:

– Бу киши машҳур балетмейстер доктор Фақир Ҳусайн бўлади. Манави хонимлар эса, бу киши бошчилигидаги дастури халқ оғзаки ижодиёти, яъни қўшиқ ва лапарлардан ташкил топган “Ялли-ялли” ансамблининг аъзолари. Ҳозир сизга “Ялли-ялли дил на гайи” (“Ялли-ялли – кўнглим куйлар”) ни ижро этиш учун ҳозирлик кўриб келишган, – дейиши билан бир томонда саф тортиб турган “парилар” продюсер соҳибга аста бўйин эгиб, таъзим бажо келтиришди

Пайтдан фойдаланган доктор Фақир Ҳусайн ўз ансамбли ҳақида Мақсуд акага қисқача тушунтириш берди:

– Ҳозир дикқатингизга ҳавола этилмоқчи бўлган лапар услубидаги қўшиқлар сизларда “Ялла-ялла” деб аталиб, шаҳаншоҳ Бобур юрти Фарғонадан Хин-диримороли мамлакатларига “Ялли-Ялли” бўлиб, кириб келган. Мен бу ҳақда илмий мақолаларимда ёзганман.

Лапар хўп маҳорат билан ижро этилди. Бунинг учун Мақсуд акамиз ансамбл аъзоларига қўлни кўксига қўйиб, миннатдорчиллик билдирилар, улар бошлиғи доктор жанобларини маҳкам бағирларига босдилар ҳам.

Бироқ, комедияга “киритиш”га келганда мутлоқ, тескари фикр билдирилар:

– Аввало, лапар жуда чўзиқ. Томошобиннинг кўп вақтини олиб қўяди. Қолаверса, саҳна от бозорига айлананиб кетиши мумкин. Яна шунча одамни овора қилиш ўрнига ўзимизнинг тайёр “Ялла-Ялла” борку, анаву Фарруҳ Зокиров айтадиган!

Меҳмонлар, Сажжод соҳиб ҳам индамай қолишиди.

Биз чинданам ўзимиз билан Ўзбекистон радиоси мусиқа фондидан куй-қўшиқлар ёзилган кассеталар олиб келгандик. Улар ичида хушловоз хонанда Фарруҳ Зокиров ижросидаги “Ўзбекистон Ватаним” (“Ялла-Ялла”) ҳам бор бўлиб, аввал “Олтин девор”чилар орасида тарқалди. Сўнг “Рэдийо Пакистан” орқали ҳамма ёққа машҳур бўлиб кетди. Қаерга борманг, бозорларда, одам гавжум жойлар-

да “Ўзбекистон Ватаним” қўшигини эшитиш мумкин эди.

Хуллас, “Олтин девор”га шу лапарни “парча” қилиб киритишга ҳам рўйхушлик бермай юрган акахон ниҳоят, яна бир бор “отдан тушган”дилар.

Комедияда шундай “саҳна қўриниши” бор: Мўмин чол ямоқчи ошнасининг косибчиллик устахонасида тўй ҳақидаги хушхабарни эшитиб, хурсандчиликдан бир-бирларини табриклаб, бир четда турган радиодан тараалаётган лапар қўшиқ “Ялла-ялла”га монанд ўйинга тушиб кетишади.

Очигини айтганда, “Олтин девор”ни саҳналаштириш билан боғлиқ ҳар бир кун, соати ҳам эсда қоларли воқеаларга бой бўлиб, мазмунли кечарди.

КАТТА СИНОВ ОЛДИДАН

Тошкент – Исломобод – Тошкент бўйича учувчи самолёт қатнови ҳафтада икки маротаба амалга оширилади. Шу сабаб Эркин акага “Олтин девор” тақдимотига сал барвақтроқ етиб келишлари учун 17 декабр куниги Пешоворга қараб парвоз қиласидиган учоқ ўнғайлиги айтилганди.

Тошкентга қўнғироқ қилдик. Эркин ака гўшакни кўтардилар. Ҳол-аҳвол сўрашдик. Чипталар олинибди.

– Индин, тушгаяқинетибборамиз, – дедилар-да, – илтимос, расмиятчилик бўлмасин, биз Гулчеҳрахон билан спектакл тақдимотида қатнашиш учун келган меҳмонлар қаторида борамиз-да, қайтамиз, – дея яна бир бор таъкидладилар.

Исломободдаги элчихонамизнинг биринчи котиби Ҳусанжон Умаров билан уландик. У ҳам Тошкент билан боғланганлиги, Пешавор аэропортида Эркин акани кутиб олишга ҳозирлик кўрилаётгани ҳақида гапиравкан:

– Бир кун меҳмонимиз бўлишади-да, кейин бу ернинг вақти билан соат ўн иккida Табани “Аэро-Эшийя” учоғида Лаҳорга боришади, – деб қўшиб қўйди.

Мақсад акага:

- Ана, Эркин ака келинойи билан келишяпти. Асосий имтиҳон энди бошланади, – дедим.
- Шу ростми? – ишонмагандай сўрадилар оқсоқол.

– Элчиҳонадан шундай дейиши. Расмий гапнинг ёлғони бўлмайди.

Барibir Эркин акани комедиянинг муаллифи ҳам машҳур шоир сифатида кўнгилдагидай кутиб олиш режалари тузилаётган, Кишвар Наҳид Исломободдан мамлакатимизнинг азалдан яқин дўсти, таниқли жамоат арбоби доктор Муҳаммад Дони соҳибни Лаҳордаги “Покистон-Ўзбекистон дўстлик жамияти” раиси Маҳмуд Али Бҳаттий ҳузурига юборганди.

Улар биздан Эркин Воҳидов ҳақида қўшимча маълумотлар сўрашарди.

“Олтин девор” учун ўйлаганимиздан ҳам соз қилиб босилган олтин ҳарфли таклифнома, бу-клетлар, ҳамда шаҳардаги “Шезон” номли “Адабиёт ва санъат Маркази” биносида ўзбек шоирининг қутлуғ 60 ёши муносабати ўтказиладиган тантанали анжуманга чорловчи даъватнома қўлимизга келиб тушди.

Айниқса, комедия тақдимоти “Таклифнома”-лари 20-21-22 декабрнинг ҳар санаси учун алоҳида – уч хил кўринишда босилган, қайси куни Покистоннинг давлат ва таниқли жамоат арбобларидан кимлар ташриф буюришигача номма-ном кўрсатилган бўлиб, улар ичida Исломободдаги мамлакатимиз элчиси Наим Гойипов ҳамда у кишининг маданий ва маърифий масалалар бўйича маслаҳатчиси Тошмирза Холмирзаев исм-фамилияларини ҳам кўриш мумкин эди.

Буларни тайёрлашда Тоҳир Аслам матбаачиликдаги бор маҳоратини ишга согланлиги шундоқ кўриниб турарди.

Белгиланган пайтда мөхмөнларни кутиб олиш учун аэропорт томон кетарканмиз, Аслам Гора аллақачон тарқалиб кетган, бизлар дўконларни қидириб, бир донадан аранг топган А. Навоий, “Ўзбек ҳикоялари антологияси”, “Олтин девор” ҳамда Н. Аминовнинг китобларидан бир нечтасини кўрсатиб:

– “Шезон”даги юбилей баҳона, буларнинг тақдимотини ҳам ўтказиб оламиз, – деб қўйди.

Бироқ, Исломободдан учиб келган “Аэро-Эшия” йўловчилари ичida биз кутаётган мөхмөнлар йўқ эди.

Бундай пайтда ҳар хил тахминлар туғилиб келаверади; “Чарчаб келишган бўлса, ухлаб қолишгандир”. “Исломободни бемалол томоша қилиб, эртага келишса керак”. “Эркин аканинг икки оғиз сўзларига муштоқ элчихонамиз ходимлари қўйиб юборишмаган бўлиши мумкин”..

Омади гапни “Олтин девор” муаллифига бироз қариндошлиқ томони ҳам бор Мақсад ака айтдилар:

– Эркинбойни яхши биламан. Биронта шахматвоз “Ҳа, қаёққа кетяпсиз, келинг, бир партия суришайлик, қўрқманг, мөхмөнлигингиз ҳурмати ютиб қўймайман” деган бўлса, костюмни ечиб, дона суришиб ётгандурлар. Бунақаси кўп бўлган.

Худди шу пайт Тоҳир Асламнинг ён телефони жиринглаб, хусусий “Аэро-Эшия” авиакомпанияси бош директори Амин Гозиёнийнинг таниш овози эшитила бошлади. “Биз Эркин Воҳид жанобларини компаниямиз қароргоҳига таклиф этгандик, Ёкуб соҳиб икковилон шахматда куч синашиб ётишибди. Ҳозирча ким ғолиб бўлиши номаълум. Шунинг учун

мехмонларни эртага алоҳида рейсда юборамиз”.

Мен бу янгиликни мухтасаргина қилиб, Мақсуд акага тушунтиридим-да:

– Топқирлигингизга қойил, устоз! – дедим.

Ансориддин қўшимча қилди:

– Мунажжим бўп кетинг-е!

Мақсуд ака асар намойишидан икки кун олдин ҳамма “тиниқсин” деб, дам олишга руҳсат берган-дилар. Шу баҳона Убайдад Сайийд хоним, Эркин аканинг ҳам келишларига умид қилиб, “Олтин дөвр” жамоаси”ни меҳмонга таклиф этганди.

Шаҳар марказий кўчаси бўйлаб узоқ юрганимиздан сўнг автобусимиз чапга бурилди. Машинамиз ўзимиздаги ўзбек маҳаллаларини эслатувчи бир-икки қаватли уйлар билан ўралган кўча бўйлаб юра бошлади.

Бирдан қулоғимизга таниш оҳанг чалингандай бўлди. Ҳаммамиз қўшиқ тараалаётган тарафга ўгирилдик. Каттагина майдон тўрида хашаматли дарвоза кўзга ташланди. Унинг устига катта қилиб “Кока-Кола. Салқин ичимликлар ишлаб чиқариш корхонаси” деб ёзиб қўйилган эди. Сал берироқда худди бизлардаги гузар чойхоналарини эслатувчи емакхона бўлиб, у ердаги сўри, чорпояларда 15-20 чоғли одам (корхона ишчилари бўлса керак) қаҳва, чой ичиб ўтиришар, тўрдаги токчага қўйилган радиоприёмниandan “Ўбекистон Ватаним” қўшиғи баралла янгарди.

Хайдовчимиз Холид қувноқ ва завқли йигитлардан эмасми, қўлинини биз томон ёзиб, ҳайрат ишораси билан бошини сарак-сараклаб, “Ваҳ-ваҳ” деб

қўйди-да, бир лаҳза уловни тўхтатди. Елка қоқиб, ўйнаб ҳам қўйди.

Димоғимизга Она Ўзбекистоннинг ҳавоси келиб урилгандай бўлди-ю, қарийб бир йилга яқин мусоғиротда юравериб, юртимизни, бола-чақа оиласизни жуда соғиниб кетганимизни ҳис этдик... Мақсад Юнусовдай ёши бир жойга етиб, ҳаётнинг кўп аччиқ-чучугини бошидан кечирган отахон кўзларида милтиллаган ёшни кўриб, Ансориддин икковимизни ҳам юрагимиз эзилиб, бир-биrimизга ботиний назар ташлаб қўйдик.

Таниқли ижодкор ҳамда артист Убайдада Сайид хонимнинг икки қаватли иморат қад ростланган унча катта бўлмаган ҳовлисидағи ўтиришимиз қизиқарли сухбат, мушоира, ўйин-кулгу билан ярим кечагача давом этаркан, хонадон соҳибаси “Олтин девор”ни ёзган машхур шоиримиз номини қайта-қайта эслаб, у киши бир кунмас-бир кун албатта шу “мўъжаз кошона”га эъзозли меҳмон бўлиб, ташриф буюришларига умид билдириди.

Бизлар эртага бўладиган “Олтин девор”нинг энг масъул ҳисобланувчи биринчи тақдимотига тайёргарлик кўра бошладик. Театр гримёрлари кундузги соат 12 ларга чақирилган бўлиб, ҳар бир артистнинг социдан тортиб, қош-кўз, юзларигача “бўяб-бежаб” ўзига хос “қиёфа”га келтира бошладилар. Бу “машқ” учинчи марта қайтарилиши бўлиб, анча мураккаб кечарди. Баъзан актисалар сочини “ўзбекча” қилиб, қандай турмакланишини Мақсад аканинг ўзлари кўрсатардилар. Қўйинг-чи, дўппини қандай кийишгача ўргатардилар.

Биз шу “гримёрлик” ишлари билан овора бўлиб, “Бугун куннинг ярмида Захириддин Муҳаммад Бо-бур Ватани бўлмиш Ўзбекистондан машҳур ўзбек шоири Эркин Воҳид жаноблари Лаҳорга ташриф буюрган”ликлари ҳақидаги хабарни кечки газета саҳифаларидан билиб қолдик.

Биринчи бетда меҳмонлар билан элчимиз Н.Фойипов, К.Наҳид, М.Дони, А. Бҳаттий ҳамда кутиб олишга чиқсан икки-уч мезбоннинг сурати ҳам берилган бўлиб, унинг остига катта ҳарфлар билан “ЭРКИН ВОҲИД” деб ёзилган, шоирнинг газета муҳбирларига берган интервьюсидан қуйидаги парча келтирилганди: “Мен Покистон юртига қадам қўйишм билан ўзимни яқин ёру дўстлар даврасида юргандай ҳис этдим десам, ҳеч ким ажабланмаса керак. Ҳа, ота-боболаримиз қадим-қадимдан ўзлари очган Ипак Йўли бўйлаб борди-келди қилишган. Бутун-бутун мамлакатларни, ҳалқларни бир-бири билан боғловчи шу йўл тужаронлари билан гавжум бўлган. Бу йўл тижорат билан бир қаторда, илм-маърифат йўли ҳам ҳисобланган. Лаҳордан йўлга тушган карvonбоши ўзининг Самарқанд ё Бухоролик ёинки Фарғоналик ҳамкасби билан Афғонистоннинг бирон карвон-саройида учрашиб, бир пиёла чой устида китобхонлик қилган, мушоири авжга чиқсан. Шуни унумаслик керакки, бобокалонларимиз тақдиримизни агадул-абад боғлаб кетишган. Минг қатла шукур, Ўзбекистон мустақилликка эришгани шарофати билан шу қон-қондошлиқ ришталари қайта боғланмоқда”.

Матбуот саҳифаларида уш бу сўзларни ўқигач, Сажжот Ҳайдар соҳибга қўнгироқ қилдик. У меҳ-

монлар жаноб Бҳаттийжининг шаҳардан четроқ қароргоҳига жойлашишгани, ҳозир Лаҳордаги Шоҳ Жаҳон томонидан қурдирилган ёдгорлик мажмуаларини зиёрат қилиб юришганини айтди. Адресни ҳайдовчимиз Холиқ ёзиб олди.

Эркин ака билан кўришиш ниятида кечга яқин айтилган манзилга етиб бордиг-у, дарвозанинг икки ёнбошида турган автомат билан қуролланган сипоҳийлардан бири йўлимизни тўсди. Кимлигимизни билгач, меҳмонлар шаҳар айланишдан қайтиб, қаергадир учрашувга кетишгани, ичкарида ҳеч ким йўқлигини айтди.

Ноилож Холиқ машинани орқага бурди.

Кеч соат ўнлардан ўтганда, Эркин аканинг ўзлари телефон қилиб қолдилар. Анчагина гаплашдик. Сўнг гўшакни Аслам Гора олиб, эртага “Шезон” адабиёт Марказида Эркин ака билан ўтказиладиган юбилей учрашуви ҳамда “Ўзбек китоблари тақдимоти” маросимида учрашишимизни айтди.

Бироқ, режиссёrimиз айни эртага пешиндан бошлаб “Олтин девор” тақдимотига жиддий тайёргарлик кўришимизни айтиб, “фавқулотда ҳолат” эълон қилдилар. Шу боис, биз бу тадбирда қатнашолмадик.

Кўпчилик адабиёт, санъат ва маданият вакиллари қатнашган “Шезон”даги шоир билан учрашув ҳамда китоблар тақдимотини Тоҳир Асламнинг ўзи бошқарибди. Унинг айтишича, тадбир кутилганидан ҳам қизиқарлироқ ўтибди. Нутқлар, табриклар ва мушоирадан сўнг “Ялли-ялли” фольклор ан-

самбли концерт берибди. Энг қизиғи, доктор Фақир Ҳусайн билан унинг лапарчи қизлари Эркин акани ўртага олиб, "Шодиёна" қўшиғи билан ўз одатлари бўйича шоир устидан гуллар сочишибди.

Бу таъриф таржимасини бизлардан эшитган Мақсуд акамизнинг кекса кўнгиллари яна бир бор жўш уриб, беихтиёр "Оҳ-оҳ" деб юборгандилар, орқа томондан бунга "жавобан" қувноқ табиат, шўх (режиссеримиз "шайтонроқ" деб атай бошлаган) актриса қизлардан Тоҳира Имомнинг қўнғироқдай товуш чиқариб, секингина "Хой-ҳо-ой!" дегани қулоққа чалинди. Акахонимиз буни эшитмадилар ёки эътибор бермадилар чоғи, ҳаммага қаратади: "Бугун охирги кун, яна бир бор машқни қайтарамиз" дедилар овозни баланд қўйиб.

Биз кун бўйи ўта банд бўлганимиз сабабли Эркин aka билан ҳали учрашганимиз йўқ эди. Балки бунга Ҳайдар соҳиб айтган Эркин aka учун комедия қўйилишдан аввалги икки кунга мўлжаллаб тузилган режанинг ғоят санжоблаблиги сабаб бўлгандир.

ШОИРНИНГ ТАШРИФИ

Соат кечки 7 га яқинлашган пайт (бу ерда спектаклар бошланадиган вақт) ташқарида бизнинг карнай-сурнай, ноғора овозларини эслатувчи оҳанг садолари янграй бошлади.

Залнинг биринчى қатор йўлакларида полициячилар пайдо бўлди.

Ичкарига Кишвар Наҳид бошлиқ Эркин ака, Гулчеҳра келинойи, элчимиз, маҳаллий ҳукумат вакиллари кириб келиб, ҳар ким ўзига ажратилган жойдан ўрин олди.

Икки мамлакат мадҳиялари янгради.

Шундан кейин парда очилиб, декорация ортида “Олтин девор” муаллифининг улкан портрети пайдо бўлиши билан, зални яна бир бор ҳаяжонли жонланиш қоплади.

Бирдан томоша залининг юқори қисмida “шовқин-сурон” кўтарилиб қолди. Узун гилам тўшалган йўлақдан беқасам тўнининг бир томон бари белидаги белбоқقا қистирилган, бошида дўппи, оёқда калиш-маҳси билан елкасида эски милтиқни кўтарганича Мўмин чол (Аслам Рао) Ҳуринисо ва бошқа комедия қаҳрамонларини қаторасига эргаштириб келар, дапқур-дапқур тўхтаб, қўлини пешонасига “соябон” қилиб, аввал ўзбекчалаб “Во-ой бўй, ана – одаму, мана – одам!” дея қичқириб қўяр, кейин “ўз тили”да қулоғи оғирроқ “хотини”га дашномлироқ қилиб, “Энди шунча томошабин,

ана, Ўзбекистондан ҳам келиб ўтиришибди, бизни деб, йиғилишган экан, бирон томоша кўрсатамизда”, дея йўлда давом этарди...

Ансориддин иккимизнинг маслаҳатимизга кўра қўлланган бу “усул” Мақсуд ака хавфсирагандек “бачкана” чиқмади. Балки томошанинг бошланишига шавқли рух бағишлади.

Комедиянинг ҳар саҳнаси ўзига хос кулгили ҳолатларга бой бўлиб, баъзан томошобинлар, ўринларидан туриб, саҳна томон қўлларини чўзиб, бизлардаги қарсак ўрнига “Ва-аҳ – ва-аҳ” дейишарди.

Томошанинг энг қизиқарли жойи – икки оғайнин чолнинг “Ўзбекистон Ватаним” (“Ялла-ялла)га ўйин тушишлари бўлди. Бундоқ қарасак, бутун зал, ҳатто олдинги қаторларда ўтирган “расмий” меҳмонларнинг айримлари ҳам Фарруҳжон Зокировга жўровозлик қилиб, куйлашмоқда (улар шоиримиз Нормурод Нарзуллаев шеърини ёдлаб олишган шекилли), завқ билан рақсга тушишмоқда эди...

Қарийб уч соатдан зиёдроқ вақт давом этган “Олтин девор”нинг биринчи тақдимоти кутилганидан ҳам зиёда қизиқарли якун топиб, асар муаллифини кутлаш тантаналарига уланиб кетди.

Эркин ака саҳнага таклиф этилди. Худди шу пайт ўнг томондаги катта дарвоза очилиб, Ёқуб Табани етовида бир қучоқдан анвойи гуллар кўтарган “Аэро-Эшия”нинг ўн чоғли стюардесса қизлари кириб келишлари билан ҳамма ёқни гулларнинг муаттар бўйи тутиб кетгандай бўлди. Эркин ака билан “продюсер Мақсуд соҳиб” Кашмирдаги Бобурийлар яратган машҳур “Шалимар” боғларидан янги узид келтирилган гуллар орасида қолдилар.

Ёкуб Табани:

– Узок ўйлаб, топганимиз, айтишларига қараганда Фарғона томонлардан келтириб экилган манави атир гуллар бўлди, – дея Эркин акани бағрига босди.

Сўзни Кишвар хоним олиб, Эркин акани аввало қутлуғ ёши ҳамда “Олтин девор”ни Ал-Ҳамронинг катта саҳнасида муваффақиятли қўйилиши билан табриклаб, яқиндагина Тошкентдан, Покистон Ислом республикасининг Ўзбекистондаги фавқулодда ва Мухтор элчиси Шавкат Али Шайх жаноблари томонидан юборилган телеграммани ўқиб эшиттириди:

“Ўзбекистоннинг ардоқли шоири қаламига мансуб “Олтин девор” комедияси қарийб чорак асрдан бери театр саҳналаридан тушмай келаётгани, телевизор экранлари орқали қайта-қайта кўрсатилаётгани халқ орасида нечоғлиқ машҳур бўлиб кетганининг ёрқин намунасиdir.

Биродарим Эркин Воҳиднинг олтмиш йиллик тўйи муносабати билан унинг “Огин девор”и Пок-Ўзбек адабий ҳамкорлигига қўйилган тамал тоши сифатида бизнинг Ватанимиз Покистонда кўрсатилаётганидан беҳад хурсандман...”

Амжад Ислом Амжат Эркин акани у кишига бағишиланган ўз шеъри билан табриклаб, устоз, бузруг адаб Аҳмад Нодим Қосимий жаноблари “Олтин девор” ва унинг муаллифи номига, бетоблиги туфайли қутлуғ тадбирда иштироқ этолмаётганидан афсус билдириб, Аллоҳдан узоқ умр тилаб, Лондондан юборган шошилинчномани ўқиб, эшиттириди.

Тоҳир Аслам Гора доктор Абдул Қодир Хон томонидан шоиришимиз номига жўнатилган “Муборакбод ҳат” билан ҳаммани таништиргач, сўз навбатини Ўзбекистоннинг Покистондаги фавқулодда ва Мухтор элчиси, жаноб Наим Ғойибовга берди.

– Хонимлар ва жаноблар! Сизларга янги бир хушхабарни етказмоқчиман, – дея ҳамманинг диққатини ўзига қаратди элчимиз, – Барчамизга маълумки, бизнинг эл севган шоиришимиз Эркин Воҳиднинг туғилган кунларини бироз олдинроқ нишонлаб турибмиз. Аслида роса бир ҳафтадан кейин кутлуғ олтмиш ёшга кирадилар. Бу “сир” ёнига яна бир янгилиқдан Сизларни хабардор этмоқдаман. Ҳар бир драматик асар саҳнада намойиш этилган кунлар сонига қараб, умри бир йилга узайиб бораверади. Куни кеча Ўзбекистон театр жамияти раиси Бернора Қориева хонимдан “Олтин девор” МИНГИНЧИ маротаба Тошкентдаги Катта театр саҳнасида қўйилаётгани ҳақида хушхабар олгандик. Мана шудамларда эса, биз Сизлар билан комедиянинг муборак БИР МИНГ БИР ёши билан юзлашиб турибмиз. Демак, қўшалоқ байрам билан Эркин акамизни қутласак арзийди, деб ўйлайман.

Худди шу пайт Эркин Воҳидни табрикловчилар қаторида турган Панжоб штати Қонун чиқарувчи Ассамблеясининг Бош спикери, йирик давлат ва жамоат арбоби, машҳур адаб ҳамда мўйқалам соҳиби Ҳаниф Ране:

– Элчи жаноблари, шу айтганларингизга қўшимча қилиб, мен ҳам бир “сир”ни очмасам бўлмас, – деди-да, микрофонга яқинроқ келиб, асар муаллифига қаради. – Ҳурматли Эркин Воҳид жаноблари,

яхши ёзилган асар умуминсоний мулкка айланади, деганлари ҳақиқатан рост гап эканлигини мана бүгунги намойиш этилган Сизнинг ижодингиз маҳсули бўлмиш “Олтин девор” исботлаб турибди. Сизнинг асарингиз бизнинг ҳам мулкка айланди. Биз учун яратиб берган кўпдан -кўп қаҳрамонларингиздан манави “Мўмин чол” ролини қиёмига етказиб ижро этган бизнинг Аслам Раога қойил қолмоқ керак. У шу кетиши бўлса, Покистоннинг машҳур намоёндалари қаторига қўшилиб қолиши ҳеч гап эмас. Сизга гапнинг очиғини айтсам, ҳозир бизда давлат бошлиғи – Баш Вазирликка номзодлар қўйиш бошланиб кетди. Энди биз Раонинг номзодини бемалол кўтариб чиқсан бўлаверади, деб ўйлайман. Бунинг учун митинглар, ташвиқот йиғилишлари ўтказиш шарт эмас. Тез-тез “Олтин девор”ни кўрсатиб туррилса, бас! Бизга шундай ажойиб қаҳрамонни тухфа этганингиз учун минг раҳмат, Эркинжан бҳай!

Шундан кейин Покистон ижодкорлар Гилдияси, Умумпокистон “Арт Коунсл” театр жамияти, Панжоб штати ҳукумати каби қатор давлат ва жамоат ташкилотлари томонидан “Олтин девор” муаллифи ва уни саҳнага қўйишда жонбозлик кўрсатган “жамоа” аъзолари номига йўлланган табрик ҳамда қутловлар янгради.

Сўнг, сўз ҳурматли меҳмонга берилди.

Эркин ака “Мўмин чол” (Аслам Рао)нинг қўлидан ушлаб, томошобинлар истиқболига яқинроқ олиб келди-да, ўзига хос лутф билан муҳтасаргина қилиб, шундай деди:

– Назаримда, ҳурматли ҳамкасбимиз ҳамда таниқли ҳукумат арбоби Рамэ соҳиб айтганлари-

дек, давлат бошқарувида артист бўлиши шартга ўхшамайди. Шундоғам бу укамнинг мамлакатингиз миқёсида обрўйи чакки эмас экан. Шуни ҳисобга олиб, мен бошқа бир нарсани ўйлаб турибман: “Олтин девор”ни Сизларнинг тилингизда кўргач, уни урдучадан ўзбекчага ўгириб, Ўзбекистонда қайта саҳналаштирилса-ю, Асламжон Мўмин чол ролини ўз тилида ижро этса, асар ҳам, бу артистимиз ҳам янада машҳурроқ бўлиб кетармиди... Шунчалик эътибор кўрсатгандарингиз учун Сизларга минг бора раҳмат.

Ҳаммаёқни қийқириқ, шод-хуррамлик овозлари босиб кетди.

Шунда мен Аслам Рао кўзларида милтиллаган ёш кўрдим. Бу севинч ёшлари эди.

“Олтин девор”нинг иккинчи тақдимоти ҳам муваффақиятли ўтди. У олдингисига нисбатан анча сайқал топгани сезилиб турарди.

Учинчи куни ёш артистлар ўзларига хос ҳаяжонни енгиб, маҳорат бобида устоз санъаткорлар билан беллаша оладиган бўлдилар. Кун сайин улар “образ”га чуқурроқ кириб бораётганликлари яққол сезилиб турарди.

Ҳар тақдимот якунида ўзидан-ўзи тантана бошланиб кетар, комедияни ҳамкорликда саҳнага қўйган ижодий “жамоа” олқишлинар, одатдагидай гулларга “кўмиб” ташланарди.

Шунингдек, саҳна билан бутун томоша зали рангин чироқлар нурига бурканиб, тантанавор “Ўзбекистон Ватаним” (“Ялла-ялла”) янграй бошлаб, “Олтин девор” жамоаси” шўх ўйин-кулги ҳамоҳанглигига томошобинлар билан хайрлашдилар.

ЮРТ СОФИНЧИ

Биз, Ансориддин иккимизни Исломободда яна бир тантанали тадбир кутарди. У ерда халқимизнинг яқин дўсти, номи дунёга машҳур физик олим доктор Абдул Қодир Хон ҳомийлигига халқларимизни бир-бирига яқинлашувида катта рол ўйнайдиган “Урдуча-ўзбекча луғат” ҳамда “Урдуча-ўзбекча муштарак сўзлар луғати” китоблари босиб чиқарилган бўлиб, уларни ҳафта ўрталарида мўлжалланаётган тақдимотида иштирок этишимиз режага киритилган эди. Чунки ушбу китобларни кўп йиллар давомида тер тўкиб, нашрга тайёрлаган Ансориддин Иброҳимов эди.

Шуни ҳам алоҳида таъкидлаб қўйишим керакки, бу “Луғат” китоблари Ҳинд-Пок элида “Устад” (“Муаллим”) деб эъзозланувчи, у мамлакатларда бир неча йил ўзбек тилидан дарс берган ажойиб инсон, дўстим, ҳамкорим, Эркин акам ўзларига яқин тутиб, кўп ҳурмат қиласидиган укаларидан Ансориддин Иброҳимов (вафотидан бир неча ой аввал) ўзимизда “профессор” унвони билан тақдирланишига сабаб бўлган.

Ҳар икки китоб тақдимоти Исломобод университетининг Ўрта Осиё тиллари факултетининг мажлислар залида жуда қизиқарли ўтди. Унда университет домлалари, элчинонамиздан вакиллар, ўзбек тилини ўрганувчи курс талабалари иштирок этдилар.

Нихоят, бутун вужудимиз билан интилиб ётган жонажон юртимизга қайтишдан олдин Холмирза aka ҳамроҳлигига Кишвар Наҳид хоним ҳузурига кириб, амалга оширилган барча хайрли ишларга катта ёрдам кўрсатгани учун миннатдорчилик билдиридик. Тошкентдан юборилган Марғilon атласини совға қилиб, топширидик.

Гап орасида хоним бироз бизлардан ранжиган бўлиб:

— Эркин Воҳид жаноблари катта арбоб ҳам эканлар, кейинроқ Тошмирза соҳиб айтиб қолдилар. У киши-ку, ўта камтарлик қилибдилар... Нега энди шуни Сизлар аввалроқ менга айтмадинглар? — дея, бир Ансориддинга, бир менга қаради. Ва қўшиб қўйди, — расамадини келиштириб, дурустроқ кутиб олардик-ку!

— Аввало, — дедим мезбонимизга, — у киши катта шоир. Кутиб олишга келсак, “расмиёна”дан ҳам ўтиб тушди. Шоирнинг ўзлари ҳам буни кутмаган эканлар чоғи, ўзларини бироз ноқулай ҳис этганларини айтдилар. Сизларга минг раҳмат.

Узоқ сафарни якунлаб қайтганимиздан хабар топган яқин-йироқ дўстлар, таниш-билишлар ҳол-аҳвол сўраб “зиёрат”га келишди. Қандай кутиб олинганимиз, қай шароитда яшаганимиз билан қизиқиши. Бу табиий ҳол эди.

Лекин, мени бир нарса ўйлантириб қўйди: ҳар бир “қизиқиш”нинг замерида бундан Сизларга бирон фойда бўлдими, наф тегдими, деган саволга ишора ётарди. Бу “ишора”га туппа-тузук, оқ-коранинг фарқига борадиган маърифатли ҳамкасларимиз ҳам зўр бериб қолишарди.

Бир яқин зиёли оғайнимга шундан ранжиброқ гап айтгандим, у бепарвогина: “Илгариги мачитда ишлагандай савоб йўлига жон куйдириш пайтлари ўтиб кетган, ҳозир бозор иқтисодиёти даври”, – деди.

Назаримда, ҳамма “бозорчи” бўлиб кетаётганга ўхшарди.

КҮНГИЛДАГИ РЕЖА

Чарчоғимиз босилиб, бироз ўзимизга келгач, Тошкентдаги Покистон элчихонаси маъмурияти томонидан “бир пиёла чой”га таклиф этилдик.

Дастурхон атрофида ўзбек адилари асарлари (хусусан, А. Навоий ғазаллари)ни урду тилига таржима қилишда меҳнати сингган институт домлалари, профессор Қамар Раис ҳамда ўзбек ҳиндшунослиги тамал тошини қўйган устозимиз Раҳмонберди Муҳаммаджоновнинг яқинда Исломбодга бориб, Покистон ҳукумати томонидан “Урду тилининг ривожига қўшган улкан хизматлари учун” дея чиқарилган Қарорга биноан, марҳум отаси сазовор бўлган юксак мукофот “Буюк хизматлари учун” (“Pride of Performance”) нишонини олиб қайтган қизлари Сайёрахон ўтиради.

“Асосий меҳмон Эркин Воҳид жаноблари чет эл сафарида” эканлиги айтилди.

– Бу йиғилишдан мақсад, – деди элчихона масъул холимларидан бири Офтоб соҳиб, – икки қардош мамлакатларимиз ўртасида адабий-маърифий алоқаларни кенг йўлга қўйиш борасида Сизлар кўрсатган жонбозлик учун барчангизга каттадан-катта раҳмат айтиб қўйишидир. Ҳаммасидан бизлар бу ерда туриб бўлса-да, Покистон матбуоти, телевидение, радиоси орқали хабардор бўлиб турдик. Бу хўп хайрли иш бўлди. Лекин, бу ердаги кўпчилик ўзбек адилари асарларини бизнинг китобхонлар

қизиқиб ўқишаётганидан, уларга таникли адаб, мунаққидларимиз томонидан тақризлар ёзилаётганидан бехабарлар, чамамда. Ҳатто бизда асарлари таржима қилинганидан ҳам! Шуни ҳисобга олиб, Покистонда урду тилида чоп этилган ўзбек китоблари тақдимотини элчихонамизда ўтказиш ниятимиз бор. Бунга Сизларнинг фикрларингизни билмоқчи эдик.

Ансориддин албатта бу тадбир ўтказилиши зарур, деб таъкидлаган ҳолда:

— Лекин бир муаммо ҳам бор, — деди, — асарлари «Ўзбек ҳикоялари антологияси» китобидан жой олган ёзувчиларимизга ҳеч бўлмаса, биттадан эсадаликка тақдим этиш керак. Бизлар ўзимиз билан бир нусхадан олиб келганмиз, холос. Вақтимиз зиқлиги сабаб, китоб дўконларини дурустроқ айланомлмаганмиз.

— У ёғини сўрасангиз, — дея Ансориддиннинг сўзини бўлди Офтоб соҳиб, — бизда ҳам “Олтин девор” китобидан ягона нусха бор, холос. Бир донаси элчимиз томонидан муаллифга тортиқ этилган. Бироқ, бу муаммони ҳал этишнинг бир йўли бор. Яъни, Ўзбекистон Ёзувчилари Уюшмаси томонидан “Бизга, ўзбек муаллифларининг Покистонда босилиб чиққан асарларидан шунча дона берилишини сўраймиз”, деган мазмунда икки энли хат ёзилса, кифоя. Биз китобларни чиқарган нашриётларга истаганча нусхада буюртма бера оламиз. Сўнг ўша китобларга қўшиб, ҳар бир муаллиф учун конвертда “қалам ҳақи” бериш ниятимиз ҳам йўқ эмас.

Хуллас, Уюшма билан алоқа боғлашни шу ерда ҳозир бўлганлар камина зиммасига юклашди.

Офтоб соҳиб:

– Агар у ердагилар рози бўлишса, тақдимотни бирга ўтказганимиз жуда соз иш бўларди, – дея қўшимча ҳам қилиб қўйди.

Нима бўлганда ҳам ўзимиздаги кўпчиликни қўшни мамлакатда илк маротаба амалга оширилган хайрли ишлардан воқиф этиб қўйиш керак. Балки бизлардан хатолик ўтиб, ҳаддан зиёд бандлигимиз баҳона бу томонларга ҳеч бўлмаса телефон орқали хабар бериб туришни унутганимиздир.

Ундаи деб ўйласак, “Олтин девор” тақдимотининг эртасигаёқ элчимиз Наим ака Гойибов жаноб Маҳмуд Али Бҳаттий идорасидан туриб телефон орқали Тошкентдаги Ёзувчилар Уюшма раиси билан боғланган, Покистондаги тантаналар ҳақида батафсил ҳикоя қилиб, шоир Эркин Воҳидовнинг олтмиш йиллик юбилейини катта тантаналар билан биз бу ерда бошлаб бердик, энди навбат Сизларга дея, алоҳида таъкидлаб ҳам қўйганини ўз қулоғимиз билан эшитган, ҳатто бир кун ўтгач, факс орқали муҳтасаргина қилиб ёзилган хабар ҳам жўнатилганини билардик.

Ўша хабар етиб келмаганми, ё тушунмовчиклик бўлганми, шоирга бағишилаб ўтказилган Ўзбекистондаги юбилей тадбирларининг биронтасида ҳам бу ҳақда ҳеч қандай малумот бериб ўтилмагани бизларни ҳайратга соларди.

Наҳот, “қўшним” бундан бир йилча олдин айтган ўз сўзларидан қайтмаган бўлса! Балки, мана энди, ҳузурига кириб, бажарилган ишлар ҳақида “ҳисобот” берсам, кўнгли ёришиб кетар, олқишилаб қўйса ҳам ажаб эмас! Ана ундан кейин “тақдимот”

ҳақида гапириб, уни элчихона билан биргаликда ўтказиш маслаҳатини ҳам айтаман...

Шу ўй-хаёллар билан ўзимда бир нусхадан бўлган урду тилидаги “Алишер Навоий. Ғазаллар”, “Эркин Воҳидов. “Олтин девор”, “Ўзбек ҳикоялари антологияси”, “Неъмат Аминов. “Темирчидан қолган тиллопар” китобларини тахлаб, улар ёнига “Ўзбек адабиёти намуналари”га, “Олтин девор” комедиясига саҳифалар бағишилган Покистоннинг йирик газета-журналларидан айримларини қўшдим. Юпқа фаранг қоғозга ўрадим.

КУТИЛМАГАН УЧРАШУВ

Чоршанба – муродбахш кун дея, яхши ниятлар билан барвақтроқ йўлга тушиб, Уюшма остонасидан ичкарига қадам қўйдим-у, киравериш ўнг томондаги кичкина ойнаванд қоровул қароргоҳида ўтирган, кўзимга оловдай кўриниб кетган 60 ёшлар чамасидаги кишига нигоҳим тушди.

Бу, ўша Тошкентнинг Оқтепа мавзеида жойлашганг мусиқа билим юртимизнинг “дарвозабон”-қоровули Мустафо оға эди.

У менга ўзини яқин тутар, худди тенгдошидай муомала қиласарди. Жуда босик, юрагида қандайдир дарди борга ўхшарди. Баъзан уни мен доим қўлимдан қўймай ўқиб юрадиган китоблардан И. Тургеневнинг “Муму”сидаги Герасимга ўхшатиб юборардим.

Мустафо оға баъзан чиройли картон қутичага оз бўлса ҳам соз қилиб терилган носқовоқнусха қора анжир олиб келиб, менга берар, “Буни е, ука. Худди бизнинг Қrim анжирига ўхшайди. Ҳовлида икки-уч тупуни парваришлаб ўстираман”, дерди. Негадир “Қrim” сўзини айтганда мунглироқ сас англагандай бўлардим. Бир марта билим юртини тугаллашимиз арафасида унинг суратини ишлаб берганман. Бирим хурсанд бўлгандики...

Оғанинг юзларига тикилиб, худди ўша сурат кўз олдимда гавдаланиб кетгандай бўлди.

– Ўзгармабсиз, фақат соchlарингиз сал оқарибди, холос, Мустафо оға, – дея унга қучоқ очдим.

У мени бағрига босаркан:

– Сен-да, ўша-ўшасан. Бундай учрашувни ҳеч кутмагандим, – деб пастдаги курсилардан бирига ўтқазди, чой қуиб узатди.

Гурунг асносида “хўжайн”, яъни Уюшма бошлиғи стационарда даволанаётганини айтди. Душанбаларга ишга чиқиб қолади дейишаётганмиш...

Ўзининг уйи шу яқин-атрофдаги Себзор мавзеида эканлигини айтиб, шу ерда ишлайдиган ҳамюрти, ёзувчи Сафтер Нагаев тез-тез келиб туради, деди.

Мустафо оға уч кунда бир кеча-кундуз навбатчиллик қилишини айтди. Ишни шеригига топшириб, мен билан хайрлашаркан:

– Албатта кечқурун уйга бор. Чизган суратингни келинойинг асраб-авайлаб, рамкага солиб, уй тўрига осиб қўйганини ўз кўзинг билан кўрасан, – дея адрес ва телефон рақамини ёзиб берди.

Мени қачонлардир оқ картонга қора қалам билан чизиб берган сурат қизиктиради.

Кечга томон телефон жиринглаб қолди.

– Кел, тезроқ. Келинойинг ошни дамламоқчи.

Мустафо оға кампири Мева хола билан уч хонали уйда бир ўзлари яшашаркан. Ўғли, келини уч фарзандини олиб, Қримга кўчиб кетибди. Украина ҳукумати барча ватандан айрилганларни чақириб, уй-жой, ер билан таъминлаб, ҳатто каттагина товон пули ҳам бераётганмиш.

Гурунгдошим:

– Сафтер Нагаев ҳам бориб келди. Шарт-шароит яхши экан. Менинг ўғлим ҳам келинглар, деб чақиргани-чақирган, – деб турди-да, – энди

биз қариганда қаерга борардик, шу юртнинг тузнамагини ичиб, хор бўлганимиз йўқ, – деб қўйди.

Сурат биз ўтирган меҳмонхонанинг тўрида илиғлик турарди. Унга қараб-қараб қўярдим. Айниқса, мени суратнинг бир бурчидаги имзо тагига ёзилган “12 феврал, 1960 й.” сана кўпроқ қизиқтирарди.

Хонадон соҳиби лаганда ош келтирилгач, мева-чевалар ёнида турган шишага ишора қилиб деди:

– Қуйиб берайми? Овқатдан олдин деганлари дай...

– Мен ичмайман, – дедим.

– Умуман-а?

– Умуман!

– Тўғри қиласан, ука! Умуман бу касофатни дастурхонга қўйиш одатим йўқ. Фақат сенга ўхшаш “нозик” меҳмонлар келиб қолганда, ҳурмати учун деб... Қани, ўзимизнинг ошдан қўймасин!

Овқатдан сўнг худда асал қиёмага ўхшаб ширалари йилтиллаб кўзга ташланиб турган икки тарелка қора анжир келди. Мева-чевалардан тотиб анчагача гурунглашиб ўтирдик. Оқтепадаги бизнинг мусиқа билим юртида қоровул бўлиб ишлаган пайтларини эслади. Ундан кейин Сағбондаги болалар мусиқа мактабида беш йил, консерваторияда эса, бир йил ишлабди холос. Унинг директори Петросян маҳаллий болаларни скрипкани қаерга қўйиб чалишни билмайсанлар, шунинг учун ҳеч қачон сенлардан яхши чолгучи чиқмайди деб, иккича марта камсатаётганини эшишиб, урушиб, кетиб қолибди... Ақли заиф болалар уйида қоровуллик қилиб, тезроқ пенсияга чиқибди.

– Бекорчидан худо безор деганлари дай, уйда ўтиравериб зериккандим, Уюшмада иш борлигини

айтиб қолишиди. Хайрият, энди тез-тез кўришиб турадиган бўлдик, – дея сўзини тугатди Мустафо оға.

ЮЗМА-ЮЗ

Эрталаб бошлиқ қабулига кириб келдим, қўлимдаги китоблар, журнал-газеталардан иборат ўрамани столи ёнига қўйиб, салом бердим.

Унинг кўз тикишларида худди аввалгидай ҳукмбардорлик аломати шундоқ сезилиб туради.

– Менга қара, – деди “алик” ўрнига киприклари ни пирпиратиб, икки кўзини тинимсиз очиб-юмиб, беписандлик билан назар ташларкан.

“Об-бо-о”, – дедим ичимда, – “қаердандир эрталабки “ош” зиёфатидан “тўйиб” келгани сезилиб турибди. Энди бу одам билан кўнгилдагидай гурунг қилиб бўлмайди”.

Сездимки, унинг ҳузурига “бевақт” кириб қолганман. Нима қилишни билмай тургандим, кутилмаганда:

– Ҳой, менга қара! – кўрсатгич бармоғини мен томон нуқди, – барибир ўз билганингдан қолмабсанда! Энди бошқача гаплашишга тўғри келади. Хўйш, мустақил Ўзбекистоннинг маданий-маърифий бойлиги – мулки ҳисобланувчи бадиий асарларимизни биздан яширинча, ўзбошимчалик билан чет элларга обориб сотишга сенларга ким ҳуқуқ берди? Америка доллари ҳисобидан валюта ишлаб, кимларга ҳадя этдиларинг-у, ўзларинг қанчасига эга бўлдиларинг? Анави, ўзимиздан қочиб кетгандар билан ҳам алоқа боғлагандурсанлар?..

Гап мавзуи “қалтис” тус ола бошлади. Қарасам, ҳали-вери тугайдиган эмас.

Шартта китоб-журналларни олмоқчи бўлиб, қўл чўзгандим:

– Яқинлашма. Булар балки диний ақидапарастликка чорловчи даъватномалардир. Ҳозир бунақа нарсалар кўпайиб кетган, – дея фаранг қоғозли ўрамани кайфона беписандлик билан ўзи томон тортганди, у полга тушиб, урилди ва ичидаги китоблар ҳар қаёққа сочилиб кетди.

Мен китобларни кўтариб олмоқчи бўлгандим, таҳдидона овоз эшитилди:

– Яқинлашма, деяпман. Бу ерга кирган нарса қайтариб чиқарилмайди.

Шунда беихтиёр китоблар орасида зарварағи қайрилиб қолган Навоий куллиёти муқовасидаги катта қилиб ишланган ул зотнинг нуроний суратига, унданам ёмони, шу сурат устидан шим почалари аралаш босиб турган гард-тупроқли оёқ кийимига кўзим тушди-ю, ўзимни тутиб туролмадим.

– Китобкунандалигингга ҳў, ўшанда бир марта гувоҳ бўлгандим. Ифлос оёғингни торт, Навоий бодбодан! Ҳайф, сендай гумроҳга, шоирлик! – дедимда, қорамтил тортиб, бужмайиб кетган башара-сига биринчи марта ғазаб билан қаттиқ тикилиб қарадим.

Унинг шу пайтдаги ҳолатини тасвирлашга ожизман. Агар эгаллаб турган амалию, яна “юқори даражали арбоб”лиги учун, ҳимоя қуроли ёнида бўлганида борми, ўқталиб қолиши ҳеч гап эмасди.

Бироқ, бор ғазабини сўз билан ифода этди:

– Мана шу ҳақоратларинг учун “Катта”миз олдида жавоб берасан. Энди билиб қўй, мен сени, ўша “гурухбошинг”ни ҳам тинч қўймайман. Бу даргоҳга

иккинчи марта қадам босмайдиган бўласанлар. Номларинг ўчиб, “йўқ” бўлиб кетасанлар. Айниқса, сенинг бошингга шундай кунларни солайки, анави яқин оғайнинг Рауф Парфидай уйсиз-жойсиз, қаровсиз итдай кўчада қоласан!

Шу ерга келганда ўзимни тутиб туролмадим:

– Уйинг-жойинг бўла туриб, кўчада – бетон ариқ ичида ях сувга бўкиб ётганингни, ўша итдай ўлиб кетишингга бир баҳя қолган пайтни унутдингми? Ҳеч бўлмаса, мана шу охирги гапингни айтмасанг бўларди. Сенда ўзи, шоирликдан ташқари одамгарчилик, инсоф, диёнат деган нарса борми?..

Унинг пирпираб, очилиб-юмилиб турган кўзлари бирдан чақчайганича, менга тикилиб қолди. Бошини қаттиқ силкитди, нималарнидир эслаб, ўзига келгандай бўлди.

Бироқ “таслим” бўлгиси йўқ эди:

– Қачонлардир бўлиб ўтган воқеани эслаб, “халоскорлик”ка даъво қилмоқчимисан! Билиб қўй, мени қутқариб қолган нарса обрў-эътибориму, шунга яраша машҳур дўхтирларнинг сай-ҳаракатлари бўлган! Хомтамалик қилмай қўя қол!

Мен шу топда нима қилиб бўлса-да, қоронғи зулумотга чўкиб қолгандай бу даргоҳдан тезроқ чиқиб кетишини хоҳлардим. Шошиб, ўзимни баланд, икки қанотли вазмин эшик томон урдим.

ҲАВАС ВА ҲАСАД

Бу одам билан биринчи танишувим устоз Қуддус Мұхаммадийнинг етовида илк китобим “Оқшом қүшиқлари”ни Миртемир домлага тақдим этиб, у кишининг оқ фотиҳасини олгани борганимизда бошланган. Муштарийлар ёдида бўлса керак, бу ҳақда “Қулатилган чинорлар паноҳида” асаримда эслатиб ўтилган.

Кейинги учрашувимиз ва анча яқинлшиб кетишимиznинг ўзига хос тарихи бор.

Тошкент шаҳрининг қоқ ўртасидаги Хадра майдонидан Бешёғоч мавзеига кетавериш катта йўлнинг шундоқ чап томонидаги пастқамлиқда Faфур Ғулом туғилган кўк дарвозали ҳовли бўларди. Шоир у ерда яшамаса ҳам, бундан кўпчилик фахрланар, Faфур Ғулом тез-тез “болалик ошнаси” “Қоратош” маҳалла оқсоқоли Қори аканинг баланд ишкомли ҳовлисига келиб, гап-гаштак қилиб кетарди.

Маҳаллақўмнинг ҳашамдор кошонаси (ҳозирги пайтга солиштиrsак, оддийгина уй) дан тўрт хонадон берироқда каминанинг “ижара ҳовлиси” жойлашган бўлиб, атроф қўшнилар орасида унинг “худди шаҳар паркига ўхшаш турли-туман гулларга буркангани, ўртада фонтани ҳам борлиги” ҳақида таърифли гаплар тарқалганди.

Ҳатто Қори aka ҳам бир-икки бор кириб, ҳафсалангга балли, йигит, деб чиқиб кетган.

“Қоратош” маҳалласида бир пайтлар таниқли заргар кишига қарашли бўлган каттагина бу гўша

доим оғзидан ширин сўз аримайдиган, ҳаммаси шаҳардан “чет”га келин бўлиб тушган беш қиз, беш куёвнинг “пиру бадавлат онахони”га эридан қолган мерос жой ҳисобланиб, у бу ерга камдан-кам қадам ранжида қиласарди. Ҳар келганда авваллари ўз ҳолига ташлаб, ойлаб қаровсиз ётадиган кенггина ҳовлига файзу барака кирганини кўриб, онахоннинг кўнгли равшан тортар, ҳаққимга дуолар ўқиб, мени алқарди.

Ҳовли этагидаги катта гилос дарахти остига дурдгорчиликда қўли гул жияним Ҳакимжон томонидан келтирилган сержило ёғоч каравот ўрнатилган. Унга тўшалган гилам, кўрпачаларда бемалол ўн чоғли киши ўтириб, гап-гаштак қилса бўларди.

Атрофига райҳон, номозшомгул ва чиннигуллар экилган узун бетон йўлак орқали келинадиган, йилнинг эрта баҳоридан кеч кузигача салқин ҳаво аримайдиган бу жойнинг шундоқ ёнбошидаги тононхона – уйча ичидан бир маромда қозон қайнаб, ўша ердан кобули шўрванинг иштаҳани қитиқловчи ҳиди димоққа урилиб туради.

Бундай расида ҳаёту “тўкинчилик”нинг сабаби бор эди, албатта. Аввалдан кўпчиликка маълум бўлганидек, камина маҳсус мактабда чет тилидан дарс бериш билан бирга, “Қоратош”га қўшни Уйғур кўчаси муюлишида жойлашган академик театрнинг бош рассом ёрдамчиси ҳам эдим. Ундан ташқари, Ленин портретининг энг бозори чақон пайт. Битта суратининг баҳоси катта-кичиклигига қараб, театрдан оладиган ойлигим (мен 156 сўм, Олим Хўжаев, Шукур Бурхоновдай артистлар эса 215–220 сўм олишарди) суммасидан 2-3 ҳатто, 4-5 ба-

робар ортиққа баҳоланиши ҳеч гап әмасди. Менинг бу борада ҳам ишим баравжлигини күрган, жойла-ри жаннатда бўлгур устоз Чингиз Ахмаров ҳазил-мутоиба билан баъзида “Бошқалар доҳийга бош эгиб, кунига бир марта салом берса, сен ўн марта тавоб қилсанг ҳам оз”, дея “насиҳат” қиласдилар...

Шундан билиб олаверингки, “Пулинг бўлса – чангала шўрва” деганлариdek, тенгдошларим ичидаги энг “бойвачча”си ҳамда “қўли очиғи” ўзим бўлгандан кейин, таниш-билиш дўстларга бағри очиқлик ҳам шунга яраша-да.

Дарвоқе, ҳар ошиённинг унга файз, суур бахшида этиб турадиган ўз сайроқи қушлари бўлганидек, кичкина бу масканга адабиётнинг қутлуғ даргоҳидан парвозга шайланган келиб-кетувчилар анчагина. Улар, яъни Рауф Парфи, Зоҳир Аълам, Дадаҳон Ҳасан, Эмин Усмон, Ёдгор Обид, Мұхаммад Раҳмон, Асқар Қосимов, Абдулхай Носир (унда-бунда Эркин Аъзам, Усмон Азим ҳам келишарди) кабиларнинг бошини қовуштириб, шу ерга жамлаб, адабий гурунглар ўтказиб турадиган оқсоқол даврабошимиз Миразаз Аъзам эди.

Ҳатто, бир марта кейинроқ машҳур бўлиб, Абдулла Қаҳҳордай одам назарига тушган Ўткир Ҳошимовнинг “Чўл ҳавоси” повести қўллөзмасини шу ерда мухокама қилганимиз.

Бир куни университет газетасида босилган китобим ҳақидаги мақоласини кўтариб, Ҳамидjon Раҳмонов келиб қолди. Унинг ёнида жилмайиб, ўша, Миртемир домланикида ўқиган шеър оҳанги ҳамон ёдимда қолган йигит турарди. Каравотга таклиф этдим.

У атрофдаги манзарага ҳайрат билан қааркан:

- Бу ҳовли Сизникими? – деб сўради.
- Йўқ, ижара ҳовли, – дедим.

Сурхандарёниг Қумкўрғон қишлоғидан бўлган чаққонгина илашимли йигит Ҳамиджон ўқишидан кейинги вақтини шу ерда ўтказар, ҳовлининг “келди-кетдиси”, “омборчилик” вазифаси унинг зиммасида эди. (Бу йигит журналистика факултетини битиргач, анча вақт вилоят газетасида ишлаб юрди. У билан тез-тез кўришиб турардик.)

Ҳамиджон дастурхонга нон, мева-чева қўйди. Чинни косаларда қайноқ шўрва келтирди. Фонтанча сувига ташлаб қўйилган қовунни сўйди.

Меҳмон дастурхонга қўйилган нарсаларга унча хушламайроқ қараётганини сезган Ҳамиджон ўрнидан туриб, қаёққадир ғойиб бўлди.

Хуллас, улар газетада чиққан мақолани икковла-ри “ювиб” бироз кайфлари ошиб қолди.

Шу кеча-кундуз матбуотида тез-тез чиқиб турувчи ўз шеърлари билан номи анча оғизга тушиб, танилиб қолган “эски” танишим ёстиқقا бош қўйганича пинакка кетди. Шу кеча меҳмоним бўлиб, тунаб қолди.

Кейин у онда-сонда ташриф буюрадиган, ҳатто “ҳалфана” масаллигини алоҳида пакет қофозида ўзи билан олиб келадиган бўлди.

Бир-икки марта уни бу ерда бўлиб турадиган “адабий гурунг”га таклиф этиб кўрдик. Келмади. Ҳамиджонга “Майдакашлар билан тортишиб ўтиришга тоқатим ҳам, вақтим ҳам йўқ. Улар гурунгидан берироқ юрган маъқул”, деганимиш.

Негадир у Ҳамиджон билан “яқин” эди. “Бошқа”-ларни ёқтиравермаслиги шундоқ сезилиб турарди. Ҳар тугул мени хурмат қиларди.

Шубҳасиз, айниқса ёшлар орасида оғизга тушиб бораётган бу оташнафас шоир гурунгини олиб, теран маъноли шеърларини эшитиб, маънавий озуқа олиш ҳамда ундан завқланиш одам руҳини кўтарарди. Бироқ, дастурхонда пайдо бўлиб қоладиган шиша(лар) бўшай бошлаган сари суҳбат ҳам, шеърият ҳам ўз маза-матрасини йўқотиб борар, мен бир неча марта бунинг гувоҳи бўлгандим.

Назаримда, у ижод пиллапоялари бўйлаб юқорилаб борган сари ундан завқланишнинг ягона йўли – кайф-сафода деб, билар ва бунга қатъий ишониб қолгандай эди.

Ўзига ҳаддан зиёд бино қўйиб, ўзгаларни менсимаслик одати унинг баъзида “бехосдан” оғиздан чиқиб кетиб қоладиган гап-сўзларидан сезилиб қоларди.

Бир куни шу “Қоратош” маҳалласида Faфур Fuлом таваллуд топганини, шоир киндик қони тўкилган ҳовли шундоқ йўл бўйида эканлигини айтгандим:

– Нима бўпти, оддий бир қофиябоз шоир-да. Унинг кўплаб шеърларини ҳозирги мактаб ўқувчиши ҳам ёзиши мумкин, – деганди, сал ширакайф бўл гани учунми, пинагини бузмай.

Айни шу пайт эшик қўнғироғи жиринглаб, Қори аканинг котиби бўлиб ишловчи йигит ичкарига кириб келди:

— Оқсоқолнинг уйларига Ғафур Ғулом нозик меҳмонлар билан келиб қолдилар. Шунинг учун тезда юраркансиз, — деб қолди.

Кутилмаган бу таклифдан ҳайрон бўлиб, ундан сўрадим:

— Тинчликми?

— Ҳа, тинчлик. Меҳмонлар соқолли, катта саллапари ҳам бор. Ҳиндистонлик шекилли. Таржимоннинг мазаси қочиб, келолмаганмиш.

Ҳамиджон менга ҳавас қилгандай жилмайиб қаради.

— Ана, кўпдан бери Ғафур Ғуломни бир кўриш орзусида юрардингиз. Тоғ пайғамбар олдига келмаса, тоғнинг ўзи у киши ҳузурида пайдо бўлади, деганлари шу бўлса керак.

Мен меҳмондан узр сўрагандай:

— Ҳамиджон ошга тайёргарчиликни кўравер-син. Сиз зерикмай ўтиринг. Мен тезда қайтсан керак. Кейин гап-гаштакни давом эттиrimиз, — дея йигит орқасидан йўлга тушдим.

Худди ўша кунлар Панжоб адабиётининг йирик вакилларидан бўлмиш ота-бола Гурбахш Синг, Навтекж Синглар Ғафур аканинг даъватига кўра Тошкентга меҳмон бўлиб келишган, Бешёғочдаги шоир хонадонида туришарди. Мен икки кунгина аввал бу ҳақда уларнинг таржимони этиб белгиланган таникли ҳиндунос олим, домламиз Наби Муҳамедов билан сухбатлашиб, газеталардан бирiga мақола ёзиб бергандим.

Қори аканинг ҳовлисига кириб келганимда, баланд ишком остидаги атлас кўрпачалар тўшалиб,

тўкин дастурхон ёзилган каравотда меҳмонлар билан шоир ўрталарида қизғин “мушоира” кетаётган экан. Faфур aka форсий тилини яхши билишини эшитгандим. Маълум бўлдики, бу тилдан ҳинди斯顿лик меҳмонлар ҳам ҳаминқадар хабардор бўлиб, Шайх Саъдийданми ё Мирза Бедилданми Faфур Ғулом томонидан ўқилган байтнинг ҳар қаторидаги сўнгги жумлаларга ургу берилганида, улар шавқ билан “ваҳ-ваҳ” дея, ўз ҳайратларини изҳор этиб қўйишарди.

Ниҳоят, хонадон соҳиби “Ўзимизнинг маҳалладан, Сизга бир марта айтгандим, ёзиб турадиган йигит”, деб мени Faфур акага таништириди.

– Ҳе, бормисан, ука, бу меҳмонлар билан “тиллашаман” деб, энка-тенкам чиқиб кетди. Аксига олгандай, анави таржимоннинг бетоб бўлиб қолганини қара- я! Қани, бир ҳунарингни кўрсат-чи.

Меҳмонлар билан дарровгина “тил топишиб” олдик. Faфур aka менга бир кўз ташлаб:

– Бало экансан-ку, йигит, – дея сўзида давом этди. – Анави, кечаги зиёфатда кўпроқ нўш тортиб юборганми, шундан бўлса керак, бирдан қорни “бураб” қолган тилмоч Набижонни сарфишдан келган ранг-рўйи ўзимизга ўхшарди. Сенинг кўринишинг, туришинг, бийрон тиллашишларинг эса... Илгари Тошкентнинг ҳов нарироқдаги Хадра майдонида манави меҳмонларга ўхшаб, ҳар куни эрталаб соқолига бир соат зеб берадиган шоҳона саллали ҳинд саррофлари бўларди. Мободо ўшаларнинг зурриётидан эмасмисан?

Шоир бу гапларни ҳазилнамо қилиб айтаётган бўлса-да, у киши билан биринчи бор рўбарў тур-

ганим учунми, аҳволимни тушуниб етган Қори aka жонимга оро кирди:

– Ғафуржон, бу йигит асли ўзимизнинг Наманғандан! Ҳиндча билимни шу ерда ўқиб, ўрганган. Ҳозир мактабда шу тилдан дарс беради.

– Нима, ўша саррофлар Наманган қаердалигини билмаган дейсизми...

Ўртада кулгу кўтарилиди.

Меҳмонлар гап маъносига қизиқиб, мендан таржима қилишни сўрашди.

Улар Ғафур аканинг инқилобдан кейин ҳам анча вақтгача мана шу ерга яқин жой – Ҳадра майдонини эгаллаган катта бозорда ўз мазҳабларига мансуб “саидар жи” – ватандошларининг дўконлари бор бўлиб, “рупия”да bemalol савдо-сотиқ қилишгани, буни шоир болалик пайтида ўз кўзи билан кўргани ҳақидаги ҳикоясини қизиқиб тинглашар, Навтекж соҳиб уни тез-тез дафттарга тушириб оларди. Бу мен учун ҳам бутунлай кутилмаган янгилик эди...

Суҳбат энг қизиб турган бир пайтда дарвоза олдида машина тўхтаб, ичкарига Наби aka кириб келди.

Икки меҳмон одатларига кўра хурсандчилик аломати – ёзилган кафтларини ҳаволатиб, у кишига қаратишиди:

– Шабаш! Шабаш! Тандурусти! – дея олқишлиган бўлишди.

...Мен ҳовлига кириб келганимда Ҳамидジョン ошни сузишга тайёргарлик кўрар, шоир меҳмоним кайфияти анча чоғ бир ҳолатда ўтирас, дастурхон четига думалатиб қўйилган шиша яримлаб қолганди.

– Қалай, Ғафур Ғуломдай шоирнинг ўзини кўролдингизми? Бундек, сўрашиб, мулоқот ҳам қилгандурсиз?

– Э, нимасини айтасиз. Суҳбатларини эшитиб, таржима қиляпман-у, ҳайратга тушаман. Ғафур ака бутун бир тарихнинг очилмаган саҳафаси экан. Яқинда мана шу ерда бўлган гурунгда у кишининг “Танланган асарлар”идан ўрин олган Қурбонжон доддоҳ Момо ҳақидаги катта мақоласини ўқиб, ҳар ким ўз фикрини билдирганди. Ўшанда “Бу Онахон Туркистоннинг қайғу ва алами. Катта китобга мавзу. Ҳали кўп асарлар яратилади”, дея бор гапни лўнда қилиб, Райф Пафи айтганди. Ғафур Ғуломнинг бугунги гаплари ҳам янгилик бўлди. Яқингача Ҳиндистон пули рупия ўзимизда муомалада бўлган экан.

– Совет давридами?

– Йигирма учинчи йиллар Совет даври ҳисобланса, ўша даврда-да! Кейин негадир йўллар беркитилиб, алоқалар узилган. Энди, мана бунга ишонаверинг, Ғафур Ғуломнинг ҳозиргина менга ёзиб берган дастхатли китоби, – дедим-да, қўлимдаги янги нашрдан чиқсан “Шум бола” асарининг ички варагини очиб, меҳмонга кўрсатгандим, у йирик ҳарфлар билан ёзиб, шоир имзоси чекилган вараққа узоқ тикилиб қолди. Кўзига яқинроқ келтириб, ўқиб чиқди. Сўнг менга қаради:

– Қандай омадли одамсиз-а! Мана, китобингиз чиққанига бир йил бўляпти! Пулингиз кўп, шунинг учунми? Меникини эса, текшириб ётишибди. Менда ҳам пул кў-ўп! Ахир машҳур раиснинг ўғлимани. Мана, улар! – у бир даста пулни ён чўнтагидан чиқариб, кўрсатди, – айтинг сирини, тезроқ чиқа-

ришнинг йўли борми? Ё, одам оёғи етмас қирлар ичкарисида минг-минглаб отар қўйлари бор акала-римни чақирайми? Мана, Ғафур Ғуломдай одамнинг назари тушибди Сизга! Энди биз йўл-йўриғини билмаймиз, саҳройимиз-да...

Ҳамиджон ўчоқбошидан лаганда ҳовури кўтарилиб турган ошни олиб чиқиб, дастурхонга қўяркан:

– Ҳой, шоир, – дея кайфи ошиб, сал “қизишиб” қолган меҳмон ҳоврини босмоқчи бўлди, – бизам Сурхоннинг чўл-биёбонларида колхознинг қўй-қўзиларини боқиб, катта бўлганмиз. Лекин, биронта отаримиз, катта боғламли пулимиз ҳам йўқ. Бир амаллаб ўқиб юрибмиз, ошна. Шеърларингни давруғи баланд. Китобинг ҳам чиқиб қолар. Сабр қилсанг-чи!

– Сен ҳам шундай дейсан! Мени кимдан камчилик жойим бор? Мен ўз қадримни яхши биламан. Бошқалар ҳам билишини хоҳлайман. Бунинг нимаси ёмон? – у бирдан мени қўли билан кўрсатиб, – Мен яхши биламан. Мана бу дўстимизнинг яқинда иккинчи китоби чиқади. Кўп ўтмай, учинчиси ҳам!.. Ана ундан кейин Союз аъзоси бўлади. Мен-чи... нима камчилик жойим бор?! Ҳамма ёзганларимни ўқияпти, мақтаяпти. Итнинг орқа оёғидай судралиб юравераманми...

Мен бир оғиз ортиқча сўз айтмай ўтиравердим. Ҳозирги пайтда бефойда эди. Ош ҳам совиб бўлди. Бир-икки қошиқдан едик, холос.

Бир пайт у ўрнидан турди:

– Чилонзордаги ижара уйимга кузатиб қўй, – деди Ҳамиджонга. Ва мен билан хайрлашмай ҳовлидан чиқиб кета бошлади.

Шунда бу одамнинг тушуниб бўлмас феъли бор-лигини англаб қолдим. Унда ҳасад туйғуси кўпроқقا ўхшарди.

Кўп ўтмай, китоби чиқди. Ҳатто Ғафур Ғуломнинг назарига тушди. Тақризчилар унинг ижодига юксак баҳо бера бошладилар. Уюшма аъзоси бўлди. Кетма-кет асарлари босилди. Мукофотлар олди. Худди бир пайтлар ўзи орзу қилганидек, унинг қадри йил сайин сарбаланд бўлиб бораверди.

Ўзаро алоқаларимизга қандайдир совуқлик тушгандай эди. Ҳар кўрганда салом-алик қилишдан нарига ўтмасдик.

ҚҮНИ-ҚҮШНИЧИЛИК

1970 йилнинг бошларида Тошкентнинг “Марказ-1” мавзеида янги “Ёзувчилар уйи” барпо этилиб, менга ҳам бошпана беришди.

Ҳозир анча обрў-эътиборга молик, ҳукуматнинг назарига ҳам тушган шоир танишим Чилонзордаги торгина, квартирасидан тўрт хонали ёруғ ва шинам уйга кўчиб келди. Каминага “сўққа бош”лиги сабаб бир хонанираво кўришганди. Ҳар қалай ижара эмас, ўз уйинг бўлганига нима етсин!

Энди мендан икки қават пастда турадиган қўшним билан алоқаларимиз анча самимий, дўустона тус ола бошлади. Албатта, бу тоифа, элга таниқли кишиларнинг айримларида ўзига хос инжиқликлар бўлади. Унинг ҳадди сиққанидан қиладиган “эркаларлари”ни кўтаршга тўғри келади.

Бир пайтнинг ўзида енгил машина сотиб олгандик. Ярим йилга етмай қаттиқ маст ҳолда уни бошқариб, “авария ҳолати содир этгани учун” ҳайдовчилик гувоҳномасидан маҳрум қилишди. “Юқори”дан аралашганлар бўлди, иш битмади. Шундан кейин ҳамқалам қўшнимнинг қаерга деса, кетаверадиган беминнат шоферига айланиб қолгандим. Қашқадарёдаги Некўз қишлоғи-ю, Сармарқанддаги акалариникига, яна аллақаерлар дейсизми... биз бормаган жойлар қолмаган... Айниқса, Сурхон воҳаси бўйича област газетасининг “махсус муҳбири” бўлиб ишлаётган Ҳамидjon Раҳ-

моновнинг она қишлоғидаги атрофи очик, кенггина, бироқ йил қурғоқчилик келгани учунми, дарахтларнинг кўпи қуриб, ўт-ўланлар қовжираб ётган ҳовлисига кириб келганимиз заҳоти кўнгли анча нозик, хашамни ёқтирадиган шеригимга бу жойлар маъқул тушмай, қайтамиз, деб қолади, деган ўйда эдим. Ваҳоланки, бўйра, унинг устидан кигиз тўшалиб, токча деворлари лойсувоқ қилинган кенггина дахлиз ичкарисидаги уй меҳмонга маъқул тушиб қолди. “Бор экан-ку, ўзимизнинг эски удумда қурилган бундай уйлар”, дея тўрдан жой олди.

Аввалдан хабардор эканларми, зум ўтмай Ҳамиджоннинг таниш-билиш, яқин оғайнилари ёпирлиб келиб қолиши. Улар ичида мактабда бирга ўқишиган собиқ синфдошлари ҳам бор эди. Семизгина қўчкор сўйилди. Машҳур шоир шарофати биланми, ҳовли гавжум бўлиб кетди. Айниқса, дастурхонга файл кириб, унга қўйилган ичкиликларнинг мўллиги-ю, хилма-хиллигини айтмайсизми. Қорнига ярим ялонғоч ҳинду аёлининг сурати туширилган ёрлиғи бор “Портарика роми” ни биринчи кўришим. Меҳмон шоир ҳам шундан ҳайратлангандай, шишани қўлига олиб, “қорни”даги суратга бир зум кўз ташлаб қўиди.

Шундай олис бир чеккадаги қишлоқни шаҳарларда ҳам камёб ҳисобланувчи бу тур “маҳсулотлар” таъминоти билан жиддий шуғулланувчилар борга ўхшарди.

Меҳондорчилик яқин-атрофдан, ҳатто тумандан келиб-кетиб турган “мухлислар” билан нақ тўрт кунга чўзилди. Шу кунлар ичида ҳурматли шоирнинг “вақти бўлмай” қаерлардадир белгиланган иккита “учрашув”ни ҳам қолдиришга тўғри келди.

Ҳар тугул Ҳамиджоннинг анчага чўзилган меҳ-мондорчилиги тинч-тотувлик, дўстона хайр-маъзур билан тугаганди. Энди бу ёғига минг чақиримча йўл босиб, уйга қайтиш азобини ёзмай қўяқолай.

ЯХШИЛИК ВА ЁМОНЛИК

“Қүшним”нинг бугунги китобларга нисбатан қилган “шаккоклиги” ҳамда кайф устида бехосданми, “яхшилик”ни ҳам ғайрликка менгзаб айтиб юборган сўзлари унинг “хизмати”ни қилиб, ўзим гувоҳи бўлган кўпдан-кўп воқеаларни кўз олдимда гавдалантириб юборди.

“Юқори”нинг “эркаси” бўлганлиги учунми, уни меҳмонга чақирувчи казо-казолар кўп бўларди. Бироқ, дастурхон устида “ўйиндан ўқ чиққач”, нима қилишини билмай, она сути оғзига келтирилган мезбон иккинчи маротаба бундай “бемаънигарчиллик”ни қилмасликка онт иcharди. Ўзим бунинг кўп гувоҳи бўлганман. Ҳеч ким унга қаттиқроқ гапиролмасди. Гапириб, обрў топмаслигини ҳамма биларди.

Лекин, тўйтепалик яқин “адаш” шоир оғайниси бўлиб, тез-тез, ҳовли боғдан деб, мева-чева келтириб, уни йўқлаб турарди. Шу йигит қўшним билан bemalol “сен”лашиб, пайти келса “баландроқ” туриб гаплаша оладиган, афтидан ўзига ишонган чапанитабиатроқлар тоифасидан эди. Бир неча бор қўшнимнинг “попугини пасайтиб”, шаштидан тушириб қўйганини гувоҳи бўлганман. Яна у “адаши” билан гурунг қилиш “меъёри”ни яхши англа, унинг милтиллаб турувчи икки кўзи пирпирай бошлагач, дарров ўрнидан туриб кетиб, “бўлди, энди бу ёғига сен билан гаплашиб бўлмайди, омон қол” дерди-да, этагини қоқиб, жўнаб қоларди.

Бир воқеа рўй берди-ю, улар бутқул юз кўрмас бўлиб кетишди.

Ўшанда тўйтепалик “адаш”нинг янги чиқсан китобини “юваб” анча вақт ўтиришди. Бирдан хона-дон эгасининг кўзлари ҳали пирпираш даражасига етмаёқ, “феъли” айниди; ўзининг ягона шоир, бошқалар ҳаммаси “лўттивоз, ҳаваскор” эканлигини айтиб, “даҳо”лик даъвосини бошлаб юборди. Бир маҳал онда-сонда “сен яхши шоирсан” деб бағрикенглик қилиб қўядиган меҳмон оғайнисига ҳам бошқача қарашиб, шундоқ ёнида турган унинг китобини мижиқ-лагандай, вараклаб кўрган бўлди-да, “бу ерда нималар ёзилган ўзи? Шеър деб, ҳар нарсани бостираверар экансан-да! Сенам ўзингни шоирман деб юрганингга ҳайронман! Б-бу, бу китобингга би-иласан-ми... нима қилишим мумкин. Сарғайган афтингни бужмайтириб, қарама менга, устимдан кулаётгандай... Ишонмайсан-а... Мен ҳақиқий шоирман. Чидасаларинг шу! Чидамай ҳам кўрларинг-чи... Шунинг учун бундай китобчаларингга тупуришим мумкин. Мана-мана...” У кутилмаганда оғзидағи сўлагини китоб устига сачратди. Меҳмон ўзини тутолмай, ўрнидан сакраб турди. “Китобни ҳаром қилдинг!” Сўнг “Ха, сен шоирсан, катта шоирсан. Лекин, шайтон ҳам барчанинг ақл-ҳушини олиб, бузғунчилик қилавергани учун жаннатдан ҳайдалгунча сенга ўхшаш катта шоир бўлган. Сен унданам ёмонроқ иблиссан”, дея хонадан чиқиб кета бошлади.

“Дўсти” унинг орқасидан “Ҳали шу ҳақоратларинг учун жавоб берасан. Рано Ҳабибовнага айтиб, ўзинг билан уруғ-аймоқларингни ҳам йўқ қилдириб ташлайман”, деганича қолганди.

Иккинчи воқеани эслаш мен учун анча оғир. Бир куни Уюшмада раис котибаси бўлиб ишловчи, ҳаммага бирдек очилиб-сочилиб қиласидиган муомаласи билан кўпчилик ҳурматини қозонган, ҳатто, кўнгли очиқлигидан ўзига яқин тутадиган кишилардан “идоравий сир”ни яшириб ўтирумайдиган Барнохоннинг саволига ҳам аниқроқ жавоб беролмаганман.

Ўшанда бошлиқ юбилейини нишонлаш учун кенг қўламли тайёргарлик кетарди. Албатта, бу хил тантана элга “ош бериш”сиз бўлмайди. Котиба тақлиф этиладиганлар номини айтилгандай рўйхат қилиб, раис олдига олиб киради. Унинг кўзи биринчи варакдагилар орасида менинг номимга тушиб қолади-да, “Бу кимса нима қилиб юрибди бу ерда?” деб, қизил қалам билан шартта ўчириб ташлайди.

Бундан фаромуш бўлган котиба охир мендан сўради:

– Сиз у кишига нима ёмонлик қилгансиз? Яна, нима учун, Эркин ака Воҳидовдай одамни ҳам унча ёқтиравермайдилар?

– Эркин ака учун бир нарса айттолмайман-у, Барнохон, мен бир пайтлар яхшилик қиласман деб, ўз бошимга бало орттириб олганимни айниқса, шу кунларда тушуниб етаяман. Ҳамма жойдан номим ўчириляпти. Лекин, қилган яхшилигимдан афсусда эмасман. “Оши бошида” қолсин-у, майли, менсиз ўтадиган юбилейлари кўпаяверсин, – дегандим унга жавобан.

“Маликушшуаро” мартабасидаги одамнинг бугунги айтган гаплари, айниқса “хомтамалик қилмай қўяқол”, дегани юрагимга урилган тиғдай бўлиб

санчилди. Бир пайтлар, Ўзбекистоннинг фахрли ва энг машҳур, ёши улуғ шифокорларидан бири ҳисобланувчи ҳурматли отахоннинг насиҳатомуз қилиб айтган сўзларига амал қилиб, индамай келардим.

Энди эса, “Пичоқ бориб сүякка етгач...” яна бир “нохушлик” баёнини айтиб ўтишга мажбурман.

Балки бу кимларгадир ёқмас! Ўша, “кечирувчан” бўлишиликни доим уқтириб турадиган валломатлар бир лаҳзагина ўзларини менинг ўрнимда қўйиб кўрсинглар-чи...

Бу воқеа етмишинчи йиллар ўрталарида, сўнгги куз ойининг охирлари совуқ одатдагидан қаттиқроқ келиб, ҳаммаёқни ўз ҳукмига олиб турган аёзли кечалардан бирида содир бўлганди. Мен машинани ташқаридаги майдонча четида қолдирдим-да, ичкарига кирдим. Вақт алламаҳал бўлиб қолган, лифт ишламас, бу ҳам етмагандай, доим катта эшик ёнбошидаги мўъжазгина ўз хонасида ўтирадиган “лифтёр-қоровул”лик вазифасига масъул Вера Николаевнанинг қораси кўринмасди.

Зиналар бўйлаб юқорига кўтарилидим-у, олтинчи қават яланглигига нимталанган гўшт бўлаклари сочилиб ётгани, улардан катта бир сүяк лифтнинг икки эшиги орасида туриб қолганига кўзим тушди. Нарироқдаги қўшним хонасининг эшиги ярим очиқ ҳолатда эди.

Дарров эсимга тушди: ҳар ойда бир-икки марта Воҳа, яна аллақаердан бутунлигича сўйилган қўй танаси шоир хонадонига мунтазам келиб турар, уни уй бекаси нимталаб, баъзан ортганини бизга ҳам чиқараарди.

Түғри, ҳар бир хонадонда нимадандир тушун-мовчилик орқасида жанжал чиқиши табиий ҳол. Бироқ, қўшнимнинг қаттиқ мастилик пайтида кўтариб турадиган жанжали “бошқачароқ” бўлар, баъзида рафиқаси бизнидан бошпана топар, ҳатто “қишлоққа кетиб” қолган пайлари ҳам бўларди.

“Бу сафаргисига гўштнинг нима алоқаси бор?” деган ҳаёл билан суюкни бир амаллаб, тортиб олгандим, лифт эшиклари тарақлаб ёпилди-да, “ишлаб” кетди. Бундан беҳабар тинчимас кампир қўшни “дом”ларнинг қайси биридадир яшайдиган устани чақириб келишга кетган, шекилли.

Нимталангтан гўшт бўлаклари оралаб ўтиб, қия очиқ турган эшик қанотларига кафтим билан уриб кўрдим, қўнғироқни босдим, ҳеч ким жавоб бермади. Ичкарида ҳам бесарамжонлик. Бирон инсон зоти кўринмасди.

Рафиқам гўштларни йиғишириб, сирли идишга солди. Яхшилаб чайиб, қўшнимизнинг ғириллаб ишлаб турган катта “Днепр” холодилниги ичига жойлади.

Унгача мен телефон орқали “Талабалар шаҳар-часи”даги “Маданий-оқартув техникуми”-да ўқиб, ўша ердаги талабалар ётоқхонасида яшайдиган келиннинг жияни Амир билан боғланмоқчи бўлдим. Лекин анча кеч кириб, навбатчи ҳам ухлаб қолганми, ҳеч ким жавоб бермади.

Эшикнинг калити йўқ эди. Зичлаб ёпиб қўйдик. Ким ҳам киради. Кампир Вера Николаевна тушмагур ўта қаттиқ қўл. Амир дастлаб келган пайлар ҳужжатини текширавериб, безор қилган.

Барибир ҳар куни кўз-кўзга тушиб турадиган ҳамсоянгнинг уйи очиқ-сочиқ ётганидан хавотирга

тушаркансан. Кечаси икки-уч марта уйғониб, ундан хабар олиб қўйдим.

Ниҳоят, иккинчи куни кечга томон ётоқхона на-вбатчиси гўшакни кўтариб:

– Амир хонасида йўқ. Жавоб сўраб, янгаси билан қишлоққа кетган, – дея жавоб қайтарди.

Хонадон соҳиби, шоир қўшнимдан ҳам ҳеч қандай дарак йўқ эди. Танишларидан бировининг уйида “нўш” уриб ётганмикан! Унинг бунаقا баъзи “яқин”ларига қилиб турадиган “эркалик” одатлари ҳали ҳам қолмаганлигини яхши билардим.

Бирдан, ўшлар нашриётида ишловчи Носир ака Фозилов эсимга тушиб, телефон рақамини тердим.

У киши:

– Ҳа, шоир! – деди-да, саволимга қисқагина жавоб қайтарди. – Қўшнинг бизникида “қўноқ”да эди. Зериқди шекилли, бир айланиб келай деб, чиқиб кетганича ҳали қайтгани йўқ. Балки, уйига бориб қолар.

Соат кеч ўн бирлардан ўтганда, кетма-кет қўнғироқ чалиниб қолди.

Эшикни очдим-у қоровул аёлнинг ҳаяжонли сўзларини эшитдим:

– Там, в арике Ваш родственник мёртвий лежит!

Бундай пайтларда шифокорлар ўзларини қандай тутишни яхши билишади. Рафиқам шоша-пизша керакли асбоб-ускунали жомадончаси билан тахмонда турган иссиқ адёллардан бирини менга тутди, иккинчисини ўзи қўлтиқлади. Кампирнинг орқасидан чопдик.

Чинданам, консерватория биноси қаршиси-даги кичкина темир чархпалак ўрнатилган, устини муз қоплаган бетон ариқда узала тушиб қўшнимиз

ётар, унинг туфлисиз бир оёғини шим почаси ара-лаш муздай сув ювиб турарди.

Нимжонгина гавдани осонгина тепага олиб чиқ-дик. Томирлар уришини текширган рафиқам жон-сизликданми ёки мастиликданми, эс-ҳушини йў-қотганиданми, қимир этмай ётган қўшнини адёлга ўраб-чирмади, тезда боши, бели ва оёқ томонидан қўлтиққа олиб кўтарганча уй томон чопдик.

Лифтга бир амаллаб чиқараётганимизда инқил-лиган овоз эшитилди.

Рафиқам юзида “хайрият” дегандай, мамнунлик аломати пайдо бўлди.

Ўзи бош врач ўринбосари лавозимида ишлай-диган район марказий поликлиникасининг “Тез ёр-дам” навбатчилик бўлимига қўнғироқ қилиб, вази-ятни тушунтириди. Вақт тифизлигини айтди..

Унгача мен анча кеч бўлиб қолганига қарамай, шундоқ яқингина, “Болалар дунёси” уйлар мажму-асида турадиган ТошМИнинг тиббиёт ҳам адабиёт илмидан яхши хабардор профессор домлалари-дан, институтнинг “Медик” газетасига муҳаррирлик қилувчи Отаулла Оқилов хондони эшигини қоқиб бордим. У киши ўзини қўшнимнинг яқин муҳлислап-ридан деб биларди. Апил-тапил кийиниб, орқамдан йўлга тушди.

Бемор ҳали ҳам ҳуши бор-йўқ аҳволда бўлиб, зудлик билан етиб келган навбатчи шифокорлар-нинг хатти-ҳаракатларига қарамай, тана ҳарора-тида ўзгариш сезилмасди.

Тиббиётчилар таъбири билан айтганда, бу ўта хатарли ҳолат ҳисобланарди.

Отаулла ака иккимиз, гарчи бемаҳал бўлса-да, катта кўчанинг нариги томонидаги қўшни “дом”-

лардан бирида турадиган Тошкент Тиббиёт институти ректори Комилжон Зуфаровни (ўзбек тиббиёти соҳасида янгилик яратган бу олим ҳақида Отаулла ака билан ҳамкорликда ёзган катта мақоламиз салгина олдин “Гулистон” журналида босилиб чиққанди) бу нохуш ҳодисадан хабардор этдик.

Бир соатга етиб-етмас вақт мобайнида ўз соҳаси бўйича энг тажрибали шифокор мутахассислар етиб келишди. Унгача бемор “кризис” ҳолатидан чиққан, анча ўзига кела бошлаган эди. Муолажани давом эттириш учун уни институт шифохонасида тайёрлаб қўйилган маҳсус палатага олиб кетилди.

Эртасига эрталаб рўй берган бу воқеадан ёзувчилардан доим кўз-кулоқ бўлиб турадиган, зарурат туғилиб қолса, улардан ҳеч қачон қўлидан келадиган ёрдамни аямаслик одатини устоз Абдулла Қаҳҳорнинг “шахсий шифокори” бўлиб ишлаган пайтдан буён давом эттириб келаётган, ўз касбining фидойиси Шабот ака Хўжаевга етказдим. Дарвоқе, у киши ҳам яқин қўшнимиз эди. Домла тезлик билан бемор ётган палатага кириб келди.

Даволовчи шифокорлар беморнинг “Касаллик тарихи” баёнини кўпни кўрган устозга маълум қилишди. Шундан сўнг Шабот ака ректор Комилжон Зуфаров билан алоҳида хонада маслаҳат гурунги ўтказиб, муолажа ишларига масъул этиб тайинланган уч кишига, жумладан каминага ҳам, ҳар хил гап тарқаб, шоир, қолаверса, адабиётнинг Қаҳҳорона намоёндалари шаънига соя тушмаслиги учун “Касаллик” сабаби “Бемор қаттиқ шамоллган ҳолда касалхонага олиб келинди” деган сўзлар билан бошлаб, шу асосда муолажани давом эттириш зарурлиги уқтирилди.

Шунда Шабот ака құли билан мен томон ишора қилиб:

– Бу хизмати учун тақдирланиши лозим эди-ю, майли, күпчилик меҳрини қозонаётган бир шоирнинг ҳаёти ҳар қандай тақдирлашларлардан ҳам юқори эканлигини унутмаслик керак, – деб қўйди.

Бир неча кундан сўнг қўшним “шамоллаш” касалидан фориғ бўлиб, уни уйга олиб кетишга ўзим келдим. Отаулла Оқилов даволовчи шифокор билан бизни кузатаркан, машинага ўтираётган қўшнимга мени кўрсатиб:

– Қўйилган ташҳисларга кўра, ҳаётингиз қил устида турган бир пайтда, мана шу ҳамсоянгиз ва унинг рафиқаси, яъни бизнинг ўқув даргоҳимизда таҳсил олган шифокоримиз биринчি зарур тиббий ёрдамни кўрсатиб, устоз Шабот Хўжаевич айтганлариларидек, катта мукофотга лойиқ иш қилишган. Бу мукофот шоирона тил билан айтганда, Сизга туҳфа этилган – катта ҳарфлар билан ёзилувчи Ҳаёт! – дея ўз табиатига хос эҳтиросли сўзини айтди-да, қўшиб қўйди, – шуни унумтманг, ука!

Хиндларда “Номарднинг ҳиммати – бошингни ёрап” деган ҳикматли сўз борлигини эшитганман. Шунга кўра, мен бирон кимса томонидан кўрсатиладиган ҳар қандоқ “ҳиммат”га асло муҳтож эмасман. Кераги ҳам йўқ.

Бироқ, баъзида яхшилик билан ёмонлик тўқнашган жойда кўпчиликнинг бепарволигидан иложсиз, нотавон аҳволга тушиб қолганинг одамга алам қиларкан. Ана шундан сўнг, устозларнинг оқилона берган маслаҳатларига ҳам шак келтиришга мажбур бўлиб қоларкансан.

ХУДБИНЛИК ГИРДОБИ

Қўшнимнинг бу даражада ғазаби жунбушга келишининг ўз сабаблари бор эди, албатта. У шеърият осмонида бир ўзи порлоқ юлдуз бўлиб порлаб туришни истарди. Бунга ўзим кўплаб гувоҳ бўлганман, бошқаларга ҳам яхши маълум.

Аммо, мен шеъриятимиз фахри ҳисобланувчи бир-биридан бекиёс икки навқирон, порлоқ юлдузни ёнма-ён чарақлаб туришини жуда-жуда истардим. Ва бунга кўп ҳаракат қилиб кўрдим.

Қўшним баъзида мени ўзига яқин тутиб, “сен барабир ишончли дўстимсан” деб қўядиган кунларнинг бирида шундай дедим:

– Ораларингда талашадиган ота мерос мулк бўлмагандан кейин, келинг, икковларингиз бир дастурхон атрофига ўтириб, дилкушо суҳбат қилиб олинглар... Биласиз, доим Саид Аҳмад ака, Ўткир Ҳошимов, Эркин акалар билан Водийга сафар қилганимизда орамизда ўрнингиз йўқлиги билинди. Сиз ён қўшним, Эркин ака яқин акам. Икковингизга хизмат қилиш бошқача-да!

Гапим унга маъқул тушди.

Хатто:

– Тўғри айтасан. Орамизда талашадиган нима ҳам бор? – деб қўйди.

Бу “янгилик”дан бир қават пастда турадиган ҳамсоям Уюшма партия ташкилоти секретарининг ўринбосари Эркин Носировни хабардор этиб;

– Ўзингиз ҳам “ярашув” дастурхони устида иштирок этасиз, адашингиз рози бўлдилар. Мана шу келаётган жума куни кечки пайт бизнида ўтирамиз, – дедим.

Эркин ака анча босик, мулоҳазали одам эмасми:

– Яшин домла амалга оширомай келаётган ишни сен уддалай олармикансан! Ниятинг яхши-ю, иш қилиб, уялиб қолмасанг бўлгани, – деб қўйди.

Чиндан ҳам шундай “үятли” ҳолат юз берди. Қўшним айтилган вақтда чиқавермади.

Телефон қилгандим, уйидагилардан:

– Нурали Қобул билан ҳозиргина кимнингдир тұғылған кунига кетишиди, – деган жавобни олдим.

Алламаҳалгача икки Эркин ака билан учовлон чақчақлашиб ўтирдик. Олтинчи қаватдан чиқиши лозим бўлган меҳмон номини тилга олиш ҳеч кимнинг ҳаёлига келмади ҳам.

Барibir одам яхши умидлар билан яшайди. Вақт ўтган сари гина-кудуратлар унутилади.

Тұнғич фарзандимизнинг беш ёшга тўлган куни эди. У ёз ойлари қўпроқ Эркин ака ҳовлиларида бўлар, қизлари қаторида эди. Туғылған куни билан табриклаб, Эркин ака, келинойи келиб қолишиди.

Қўшним уйида экан, меҳмонлар келишганини айтиб, таклиф қилгандим, албатта чиқаман, деди.

Анча вақт ўтди ҳамки, дарак бўлавермагач, яна ўзим пастга тушдим.

Кимдир бирров келиб кетган шекилли, дурустгина кайфи бор.

– Менга қара, ука, – деди у мастона кўзлари билан ғалати қараш қилиб, – бунақа ўртакашлигингни қўй! Аканг келган бўлса, келгандур. Хў-ўш, нима

бўпти? Қуллуқ қилиб, кап-катта бошим билан мен чиқайми? У ҳамма қатори бир шоир! Ҳадеб уни мен билан тенглаштираверма... Кейин, ҳалигинаقا... сиёсий қарашлари ҳам анча шубҳалироқ... Абдулла Қаҳҳор бўлмоқчи шекилли... Майли, гап-гаштакни ўзларинг қиласавер. Нормуродни биласанми, ҳўй, цекада ишлайдиган... Ўша келганди, пича гурунглашдик. Сал мазам йўқроқ.

Эртасига якшанба куни аzonдан “Ёзувчилар уйи” биноси бўйлаб, ваҳимали гап тарқади; шоирни кўролмайдиган ҳасадгўйлардан бири кеча кечаси келиб, унинг олтинчи қаватдаги олди очиқ балконига қандайдир таблеткалар сочиб кетибди. Докторлар келиб, текшириб кўришса, вишшиллаб, заҳарли буғ чиқарибди... Қўшним милицияга ариза билан мурожаат қилибди, Рано Ҳабибовнанинг шахсан ўзи бу “иш”ни назорати остига олганмиш.

“Миш-мish” уч кунча давом этди-ю, тезда барҳам топди. “Айбор” аниқланмади. Лекин, кимга ишора эканлиги айрим одамларга маълум эди.

“Ўзбекистон маданияти” (ҳозирги Ўзбекистон адабиёти ва санъати”) газетасида таниқли мунаққид олимнинг “Ҳаётбахш дарёлар” номли мақоласи эълон қилинди. У адабиётимизнинг фахри бўлиб қад тиклаётган кўпчиликка маълум ва машҳур икки шоиримиз ҳақида ёзилган бўлиб, бири Амударё бири Сирдарёга қиёсланган, рамзий ташбеҳлар асосида улар ижоди нозик дид билан юксак савияда таҳлил этилганди. Ҳузур қилиб, ўқиб чиқдим-у, газетани олиб, қўшним олдига тушдим.

У мақолага югурик бир кўз ташлаб чиқди-да, юзлари жиддийлашиб, столи ёнидаги телефон рақамини тера бошлади:

– Кимсан? Биш редактор шу ердами? Йүк!.. Ҳа, майли, кейинроқ ўзим гаплашиб қўяман.

Сездимки, қўшним мақоладан ранжиди. Шубҳасиз, ўзини кимга тенглаштирилгани боис, редакторнинг асабини анча-мунча эговламоқчи...

Мана шундан сўнг, бу “икки дарё” бутунлай бир-бирига тескарилиги, улар ҳеч қачон бир-бирини тўлдириб, ҳамжиҳатлик билан оқа олмаслигига кўзим етганди.

Дарвоқе, бесамар кетган менинг урунишларимдан сўнг ҳам обрў-эътиборли кишилар томонидан бу икки дарёни бирлаштиришга ҳаракат бўлди. Яъни, Эркин Воҳидовнинг 70 йиллиги (Фарғона ва Олтиариқдаги шоирнинг ўзисиз ўтказилган юбилейдан сўнг) камтарона суратда (таклифномаларнинг анчагинаси тарқатилмай) миллий давлат академик драма театри биносида ўтказилаётган пайт, таомилга кўра Уюшма раиси табрик нутқи сўзлаб, юбилияр шаънига анча-мунча мақтовли сўзлар ҳам айтиб юборди. Бу шу тадбирни фаолларидан бўлган адабиёт ва санъатнинг бир гурӯҳ жонкуярлари эътиборини дарров ўзига жалб этиб, улар икки шахс орасида дўстлик-биродарлик ришталарини боғлашдай савобли ишни амалга ошириш пайти келганини англаб қолдилар.

Театр директори, таниқли артист Ёқуб Аҳмедов ўз хонасига 10–15 кишига мўлжилланган дастурхон тузади. Тадбир “ҳомий”лари тантанали кеча тугагач, эл эъзозидаги шоирларни шу ерга таклиф этишди.

Қадаҳлар кўтарилиб, улар шаънига кўп яхши гаплар айтилди. Сарпо кийдирилди. Бу ўтириш “айб-

дорлари” ҳам яйраб, путфи карамли сўзлар айтиб, бир-бирларини бағирларига олиб, суратга тушдилар. Кўпчилик бу дўстона яқинликни қарсаклар билан қутлади.

Ўтириш тугагач, ҳатто юбилир машинасига суюб, ўтқизиб қўйилган Ўюшма раҳбарини уйига элттириб ҳам қўйди. Ўпишиб, дўстона хайрлашдилар.

Шундан кейин, мен биламанки, Эркин ака иккича бор телефон қилиб, шоирдан ҳол-аҳвол сўради, уйига, дўстлари билан бўлиб турадиган гап-гаштакка таклиф этди. Лекин у бирон марта ҳам келмади

Ҳатто, Чорбоғ дала-боғида ёзилган “Сайд Аҳмадча бир чўқим ош” дастурхонига ҳам...

Охир-оқибат икки шахс муносибатларини илиқлаштиришга қаратилган навбатдаги ҳатти-ҳаракатлар яна ўз-ўзидан барҳам топиб кетди.

Менимча, қўшним юрагини ўртаётган яна бир нарса бор эди. Яъни, бизлар “Олтин девор”ни Покистонда саҳналаштириш ҳақида ўйлаб ҳам кўрмаган бир пайтда киночилар унинг қаламига мансуб соҳибқирон Амир Темур ҳақидаги драма асосида фильм сценарийси ёздилар. Ҳукумат томонидан катта маблағ ажратилди. Нимагадир фильм Ҳиндистонда суратга олинадиган, киногуруҳ жамоаси билан шоир акахон ҳам бир ярим ойлик “ижодий жараён”да иштирок этадиган бўпти. У кишига шахсий таржимон бўлиб боришни мендан илтимос қилишди. Гўё Шуҳрат ака Аббосов менинг у ердаги артистлар, хусусан Раж Капур болалари билан «яқинлигим»ни, каттароқ роллардан бирига уларни ҳам жалб этишим мумкинлигини айтганмиш. Айни

ўша пайтлар “Ойбек изидан” Покистон бўйлаб икки ойлик сафарга тайёргарлик кўраётгандим. Унинг устига, собиқ қўшнимга ҳаммоллик қилишга кўзим учиб тургани йўқ эди.

Ўз ўрнимга бир пайтлар мактабда мендан сабоқ олган “ҳиндшунос” ўқувчи шогирдларимдан бирини тавсия этдим. Бечора қиз узоққа чўзилган “таржимонлик”дан суроби тортилган ҳолда қайтиб келди.

Маълум сабабларга кўра, кўп сарф-харажатлар эвазига тасвирга туширилган буюк саркарда ҳақидаги илк фильм муваффақиятсиз бўлиб чиқди. Сабаби, «арзимас пул учун ҳинд киноактёрлари унда иштирок этишни истамаганлигига» дегувчилар ҳам йўқ эмас. Уни кичик “доира”лардагина на-мойиш этилди, холос.

Шундай бир пайтда Уюшма раиси шубҳасиз, “Олтин девор”нинг Покистондаги муваффақиятларидан хабардор, кўз-кулоқ бўлиб тургани аниқ.

Ҳар қандай одамга ҳам алам қиласида!

ТАЪҚИБ АЛОМАТЛАРИ

Орадан бир ҳафта чамаси вақт ўтиб, Мустафо оға қўнғироқ қилиб қолди. Айтишича, улар ўтирадиган стол устидаги юпқа елим “ойна” остида “Уюшмага кириши таъқиқланган” иккита сурат пайдо бўлиб, улардан бири мен эмишман.

– Шеригим ким экан? – деб сўрадим.

– Анави, Зоҳир Аълам дегани экан. Тушунмайман, нимага бундай... Лекин, Сиз келаверинг, доим дарвоза очиқ.

– Жуда боришга ҳам қўзим учиб тургани йўқ. Вақтим тифиз. Бошқа томони ҳам бор: Сиз яна битта “Петросян” билан жанжаллашиб, ишдан кетиб қолишингизга сабабчи бўлишни истамайман, Мустафо оға!

Чиндан ҳам номларимиз “қора” рўйхатга тушиб, хориждан келмасимииздан аввалроқ ўчира бошланган эканми, бизнинг кўп чеккан заҳматлар эвазига амалга оширган озми-кўпми, адабиётимиз тарғиботига оид қилган хизматларимиз ҳақида, ҳеч қаерда, на матбуотда, на телерадио орқали кичкина бўлса-да, бирон хабар ҳамон тарқатилмай келарди. Бунинг сабаби нимада эканлигига қизиқувчилар бор эди.

Биздан сўрашарди. Лекин, аниқ бир жавоб айтишни ўзимизга эп кўрмасдик.

Ҳукумат идорасида нуфузли лавозимда ишловчи, ҳар доимдагидек барчанинг диққат-эътиборида

бўлган Эркин акадан қандайдир муносабат кутардик. Камтарлик қилибми, у киши бепарво эдилар. Баъзан менга “Ҳа энди, вақти келиб, ёзиб қолишар. Бундай хабарлар қанчалик “пишиб етилса” шунча аҳамиятли бўлади”, дердилар ҳазилга мойилроқ қилиб.

Бунинг тагида юз йилча муқаддам шоир ёзган:

“Мулки Ҳинду Марғдин келсам
топардим эътибор,
Шул эрур айбим, Муқимий,
мардуми Фарғонаман”, –

деган ботиний нидо йўқмикан, деб ўйлаб қолардим.

Яна, ўзимча чодирхаёлликка бериламан: агар Эркин ака ўрнида бошқаси бўлганда борми... Устод Садриддин Айний “Бухоро тарихига оид “Эсадаликлар”ида ёзган “Амирнинг дахлсиз калваччалари”га ўхшаб, бошини тирнаб, яра-чақа қилиб, ҳаммаёққа аюҳаннос солган бўларди. Шунча қилган меҳнатимни ҳукумат қадрламади, дея чет элларгача оҳ-воҳини тарқатарди.

Биз билан “матбуотчи”лардан ҳеч ким “қизиқмас”, кўнгил учун “сұхбат”га ҳам чақиришмасди.

Фақат “Олтин девор” қўйилишидан анча аввалроқ “Ойбек изидан” бир неча маротаба Покистоннинг “гадойтопмас” олис манзилгоҳлари ҳам қолмай кезиб чиққанимдан яхши хабардор устоз Озод Шарафиддиновгина “Жаҳон адабиёти” учун “Жаҳонгашталик” асарини тезроқ ёзиб беришга қисталанг қиласардилар ва уни “Даричам рўпапрасидаги Покистон” номи билан қаламга тушириш билан овора эдим.

Худди ўша кунлар Ҳиндяримороли мамлакатла-ри адабиётининг йирик намоёндаси, машхур адиб Аҳмад Нодим Қосимий қутлуғ юз ёшга тўлиш ара-фасида вафот этгани ҳақида қайғули хабар тарқаб қолди. Хаёлимдан буюк ёзувчимиз Ойбекдай ин-сонни кутиб олиб, мөхмон қилган сўнгги хорижлик адиб ҳам оламдан ўтибида-да, мен бу ҳақда нега аввалроқ ёзмадим, деган фикр ўтди. Қосимий жа-ноб билан илк бор учрашганим, кейин Ал-Ҳамрода, “Ризқ-рўз” ресторанида бўлган гурунгларимиз кўз ўнгимда гавдаланиб кетди. Беихтиёр қўлимга қалам олиб, “Икки буюк сиймо” мақоласини ёзиб тугатдим. Адибнинг ўзбекча зарчопон, дўппи кий-иб тушган суратларидан танлаб, қўлёзма ёнига қистирдим.

Назаримда, бу мақола “Ўзбекистон адабиёти ва санъати”дагилар кўзларига суртиб, қабул қилиб олишларига арзийдиган, кутилмаган, шов-шув бў-ларли “янгилик” эди.

Бироқ, бош муҳаррир йўқ экан. Асосий ишни «ўринбосар» ҳал қилишини яхши билардим. Қўл-ёзма билан суратни олдига қўйдим.

У беш бетлар атрофидаги мақолага кўз югурти-риб чиққач, ялтироқ бошининг ўнг чакагини икки бармоғи билан қашлаб қўйди-да, афтини бужмай-тириб, деди:

– Гапнинг тўғрисини айтайми? Зўр нарса! Лекин беролмаймиз. “Юқори”дан буйруқ бўлган. Айниқса, чет эллар билан боғлиқ хабар ва ахборотларни фақат Уюшма орқалигина босамиз. Иложимиз қанча.

Барibir мақола шу кун учун энг долзарб мав-зуда бўлиб, Ойбек аканинг туғилган кунлари

10 январ ҳам яқинлашиб келарди. “Ўзбекистон овози”нинг аввалги бош муҳаррири Азимжон Суюн бўлганда эди, ҳеч иккиланмай шу куннинг ўзидаёқ босишига топшириб юборарди. Ҳозирги раҳбар бунга қандай қаараркин? Унинг “қаравшлари”ни газетанинг “Таҳририят аъзолари” деб, кўрсатилган фамилияларнинг энг юқорисида ола таёқдай кўзга ташланиб турган устози – Уюшма бошлигининг исм-фамилиясиданоқ билиб олавериш мумкин. Албатта босмайди.

Лекин унинг қўлида бир йилчадан бери анча долзарб мавзудаги мақолам ётар, ҳар кўз-кўзга тушганда “босамиз-босамиз” дейишдан нарига ўтмасди.

Ўша “туя гўшти еб ётган” қўлёзма тақдири билан ҳам қизиқмоқчи бўлиб, лифтлар келиб тўхтайдиган каттагина йўлак яланглигини кесиб, ўтдим-у, эллик қадамча наридаги қабулхонага кириладиган эшик қаноти очилиб, бош муҳаррирнинг ихчамгина гавдаси кўринди ва шу заҳоти назари менга тушгач, лип этиб, кўздан ғойиб бўлди. Бу худди Чарли Чаплиннинг кинодаги қилиғига ўхшаб кетарди.

Ўзимча ўйладим: «У, энди шошиб, мақолани қаердандир излаб топади. (Агар, шунча вақт мобайнида йўқолиб кетмаган бўлса!) Ҳузурига кириб келишим билан пилиқдай қошларини чимириб, аллақандай баҳоналарни тўқиб-чатиб, мана шу сабабларга кўра фойдаланолмадик, дейди-да, қўлёzmани қайтаради».

Бироқ, ичкарига кириб, хаёлларимнинг бутунлай тескариси бўлган манзарага дуч келдим; шўро давридан “отамерос” газетанинг қарийб ўттиз йил даво-

мида навбатма-навбат “бешигини тебратиб” кетган “Бош муҳаррир”ларига фидойиларча пойлоқчилик хизматини ҳамон уddyалаб келаётган (раҳматли, хўп яхши одам эди) Юнус акахон “Қабулхона” эшигига ихчамгина гавдасини “қалқон” қилиб турарди. Саломимга “алик” ўрнига зорланган овозда: “Кирманг, хўжайин Сизни қабул қилолмайдилар. Бандлар... Яқинлашманг! Яқинлашманг!!! Милиция чақираман”, дея дағдаға қилгандай мени ҳуркита бошлади...

Демак, ўртага “милиция” тушдими, бу каминани матбуотга яқинлаштирмаслик, яъни номимни “ўчириш” “расмий” тус олганини англатарди.

“БИР КУНЛИК ХАЛИФА”

Бунинг аччиқ мевасини кўп ўтмай тотиб ҳам кўрдим.

Бир куни Уюшма қошида нашр этиладиган “Ёзувчи” газетасининг бош муҳаррири Мурод Абдуллаев:

– Янги йил яқинлашяпти. Газетамизга обуна бўлганлар сони 700 га ҳам етмай турибди. Агар бир ярим мингга чиқмаса, газета “ўлади”. Уюшмада пул йўқ экан. Водийда танишларингиз кўп, ёрдам бермасангиз бўлмайди, – деб туриб олди.

Умуман, мен бу одамни ёқтирамасдим. Қолаверса, Уюшмадан “қувғин” қилинганман. Бироқ, кўрпага аччиқ қилиб, энди қаддини тиклаётган газетага қўлдан келган ёрдам қўлини чўзмасликни ўзимга эп кўрмадим.

Ўша пайтлар ёқилғи анқонинг уруғи. Айниқса, Водийда бир баклажкаси фалон пул. Ҳамма харажатни ўз зиммамга олдим. Қўқон Ёзувчилар бўлими бошлиғи Ҳабибулло Саид Фанига, Данғара район раҳбари, адабиёт ишқибози Мансурхўжа Хўжаевга, фарғоналик оқсоқол шоир Охунжон Ҳакимга, андижонлик Тўлан Низомга аҳволни “тушунтириб”, телефон қилдим. Наманганли “Қўшма корхона”си бор ука-жиянларни-ку, гирибонидан олиб, анча-мунча “обуна пули” ундириш мумкин.

Муроджон билан беш кун давомида Фарғонанинг уч минтақасини айланиб, икки мингдан зиёд обуначи билан Тошкентга қайтдик.

“Ёзувчи”нинг биринчи – Янги йил сони байрамона кўринишда чиқди. “Таҳририят аъзолари” ичida Ҳ.Сайд Ғани, О.Ҳакимов, Т. Низомлар қаторида каминанинг номи ҳам кўр тўкиб турарди. Тўғрисини айтсам, мен бундай кутилмаган “марҳамат”га ҳаётимда биринчи марта сазовор бўлишим эди. Кўплар телефон қилиб, табриклишди.

Ҳатто, шу газетанинг “Бош мақола”сида “ҳомийликка катта ҳисса қўшган” укаларим Содиқжон, Ҳамидуллахонларнинг номлари алоҳида тилга олиниб, таҳририят номидан миннатдорчилик ҳам изҳор қилинганди эди.

Бироқ бу рўшноликни ҳам менга худо кўп кўрди. Газетанинг навбатдаги сонида берилган “Таҳририят аъзолари” ичida номим йўқ эди.

Бош муҳаррир бунинг сабабини жиғибийрони чиқиб, тушунтира кетди:

– Нима ёмонлик қилгансиз раисга? Газетани юзимга отиб, йўқот бу номни, йўқса, газетангни ёптириб ташлайман, ўзларингни ҳам ҳайдаб чиқараман, деб шунаёнги тўполон кўтардики... бундай итфеъллигини биринчи кўришим...

Жаҳл чиқса – ақл қочади, деганлари рост экан. Мен бу одам оғзидан ўзининг энг яқин “балогардон” устозига нисбатан бундай ножӯя сўзлар чиқишини асло кутмагандим.

Дарвоқе, устоз Эркин ака бир кун менга лутф билан гапириб қолдилар:

– Биз-ку, вақтида номимизни матбуоту телерадиода рўкач қилавериб, ҳамманинг жонига текканмиз. Сиз “Бир кунлик халифа”дай лип этиб, кўриниш бердингиз-да, “Ёзувчи”ликдан ҳам “ўчиб” кетдингиз, чоғи. Бу қанақаси бўлди?

– Мухлисларингиз “нега кўринмай қолдингиз?” деганларида ўзингиз: “Тегирмон навбати билан, ҳадеб кўринаверсанг – кўз тегади”, деб жавоб бермоқдасиз-ку!

– Лекин, Сиз навбатни анча олдин топшириб юбормадингизми?

– Олиб қўйишса, нима қилай...

Устоз ўзига хос вазмин жилмайиш билан:

– Биламан, – деб қўйди.

НОМ ЎЧИРИШ ПОЙГАСИ

“Хуррият” газетаси ғафлат босиб икки буюк аллома Ойбек билан А.Н. Қосимий ҳақидаги мақоламни эълон қилди-ю, кимлардандир рухсат олмагани учун бошига анча ғавғони орттириб олди. Бироқ, у ердаги ижодий жамоа “мустақил” матбуот органи эканликларини айтиб, бўш келишмади чоғи, бирон бир “жазо”га дучор қилинмадилар.

Аммо орадан бироз вақт ўтгач, шу газета қайта “хатолик”ка йўл қўйиб, ўзим раис бўлган Чорбоғдаги “Озод Шарафиддинов номидаги Ёзувчи дала-боғи”да ҳашар йўли билан қуриладиган сув омбори ҳақидаги шапалоқдай интервьюимни эълон қилиб (бошқа ном қўйишганда, олам гулистон эди), энди чинакамига сиқиқقا олина бошланди. Бош муҳаррирни кундузлари эмас, яrim тунда телефон орқали қилинадиган алжираб сўкишлар, қандайдир “гуруҳбозлик”ка алоқадорликда “айблов”лар жонига тегди. Охири, ариза ёзишга мажбур бўлди.

Биргина менинг “номим”ни деб, ўз амалини мардона ташлаб кетган бош муҳаррир укамиз олдида ҳамон хижолатдаман.

“Ном ўчириш”нинг “қора рўйхати”дан Эркин Воҳидов ҳам четда қолмаганлиги дарров маълум бўлди.

Кўпчилик адабиётшунос мунаққидлар эълон қилинаётган мақолаларидан негадир Эркин Воҳидов номи “тушириб” қолдирилаётгани, бунинг учун шо-

ир олдида ўзларини нокулай хис этаётгандар ҳақида гапирадилар.

Бу гаплар тезда ўз тасдиғини топди. Яхшигина ёзуви дүстимизнинг ўзига хос услубида ёзилган китоби баъзилар учун “ғайри-табиийроқ” туюлди шекилли, нашриётдагилар кимларгадир “тегиб” кетишини рўкач қилиб, босишавермади.

Шунда анча-мунча ўзига хос ҳазил-юморга мойил шеърлари, айниқса Матмуса бош қаҳрамони бўлган машҳур ҳажвий “Туркум” орқали кўпчиликни ҳайратга солиб келаётган устоз олдиларига бориб, “Ҳангомалар” қўлёзмасини топширган эдик, у кишига маъқул бўлди. “Сўз боши” ёзиб бердилар. Асар тезда чоп этилиб, қўлма-қўл бўлиб кетди.

Кўп ўтмай, унинг “тўлдирилган нашри” босмадан чиқди. Энди Эркин Воҳидовга ҳамо-ҳанг қилиб, до́мла Озод Шарафиддинов ҳам китобга илиқ сўзлар битгандилар.

Муаллиф бизнинг дала-боғ аъзоларидан эмасми, каминага обрўли газета таҳририятидан телефон қилиб, китоби ҳақида тақриз чиқаётгани, унда Эркин аканинг ҳам номлари алоҳида таъкидлананаётганини гапириб қолди.

Ўша пайтлар устоз номи бирон матбутда тилга олинмай қолганди.

Мен хурсандчилик билан:

– Хайрият, бу Эркин ака учун янгилик бўлади. Эртага шанба! Дала-боғда қўшалоқ байрам қиласканмиз-да! Озод ака билан иккала устозни олиб чиқиш ҳамда ош харажати ўзимдан! – дедим.

Эрталаб барвақт туриб “Матбуот дўкони”дан газетани сотиб олдим-у “Тақриз”да фақат Озод ака номлари ёзилганлигини кўриб, ҳайратландим.

Дарров ёзуви дўстимизга телефон қилдим.

У ҳам ҳайрон.

– Ўша, бош муҳаррир хонасидан Сизга телефон қилган пайтимда корректурани ўзим ўқиб бергандим-ку, – деди...

Демак, одатдагидай, «Эркин Воҳидов» ўчирилган.

Яхшиям, кеча-кечқурун у кишига телефон қилиб, дала-боғда бўладиган “ош”га таклиф этмаганим... Ўзлари билдирамасалар ҳам, кўнгиллари ғаш тортиши мумкин эди.

Аслида-ку, шоир кўзи шу газетага тушмайди, деб ўйлайсизми...

Ваъдага вафо қилиб, Озод домла бироз зерикиб ўтирган эканлар, йўл-йўлакай Чорбогга олиб кетдик.

У кишигазетани кўриб “нега бундай қилишибди-я!” деб, қаттиқ жаҳллари чиқди. Ўз шогирдларидан бўлган бош муҳаррир Усмоновга ҳарчанд телефон қилсалар-да, боғлана олмадилар.

Ош ҳам татимади.

Унча кўп вақт ўтмай “ном ўчириш”нинг ошкора тус олганининг гувоҳи бўлдик.

Машхур мусаввир Акмал Нур қўнғироқ қилиб қолди:

– Ака, янги чизган суратларим кўпайиб қолди. Кўриб, баҳосини берсангиз. Телевизордан ҳам келишмоқчи.

– Албатта етиб бораман, – дедим.

Рассомнинг устахонаси менга яқин жойда. Пиёда 15 дақиқалий йўл.

Телевизорчилар “Ёшлик”дан экан. Бир пайтлар

шу студияда мен ҳам ишлаганимни айтиб, улар билан бироз гурунглашиб ўтирдик.

Тасвирга олиш бошланди. Бошловчи қизнинг биринчи саволига Акмалхон жавоб беради.

– Мен ёшлигимдан шеърларни ўқиб, ёд олишни яхши кўрардим. Биринчи чизган суратим Ҳамид Олимжоннинг “Ўзбекистон” шеъридан олган таас-суротларим асосида бўлган. Кейин Эркин Воҳидов шеърлари “сурати”ни туширганман.

Худди шу пайт бошловчи қизнинг ўзига ярашмаган буйруқнамо овози эшитилиб кетди:

– Стоп. Стоп! У одам номини эсламанг. Мумкин эмас!

– Нега мумкин эмас? – дея саволга тутдим 23-24 ёшлардаги “ҳамкасбим” бўлган қизни.

– Шундай деб айтишган. Биз буйруқни бажарамиз.

Беихтиёр ўйланиб қоласан киши. Бу, ҳеч иккиланмай “буйруқ”ни бажараётган ходима Эркин Воҳидов кимлигини билармикан, ўзи? Унинг бирон шеърини ўқиганми? Худо кўрсатмасин, эртага Ойбек, Абдулла Қаҳҳор, Faфур Ғулом, Шайхзодадан тортиб, қўйинг-чи, Навоийларгача “Номини ўчириш” шундайлар қўлига тушиб қолса, адабиётнинг аҳволи не кечади?

Шундай фикрлар хаёлимдан ўтиб, қизга:

– Биз ундан буйруқдан бехабармиз. Шунинг учун сизлар билан мулоқотни тўхтатамиз, – дедим-да, Акмалхонга ўгирилдим.

– Тўғри айтдингиз! – дея у сўзимни маъқуллади.

Жума куни эди. Эрталабдан бошланган бу кўнгилсизлик кун бўйи таъбимни хира қилиб юрди.

Нихоят, “ўжар”лигим тутиб, “буйруқ”қа аниқ жавоб олмоқчи бўлдим. Қарасам, вақт соат 6 га яқинлашмоқда. Таваккал деб, студия томон йўл олдим.

Ҳамма кетиб бўлгандур, деб ўйлагандим, ҳар тугул теледастурлар бўйича масъул бошлиқ ўзида экан.

Ички телефон орқали бир оғиз гапим борлигини айтиб, ўзимни таништирдим. Шошганимдан бирон хужжат олволмаганимга ҳам ишора қилиб қўйдим.

– Ҳозир ёрдамчимнинг ўзи тушиб, бирга олиб чиқади, – деди бошлиқ.

У яхшигина муомалали киши экан. Қисқагина “арз-ҳолим”ни тинглаб, жаҳли чиқди:

– Биз қачон одам бўламиз-а! Мана, шундай ўз оёғимизга болта уриб юрадиган қандайдир гуруҳ бор. Бизга келиб айтганингиз яхши бўлди, – дедида, ёрдамчисини чақириб, – Эркин ака Воҳидовнинг шеърлари асосида олинган баҳорий кайфиятдаги “сюжет” бор, эсласангиз керак. Ўшани топиб, эрталабги “Ассалом” дастурида кўрсатинглар.

Чиндан ҳам шу “сюжет” шанба дастурида икки марта намойиш этилди.

Эртаси якшанба куни таниқли шоиримизнинг рафиқаси жанозасига кета туриб, Эркин акага дедим:

– Кеча телевизорда ўзингизни кўрдингизми? Қайта-қайта кўрсатишди!

Чиндан ҳам у киши учун бу кутилмаган “янгилик” эди.

– Йўғ-е, – деди акахон гапимга ишонмагандай.

– Яхши, мазмундор баҳорий кўрсатув бўлди, –

деб сўзимни маъқуллаган бўлди ёнимда кетаётган Иброҳим ака Ғафуров ва қўшиб қўйди, – бугун ҳам қайтаришса керак.

“ПОЙГА”НИНГ ЯНГИЧА УСЛУБИ

Шуниси қизиқки, шоир номини ўчиришгина эмас, уни турли тадбирлар рўйхатидан “тушириб” қолдириб, адабий жамоатчилик, айниқса, мухлислар назаридан иложи борича узоқроқ тутишга ҳаракат қилинарди. Чунки қаерда бўлмасин, Эркин аканинг пайдо бўлиши барча тоифадаги одамлар орасида катта қизиқиш уйғотар, у кишини ўраб олиб, икки оғиз лутфли сўзини эшлишга муштоқлар олис қишлоқларда ҳам топиларди. Мен бунинг кўплаб гувоҳи бўлганман.

Хатто, ёшгина фарзандларини олиб келиб, шу боламизга бир назар солиб қўйинг, Эркинжон aka, деган ота-оналарни кўрганман. Эркин aka болани қўлларига олиб, отини сўрар ва одатлари бўйича оҳиста пешонасидан ўпид қўярдилар.

Ҳа, халқ ўз шоирини чин маънода севар, ардоқларди. Лекин, бундан ғайирлиги тутадиганлар айниқса кейинги пайтларда, шоирнинг кутлуғ 70 ёшини нишонлаш яқинлашиб келгани сайин кўпайиб қолганди.

Наманган шаҳридаги энг катта мактаблардан бирининг ўқитувчи, ўқувчилари Эркин Воҳидовдай шоир ўз билим масканлари жойлашган маҳалладаги катта сўлим боғли ҳовлига ёз ойлари овоза қилмай, тез-тез “ижодий сафар” билан келиб туришини билишар, лекин мактаб директоридан ташқари ҳеч ким у киши билан учрашиб, гурунг

қилишга журъат этолмасди. Шундай сухбатлардан бирида директор мактаб жамоаси шоир билан учрашув ўтказишни илтимос қилишаётгани ҳақида гапиради.

Эркин ака йўқ демайди. “Вақт-соати келганда, албатта бу тадбирда қатнашишга рози” эканлигини айтади.

Мана, энди ўша айтилган вақт-соат келиб, бутун мактаб аҳли шоирнинг қутлуғ ёшини биргаликда нишонлаш тадбирига тайёргарлик кўрар, ҳатто мактаб сахнасида “Олтин девор”дан “парча”лар кўрсатиш ҳам режалаштирилган эди.

Бироқ, яхши ният амалга ошай деб турган бир пайтда “раҳбариятдан беруҳсат амалга оширилаётган” бу “юбилей” ҳақида Тошкентга хабар етиб боради-ю, ана шундан кейин худди бир неча йил олдинги бизлар Ҳабиб Саъдулла икковимиз ўз кўзимиз билан кўриб, гувоҳи бўлган “Қўқон воқеаси” Наманганда қайтарилади.

Ҳа, ўшанда мен Тошкентда даволаниб қайтаётган Ҳабиб Саъдуллани олиб, Наманганга келгандим. Телефон жиринглаб, Қўқондан шоир Ҳабибулло Саид Фани 60 ёшга тўлиши муносабати билан дўст-биродарлари ўзи маънавият ишлари бўйича бошлиқ ўринбосари бўлиб ишлайдиган ёфмой комбинати чойхонасида дастурхон ёзишаётганини айтиб, албатта келинглар деб, таклиф этиб қолди.

Эртаси кундуз соат 12 ларда айтилган жойга келдиг-у тўс-тўполон устидан чиқдиқ: ҳамма ёқни милиция босган, чойхона берк, эшикларига қоғоз ёпиштириб, тамға босилган. Орқароқдаги усти

ёпиқ товоонхонада масалликлари тайёр катта қозон бир четга суриб, кўздан паналаб қўйилган.

Маълум бўлишича, ўша пайтлар айтгани-айтган, дегани-деган бўлиб турган арбоб ҳамда “маликушшуаро” мартабасидаги раҳбар бундай “юбилей”лар ўtkазиш таъкиғланганлиги, “бир бошланса, яна авж олиб кетиши”ни айтиб, вилоят раҳбарларини оёққа турғизган.

Ҳабибуллахон бир четда ўтириб олганича, бoshини чангллаб:

– Мен аҳмоқ, қайданам шунча йўл босиб, атайин Уюшмага бориб, хабар бериб келдим-а, – дерди ўзини босолмай, асабий ҳолатда.

“Тез ёрдам” машинасида дўхтирлар келиб, унга укол қилишди ва зудлик билан шифохонага олиб кетишиди.

Шундан кейин шоирнинг жанозасига бордик.

Наманганда эса, иш ваҳимасиз, тинчгина амалга оширилди. “Юқори” билан “Бамаслаҳат йўл тутмаган” мактаб директори ими-жимида ишдан олинди.

Энди шу ерда кўпчиликка ҳамон жумбоқ бўлиб қолаётган ижодкорлар юбилейларини ман этилишига сабаб бўлган кичкина “сир”ни айтиб ўтишга тўғри келади. “Маликушшуаро”нинг туғилган куни бутун мамлакат миқёсида катта тантана билан ўтказилаётган бир пайтда юқори минбардан “бундай шод-хуррамлик байрамини ҳар йили нишонласак арзиди”, дея айтилган сўз янграйди. Буни телерадио ҳамма ёққа овоза қилади. Ўта кўтаринки руҳда айтилган бу гаплардан илҳомланган “юбилияр” “шод-хуррамлик”ни давом эттириб, йил сайин авжга чиқаради. Унинг атрофидаги содиқ “мухлис-

лар” бу тадбирни муносиб ўтказиш мақсадида ви-
лоятлардаги бўлимларга “Таклифнома”лар қатори
“маслаҳат” хабарлари ҳам юбориб турадилар.
Шунга яраша “Тўй тўёнасиз” бўлмайди албатта. Бо-
ра-бора “тўёна”ларнинг шакл-шамойили ҳамммага
кўз-кўз қилиб, келтириладиган совға-саломлардан
кўра бошқача “ихчамрок” тус ола бошлайди. Вақт
үтиб, янада «ихчамлашади».

Бундан мутлақо бехабар кекса, обрў-эътиборли
Қаҳрамон адабнинг “табрик – тўёна”си самолёт уч-
май қолгани сабаб, бир кун кечикади. Отахон эрта-
лаб Дўрмон “Ижод уйи”да биз 10 чоғли қалам аҳли
даврасида нонушта қилгач, унча узоқда бўлмаган
Раис қароргоҳи томон унинг туғилган куни муноса-
бати билан табриклаш учун кетаркан, ҳаммамиз
кузатиб қўйдик.

Бироқ, орадан кўп вақт ўтмай, саксон ёшлар-
ни қоралаб қўйган кекса адаб оғир бир аҳволда
кўкрагини чанглаб, қайтиб келди. Уни икки ёнбо-
шидан суюб, йўлақдаги диванга ўтқаздик. Аҳволи
ёмонлашиб борарди. Яхши ҳам ҳамшира Нурия-
хон нарироқдаги ўз хонасида экан. Чопиб келиб,
муолажасини бошлади. Укол қилди. Оқсоқол би-
рорз ўзига келгач, уни алоҳида, тинчгина хонага
ётқизилди.

Ёзувчилар Уюшмаси поликлиникасининг “Тез
ёрдам” машинаси келди.

Бемор:

– Ўтиб кетди. Тинч қўйинглар, ўзимни яхши ҳис
этяпман, – деди.

Биз ижодкорлар адабиётимизнинг йирик вакил-
ларидан бири саналган отахондан тез-тез хабар
олиб турдик.

Эртаси кун у киши мени йўқлаб қолди. Хайрият, юзларига анча ранг кириб қолган, яхши кайфиятда эди.

– Тузукмисиз ака, – дея ҳол-аҳвол сўраган бўлдим.

– Тузукману, ўзимча ўйлаб ўтирибман. Сен “Қулатилган чинорлар” ҳақида асарингни бежиз ёзмаган экансан. Мен ҳам уни Озод аканинг журнallарида ўқиб тугатган кунимоқ, икковимизни бир кунда чақириб, оқ фотиҳа берган устоз Абдулла Қаҳҳорнинг муборак номини әслаб, “Ўзбекистон адабиёти ва санъати” газетаси орқали сени янги асаринг билан табриклаб, бекорга “Очиқ хат” ёзмаган эканман. Ҳали ҳам “қулатиш”га уриниш бўлаётганининг икки марта гувоҳи бўлдим. Шу ёшга етганимда бу энди учинчиси – энг оғири бўлди, ука! Шуни сен әслаб қўй! Энди мен ўз юрак дардимни керакли кишиларга айтмагунимча, бу ердан ҳеч қаёққа кетмайман...

Орадан кўп ўтмай, барча ижодкорларнинг таваллуд кунини “расмий” суратда нишонлаш тўхтатилиши ҳақида норасмий хабар тарқалди. Бу Ююшма раҳбари учун айни муддао бўлди. “Расмий” бўладими, “норасмий” бўладими, шу ишга қўл урганларининг барини орқа-кетига қарамай жазолайверди. Онда-сонда вилоят, туман раҳбарларига ҳам дағдаға билан қўнғироқ қилиб, “Милиция қаёққа қарайпти?” дейишдан тоймасди.

Фарғоналикларга келсак, “ўз” шоирлари туғилган кунини муносиб нишонлаш учун “расмий” тайёргарлик кўришар, ҳатто Анвар Обиджон билан каминани шу тадбир юзасидан маслаҳатга чақириб туришарди.

Бундан албатта Уюшма хабардор этилган, тушиб чиқилган режа бўйича икки кун давом этадиган тантана шоир туғилган юрт Олтиариқдан бошлиниб, Вилоят Давлат театри биносида якунланиши лозим эди.

Айниқса, олтиариқликлар қонида қаердандир пайдо бўлиб қолган ноодатий “маҳаллийчилик” туйғуси жўш уриб, ўзларидан чиқсан машхур шоир Эркин акани катта тантана билан муносиб кутиб олишга астойдил тайёргарлик кўришарди. Ҳатто Анваржон иккимизнинг қулогимизга чалиниб қоладиган гапларга қараганда, туманнинг 5-10 то-пармон-тутармон тадбиркор йигитлари Андижондаги автомобил заводига шоир учун маҳсус условга буюртма бериб, калитини шахсан унинг қўлига топширишга ҳам ҳозирлик кўриб қўйишган.

Албатта, бу тайёргарлик ишлари анча жўнашиб кетгач, “янгилик”дан Эркин акани хабардор этгандик, у киши ўзига хос камтарлик билан:

– Тадбир “Адабиёт байрами” мақомида ўтгани маъқул. Ана унда мен “даврабоши” бўлиб қатнашман, – дегандилар.

Ўша кутилган кун ҳам етиб келди. Белгиланган қатъий режа бўйича, шанба куни эрталаб барвақт Фарғонадан юбориладиган енгил машиналарда Уюшма рўпарасидаги майдондан йўлга тушишимизни айтиб, Анваржон икковимиз устоз билан хайларлашдик.

Негадир келишилган вақтдан анча дақиқа ўтдики, Эркин акадан дарак бўлавермади. Шунда кимдир Уюшмага кириб кетаётганларини кўргандай бўлдим, деди.

Демак, “оқсоқол”лар ҳов анави олдинда турган анчагина салобатли машинага ўтиришади, деб ўйладик-да, биз орқароқдаги уловлардан бирини танладик.

Гап билан бўлиб, ўнтача енгил машинадан иборат “колонна” йўл ҳаракати назоратчиларининг рангин нур сочиб, липпиллаб, ёниб-ўчиб турган чироқлари ортидан йўлга тушганимизни билмай қолибмиз.

Ҳеч қаерда тўхтамай соатма-соат қилиб белгиланган вақтда Катта Фарғона магистрал йўлининг Олтиариққа бурилиш жойига етиб келдик.

Атрофни тумонот одам босган. Карнай-сурнайлару чилдирмалар садоси остида биз меҳмонларни кутиб олиш маросими бошланди.

Шу тадбирга масъул этиб белгиланган вилоят ҳокими ўринбосарларидан бири меҳмон “раҳбар”лар келишган машина олдида мулозамат қилиб, бироз турди... Кейин бизга кўзи тушгач, тез-тез юриб олдимзга келди.

– Эркин ака қанилар?

– Уюшма раҳбарлари билан келдилар, чоғи, – деди Анваржон.

– Йўқлар у ерда! – ҳайрон бўлиб елка қисди мезбон...

Олтиариқ марказига элтувчи бир неча чақиримга чўзилган, атрофи супуриб-сидириб, сувлар сепилган йўлнинг икки томони қўлларида гуллар тутган бола-бақра, йигит-қизлар, эркак-аёллару нуроний қариялар билан тўла эди. Улар шоирни кўрмоқчи бўлиб, машиналар ичига тикилиб қарашар, қичқиришарди...

Биз Анваржон билан нима гаплигига ҳамон тушунолмай, фаромуш эдик. Шу пайт бизга ҳамроҳ бўлиб ўтирган туман маориф бўлими бошлиғи:

– Ўчакишганини қаранглар, шундай ҳаммамиз илхақ бўлиб кутган кунга келиб, Эркин аканинг бироз тоблари қочиб қолса-я... – деб қолди.

– Кечқурун учрашганимизда бардам-бақув-ват, туппа-тузук эдилар! – деб унга бир қараб қўйгандим, мезбон:

– Ҳа, энди иссиқ жон-да, ака! – дея жавоб қайтарди.

Тантаналар давом этарди-ю, бизнинг кўнглимизга ҳеч нарса сиғмас, ғаш эди.

Хайрият, вилоят Адабиёт бўлими раҳбари шоира Энахон Сиддиқова таҳсинли гап айтиб қолди:

– Устоз билан телефонда гаплашдик. Соппасоғлар. Кайфиятлари ҳам яхши. Ҳазил аралаш “Ёшлигимда Повулғон қишлоғиликлардан бир-икки ошна орттирганим, таъсир қилди шекилли, ўзимни ўзим “Адабиёт кунлари” қатнашчилари рўйхатидан ўчириб ташлаганимни билмай қолибман”, дедилар...

Кейинроқ маълум бўлдики, кеча кечқурун устоз билан хайр-маъзур қилиб кетганимиздан сўнг кўп вақт ўтмай, Үюшмадан кўнғироқ бўлади.

Эркин ака гўшакни кўтаргач, томоғи сал “қирилгандай” йўталиб қўяди.

– Ҳа, мазангиз йўқ, деб эшитамиз.
 – Бу ёғи энди қаричилик, нима ҳам қиласдик.
 – Қаричиликни ҳозирча елкага олманг. Туғилган кунингизни нишонлаш қаторлашиб турибди.
 – “Нишонлаш” қайта бошландими?

– Сиз учун бошлаб, биргалиқда нишонлаймизда! Соғлигингизни авайланг, бизга мана шуниси керак! Фарғонада “Адибиёт қунлари” экан, ўшани ўтказиб келишга кетяпмиз. Она юртингизда етмиш йиллигингизни алоҳида рўйхат тузиб, тантана билан ўтказишни ҳам гаплашиб келмоқчимиз.

Устоз ориятли одам эмасми, шундай сўзлардан кейин “Мен сизлар билан боришим керак эди-ку”, деб айтмаган, албатта. “Қўнғироқчи”нинг асл мақсади нима эканлигини билгани учун ҳам шундай қилган.

Орадан озгина вақт ўтгач, Эркин акани навбатдаги “рўйхат”дан тушириб қолдириш тарихи ҳам қизиқ кечган.

Устоз менга қўнғироқ қилиб, сўраб қолдилар;

– Биз билан Фарғона сафарига боришга вақтингиз қалай?

– Қачонга? – дедим.

– Эртага эрталаб жўнаймиз, жомадонларни шайлаб қўйибман.

Лекин бу сафар тарки-одат қилиб:

– Менинг зарур ишим бор эди, – дедим-да, қўшиб қўйдим. – Ўзингиз мазангиз йўқлигини айтиб, даволанишга ётмоқчи эдингиз. Шуни деб, Чорбоғга чиқиш режасини ҳам кейинроққа қолдирғандик-ку.

– Биласизми, Худойберди Тўхтабоевнинг 80 йилликлари экан. “Рўйхатда биринчи бўлиб Сизнинг номингиз турибди. Сиз “Йўқ” дессангиз, ўзим ҳам бормайман”, деяптилар, оқсоқол. Энди даволанишни сал орқага суриб, бориб келмасам бўлмайди. Кекса, қўнгли нозик акамиз. Ёш боладек қалби тоза, беғубор одам.

– Яна, етмиш йиллигингиздагидек “Фарғона юбилейи”дан бўлмасин!

– Монелик қилишмас.

Ўша куни кечга томон соат 9 лардан ўтганда телефон жиринглади. Уюшмада ўринбосарлик лавозимида ишловчи укамиз гапиради:

– Фақат Сизнинг қўлингиздан келадиган иш бўлганилиги учун бир илтимос қилишмоқчи.

Ҳайрон бўлиб:

– Қанақа иш экан, – дедим.

– Устоз Эркин Вохидов эртага Фарғонага қиладиган сафарларини кейинроққа қолдиришни сўрашяпти. Ҳар ҳолда у киши обрўли одам, алоҳида учрашув ташқил қилиш режалари бормиш.

– Аввало, сал олдинги “ташқил” этилган ўша ердаги “учрашув” куёвсиз ўтказилган тўйга ўхшаб, ҳаммани тонг қолдирганини ўзингиз яхши биласиз.

– Биламан.

– Қолаверса, ҳозир соат неча?

– Кечки тўққиздан қирқ икки дақиқа ўтганини кўрсатяпти.

– Шунинг ёнига “2012 йил, 28 май” санасини ҳам қўшинг.

– Қўшдим.

– Энди ўша, кечаси билан уйқуси қочиб, тўлғониб чиқадиган “илтимосчи”ларга худди мана шу сўзларимни оқизмай-томизмай етказиб қўясиз. Дарвоқе, ҳозир телефонларнинг кўпида ёзиб олиш аппарати ҳам бор, деб эшитаман. Иложи бўлса “ёзиб” олинг, гапим шу: “Сен ким, одам зотидан-мисан ёки қандайдир бузуқилар қавмидансанми, ёшинг бир жойга етиб, жонинг ҳалқумингга келиб

турган бир пайтда, ёмонлигу фиску фужурларга тўлиб тошган одатингни бас қилиб, тавба-тазарру билан кунларингни ўтказсанг-чи! Сенга ато этилган ақл-фаросат ҳамон ўзбекнинг пок виждонли, фидойи фарзанди Эркин Воҳидовдай инсон кимлигини тушуниб етмаётган экан, сени қанчалик олий мақом мартабаси-ю шон-шуҳратга буркамасинлар, шу қилмишларинг учун Яратган Эгамнинг хор-зорлик қаҳрига учрашинг муқаррар!”

– Жуда қаттиқ гап бўлди, устоз.

– Нима бўлганда ҳам, етказиб қўйинг. Уларнинг ҳар бир жумласига ўзим жавоб бераман.

Орага анча вақт жимлик чўкиб, яна телефон жиринглади.

– Устоз, гапларингиз анчагина “аччиқ” бўлғанилиги сабаб, мазмунини умумийроқ қилиб етказдим. Ҳеч қандай акс-садо бўлмади. Демак, Эркин акага оқ йўл!

Яшириб нима қилдим: бу Иқбол Мирзонинг овози эди.

КИМДАН НИМАНИ ЎРГАНИШ КЕРАК?

Унинг учун ҳамма нарса бахшида эди. Матбуотдан тортиб, телерадиогача. Кунига ёки ҳафтасига ўзини бир марта намоён этиб турмаса, ёки кўрсатиб туришмаса, кўнглига шубҳа оралар, кимларгадир шикоят қилишдан тоймасди. Тўғри, баъзида “инжиқлик”лари ҳаддидан ошиб кетса, сал “жилови”ни тортиб қўйилган пайтлар ҳам бўларди.

Ҳали “Маликушшуаролик” мақомига эга бўлмасдан анча аввалроқ ижоди-ю “шахсияти”га мақтову таҳсин ўқишлар авжга чиқиб, ўзига бино қўйишдай мазахўракликни унинг бадан-банига сингдириб қўйишганди.

Биринчилар қатори унга бағишланган “Шоҳнома” мисол шеърий роман яратилди. Бироқ бошдан оёқ ғайирлик билан риёкорликни “илоҳий” фазилатга менгзаб битилган бу китобдаги куфронга “ташбехлар” уни ёзганнинг бошига етди. Қаергадир изсиз йўқолди.

Лекин номлар “ўчириб” турилган бир пайтда улар ўрнини кимдир эгаллаши керак эди. Бу унинг бир нечта “фидойи” ҳамду саночилари учун айни муддао бўлди.

Улардан энг ашаддийси “Хотамов” дегани “Адабиёт осмонидаги ёлғиз юлдуз бўлиб порлаётган” устози ҳақида назмда ёзилган “Даҳонома”нинг янгича талқинини яратишга киришди. “Маҳалий”лашиб олган газеталар байрамона кайфиятда кетма-кет ундан туркумлар эълон қила бошлади.

Бу “туркум”ларни ўқиб, “бош қаҳрамон”ни дуру гавҳарлар билан ўраб-чирмаб, таҳсинли сўзларни аямай ишлатилганидан ҳайратга тушасиз; “Олий-жаноблик намунаси”, “Покиза хулқ әгаси”, “Нур ёғилиб турувчи беғубор чеҳра”, “Ҳикматона сўзлар хазинаси”, “Доно”, “Донишманд”, “Мутафаккир”, “Инсоний камтарлик”, “Ҳокисор жилтмайишлар...” эҳа, санаб-саноғига етолмайсиз.

Агар ҳалқимизнинг пешонасига битган энг навқирон, пешқадам шоирлари иккита бўлса, улардан бири Эркин Воҳидовнинг етти ухлаб тушига ҳам кирмайдиган бу залворли мақтовларни бир одам кўкрагига тинимсиз ёрлиқ мисол ёпиштиравериш қанақа бўларкин... деб, салгина йилаб кўрадиганлар топилмади.

Агар топилганда эди, анави “даҳопараст” ҳадидидан ошиб, гумаштаси – Раиснинг “ягона” эканлигига телбаларча ишониб, бошқаларни назар-писанд этмасликдай вассаса хуружига берилмаган, адабиётимизнинг фахри ва ғурури ҳисобланган Абдулла Қаҳҳор, Озод Шарафиддиновдан тортиб Эркин Воҳидовгача бўлган пок, ҳалол намояндалари шаънига тухмат тошлари отиб, жирканч ҳақорат сўзлари ёғдиришга журъят этмаган бўлармиди.

Энг қизифи, бу муртад ялоқи қилмишларини ҳамма лаънатлаб турган бир пайтда, “мақтов ёрликлари”дан маст-аласт қалам аҳлининг сардори бўлмиш “раҳнамо” унга қарши бирон қарши муносабат билдирамади. Балки, ҳаммани “эътибор бермасликка” чақирди. Чунки, айтилган “гап” – айтиб бўлинган, “бошқалар” мақтов шоҳсупасидан “туширилиб”, у эса, яна юқорироқ поғоналарга кўтариб қўйилганди.

Барибир “Хотамов” дегани ифлос “ижоди” учун кўпчиликнинг тавқи-лаънат қарғишига учраб, номнишонсиз йўқ бўлиб кетди.

Афсус, “нима бўлса бўлсин, бойнинг ўғлига бўлсин”, деганларидаи “Даҳо”нинг “Якка-ю ёлғиз” юлдуз дараҷасига кўтариб, улуғлаш “маросими” ҳали-вери пасаядиганга ўхшамасди.

Балки, ой ҳам, кун ҳам шу зот учун чиқадиган “ёруғ юлдуз” ёнида “митти”ларини хирагина нур сочиб туриши кимларгadir ёқмасди...

Худди шуни аввалдан англагандек, узоқни кўра биладиган, “замонамиз” “Даҳо”сидан ҳам донишмандроқ Абдулла Қаҳҳор бундан эллик йилча аввал “Ён дафтар ёзувлари”га кимга қаратилгани сир бўлиб қолаётган қуйидаги ёзувларни битганди: “У катта истеъдод эгаси. Ёмон иллати ҳам бор: фақат ўзим бўлсан, ёниб, култепага айланган уйнинг мўрисидай бир ўзим қолсан, дейди”.

Шунинг исботи учунми, яқинда Раисга салкам авлиё таърифи берилган навбатдаги учинчи “шарафнома” китоби пайдо бўлди. Тўғрироғи, салмоқдоргина беш қисмдан иборат бу китобнинг асл номи бош қаҳрамоннинг ўзига яраша зуғумкорона сўзидан олинган “Мен шоирман... Истасангиз шу...”

Ундаги соҳта мақтовлару, учига чиққан ёлғон “тўқималар”га тўн кийдириш борасида аввали “нома”чилардан ўтиб тушилган деса ҳам бўлаверади.

Уларга тафсил бериш учун анча-мунча вақт кеरак. Шу сабабли асарда даъватнома руҳида битилган биргина қуйидаги жумлаларга эътибор бе-

ринг! “Мутафаккирона одоб-ахлоқ соҳиби, дилкаш сұхбатижон... устоз (китоб қаҳрамони)нинг ҳар бир айтган каломини КҮЗГА СУРТИШ, янаям муҳими, бу давра (яъни кўзга суртuvчилар) га бошқаларни ҳам кенгроқ жалб этиш керак”.

Буларни ўқиб, қойил, асрлар давомида ада-биётимиз бешигини тебратиб келган ҳали бирон зот бу қадар юқори мартабали таҳсинга сазовор бўлмагундур дея, ўйланиб қоласан.

Ва ногаҳон миянг ишлаб кетгандай бўлади-да, ботиний фикр хаёлингни чулғайди: адабиётнинг муқаддас даргоҳига қадам ранжида қилган поки-за ниятли ҳар бир инсон энг аввало шу соҳанинг асосий мезони бўлган одоб-ахлоқ, ҳусни хулқ ва чин одамийликни тараннум этиб, унга ўзи амал қилиб, бошқаларга ўrnak бўлмоғи керак. Агар унда шу муқаддас фазилатлар мавжуд бўлмаса, минг мақомга солиб мақтама, унинг “доно”лигию, “даҳо”лиги куфронга ўйинлардан бошқа нарса эмас. Қайтараман, “доно”лигию, “даҳо”лиги куфронга ўйинлардан бошқа нарса эмас.

Шундай экан, ҳар бир ўқувчида китобни чи-қарганлар кимнинг қаерини кўзга суртинглар, деб даъват қилмоқда? деган савол туғилмайдими...

Сўз ҳам Оллоҳ томонидан биз инсонларга инос-ят этилган муқаддас тухфа. Ундан ёлғон ақидалар ясаш ножоиздир.

Тўғрисини айтавериш керак, шоиримизнинг ижоди бебаҳо хазинадир. Ундан қусур топиш гуноҳ. Бироқ ахлоқ бобида кимдан нимани ўрганишга даъват қилишга келганда, ниҳоятда эҳтиёт бўлиш керак эмасми!

“ГУРУҲБОЗЛАР”

Бу атама асосий вазифаси барча қалам аҳли бошини қовуштириб, улар орасида ҳамжиҳатлик, кўтаринки ижодий муҳит яратиш вазифаси бўлган “Маликушшуаро”нинг узоқ йиллар давомида муюмалага киритиб келаётган палахмон тоши мисол қуролидир. Унга нишон бўлганларнинг ҳолига вой. Ҳатто адабиётимизнинг мўътабар вакилларига ҳам омонлик йўқ.

Бунга мисол қилиб, Бўстонликдаги Ёзувчилар дала-боғини (ҳозир “Озод Шарафиддинов номи билан аталади) келтириш мумкин.

Мазкур масканда мамлакатимиз Мустақиллиги байрамини тантанали нишонлаш анъана тусини олган бўлиб, унда юзлаб ижод аҳлиниңг барча авлодга мансуб вакиллари, олиму зиёлилар, таниқли санъаткорлар, давлат ва жамоат арбоблари, вилоят ҳамда туман раҳбарлари қатори чет эллик дипломатлар, журналистлар ҳам иштирок этишарди.

Катта қозонларда ош дамланиб, зиёфат дастурхонлари атрофида йиғилганларнинг дийдорлашув гурунглари, ижодий мулоқотлар, мушоира-шеърхонлик, ўзаро шахмат беллашувлари, ҳофизлар хониши то кеч оқшом тушгунича давом этар, тадбир якунида сўзни ҳазрат Анваржон қори Турсунов олиб, йил давомида бандаликни бажо келтирган марҳумлар номини бирма-бир эслаб, улар руҳи покларига Қуръон тиловат қилинар, шу ерга таклиф

етилнган марҳумларнинг оила аъзоларига ёрдам совғалари тарқатиларди.

Ҳар йили қайтариб туриладиган шундай хайрли тадбирда иштирок этишларини сўраб, энг аввало Уюшма раисига “Таклифнома” жўнатиш канда қилинmasди. Бироқ, расмий Уюшма томонидан раис тугул, унинг ўринбосарларидан биронтаси қорасини кўрсатмас, у ердан садо ҳам чиқmasди.

Чунки, бу тадбирга ҳар доимдагидай “даврабоши”лик вазифасини устоз Озод Шарафиддинов билан Эркин Воҳидовлар ўз зиммаларига олишарди. Унинг устига-устак, маросим камина “раис” бўлган худудда ўтказилиши ҳам Ёзувчиларнинг “ягона рasisi” ғазабини қўзғар, у ростманасига мазкур тадбирни “Уюшмага ҳеч қандай алоқаси йўқ гуруҳбоз тўдалар йигини” деб эълон қилганди.

Қизиқ томони шундаки, бу “тўдалар йигини”нинг довруғи ошгандан-ошиб, қўшни мамлакат Хиндистон-Покистон газета-журналларида у ҳақда хабарлар эълон қилинар, дала-боғ полизида этиштириб, дастурхонга тортилган “Бобурнома”даги “Бобурий қовунлар” таъриф-тафсифи баён этиларди.

Ўзимизда эса... бу ҳақда кичкина мақола эълон қилишга журъат этган матбуот органи бошига юқорида айтиб ўтилганидек, “Хуррият” газетасининг куни солинарди.

“Гуруҳбоши” ва “унинг одамлари” деганда ким ва кимлар назарда тутилаётганини Водийдаги адабиёт учун “масъуллар” яхши билишади. “Анавунинг гуруҳидагилар кетаётганмиш. Улар кимлигини яхши биласанлар-а! Яқинлашмаларинг!”

Бундай буйруқ айтилгандан сүнг айримлар ўта нокулай ахволга тушади, наманганлик “шотир” эса, “устози”нинг узоқдан туриб чалган мусиқасига боплаб беркинмачоқ ўйини уюштириб, ўша “гурухбоз”лар жонини ҳалкумига келтиради. Шундан кейин вилоятга иккинчи қадам босмасликка қасам ичғанлар қанчадан-қанча.

Қаламкашлар орасидаги ўйлаб топилган “гурухбоз”ларни кўришга кўзи йўқ биттаси қачонлардир адади 700 000 дона бўлиб, ҳозир 3500 лар нариберисига тушиб қолган “Ўзбекистон адабиёти ва санъати” газетасига (албатта “Маликушшуаро”нинг фатвоси билан) бошқон бўлиб ўтиради-ю ишни “рақиб”ларга қарши курашни баттар авж олдиришдан бошлади.

“Ҳар нарса бўл – инсоф билан бўл” деган ҳикмат мағзини чақишга ҳам фаҳми етмайдиган бу амал бандаси паноҳгоҳи раҳбарлик шоҳсупасидан тушиб, “фаҳрий”лик номини олгач ҳам, унга содиқлигича қолиб, аввалги қилиғни давом эттираверди.

Бир пайтлар “устозим” деб атаган шоирнинг муборак номини газета сахифаларидан ўчириш билан чекланиб қолмай, у киши қатнашган, ўзи бошқариб борган катта адабий анжуман, учрашув тадбирларни кўркўрона “йўқ”ча чиқариб, улар ҳақида қисқагина хабар беришни ҳам лозим топмас, буни очиқласига ҳамманинг кўз олдида амалга оширади.

Бунга Ўзбекистон Вазирлар Маҳкамасининг Қарорига биноан Наманганда катта тантана билан Эркин Воҳидов бошлиқ йигирма беш кишидан зиёд ёзувчи-шоирлар иштирокида ўtkazилганта икки кунлик “Адабиёт байрами”ни мисол қилиб келтириш мумкин.

Бу республика аҳамиятига молик бўлган тадбирда аввалдан белгилаб қўйилганидек, “ЎзАС” газетаси мухбири иштирок эшиши керак эди.

Бироқ, газета бош муҳаррири худди ўша куни “фахрий”нинг воҳага сафари бошланиб қолгани сабаб, мухбир унга ҳамроҳ қилиб юборилаётгани, таҳририята “ортиқча одам қолмаган”лигини баҳона қилиб, туриб олди. Ҳатто Уюшма раиси ўринбосарининг гапларига ҳам қулоқ солмади.

Наманган Вилоят ҳокими Баҳодир Юсупов юқори минбардан туриб “Адабиётимизнинг Эркин Воҳидов бошлиқ йирик намоёндаларининг бу қадар жамул-жам бўлиб ташриф буюришлари вилоятимизнинг шаҳар ва қишлоқлардаги мингминглаб аҳолиси учун ҳақиқий адабиёт байрами тусини олиб кетди” деб, айтганидек, наманганли мухбирлар хўп қизиқарли ўтган бу унутилмас икки кунлик тадбир ҳақида мухтасаргина мақола ёзиб, адабиёт газетаси таҳририятига жўнатдилар.

Аммо, шоиru ёзувчиларнинг ягона органи бўлмиш бу газета ундан қисқагина парча босиши ни ҳам раво кўрмади. Ваҳоланки “фахрий”нинг бир неча кунлик Воҳа бўйлаб қилган “унутилмас сафар” чоғида “халқ билан учрашувлари, қизғин мулоқотлари” ҳақида маҳсус мухбирнинг бутун бир саҳифани эгаллаган мақоласини эълон қилди. Бунга нима дейсиз!

Шу Наманган «Адабиёт кунлари»га муносабатнинг яна бир қизиқ томони ҳақида гапирадиган бўлсам, адабий газета ҳисобланмиш “Китоб дунёси” бош муҳаррири, таниқли шоира бошлиқ унинг бир нечта ходимлари Эркин ака, Иброҳим ака-

лар билан ёнма-ён туриб, адабий анжуманларининг барчасида иштирок этдилар, оташин нутқлар сўзлаб, шеърлар ўқидилар. Аммо, улар ҳам кўзлари кўрмас, қулоқлари эшитмас, тиллари гунг бўлиб қайтдилар чоғи, “ўз” газеталарида қисқагина бўлса-да, хабар беришни истамадилар.

Бироқ, Наманган телевидениесининг ижодий гурӯҳ йигитларига қойил қолиш керак. Улар икки кун давомида ардоқли шоир изидан қолмай, унинг ҳар бир қадамини тасвирга тушириб чарчамадилар. Элнинг унга бўлган ҳурматини мухрлаб бордилар. Нуроний бир қариянинг интервью бературиб “Эркинжон Наманганга келганларидан бери шахримиз ёруғ нурга чулғаниб кетгандай бўлди”, деб айтган сўзларининг ўзи ҳар қандай газета хабаридан устунроқ эди.

Нима бўлганда ҳам бир ҳақиқатни айтиб ўтишга тўғри келади. Адабий газета ҳисобланмаса-да, “Даракчи” ҳафтаномаси гугурт қутиси ҳажмида жой ажратиб, Наманганда бўлиб ўтган “адабий кеча” ҳақида беш қатордан иборат эслатма эълон қилди.

Шунисига ҳам шукур, деб тургандик, мустақил “Ҳуррият”нинг нақ ярим саҳифасини эгаллаган, Наманган вилоят давлат театри биносида бўлиб ўтган “Адабиёт байрами” хусусидаги репортажни кўриб, қувониб кетдик. Афсус, қувончимиз узоққа чўзилмай, “Репортаж” га бир сидра кўз юргутиб, ёқа ушлашдан бошқа иложимиз қолмади: бу тадбир нима муносабат билан ўтказилганлиги мавхум, “сир” тутилган. Унда иштирок этаётганларнинг қиёфаси тугул, сояларини ҳам кўрмайсиз. Ҳамманинг эътиборида бўлиб сухандонлик қилган

Эркин Воҳидов-ку майли, унга ҳамроҳ бўлиб, ёнида ўтирган Ўзбекистон Ёзувчилар уюшмасининг масъул раҳбарлари қатори уч кишидан иборат республика Олий Мажлиси сенати аъзосидай расмий вакилларнинг номларини ҳам “ӯчириш”га наҳотки, газетадаги азаматлар журъат этишган бўлса, деб ўйланиб қоласан киши. Ва бирдан... аввалроқ рўй берган бош муҳаррир “бошини еган” кўнгилсизликни эслаб, э-ҳа, бу “Ҳуррият”чиларнинг “Бир марта қайноқ сутдан оғзи куйган – қатиқни ҳам пуфлаб ичади” деган ҳикматга кўра амалга оширган уддабурроликлари бўлса керак, деб ўзингни босишга мажбур бўласан.

Юшма янги баҳавороқ жойга кўчиб, вазият ҳам ўзгаргач, у ернинг дарвозаси қоровулсиз, ҳамма учун очиқ бўлиб қолганди.

Эркин Воҳидов қадрдан бу гўшага узоқ йиллардан сўнг илк бор қадам босиб, кириб келди.

Чунки уни катта мажлислар залида шеърият шайдолари кутишар, муҳлислар бутун зални тўлдириб, ташқаригача чиқиб кетганди.

Тўғрисини айтиш керак, бундай учрашувни узоқ йиллардан буён кўпчилик илҳақлик билан кутган эканми, икки соатга мўлжалланган шеърхонлик савол-жавоб, ҳазил-мутоибалар билан уч соатдан зиёдроққа чўзилиб кетди. Ҳеч ким, айниқса ёшлар шоирни минбардан туширгиси йўқ эди...

“Фахрий” ҳам катта шоир. Кўнгли ўта нозик. Шуни ҳисобга олиб, унинг “Шеърият кечаси”ни келаси ҳафтага белгиланган, газетада бу ҳақда эълон ҳам чиққанди.

Бироқ, ҳар доим қизғин ва завқли ўтадиган ўз “кечаси”га бу сафар муҳлислар одатдагидан ан-

ча сийрак йигилганлигини кўрган “фахрий”нинг кайфияти бузилди. “Амалдан тушганимни дарров билдиришди, баччағарлар!” дегандек “кеча”ни бошқараётган Адабиёт газетасининг бош муҳарририга зуғумли қараш қилиб қўйди.

Бунга жавобан у:

– Ҳаммаси яхши бўлади, устоз! – деб қўйди.

Чиндан ҳам, ўтган ҳафта Эркин Воҳидов билан бўлиб ўтган ўта қизиқарли “Мушоира”ни “ўрага сичқон тушди-гулдир-гуп” қилинди-ю “мухлислар учун байрамона тус олиб кетган” “фахрий” шеърият кечаси ҳақида ҳамду саноларга тўлиб-тошган, одатдагидек газетасининг бутун бир саҳифасини тўлдирган кўрпадай мақола эълон қилинди.

Уюшма мажлислар залида аҳён-аҳёнда 6-7, жуда борса 10-12 киши иштироқида “Янги асар муҳокамаси” тадбири ўtkазилиб турилади. Буни “ЎзАС” биринчи бетда маҳсус руҳи остида муҳим хушхабар ўрнида дарров эълон қиласди.

Ҳафта ичидаги янги асар олдинма-кетин кўпчилик ҳукмига ҳавола этиладиган бўлди. Аввал салмоқдоргина, энг долзарб мавзуда ёзилган “қўлёзма” муҳокама қилиниб, эҳа, унда қатнашмоқ учун келганлар 55 кишидан ошиб кетганлиги сабаб “кичик зал”га сиғмай, “катта зал”га ўтишга мажбур бўлдилар. Бу камдан-кам кузатилган ҳол эди. Йигилганларнинг кўпчилиги узоқ йиллар ичидаги илк бор Уюшмага қадам босиб кириб келган мунаққид ва ижодкорлар эди. Номма-ном айтиладиган бўлса, У.Норматов, И. Фафуров, А. Расулов, Ш. Ризаев, Ж. Камол, Қ. Йўлдошев, М. Аъзам, Ф. Мусажонов, О. Мухтор, Э. Аъзам, Н. Норматов, Н. Муҳаммадиев,

Хуршид Дўстмуҳаммаддан тортиб Ш. Салимова, Х. Рустамова, Г. Норматовагача шу ерга йиғилган эдилар... Хуллас, Э.Воҳидов “ҳакам”лигига асар муҳокамадан яхши ўтди. Ҳатто муҳаррирликни Н. Муҳамадиев елкасига юклаб, босишга тавсия ҳам этилди.

Шу куннинг эртасига бор-йўғи муаллифнинг ўзи билан қўшиб ҳисоблаганда етти киши иштирокида муҳокама этилган, болаларга бағишинланган шеърий достонча “ЎзАС” бош муҳарири қаламига мансуб бўлиб, бош маърузачиликни “фаҳрий”нинг ўзи қўлга олди. Албатта, бошқалар унинг барча айтганинги “бир овоздан” маъқуллашди.

Энди бу ерда ҳар икки асар муҳокамасини бошқарганлар киму, улардан қай бирининг номи газетага “муносиб” эканлигини билиб тургандирсиз! Шундай бўлгач, бош муҳаррир яна бир бор бетни қаттиқ қилиб, “гуруҳбоши”сининг ўз асари ҳақида айтган мақтовли сўзларидан иқтибослар келтириб, “Янги асар муҳокамаси” рукни остида газетанинг биринчи бетида каттагина таҳсинли хабар эълон қилди.

Қисқа муддат ичидаги амалга оширилган ғирт “тарафкашлик” (“Гуруҳбозлик” эмас) дан иборат бу далил-исботларга шубҳа билдирадиганлар бўлса, “ЎзАС” газетасининг ўша йилги таҳламларини вараклаб, энг охирдаги “Бош муҳаррир”нинг исми-шарифи ёзилган жумлаларга бир назар ташлаб қўйишлари мумкин. Хуллас, мен келтириб ўтган юқоридаги мисолларнинг ўзи ўша давр “Ўзбек журналистикаси”нинг аҳволи қай даражада бўлганлигини кўрсатиб турибди. Келажақда бун-

га қизиқиб, тадқиқот ўтказмоқчи бўлганлар буткул “ғаройиб” бир мавзу сифатида улардан фойдаланишлари мумкин.

БЕЗОВТА ЮРАК

Ҳозирги пайтгача, “Мустақиллик учун фидойиларча курашиб”, шўронинг “кўп жабру жафоларини тортган”лиги, “қийинчиликларни бошидан кечирган”лиги ҳақида ҳеч тортинмай, қўшиб-чатиб гапираверадиганлар топилади. Улар ўзини “мустабид даври”нинг “қурбони” қилиб кўрсатади ҳам.

Наҳот шунга ўхшаганлар “сенлар “Мустақиллик” деган ҳавои тушунчаларни орзу қилиб қолдингми? “Мустақиллик” – тандирда мавжланиб турган аланга. Унга янги тухумдан чиқкан жўжа маҳлиё бўлиб, ўзини отганидай, сенлар ҳам куйиб, йўқ, бўлиб кетасанлар”, деган мазмунда ўз қавмини “жўжа”га қиёслаб шеър битган кунларни унугтан бўлса!

Агар биз шўрога бу қадар фидойиларча ҳаддидан ошишларга “ўша даврнинг тақозоси эди”, деган ақидани балогардон қиладиган бўлсак, юзлаб бегуноҳ ҳаётдан кўз юмганлар руҳини қақшатган бўлмаймизми! Балки, Абдулла Қодирий, Чўлпонларни отганлар ҳақида индамай қўя қолиш керақдир. Балки озгина вақт ўтгач, авф ҳам этилар..

Мен асло бу гапларим орқали “давр тақозоси билан” билиб-бilmай “гуноҳ” содир этганларга бирон жазо берилиши ёки тазийқ остига олиниши лозим, деган фикрдан мутлоқ йироқман. Лекин, инсоф юзасидан айтадиган бўлсак, билиб туриб

қилингган “айб”ни мардона елкага олмаганда ҳам, ҳеч бўлмаса, сал камтар бўлиш керак-ку, одам!

Модомики Эркин ака ҳақида гап кетаётган экан, у кишининг кўпчиликка ибратли бўладиган ўзларига хос фазилатлари ҳақида гапирмасликнинг иложи йўқ, деб ўйлайман.

Бу одам ҳеч қачон шахсий манфаатини устун қўйишни хаёлига ҳам келтирмаган. “Мен, мен” дея жонини жабборга бериб, “биринчи” бўлишга интилувчилар тоифасини мутлақо ёқтирмаган. Кўпчилик, бошқалар ташвиши ҳақида қўпроқ қайғурган.

Ҳатто, ҳуда-бехудага “Тез ёрдам” машинаси-ни чақиришга ҳам истиҳола қилганининг ўзим кўп марта гувоҳи бўлганлигим ҳақида юқорида ёзиб ўтганман. Бунга қўшимча қилиб, Покистонда, сўнг орадан ўн йил ўтгач, Фарғонада ўtkазилган тадбирлар “тариҳи”ни яна бир бор муштариylарга эслатиб қўйишни истардим. Маълумки, ҳар икки тантана ҳам Эркин акага бағишланган бўлиши лозим эди. Бироқ у киши чет мамлакатда ҳам, ўзимиизда ҳам “Ўзбек адабиёти кунлари” номи билан ўтказишни қатъий талаб қилиб туриб олди. Фарғонада рўй берган “ноқулайлик”ка эътибор бермади, бирон оғиз нолиш сўзи ҳам айтмади.

Бундай камтарона сабр ва чидамни нимага қиёслаш мумкин...

Дарвоқе, туби чуқур, суви оғир ва салобат билан оқувчи азим дарёга қиёслагудек Эркин Воҳидовга келсак, у инсон ўзбекнинг “ардоқли шоири” бўлиб турган “Совет замони”да ҳам жуда рўшнолик кўравермаган. Бунинг боисини билмоқчи бўлган

ҳар қандай зийрак шеърхон шоир асарларига бир сидра кўз ташлагандаёқ англаб етади. Ижодининг бирон ерида шахсий гина-кудуратларга йўғилган, нуқул кимларданdir норози бўлиб ёзилган мисраларни учратмайсиз. Кимданdir “паноҳ” излаб, ялтоқланиб, куллуқбозликка берилиш шоир учун мутлоқ ёт нарса эди. Унинг ҳар бир шеърига яши-ринган кўринмас вужуд – юракнинг дардли уриши-ни эшитгандай бўласиз.

Эркин Воҳидовни чин маънода “Ардоқли Шоир” дея бежиз айтилмаган. У ўзбекнинг фидойи фарзанди сифатида унинг келажаги, равнақи, бошқалардан устунроқ бўлса-бўлганки, кам эмаслиги, ўрнак бўларли ўтмиши, дунё тан олган ўнлаб буюк олиму уламо, мутафаккирлари борлиги билан мағрурланарди. Шу билан дунё тамаддуни илмиётининг турли соҳалари бўйича ўчмас из қолдирган бобокалонларимиз бир четда қолиб, ўзга “даҳо”ларнинг “жаҳоншумул” шон-шуҳрати мияларимизга сингдириб, юқори минбарлардан “Буюк оғалар олдида бошимизни эгамиз” (“низкий поклон”) шиорлари янграб турган пайтларда юраги ўртанарди. Ёнарди. Шунинг учқунлари шеърларига жо бўларди.

Кремлнинг шафқатсиз айланиб турувчи тарғибот-ташвиқот “тегирмони”га дахл қилиб, ундан омон қолиш осон эмаслигини яхши билса-да, шоир юрагидаги бор дардни машъала қилиб, ўзининг “Ўзбегим” деб аталган “Шоҳнома” мисол мумтоз қасидаси билан майдонга чиқди. Бутун бир халқнинг кўп асрларга teng залворли ўтмишини ўзида мужассам этган бу асар жуда кўпларнинг

кўзини очди. Ҳатто, “кўриш қобилияти” хиралашиб, “Ягона тил, ягона Совет миллати” эканлигига ишониб, ғафлат балосига йўлиққанларни ҳам ҳушёр торттириб юборди.

Турли йиғин-гурунгларда “Ассалом рус ҳалқи, буюк оғамиз” деган жумлалар билан бошланувчи республика гимнига муқобил тарзда “Янги Ўзбек таронаси” пайдо бўлганлиги ҳақида гаплар тарқаб қолди.

Бу албатта “юқори”дагиларни ҳушёр торттирмай қолмади. Шоирдан “Ўзбегим”ни янги даврга мос “байналмилалча” ҳамда “кatta оғалар”га миннатдорчилик руҳидаги мисралар билан тўлдириш кераклигини илтимос қилишди. У, ҳа деганда бу илтимосни бажаравермади. Буйруқ берилди. Унга ҳам қулоқ солмади.

Ўртага Ғафур Ғулом тушиб, уйига чақирди. “Ҳой, менга қара”, деди устоз шоир чапаничасига, “биз сендей пайтимиизда тор тупроқ кўчадан унда-мунда қиз-жувонлар ўтиб қолса, пахса деворнинг тирқишидан мўралаб, “оҳ-оҳ” деб (аслида гап бошқачароқ бўлган), ҳузур қилардик. Сани эса, орқа-олдингдан ман-ман деган жононлар аrimайди. Бундан бошқа яна, нима керак санга? Шундай бўлгач, анаву қасиданг масаласида “катталар” берадиган маслаҳатга қулоқ солгин-да, қайсарлик қилавермай... Ҳа, гапим чўзилиб кетди. Энди, менга қара! Ўнг-чап қулоғинг билан яхшилаб эшитиб ол: сенга шунча вақтимни кетказиб, ҳам меҳмон қилиб, насиҳат қилдимми? Қилдим! Айтганларимни қулоғингга илиб олдингми? Олдинг! Энди бор кетавер, ўз билганингдан қолма! Мол сеники. Туппа-тузук нарсани тасқара қилиб нима қиласан”.

Кимлардир томонидан “насихат қилиб қўйиш” сўралган Академик шоирнинг бу “маслаҳат”лари ҳам кор қилмагач, шоир “масаласи” ёпиқ партия мажлисида муҳокама этилиб, унга огоҳлантирувчи “партиявий жазо” – ҳайфсан эълон қилинди.

Мана шундан кейин у танқид “нишони”га айланди қолди.

Шоир ўткир публицист сифатида “Совет замонаси” давридаёқ чоп этилган “Изтироб” номли салмоқдоргина мақолалар китобида шўро сиёсатини бешинчи ғилдираги кўндалангига ўрнатиб қўйилган аравага қиёслаб, унинг кўп бўлмағур томонларини фош этувчи далил-исботлар билан шармандасини чиқарганди.

Кейинчалик бу мавзу кенгайиб, ҳам жиддий, ҳам енгил, қитмиона юмор шаклида ёзилган туркумлар пайдо бўлди.

Маълумки, дапқур-дапқур кутилмаганда бутун мамлакат узра “совуқ уруш” васвасаси бошланиб қолар, гўё Америка босқинини даф этиш учун ҳамма ерда мудофаа сафарбарлиги эълон қилинарди. (Худди ҳозирги Россияда рўй берадиган жазавадай!) Одамлар юрагига ғулғула уруғини сочиб, кўп безовталиклар қўзғайдиган бу “жанговар ҳолат”га шоир ўзининг машхур бўлиб кетган шеъри орқали “Агар, Америка бизни босиб оладиган бўлса, боқиши керак, ахир, шунинг учун ҳеч қандай қўрқувга ўрин ўрин йўқ”, дея кўпчиликни ваҳимага берилмасликка чақирганини ҳамма эсласа керак.

Бунинг замирида қанчалик теран маъно ётганини сезиш қийин эмас.

“Эркин ака учун халқнинг қайғу ва мусибатини кулиб гапириш, унинг шодлик ва қувончини йиглаб га-

пиришдан кўра қийинроқ бўлган” (Мирза Кенжабек) бир пайтда “Дониш қишлоқ”ли Матмуса ҳақида ўзи ҳазилга ўхшагани билан таги “зил” шеърлар туркумини яратиб, жамиятдаги норасоликларни мажозий ташбеҳлар орқали фош этишнинг бутунлай янгича услубини кашф этди. Биргина “Матмуса-нинг уйланиши”ни олинг: у шаҳарда бир ҳурлиқога ошиғу беқарор бўлиб, осонгина уйланиб олади-да, қишлоққа олиб келади. Унинг таърифига гап йўқ. Ҳамма мақташ билан овора. Шу орада келин тушмагур тўқиз ойда эмас, уч ой ичида тўлпоқдай чақалоқ туғиб беради. Бутун “Дониш қишлоқ”да тўйу томоша янада авжга чиқади. “Маҳаллий” газеталар бу мисли кўрилмаган “янгилик”ни ҳамма ёқقا жар солиб, ёза бошлайдилар. “Зарбдор” Матмуса иззат-ҳурматда. Димоги баланд. Қаёққа қараманг, “Тўқиз ойлик планни уч ойда уддалаган Матмусага шон-шарафлар бўлсин!”, “Барча эркаклар Матмусадан ўрнак олишлари керак!” деган шиорларга тўлиб тошган...

Сатиранинг нимтабассумли ўткир тифи яширган бу шеър орқали шоир нима демоқчи, тушуниб етгандурсиз.

“Дин – афюндинир” шиорига худди 30- йиллардаги тала-тўп жазавасини бериб, минг йиллик тарихга эга муқаддас зиёратгоҳлар булдозерларнинг темир ғилдираклари остида йўқ қилинаётган, қўхна масjid бинолари бузилиб, вайрон этилаётган, Наврўздай халқ байрамини қораловчи шеърлар битиб, минбарларда ҳайқириб ўқилаётган бир пайтда, телевизор орқали ҳаммага қаратада “Қўшалоқ бўлиб, келаётган муборак рамазон Ҳайит

байрамингиз ҳамда буюк бобомиз Алишер Навоий ҳазратлари мадҳ этган Наврӯзи олам барчангизга муборак бўлсин, азизлар” дейишнинг ўзи ҳамон кескир бўлиб турган шўро сиёсатига очиқдан-очик исён белгиси эмасми!“

“Мустақиллик жонкуяр”лари ўша пайтлар шундай жасоротли сўзларни айтишга журъат қила олармидилар?

Москадан туриб бошқариладиган “Совет мафкураси”нинг ҳақиқий башараси Гдлян, Иванов бошлиқ Ўзбекистонга ташланган “десантчи”ларнинг “Ўзбек иши” деб, амалга оширган мислсиз жинояткорона хатти-ҳаракатлари орқали яққол кўзга ташланиб қолди.

Бутун ўзбек ҳалқи таҳқир остига олиниб, очиқдан-очик “жиноятчи”, “порахўр”, “фирибгар”, “ишёқмас – дангаса”га чиқарилди. Ишнинг кўзини билган катта-кичиқ раҳбардан тортиб, қишин-ёзин даладан бери келмай, пахта етиштирадиган, лекин топган-тутгани оиласини боқишга аранг етадиган йиртиқ чопон дехқону чўл-биёбонлардаги қўйбоқаргача тутиб-келиб, қамалаверди. Хибсхоналар тўлиб-тошгач, Москва атрофидаги қамоқхоналарга жўнатилди. Бу худди Ўзбекистонга нисбатан уюштирилган қирғинбартони эслатарди.

Бундай кўр-кўрона амалга оширилаётган жабру жафоларга Иттифоқ ва жаҳон миқёсида номи машҳур Чингиз Айтматов каби ижодкорлар бефарқ қараб туришмади. Ўта меҳнаткаш ва бағри кенг ўзбек ҳалқини ҳимоя қилиб, матбуотда чиқишлиар қилишди. Ҳеч қандай натижа бўлмади.

Шундай бир “иложсизлик” пайтида “маҳаллий” қалам аҳли қўлидан нима ҳам келарди. Сукут

саклашарди. Лекин улар орасида думини ликкил-латиб турадиган бир-икки “сайроқи” түтилар ҳам йўқ эмасди.

Бироқ, бегуноҳ “қурбонлар” оҳи-зори кўплар қатори шоиримизнинг дардли юрагини ҳам ўртари-ди. Энди ҳазил-мутоиба билан эмас, бу ҳаддидан ошишларга кескин муносабат билдириш пайти етганини англаган Эркин Воҳидов мардлик билан ягона йўлни танлади. Ўз норозилигини намойиш-корона партия билетидан воз кечиш орқали баён этди.

Шубҳасиз, у кутилмаган бундай шаккоклиги билан куни битиб бораётган тузум яловбардорлари ғазабини баттар жунбушга келтирди. Улар ҳар хил усууллар билан шоирга тазийқ ўtkазиш йўлларини излардилар.

МАВЗУНИНГ ТУҒИЛИШИ

Эркин ака

*“Бу Ватандан бир Ватан
Кўрмоқни истайдир кўнгил,
Уни озод қуш каби
Кўрмоқни истайдир кўнгил” –*

деган муқаддас орзулар ғояси билан яшар, доим халқнинг келажаги учун қайғуриб, ижод қиласарди.

Хоҳ катта, хоҳ кичикроқ, ҳатто тўрт сатрдан ибрат шеърининг чақмоқдай дарров одам диққатини тортиб олиш сири шунда эдики, у мавзуни ўйлаб топмасди, бир лаҳзада илҳом парисидай кўз олдида пайдо бўлиши билан унинг “сурати”ни қоғозга тушириб олар, кейин сайқал берарди. Баъзан ёдда сақлаб қоларди.

Шоирнинг болалиқдан энг яқин қадрдони Раҳматилла Иноғомов эндиғина жарроҳлик амалиётини бошидан кечирган дўстининг дераза раҳида чуғурлашаётган қушчаларга қўзи тушиб, ўша заҳоти пайдо бўлган уш бу сатрларни келтиради:

*“Чумчуқлар деразада
Хўп уларга мазза-да,
Оғрийдиган боши йўқ,
Ўт қолида тоши йўқ”.*

Лекин, Эркин ака ижодининг каттагина қисмини ўта долзарб, жиддий социал мавзудаги шеърлар

ташкил этиши ҳаммага маълум. Уларнинг пайдо бўлиши ҳам “замона зайлар”га қараб деганларида турли-туман. Мен бунинг кўп гувоҳи бўлганман.

Маълумки, тил бутун бир миллат мавжудлигининг тимсоли ва рамзи.

У йўқ қилинса, миллат ҳам йўқ бўлади.

Бунинг ёрқин мисоли ўрнида шўронинг узоқ шимолий минтақаларида қадим-қадимдан ўзлигини сақлаб келган ўнлаб “майда” миллат ва элатларнинг қисқа вақт ичидаги “ассимиляция” – қўшилиб кетиш орқали “йўқ” қилингандигини келтириш мумкин эди. Буларнинг ҳаммаси “интернацоналлик” байроғи остида “ягона оила” бўлиб яшаш шиори билан амалга ошириларди.

Ўтган аср ўрталаридан бошлаб бу “тажриба” Кавказдан кўра Ўрта Осиёда самаралироқ кечиши масковлик “аҳолишунос”ларга маълум бўлиб қолди.

Аввал кўпчилик одамлар онгига “катта оғалар” тилисиз дурустроқ амал мартабасига эришиб бўлмаслиги” аста-секинлик билан сингдирила борди. Бунга ўз фарзандлари келажаги ҳақида қайғурган шаҳарлик кўпчилик зиёлилар (кейин бошқалар ҳам) “миллий таълим”дан кўра “буюк тилли” боқчаяслидан бошлаб, мактабларни маъқул кўра бошладилар. Албатта, бу “интернацонал” ўкув даргоҳларига катта эътибор қаратилар, шу баробарида “маҳаллий” мактабларда ўзбек тилида дарс бериш қисқартирилиб борди.

Бу ўз йўлида “миллий мактабларда билим бериш саъвияси ўта паст” деган миш-мишлар тарқалишига сабаб бўларди. (Ҳозир ҳам бундай қалтис ақида ўз ҳамияти, миллати қадриятига бефарқлар орасида сақланиб қолган.)

Масала шу даражага бориб етгандики, ҳатто олис қишлоқларда яшовчи фуқаролар томонидан маҳаллий ҳокимят амалдорларига ёзиладиган ариза ва бошқа қоғозлар ҳам рус тилида бўлишилиги ҳақида буйруқ берилди. “Твоя-моя” деб, “оғалар” тилини чала-чулпа билади ганлар ошиғи олчи бўлиб кетди.

Албатта, бундай аҳмоқона авж олдириладиган тала-тўпларга ҳалқ назарига тушган ижодкорлар томошобин бўлиб туришмасди. Ўз юрак дардларини матбуот, радио-телевидение, аксар юқори минбарлардан туриб, ҳалққа етказишар, унинг кўзини очишарди. Шулардан бири Абдулла Қаххорнинг 60 йиллиги Катта Навоий театри биносида тантана билан нишонланаётган, бу тадбирни бутун республика аҳолисига радио орқали эшилтирилиб, телевидение кўрсатаётган бир пайтда “юбилияр”га сўз берилгач, у қатъий қилиб, белгилаб қўйилган “қоида”ни бузиб, ўзбек тилида “Модомики мен “Тўй бола” бўлсан, эркалигимни кўтарасизлар, деб умид қиласман. Чунончи бир умр ўзбек адабиётига хизмат қилиб келаётган бир ўзбек ёзувчиси сифатада ўз Она тилимда сўзлашга ҳаққим бордир, ахир”, дея айтган сўzlари кўпчиликнинг эсида қолган. Ва буюк ёзувчи ўзининг мана шу “руҳдаги сўzlари” учун кўп азоб чеккани ҳам бор ҳақиқат... Устознинг ўша нутқидан илҳомланган Эркин Воҳидов ўзининг “Она тилим ўлмайди” шерини яратди. Ва бу тез орада эл оғзига тушиб кетди.

Дарвоқе, шоирнинг сал кейинроқ ёзилган Она тили ҳақидаги анча “исёнкорона” руҳдаги яна бир шеърининг туғилишига туртки бўлган бир воқеа ҳақида тўхталиб ўтмоқчи эдим.

Етмишинчى йиллар үрталарида миллий тилидан, “ўзлиги”дан бебаҳра “интернациаллашган” бир тӯда авлод етишиб чиққанди. Ана ўшалардан бири, марҳум адабининг ягона зурриёти ҳисобланмиш қирқ ёшлар атрофидаги, соч-соқоллари ўсиқ киши Эркин акани йўқлаб (у пайт акахон катта нашриёт бошлиғи вазифасида ишлар, дам олиш куни бўлгани учун уйда эдилар) келиб қолди.

Салом-алик ҳам қисқа, лўнда “маданийча” бўлди. Мулоқот ҳам шунга яраша кечди. Чунки “мехмон” узоқ бегона юртдан келгандай бирон жумла ўзбекча сўзни эплаб гапиролмас экан. Ўзи буни тан олди.

Иддаоси, отасининг яқинлашиб келаётган саксон йиллиги муносабати билан “Танланган асарлар”ини чоп эттириш бўлиб чиқди.

Эркин аканинг:

– Ким нашрга тайёрлаб беради? – деган саволига:

– Я не понимаю, другие займутся, – дея жавоб берди.

Устоз уни кузатиб қайтаркан:

– Қизиқ, отаси нима ёзганини билмаса, бу кимнинг фарзанди ўзи, – деб қўйди.

Шунда беихтиёр бир неча йил олдин Ойбек до-мланинг шаҳардан чет дала-ҳовлисида рўй берган ҳодиса кўз олдимда гавдаланиб кетди. Ўшандა укам Амир Файзулла билан мева териш ҳашарига чиққандик.

Якшанба куни бўлгани учун устознинг ўғил-қизлари ҳам уч-тўрт бола- бақра билан шаҳардан дам олишга келишганди.

Тушга яқин ҳовли бекаси Зарифа опа ўртадаги катта юмалоқ столга дастурхон ёзиб, бизни ҳам тушликка чорлади.

Ойбек ака Амир икковимизга ёнларидан жой күрсатдилар.

Дастурхон атрофига жам бўлганлар ўртасида чуғур-чуғур бошланиб кетди. Фақат биз Ойбек до-мла билан онда-сонда “ўз” тилимизда гаплашиб қўярдик.

Охири буюк адид худди бизнинг олдимизда ўзларини ноқулай сезаётгандек, бошларини қимирлатиб, бармоқлари билан ёнма-ён ўтирган набира-ларига ишора қилиб:

– Бебаҳра, бебаҳра, – деб қўйгандилар...

Шуларни ўйлаб ўтириб, Эркин ака яна бир бебаҳра ҳақида қоғозга тушириб қўйган тўрт сатрга қўзим тушганди:

*“Агар ўз она тилин билмаса ўзбек,
Пайтава бошида салла бўлгани шудир.
Пушкинни ўқиб, Навоийни уқмаса,
Чала пишган қовоқ калла бўлгани шудир”.*

(Мен ушбу жумлаларни илк бор қоғозга тушган нусхаси қандоқ бўлса-шундоқлигича келтирдим.)
Аслида бу шоирнинг машхур «Ўзбек Навоийни ўқимай қўйса» шеърининг «хамиртуриши» бўлган.

Ҳа, устоз ҳеч қачон зўрма-зўракига бирон мавзуни ўйлаб топмас, балки мавзу тўсатдан пайдо бўлиб, у кишининг ўзини ўйлатиб қўярди.

Эркин ака шеъриятининг ҳаётийлиги ҳам мана шунда бўлса керак.

ҚОРАҚҮЛ ТЕЛПАГИ

Хукумат миқёсида ўтаётган мажлислардан бирида минбарга “таниқли” сўзамол чиқиб келди. Гапни “қисқа” қилишини айтиб, бармоини Эркин aka томон бигиз қилди. “Хў-ўш, “Халқ шоири” деган юксак унвонга” дейиши билан кимдир залдан туриб, “бивший-бивший” (яъни “собиқ Халқ шоири”) дея воизга қўшимча қилганди, у бироз сукут сақлаб, нутқини давом эттири: “Ҳа, юксак унвонга эга бўлган бу шоиримиз айтсин-чи, ўзи аъзо бўлган партиядан, хукуматимиздан нима ёмонлик кўрди? Жавоб талаб қиласман. Бошқа талабим йўқ”, дедида, минбарни тарк этди.

Мажлис аҳли ичида ҳеч ким бундай “нутқ”ни кутмаган, ҳатто кимдир томонидан унга “қўшимча” қилинишини хаёлига ҳам келтирмаган эди шекилли, залда бир шамол қўзғолгандай жонланиш бўлди.

Йиғинни бошқараётган киши микрофонга қўлидаги қалам билан бир-икки бор уриб:

– Мажлис тугади, – деб эълон қилди.

Ўша пайтлар Горбачёв бошлаб берган “ошкоралик” тамойиллари ҳали ўз кучини йўқотмаган, омма ҳар нарсадан огоҳ ва қулоғи динг эди.

Тез орада Эркин Воҳидовни “Собиқ шоир”га чиқарилганилиги ҳақидаги гап мажлис залидан “ташқари”га тарқаб, кўпчилик ғазабини қўзғади. Ташқирона фикрни ўртага ташлаган кимса ким

эканлигини аниқлашга қизиқувчилар кўпайди. Миш-мишлар тўлқинида кимларнинг номи қалқиб чиқмади, дейсиз.

Шу орада Москванинг “Комсомолская правда” газетаси ҳам шоиримизга “бағишиланган” катта мақола эълон қилган, у киши “шов-шув”лардан четроқ бўлиш учун Дўрмондаги вақтингчалик дала-боғдан бошпана топганди.

Шубҳасиз, ножоиз сўз айтган ўша “гумроҳ”га мен ҳам қизиқиб қолгандим. Кўпчилик орасида “Бухоро обкоми” деган гап юрарди. Жамол Камол: “Ундей бўлиши мумкин эмас. У ернинг бошлиғи жуда маърифатли одам... Ҳар ҳолда, аниқ фикрга эга бўлмасдан туриб, бундай юзаки хаёлга бориш яхши эмас”, деди.

Эркин аканинг: “Эринмаган одамсиз-а! Қўйинг, овора бўлманг”, дейишларига қарамай, Бухорога қараб уловни ҳайдадим.

Самарқандда эскидан танишлигимиз бор таниқли ёзувчи Нусрат Раҳматнинг шаҳардан четроқ ҳовлисида тунаб, эрталаб аzonда йўлга тушдим. Обкомдаги ходима аёл “бошлиқ” Қоракўл район марказидаги хўжалик клубида ўтказиладиган мажлисга кетганлигини айтди.

Яна етмиш чақиримча йўл босдим.

“Миллионер” колхознинг катта клубида, кейинги йиллар анча ғала-ғовурли тус олиб кетган “раис сайлаш” тадбири энди тугалланиб, ҳамма тарқалаётан экан. Менга милиционер йигит “Ёдгоров ана шу одам”, деб баланд бўйдан келган одамга ишора қилиб қўиди. У кишига яқинлашиш учун қадамимни тезлатдим.

Үша пайтлар шаҳар боғдорчилиги ҳамда Бўстонлик муаммолари билан боғлиқ шов-шувли мақолаларим орқали кўпчиликка отнинг қашқасидай анча “машхур” бўлиб қолгандим. Ўзимни таништириб, “бир оғизгина сўзим бор” лигини, “атайин Тошкентдан келганлигим”ни айтдим.

Секретар уч-тўрт ҳамроҳлари билан мени унча узоқда бўлмаган райком биносига бошлаб кирди. Қисқагина суҳбат асносида шу нарса маълум бўлдики, “номаъқул” гапни айтган, ва ўша куннинг ўзида яхшигина дакки еган одам яқиндагина Москвада “ўқиш”ни битириб келиб, шу яқин атрофдаги шаҳарга раҳбар этиб тайинланган “ҳовлиқмароқ ёш кадрлар”дан экан.

– Бундай ҳали орқасини мўйчинак тишлимаганлар, кўп вақт ўтмай, ўзи “бивший” бўлиб кетишини билса эди, – деди суҳбатдошим сўзини тугатаркан.

Област раҳбари Дамир Ёдгоров чинданам шоир Жамол aka айтганидек, анча маърифатли, фикр доираси кенг кишилар тоифасидан экан. Ундаги бу одамшавандалик хусусияти менга Бухорои шарифдан бориб, Намангандини бир неча йил бошқарган, ободончиликка оид кўп саводли ишларни амалга ошириб, намангандилар меҳрини қозонган Назир aka Ражаповни эслатиб юборди.

Ҳатто гап орасида:

– Сиз ўша кишига ўхшаб кетасиз, – деб қўйдимда, мезбондан, энди кеч қолмай, кетишим кераклигини айтиб, рухсат сўрадим.

– Қолиб, меҳмон бўлиб кетмайсизми?

– Эртага Тошкентда қиласидаган ишларим бор.

– Тошкентдан йўл босиб келган уловингиз

“қорни” қалай? Мажлисдан бўшаб, ҳали ўзимиз тушлик қилганимиз йўқ. Бирга овқатланамиз, – деб қолди Дамир ака.

Кейин ҳайдовчини чақириб:

– Меҳмонимиз машинаси калитини олгин-да, тўлатиб бензин қуй. Тошкентгача етиб оладиган қилиб, бир-икки канистр солиб қўйишни ҳам унумла, – деди.

Қўшни хонага дастурхон тузатиб қўйилган экан, ўша ерга кирдик.

Дамир ака билан хайрлашар эканмиз, менинг қўлимга яхшилаб қоғозга ўралган нарса тутаркан:

– Эркин акага кўпдан-кўп саломимизни етказинг! Мана бу, биздан Қорақўлдан тухфа! Ўз қўлингиз билан кийдириб қўйинг. Олтин бошлари омон бўлсин! – деди.

Устозга “салом”ни етказдим. Совғани ҳам топширгандим, бироз кийиб ўтиридилар-да, кейин ечиб, менга узатдилар:

– Биласиз, менда бунақасидан иккитаси бор. Бунисини мен учун ҳам Сиз кийинг. Ҳадемай қиш келади. Энди, анави шляпангизни менга беринг.

– Қанақа бўларкин, совға Сизга эди-ку! Мабодо Дамир Ёдгоровнинг кўзлари тушиб қолса, нима дейман?

Устоз жилмайиб, кулди:

– Ташвиш чекманг. “Икковимизнинг бошимиз бир – ўзим кийдириб юбордим”, деб айтаман у кишига.

ЯНГИ ТАШВИШ ШАРПАСИ

Бош омон бўлса, кўраверар экансан деганларидек, Эркин ака боши устида пайдо бўлаётган яна бир руҳий тазиيқ ҳақида гап... қаерда денг, узоқ Белорусия пойтахти Минск шаҳрида “Ёзувчи – публицистларнинг Бутуниттифоқ Конференцияси” минбаридан қулоққа чалиниб қолди.

Шу анжуманга Ўзбекистондан икки киши бориши айтилганди. Лекин, мен бир ўзим учдим. У ерда шундай қаҳратон қиш эканки, самолётдан тушган заҳоти юзларим музлаб қолгандай бўлди. Яхшиям, Эркин ака совға қилган Қорақўл телпагини қийиб келган эканман, унинг олд томонини қошим устигача бостириб олиб, нарироқда турган автобус томон чопдим.

Шундан кейин бу телпакнинг қадри кўп билинди. Бу томонларда ғоят қадрланар эканми, ҳатто бир-икки “маҳаллий ҳамкасб”лар буни кийиб, ёлғиз ўзингиз кўчага чиқманг деб, огоҳлантириб ҳам қўйишиди.

Юқорида эслатиб ўтганимдек, ўша пайтлар бутун Ўзбекистон “ўғри, муттаҳам, ишёқмас, уюшган жиноятчилар”дан иборат қандайдир хавф-хатар минтақаси, дея эълон қилиниб, унга нисбатан истаганча бўхтонлар ёғдириш, ёмонотликқа чиқариш энг авж олган давр эди. “Мен шу юртданман” дейишга одам тортинадиган бўлиб қолганди.

Шунинг учун ҳам бу анжуманда қатнашаётганлар ичига ўзбекистонлилар “йўқ” ҳисобла-ниб,

кираверишдаги маълумотнома рўйхатида “Дадаҳанян Н.” (бу ҳеч қандай “Арман радиоси” томонидан тарқатиладиган ҳазил мутоиба эмас, бор ҳақиқат!) ёзуви туриши мен учун айни муддаодек эди.

Конференциянинг тўртинчи куни Минскдан анча четроқдаги чўчқачиликка иқтисослашган “миллионер” колхозда семинар ўтказиладиган бўлди. Тўғрироғи, шу хўжаликнинг икки марта Социалистик Меҳнат қаҳрамони унвонига эга раиси ҳақида маҳаллий журналист томонидан ёзилган китоб (ундан ҳаммамизга бир донадан тарқатилган эди) тақдимотига бағишлиланган мажлис бўлди. Хашаматли колхоз маданият саройининг 500-600 кишига мўлжалланган мажлислар зали меҳмон ёзувчилар, илғор чўчқабоқарлар билан тўлиб тошганди.

Китоб муаллифи саҳнада бир ўзи қўр тўкиб ўтирган 60 ёшлар чамасидаги ўз “қаҳрамони”-нинг ишчанлик фазилатлари ҳақида узоқ гапирди. Китобни ёзиш пайтида “гувоҳ” бўлган қизиқ воқеалар ҳақида ҳам тўхталиб ўтди.

Шундан кейин раисга “бу муваффақиятларга қандай эришдингиз?” деган анъанавий саволлар бериш бошланди. У ҳам саволларга яраша мазмунни умумийроқ бир хил қолипдаги жавоб қайтарарди. Баъзан, мен ҳақимдаги китобнинг фалон бобони ўқиб, билиб олишларинг мумкин, деб ҳам юборарди.

Шу орада орқа томонда ўтирганлардан кимнинг-дир кутилмаган саволи янграб қолди:

– Мана шундай, Сиз каби иш кўзини биладиган, жонкуяр раҳбарлар айниқса, ҳозир Ўзбекистон учун ғоят зарур масала бўлиб қолди. Республикани

тажрибали кадрлар билан таъминлаш ишлари кенг йўлга қўйилди. Мободо Сизни ҳам Ўзбекистонга юборишса, ишни нимадан бошлаган бўлардингиз?

Мезбон раис юзи жиддийлашди. Қаддини ростлаб зал томон бургут қараш қилиб қўйди. Бироз сукут сақлагач, қўлини бигиз қилганича қисқагина жавоб қайтарди:

– Чиндан ҳам у ердаги одамлар ишламасликка, мазахўраклик билан бойлик орттиришга ўрганиб қолишган. Мен уларни қамчи билан уриб бўлса ҳам, ишлашга мажбур этардим.

Шунда залда қандайдир безовталик рўй бериб, ҳар ер-ҳар ердан кимларнингдир овози эшитилди:

– Ёлғон. Ёлғон.

– Бу туҳмат...

Мен зални ташлаб чиқиб кета бошладим. Раис бепарвогина ёнидан сигарета олиб, тугатаркан, мен томонга қошларини чимирганича ғалати қараш қилиб қўйди.

Шу дақиқаларда хаёлимдан “устоз бекорга шундайлар сафида бўлиш миллат учун ҳақорат”, деб ўйламаган эканлар, деган фикр ўтди.

Эртасига яна бир кутилмаган воқеа рўй бериб, осмондан тушгандек пайдо бўлиб қолган Нуралиев деган Ўзбекистон “вакили”га сўз берилиши мени ҳайратга солди.

Қарасам, туппа-тузук ўзимизнинг йигит минбарга чиқиб келяпти. Кўплар худди ҳаёт-мамот учун жанг кетаётган “фронт”дан энг ишончли “янгилик” кутгандай унга бор дикқатини тиккан.

Нотиқ яхшигина тайёргарлик кўриб келган, санжобигина қилиб ёзилган бир даста варақ ҳажмидаги

текстни равон “тил” билан ўқиб берди. Ундаги муҳтасар мазмун қуидагича эди. Яъни, “Ўзбекистондаги ҳозир рўй бераётган барча “бузилишлар”нинг ягона сабаби, “ленинча партиявий принциплардан чекиниш; антипартиявий ғояларга ўз вақтида қақшатгич зарба бермаслик; интеллигенция, айниқса ёзувчилар орасида хавфли тус олаётган миллатчилик кайфиятини ўсиб бораётганига ҳукумат томонидан ўта бефарқлик билан қаралаётгани”да экан.

Энг қизиги, воиз “бу кайфиятни қўзғовчилардан бири, бир пайтлар халқ севган, ишонган, энди эса, кўпчилик орасида обрўсини йўқотиб бораётган шоир Эркин Воҳидов” деб айтаркан, залда ўтирганларга мурожаат қилиб, қуидаги сўзлар билан ўз нутқига якун ясади: “Биз уларга қарши курашяпмиз, мақола ва чиқишлиар эълон қиляпмиз, бироқ маҳаллий матбуотнинг таъсири кам. Республикадан ташқарига чиқмайди. Бизга Иттифоқ миқёсидаги матбуотнинг мадади керак. Қизиқувчилар бўлса, нутқимнинг бир нечта нусхаси бор, олишлари мумкин”.

“Ўзбекистон вакили”нинг бу “нутқи” худди машъум 37- йиллар руҳида ёзилган фельветоннамо айбномани эслатарди.

У минбарни тарқ этаркан, ҳеч ким қарсак чалмади. “Нутқи”дан нусха ҳам сўрамади. Олдинги қаторларда ўтирган, минтақамиздаги қўшни республикалардан ташриф буюришган вакиллар унга қандайдир совуқ назар билан қараб қўйиши. Орқадан кимдир “грузин лаҳжаси”да ўрисчалаб “Хой, сени ким юборди?” дегани эшитилди. Афтидан, бу ерда ўтирганларнинг кўпчилигига “Эркин Воҳидов” номи яхши маълум эди.

Чиндан ҳам, конференцияга анча “кечикиб” қелганды бу “вакил”ни кимлардир юборганга ўхшарди.

У билан кечки овқатланиш пайтида учрашиб қолдик. Түғрироғи, ёнидаги бўш стулга ўзим келиб ўтиредим. Мени танидими йўқми, билмайман. Мен уни танидим: фарғонада коммунистик эътиқод на-моёндаларининг етакчиси бўлиб, “пролетариат доҳийлари” номи билан аталувчи жойлар, уларнинг ҳайкаллари ўрнатилган майдонлар “дахлсиз”лиги учун курашиб юради. Шу руҳдаги район газетасини ҳам бошқаарди.

“Ҳамюорт” билан сухбатимиз қисқа бўлди:

- Сал кечикдингиз, чоғи?
- Ҳа, тўрт кун. Қамчиқ довонини қалин қор босган экан, ўтолмай қолиб кетдим. Ниҳоят, кечаги рейсда учиб келдим.
- Нутқингиз яхши бўлди. Нусхасидан ўқишга берасизми?
- Бир йўла ўзбекчасини ўқий қоласиз. Ўзимиздаги журналлардан бирида босиляпти. Корректурасини ўқиб келдим.
- Энди кўришолмасак керак. Хайр. Менинг вақтим тугади. Эртага аzonги самолётда учиб кетяпман.

Минскдаги “доклад” ва Нуралиев билан сухбат ҳақида, куйди-пишди, бировнинг ташвишини деб, тиниб-тинчимайдиган Миразиз (Аъзам) акани хабардор этдим. Газета ва жамийки журнал таҳририятларида хизмат қиласидиган ишончли танишларни огоҳлантириб ўтиришга ҳожат қолмади. Дарровгина журнал аниқланди. Матн тўла адади бўйича босиб бўлинган, энди уни саҳифалаб “ти-

киш” ишлари қолган экан, холос. “Операция”ни амалга оширишнинг энг қулай томони – Эркин Воҳидов ҳақидаги фельдешон нақ тўрт саҳифадан иборат бўлиб, ўртадаги икки варакқа жойлаштирилганида эди. Демак, ўша варакларни “киши билмас” олиб қўйса, бўларди.

Журнал “техник носозлик” туфайли “жузъий камчилик” билан босилиб чиқди. Тарқатилди ҳам. Лекин саҳифалар “етишмовчилиги”ни билган – билди, билмаган-билмади. Ҳатто, Эркин аканинг ўзи ҳам бу воқеадан анча вақт ўтиб, Миразиз Аъзам билан икковимизда сақланиб қолган бор-йўғи икки нусхадан иборат “йўқ қилинган” тарихий фельдешон варакларини кўрсатганимиздагина хабардор бўлди.

Булар, шоиримиз бошидан кечирган мустақилликкача бўлган жабру жафоларнинг бир шингили эди, холос, десам балки айримлар ишонавермас.

Ҳа, бош омон бўлса, унга тушганини одам кўравераркан...

Шу ерда яна бир гапни эслатиб қўймоғим керакка ўхшайди. Республика, ҳатто халқаро миқёсда машҳур шифокор, юқорида эслатиб ўтганим Шабот Хўжаев “Озод Шарафиддиновни ички жисмоний тазиيқлар ногиронлик азобига дучор қилди, Эркин Воҳидовнинг эса, руҳий хуружлар баъзи “дўстлари”нинг ёнида суюнчиқ бўлиш ўрнига нормардларча панд беришлари тиф бўлиб юрагига санчилди, яна ҳам шоир юраги бардошли экан”, деганида жон бор эди, албатта.

Лекин ҳар қандай фириб ва қаттолликлар авжга чиқиб, қилич яланғочлаб қўйилган даврда ҳам,

миллат ҳақида қайғурадиган, унинг келажагини ўйлайдиган фидойилар бўлган.

Эркин ака гапдан-гап чиқиб, юқори лавозимли бир инсон номини айтиб, “яхшиям шундай бало-гардон кишилар бор, юрак баъзан асовлашса ҳам уриб турибди”, дегандилар.

Энди орадан йиллар ўтиб, пайти келиб қолган экан, ўша инсон (умрлари яна-да зиёда бўлсин!) Азиз Тўраев эканлигини кўпчиликка маълум қилиб қўйишни буюк шоир руҳи олдида фарзу қарз – бурчим деб, биламан.

АРАВАНИНГ БЕШИНЧИ ҒИЛДИРАГИ

Бир куни домла Озод Шарафиддинов телевизорчиларга интерью бературиб, шундай гапларни айтгандилар:

– Мана, эркимиз ўз қўлимизда. Мустақилликка эришганимизга ҳам анча йиллар бўлиб қолди. Бироқ, ҳали ҳам гарданида алмисоқдан қолган бўйинтуриқ бордай ҳадиксирайдиган, ҳозирги замон талаби бутунлай бошқача эканлигини тан олмай, эскича фикрлайдиганлар йўқ эмас. Афсуски, ундейлар бизнинг орамизда ҳам бор. Фикр қотиб қолган жойда ҳеч қандай тараққиёт бўлмайди.

Ҳақ гап. Ҳар бир давлат мафкураси у ерда олиб бориладиган сиёsat, айниқса бошқа мамлакатлар билан муносабатларга қараб белгиланадиган бўлса, домла бу масалада анча куюнчак эканликларининг бир неча бор гувоҳи бўлганман.

Газеталарда босиладиган халқаро мавзудаги мақолаларни ўқиб, телевизор “шарҳлов-чи” ларининг гурунгларига қулоқ тутиб, баъзан “худди ўша аввалги эски гаплар, қани, ўзимизга хос мустақил фикр, янгича ёндашувлар?” деб қолардилар жиғибийронлари чиқиб.

Шарофат келинойи “Ташвиш чекмаганингиз энди шу қолувди, ўз соғлигингизни ўйласангиз-чи”, десалар, “мен ўйлаб бўлганман, мундоқ мустақил фикримни айтишга қўйинг. Ҳеч бўлмаса, бу уйда демократияга риоя қилайлик”, дея ҳам жиддий,

ҳам ҳазилнамороқ жавоб қайтариб, бироз ҳовурдан тушгандай бўлардилар.

Мустақил, бирон нафли фикрни қўрқмай ўртага ташлаш одати Эркин акада аввалдан мавжуд бўлганлигини юқорида бир нечта мисоллар орқали айтиб ўтдим.

У кишининг юрак амри шундай: “Қани бошқалар нима деркин”, дея бир четда томошабин бўлиб туриш одати йўқ эди.

Баъзан оламда рўй бераётган тала-тўпули воқеалар хусусида баҳслашиб, “мағлубият”га учрашимни сезиб қолсам, дарров “Қўргон бериб,” “Шахмат тугул, “дамка” ўйнашни ҳам билмайман, шунинг учун рақиб билан дона суришда маҳоратингиз қандайлигига баҳо беролмайман-у, лекин сиёсада, шу соҳанинг пири Акмал Сайдов билан бемалол беллаша оласиз”, деб орани “очик” қиласдим.

Чиндан ҳам Эркин aka факат файласуф шоиргина эмас, дунёда рўй бераётган воқеалардан яхши хабардор, тўғри баҳолай оладиган теран фикрли сиёсадон ҳам эди.

Бекорга у кишини мустақиллик йилларининг бошлариданоқ Ўзбекистон Республикаси Олий Мажлисининг ҳалқаро алоқалар ва муносабатлар қўмитаси раиси лавозимига сайлашмаган эди.

У, ҳали ҳам бир пайтлар ўзи таърифлаган, кўндаланлигига туриб олиб, ишга халақит берувчи “бешинчи ғилдирак”лар борлигидан куюниб гапирарди.

Бир куни Эркин aka ҳузурига чақирди-да:

– Хабарингиз бор, президентимиз “Энди эскича сиёsat – душман қидиришни бас қилиб, дўст-

биродарлар орттиришга ҳаракат қиласынан. Болаша қаларга ҳасад билан эмас, ҳавас билан қараб, яшашни ўрганайлик”, деб тақрор-тақрор айтаётган бир пайтда, мана бу сиёсий ғүрликтин қаранг! Ҳали ҳам миясига қоқиб қўйилган заранг мих таъсиридан қутуломтай юрганлар бор-а. Бунда босилган мақоланинг айрим ерига чизиб қўйдим. Фикрингизни айтарсиз, ҳархолда дунё қўрган одамсиз, – дея анча обрўли ҳафтанома газеталардан бирини менга узатди.

Қарийб сал кам бир саҳифани эгаллаган мақола сўнггида муаллифнинг исм-фамилияси, ҳамда шўро даврида “хизматлари” учун тақдирланган “унвон”и, ундан пастроқда қайсиидир матбуот шўйбасининг “эксперти” эканлиги ҳам ёзиб қўйилганди.

Мен бу одамни кўплар қатори яхши танирдим. Хаёлимдан “наҳот, дунёқараши салгина бўлса ҳам ўзгармаган бўлса”, деган фикр ўтди.

Чиндан ҳам, у бир пайтлар “Америка мавзуси” бўйича энг “бозори чақон” журналистлардан ҳисобланарди. Тинимсиз ёзарди. Ёзганда ҳам ўша “океан ортидаги иблислар мамлакати”ни шундоқ тасвиirlардик, гўё дунёдаги барча ёмонлигу ёвузликлар худди ана шу ердан чиқаётгандай... “Далил исботлар”ни эса, тўғридан-тўғри марказий матбуотдан олиб, “ўзбекчалаштириб” худди ўзиникидай қилиб чиқараверарди. Нима фарқи бор, “душман”га қарши курашда ҳамманинг фикри-зикри яқдил бўлиши керак-да!

Бу одамнинг баъзида жазавага тушиб, эълон қилиб юборадиган “ижод намуналари”ни ўқиганлар юрагини ваҳима босиб, “иш қилиб, шу сўтак

ҳозирча ёзиш билан овора, агар масъупроқ вазифага ўтириб қолса борми, Америкага қарши уруш очиб юбориши ҳеч гап эмас”, деган ўйга бориб қолишарди.

Мустақилликдан сўнг шу одамнинг “касби” касодга учраб, умуман номи газета- журналларда кўринмай қолганди.

Мана энди яна пайдо бўлиб, “экспертлик” вазифасини эгаллабди.

Мақолада Евроиттифоқ мамлакатларидан бири пойтахтида ўтказилган Халқаро Хавфсизликка бағишлиланган Саммитда Мустақил Ўзбекистон вакиллари илк маротаба иштирок этаётганликлари ҳақида батафсил ҳикоя қилинади. Унчалик зарур бўлмаган тафсиллар анчагина. Сўнгра, муаллиф кўпгина воизларнинг нутқларидан “парча” келтириб, уларни танқид остига олади-ю, нимага асослаётганини аниқ айтмайди.

Бунга чидаса бўларди. Бироқ, тагига чизиб қўйилган бир нечта қатор жумлаларни ўқиб, ҳайратдан ёқа ушлаш мумкин эди. Унда “мен” деб ёзилишича, мақола муаллифи, яъни (журналистимиз) Саммит ўтаётган бинонинг зинапояларидан тушиб келаётган “хўппа семиз” Америка генералига рўпара қелиб қолади ва юзига тик қараб “Америка солдатлари Афғонистонда нима қилиб юрибди?” деган саволни беради. Шундан кейин бирон оғиз сўз айтолмай, “жуфтакни ростлаб қолган” генерални “мот” этиб”, унинг устидан қозонган “ғалаба”си билан мана, мен қандай одамман, демоқчи бўлади.

Аввало, бу ўта жўн, фаросатсизларча мақтан-чоқликка берилиб ёзилган жумлалардан иборат

мақолага жой бериб, чоп этган газета таҳририя-тидаги-ларга ҳайрон қоласан.

Унданам ҳайратланарлиси, худди мана шу “Ўзаро Ҳамкорлик Саммити” ҳақида Москвада чиқадиган “Аргументи и факти” газетаси бир ҳафта олдин ўз муҳбирининг мақоласини эълон қилиб, унда айнан “Россия делегацияси бошлиғи Рогозин (бу жангари жаноб Иттифоқ емирилаётган пайтлар миллатчиликка мукласидан кетган шовинистик руҳдаги ёшлар гурӯҳининг “Тақирбошлар” тўдасини бошқариб, Москва кўчаларида айниқса, “осиёлик келгинди”ларга қарши кўп хунрезликлар уюштирган. Бу ҳақда Россия матбуотининг ўзи, ҳали-ҳануз ёзигб туради. Д.Н.) минбарга чиқиб, шундай нутқ сўзладики, Америка бошлиқ баъзи давлат делегациялари зални ташлаб, жуфтакни ростлаб қолишга мажбур бўлдилар”, деган жумла-ларга урғу берилганди.

Ўзаро ҳамкорлиқда тинч-тотув бўлиб яшаш та-мойилларини бамаслаҳат келишиб олиш учун хайрли орзу умидлар билан Анжуманга йиғилгандар орасига кимдир минбардан, яна кимдир зинапоядан туриб адоват уруғини сочувчилар чиқиб қолганини қаранг! Айниқса, улардан бири “Ўзингдан чиқсан балога, қайга борасан давога” деганлари-дек, ўзимизданлигига нима дейсиз!

Ха, шалоғи чиқиб бўлган араванинг бешинчи ғилдираги устида ҳамон ўтириб олган айрим ким-саларга шу керакка ўхшарди.

Бироқ жамиятни тубанникка тортувчи бундай ғайирликларга ўз мунасабатини билдиrmай, эътиборсиз қолдиришга шоирнинг безовта юраги изн бермасди.

Эркин ака яқинда чет эл сафаридан катта таассу-ротлар билан қайтган бўлиб, жиддийроқ таҳлилий мавзудаги ниманидир қоғозга тушириш билан банд эканлигини билардим.

Бир куни:

– Ҳеч ким билмас қилиб, бирон ёққа бош олиб кетмаймизми? – деб қолдилар.

Сездимки, Абдулла Қаҳҳор таъбири билан айт-ганда “Дард тутмоқда”. Демак, дарровгина уловни йўлга шайламоқ керак.

Намангандаги тўрт кунлик “чилла” пайтида Эркин ака ҳеч қаёққа чиқмай, ёзув-чиズув билан банд бўлдилар. Фақат бир марта – кечки овқат пайти кўришардик, холос.

Ниҳоят, янги асар дунёга келгани маълум бўлди.

– Қани, овоз чиқариб ўқинг-чи, – деди у киши майдароқ бўлса ҳам ҳуснихатдай, чиройлик қилиб ёзилган “Ташриф. Тарих. Тақдир” сарлавҳали қўл-ёзмани менга тутаркан.

Негадир ҳаяжонландим. Бу ҳаяжон Абдулла Қаҳҳор билан илк бор учрашганимда, у киши юзимга тикилиб қараб: “Қани, ёзганингизни ўқинг-чи”, деганида менда пайдо бўлган ҳолатни эслатиб юборди.

Дарвоқе, шу топда устоз биринчи марта менга ишониб топшираётган, ҳали сиёҳи қуримаган қўлёзмани ўқиб беришим керак эди.

Ҳижжалагандай, дона-дона қилиб, бир соатча вақт давомида ўқидим. Эркин ака баъзи жумла-ларга ўзгартириш киритдилар.

Кўплаб жонли мисол ва таҳлиллар асосида халқаро ҳамкорлик тамойилларига бағишланган

кенг қамровли каттагина бу асарнинг асл моҳияти давлатимиз раҳбари кўнглидаги барча орзу-ниятларни ўзида тўла мужассам этганди.

Тўғри, унда баъзи “ножоизроқ” “ҳали биз ҳавас қилган кунларга эришиш учун анча қовун пишиғи борга ўхшайди”, деган жумлалар ҳам йўқ эмасди.

Мен ўз фикримни қисқагина баён қилдим:

– Бу мустақиллигимизнинг сиёсий, манавий, ижтимоий йўналишлари бўйича янги бир саҳифа очувчи публицистик бадиа бўпти.

– Босишармикан?

– Наҳотки босишмаса!

Эркин ака кулди.

– Ҳали ҳам қўлида “қизил қалам” ушлаганлар йўқ, деб ўйлайсизми?..

Чиндан ҳам шундайлар топилди. Мақола бир нечта идора “эксперт”лари томонидан чизиб-бўяб, қайтарилаверди.

Шундан кейин Эркин ака обрўли бир газета таҳририяти номига “Ушбу ёзганларимдаги барча «нотўғри, қалтис» жумлалар учун ўз бошим билан жавоб бераман” дея, иқрорнома ёзилган хат билан мақолани топширди.

Бош муҳаррир лутф билан:

– Сизнинг олтин бошингизга бизнинг таҳририядаги барча бошлар садақа, – дея шоир “нома”сини унинг қўлига қайтарди.

Мақола бир саҳифани эгаллади. У кўпчилик орасида катта қизиқиш уйғотди. Шов-шув бўлиб кетди.

Давлатимиз раҳбари шоирга миннатдорчилик билдирабкан:

– Бундай ҳозирги пайт учун энг керакли, дол-

зарб мавзудаги асарлар сув-ҳаводай зарур! Нега, олдинроқ ёзмадингиз? – дея саволга тутди.

– Текширувчилар қўлида бироз вақт ушланиб қолди.

– Ҳали, Сизни ҳам “текширувчилар” борми? Ким экан, ўшалар?

Эркин ака индамади...

Орадан кўп ўтмай, ҳар хил номдаги бир неча идоралар фаолиятига чек қўйилиб, баъзи кўндаланг туриб олган казо-казо “эксперт”лар ҳам ўз иссиқ жойларидан мосуво бўлишиди.

Улар кўчада қолгани йўқ, албатта. “Пастроқ” лавозимда бўлса ҳам, матбуот, телерадиодан “бошпана” топдилар.

Шунинг учундир балки, у ердаги айримлар шоирни ҳамон ёқтираверишмас.

“БИЛОЛИДДИН ДОМЛА”

Эркин аканинг номи чет элларда, хусусан Америкада истиқомат қилувчи Ватандошлар орасида худди ўзимиздагидай қанчалик ардоқли бўлмасин, у кишига ўша ердан туриб ҳам тош отувчи кўролмаслар борлиги маълум бўлиб қолди.

Улар ким экан, леган саволга жавоб беришдан аввал АҚШдаги энг машхур Олийгоҳларидан ҳисобланувчи Индиана университетида “Билолиддин домла” номи билан таниқли бир инсон “ўзбек” (кейинчалик қирғиз, қозоқ биродарларимиз “ўзлариники” қилиб олишган) ҳақида муҳтасаргина ҳикоя қилиб ўтишга тўғри келади.

У кишининг асл номи Билл Фирман бўлиб, аввалги асрнинг 70- йиллар бошида Америкадаги машхур Ҳарвард университетининг туркий тиллар факултети талабаси сифатида ўзбек тилини мукаммалроқ ўрганиш учун биринчилар қатори Ўзбекистонга келади. “Дунёқараши” ҳар хил устозлар таълимими олади. Ёзувчи ижодкорлардан дўстлар орттиради. Айниқса, Эркин Воҳидов унинг диққатини кўпроқ ўзига жалб этади. Шоирнинг ўз она тили тарихини чуқур билиши, ўзбек тилининг “Сўз бойлиги” бошқа тиллардан қолишмайдиган, балки устунлиги ҳақида олимона фикр юритиши ёш хорижий тақиқодчини бефарқ қолдирмайди. Уни устоз ўрнида кўра бошлайди. Эркин ака ҳам “шогирд”нинг бу даражада тиришқоқлиги, ўзбек

тилига бўлган меҳр-оқибатидан ҳайратга тушиб, унга Билолиддин Фармон дея ном қўйиб беради... Хуллас, у шу ном билан Ватанига қайтгач, “Ўзбекистонда ўзбек тилининг 1930–50 йиллар орасидаги сўзлашув диалектикаси” мавзуида докторлик диссертацияси ёқлади.

Сўнг ўз фаолиятини Индиана университетидан ўзбек тили ва адабиётидан дарс беришдан бошлайди.

Кейинроқ “Билолиддин домла” ташабbusи билан Индиана университетидан туркий тиллар факультети ташкил этилади.

Ўтган асрнинг 80- йиллар ўртасида АҚШ билан алоқалар анча илиқлашади. Шунда Билолиддин aka бир неча бор Ўзбекистонга келиб кетади. Ўзбек ҳамкаслари билан яқиндан ҳамкорлик алоқаси боғлайди. Уларни Индианага таклиф этади. Китоблар айрбошлиш бошланади. Икки-уч йиллик “Ёзги таътили”ни Ўзбекистонда “ижодий сафар” билан ўtkазиб, “Ўзбекча-инглизча сўзлар луғати” ҳамда “Инглизча-ўзбекча сўзлар луғати”ни тузиш билан машғул бўлади.

Ниҳоят, узоқ йиллик меҳнатнинг самараси сифатида иккала луғат китобининг электрон варианти тайёр бўлади. Энди буни тошкентлик ҳамкаслар билан бир сидра таҳрирдан чиқариб, Эркин Воҳидовдан оқ йўл олиб, нашрга топшириш ишлари қолганди, холос.

Бироқ, ўзимизнинг “Билолиддин Фармон” уч кун Москвада тургач, Ўзбекистонга учиб келади-ю, кутилмаганда аэропортда “қўлга тушиб” қолади. Бунинг сабаби меҳмоннинг тушунчаси бўйича “од-

дийгина” эди. Яъни у маҳаллий тилни билмайдиган икки формали ходим кекса бир аёл жомадонини қўлидан тортиб олиб, очмоқчи бўлиб, унга қўпол муомала қилишаётганини қўриб, бефарқ ўтиб кетолмайди. “Бу яхши эмас, йигитлар, шундай кекса онахонга-я” дейди-ю, балога қолади. Уни “алоҳида” хонага таклиф этадилар.

Ўшанда собиқ Иттифоқ парокандага юз тутиш арафасида таҳликага тушган “катта оғалар”нинг, айниқса, “кардош республика”ларда зуғуми зўрайиб кетган, арзимас баҳоналар билан хоҳлаган кишини “миллатчи”га чиқариб, жазога тортишлари мумкин эди.

“Билолиддин”нинг тез-тез Ўзбекистонга ташриф буюриб туриши аввалдан кимлардадир шубҳа уйғотиб келган эканми, унга тегишли “ҳужжат”ларни топишгунча анча вақт кетди. Бечора “бутун дунёдан” ҳатто телефонда алоқа қилишдан ҳам маҳрум этилган ҳолда торгина хонадаги диванда бир кечани ўтказди.

Энди у биринчи “сұхбат”даёқ гарданига қўйилган “айб”нинг жиддийлигини тушуниб етганди. Яъни “махсус хизмат ходимлари ишларига аралашиб, халақит берганлиги учун...” нафақат Ўзбекистонга, балки Иттифоққа иккинчи қадам босмайдиган “депорт” қилиб, ўз юртига жўнатиб юбориш ҳозирлиги кўрилаётгани аниқ эди.

Энди нима қилиш керак? Шундоқ яқин-атрофдаги дўст-биродарлар билан ҳам алоқа узилган!.. Шунда бирдан унинг кўз олдида, Москвадаги меҳмонхоналардан бирида тасодифан машҳур ёзувчи билан бўлган учрашув гавдаланиб кетди.

У шаҳар марказида меҳмонхонадан жой олиб, ўз хонасига энди кирмоқчи эди, “қўшни” эшиги очи-либ, ичкаридан чиқиб келган таниш чехрани кўрди. Қувониб ҳам кетди.

– Ассалому алайкум, Чингиз ака. Мен Сизнинг китобингизни мутолаа қилганман.

Хорижлик овруполикларга ўхшаб кетадиган бу нотаниш кишининг соф ўзбекчалаб гапираётгани ёзувчida қизиқиш уйғотди.

– Қаерликсиз? Китобимни қайси тилда ўқиган-сиз?

– Америкаликман. Асил Рашидов таржима қил-ган ўзбек тилида ўқиганман.

– Бу тилда менданам яхши гапирап экансиз. Қа-ерда ўргангансиз?

– Аввал Ҳарвард университетида. Кейин Ўзбе-кистонда.

– Мен қирғиз ёзувчисиман. Лекин рус тилида ижод қиласман.

– Биласман. Ўзбекчада ҳам яхши гапирап экансиз.

– Болалигим ўтган овлунинг ярмичаси ўзбеклар эди. Қолаверса, тилимизнинг ўзаги бир. Мободо менинг қирғиз тилидаги китобимга кўзингиз тушма-ганми?

– Ҳозирча йўқ. Лекин қирғиз тилини билганимда, жон деб, топиб ўқирдим.

– Бир-бирига жуда яқин – ўзаги бир тил, деб айтаяпман-ку! Сиздай тиришқоқ одам дарров ўрга-ниб олиши мумкин. Юринг, ўшалардан биттасини совға қиласман, – кутилмагандага қўшни хона соҳиби эшик қанотларини каттароқ очиб, уни ичкарига бошлади.

Ёзувчи қирғиз тилида чоп этилган салмоқдоргина “Жамила” номли қиссалар китобига дастхат ёзмоқчы бўлиб:

– Отингиз нима? – деб сўради.

Билл ташриф қоғозини унга узатаркан:

– Бу ерда исм-фамилиям “Билл Фирман” деб ёзилган. Лекин ўзимни кўпроқ Билолиддин Фармон деб биламан, – деди-да, таъкидлагандай, – Бу номни менга машҳур ўзбек шоири Эркин Воҳидов қўйиб берган, – деб қўйди.

– Биламан, яхши шоир. “Ўзбегим”ни ёзган. Бир марта Москвада, кейин Тошкентда учрашганмиз.

Шунда у гурунгрошига бир мақтангиси келиб қолди.

– Эркин аканинг номзоди Фарғонадан Олий Мажлис депутатлигига қўйилганда, катта стадионда бўлган йиғилишда мен ҳам қатнашиб, Сиз айтган қасидадан парча ўқиб берганимда ҳамма ҳайратдан қарсаклар чалиб, ўрнидан туриб кетган.

Чингиз Айтматов:

– Сиз чинданам ҳайратланса арзийдиган одам экансиз, – деди-да, таҳсинли сўзлар битилган китоби ичига ўзининг ташрифнома қоғозини ҳам солиб, унга тақдим этган, бу тўрт кунгина аввал бўлиб ўтган воқеа эди.

“Билолиддин домла” ниманидир калитини топгандай, шулар ҳақида хаёл суриб ўтиаркан, хона эшиги очилиб, ичкарига шу атрофдаги буфет хизматчиларидан бўлса керак, ўрта яшар жувон кириб келди. Нарироқдаги стол устига нонушта егуликлари, қаҳва солинган патнисни қўйиб, ош бўлсин дегандай ним табассум билан чиқиб кетди. Ҳар тугул

уни озиқ-овқатдан қисишаётгани йўқ. Шу тарафдан негадир кўнглида хотиржамлик сезар, лекин қандай “хўм” чиқаришларини эсласа, анча безовта бўларди.

Ўша ҳукмбардор кира қолсайди... Ҳа, анави жомадончасидаги китоб ва машҳур ёзувчи ташрифномасини кўрсатиб, мени тезроқ шу киши ҳузурига жўнатиб юборинглар, деб илтимос қилса, қандай бўларкин... Умуман, адабиёт, маърифатдан бехабар киши бўлса-чи...

У енгилгина нонушта қилиб олди. “Жамила” китобини таталаб-тумталаб ўқишга ҳаракат қилиб, кимнидир кута бошлади.

У кечаги биринчи сухбатда “савол-жавоб” ўзбек тилида бўлсин, деб талаб қилганди. “Тилинг бир” одам ҳар қалай сени бошқаларга нисбатан яхши тушунади-да!

Ноласи худога етган эканми, соат ўнларга яқин, “маҳаллийлиги” шундоқ юз-кўзидан кўриниб турган ўттиз ёшлар атрофидаги йигит қандайдир ҳужжатлар солинглан юпқа папка кўтариб, кириб келди.

“Жамила” китобига кўзи тушгач, биринчи саволи:

– Қирғизчани биласизми? – дегани бўлди.
– Бу тилни энди ўргана бошладим. Аслида, ўзбек тилини яхши биламан.

Йигит қизиқсиниб, китобни қўлига олди. Варақлаб кўриб:

– Чингиз оға билан учрашдингизми? – дея ҳайратомуз қарашиб қилди.

– Бахти тасодиф дейдилар-ку! Яхши одамнинг шарофати билан мана, Сиз билан ҳам учрашиб турибман.

Шундан сўнг ўзаро ўтказилиши лозим бўлган расмий “савол-жавоб” мавзуи бутунлай бошқача тус олиб кетди.

Йигит аслида Ўшдан бўлиб, адабиётга қизиқар, у ердаги ўзбек мактабларидан бирини битириб, Тошкент олийгоҳларидан бирида ўқишни давом эттирган экан.

– Сиз учун, – деди у овозини пастлатиб, – Ўзбекистонга кириш тақиқланди. Шуни маълум қилиш мақсадида олдингизга киргандим. Энди уни бузиб бўлмайди. Лекин бир йўли бор. Мана бу ташриф қоғозида ёзилган телефон рақами орқали иложи борича ахволни у кишига етказишга ҳаракат қиласман. Чингиз Айтматов ҳамма жойда таникли одам. Албатта Сизга ёрдам беради.

Эртасига эрталаб “Билолиддин домла” тушган самолёт Қирғизистон пойтахтига учиб келди. Мехмонни фанлар Академияси қошидаги тилшунослик институти директорининг шахсан ўзи кутиб олди.

Хуллас, ўша кундан бошлаб, биз ўзимизнинг анча бепарволигимиз орқасиданми (у одамнинг Москва орқали учиб келишидан хабардор ҳамкаслари бор эди), она тилимизнинг хорижли жонкуярларидан бирини бой бериб қўйдик.

Ҳозир Билл Фирман (Билолиддин Фармон) қирғиз ва қозоқ тиллари ривожига қўшган улкан ҳиссаси учун ҳар икки мамлакатнинг фахрли унвонлагрига сазовор бўлган америкалик олимдир.

Лекин бу бағри кенг одам. Биз ҳамон «эски» ақидаларга риоя қилиб, дарвозамизни очмаган бўлсак-да, ўз Ватанида туриб, тилимиз ҳамда адабиётимизнинг толмас жонкуярлигича қолмоқда.

Мустақиллигимиздан кейинги биринчи Америкаға қилған сафарим чоғида “Билолиддин домбек”нинг Индиана университетида ўтилаётган ўзбек тили дарсларини тұғридан-тұғри АҚШнинг эңг йирик түртта Олий ўқув даргоҳидаги аудиторияларга узатиш учун электрон асбоб-ускуналар сарф-харажатига Конгрессдан уч миллион доллар ажратишлиарни талаб қилиб, елиб-югуриб юрганини гувоҳи бўлгандим.

ИНДИАНАГА ТАШРИФ

Ниҳоят, АҚШ бўйлаб иккинчи маротаба “Жон Стейбек изидан номаълум Американи излаб” ижодий сафаримни бошлаш учун Нью-Йоркка келдим. Мени олдиндан танишилигимиз бор Америка-Туркистон Ассоциацияси президенти Абдулла Хўжа ака, ҳамда тўрт кундан сўнг нишонланадиган Рамазон ҳайити муносабати билан Тошкентдан, Ўзбекистон Мусулмонлар идорасидан ташриф буюрган Фаррухжон Қорилар кутиб олишди.

Ассоциациянинг шинамгина мөхмонасига Фаррухжон Қорига ҳамроҳ бўлиб жойлашдим. Анча гурунглашиб ўтиредик. Бироз дам олдим.

Кечга томон мезбонларга “Улуғ айёмдан кечикмай Эркин ака бошлиқ нозик кишиларнинг Рамазон Ҳайит байрами билан йўллашган муборакбод саломларини маълум кишиларга етказиб қўйишим зарурлигини айтиб, тезда қайтаман деб, Вашингтонга қараб йўлга тушдим.

Сал кам уч кунни бесамар ўтказиб, Нью-Жерсига чин арафа куни кечга томон қайтиб келдим.

Абдулла Хўжа ака:

– Улуғ айём арафасида нега хомуш кўринасиз? Айниқса, Америка бўйлаб бошланадиган катта сафарингиз олдидан яхши кайфиятда бўлишингиз керак, – деганларига:

– Шунчалик ўзим. Чарчоқ таъсир қилди, шекили, – дедиму, асосий “сир” ҳақида оғиз очмадим.

Ассоциациянинг катта биноси залида Ҳайит на-
мозини бирга ўқидик.

Кейин худди ўзимиздагидек, байрам кунлари бошланди. “Пикник” қилиб, шаҳардан ташқаридаги оромгоҳлардан алоҳида ажратиб қўйилган жой-
ларга чиқдик. У ерда ейиш-ичиш, ҳордиқ чиқариш учун ҳамма нарса муҳайё қилиб қўйилганди.

Орадан уч кун ўтиб, яна бир катта байрам – Ўзбекистон мустақиллик куни нишонланди. Ассо-
циация Марказининг кенг яланглик – ҳовлисида катта қозонларда ош дамлаб, келган-кетганларга тарқатилди. Ўзбек ҳамма жойда ҳам ўзбек экан-да!

Худди ана шу пайтлар телефон жиринглаб қолди.

– Қўшалоқ байрамлар муборак бўлсин! Қадам-
ларингизга ҳасанот, хуш кўрдик, – бу Билолиддин
аканинг таниш овози эди.

– Ўзингизга ҳам қутлуғ мустақиллик байрами муборак бўлсин!

– Раҳмат! Энди аввал келишганимиздагидек, бирон жойдан “закалат” олиб қўймаган бўлсангиз, эртага кечки пайт Ўзбекистон мустақиллиги байра-
мига бағишлиб, талабаларимиз ўртасида ўтказила-
диган мушоира баҳсида иштирок этасиз, деб умид қиласиз. Ҳакамлар рўйхати ичиди Сиз ҳам борли-
гингиз унутманг. Эркин aka қалайлар? Соғлиқлари яхшимиз? У киши ҳақида ҳам янгиликлар эшитишни
хоҳлаймиз.

Мен биздаги ўртамиёна туман худудига тенг келадиган “Талабалар шаҳарчаси”да жойлашган Индиана университетининг “Ўзбек тили ва адаби-
ёти” бўлими талабалари орасида ўтказиладиган

“Мустақиллик мушоираси”га ўз вақтида етиб келдим.

Унча катта бўлмаган аудиторияга кириб, у ердаги ўзбекона жиҳозлар, тўрдаги Навоий бобомизнинг катта суратига қўзим тушиб, ҳайратландим. Сурат остига чиройли қилиб, ул зотнинг ҳикматли сўзлари ёзилган.

Ўн беш чоғли йигит-қиз талабалар “белла-шув”-ни бошлиашди.

Бундан бир неча йил олдин “Билолиддин дома-ла”нинг қилган орзуси амалга ошиб, АҚШнинг турли бурчакларидағи университет талабалари ҳам бу мушоира тадбирида “иштирок” этаётгандар шундок қаршидаги экранларда кўриниб туради.

Мушоира якунига кўра, уч талаба уч ўринни қўлга киритдилар. Биринчиликни ҳинд қизи Дипавали Бобурнинг “Ватандин айрилиб бўлмас” радиифли шеърини ёддан ифодали ўқиб, қўлга киритди. Иккинчи ўринга Лотин Америкасидан колумбиялик Родригес (“Нодирбек”) “Ўзбегим”дан парча ўқиб, эга бўлди. Учинчи ўрин ғолиби “Ўзбекистон Ватаним” қўшигини ижро этган африкалик Лью хоним деб топилди. Улар бир кийим атлас, зарчопон, Бутороча зардўзи дўппи билан тақдирландилар.

МЕҲМОНДОРЧИЛИК

“Билолиддин домла”нинг уйи университет шаҳарчаси четроғидаги осойишта боғ ичида жойлашган бўлиб, чироиликкина қасрчани эслатарди. Бир нечта катта-кичик хоналарнинг ярмидан кўпи китоблар билан тўла.

Уларни айланиб чиқарканман, хонадон эгасидан сўрайман:

- Бу ер университет кутубхонаси эмасми?
- Қайда. Университет кутубхонаси бир неча қаватли бинода жойлашган бўлиб, 6 миллион 780 минг китоб бор. Меники унинг урвоғига ҳам арзимайди. Энди мана бу энг ноёб китоблар сақландиган алоҳида хонага кирамиз. Бу ердаги китобларнинг ноёблиги шундаки, барчасига муаллифларнинг дастхатлари ёзилган. Мана бу жавон “ўзбек адабиёти” бўлими. Бу ерда икки юздан зиёд турли жанрдаги китоблар бор. Ҳаммасида Одил Ёқубов, Пиримқул Қодиров, Саид Аҳмад, Эркин Воҳидов, Ўткир Ҳошимов, Омон Матжон, Омон Мухтор, Абдулла Орипов, Жамол Камол, Ҳалима Худойбердиевадан тортиб Сизгача бўлган ижодкорларнинг илиқ сўзлар битилиб, қўйган имзоингиз муҳрланган.
- Кўриб турибман. Бу ерга йигилган китобларнинг энг кўпини Эркин ака Воҳидовники ташкил этса керак. Ҳатто мана бу 52 йилча олдин чиққан “Қўшиғим сизга”, “Ақл ва юрак” шеърий китоблари

у кишининг ўзларида ҳам бўлмаса керак. Имзолари ўша-ўша “Э Воҳ”...

— Ахир, Эркин ака сал кам ярим асрлик устозим. Аҳволлари қалай? Баъзан ғалати гаплар эшитиб қоламиз.

— Биласиз-ку, устоз куюнчак шоир. Ўз юрак дардини фақат пинҳоний “Э, Воҳ” деб, ёзиш билан чегараланиб қолмайди. Шунинг учун у киши ҳам “ғалати гаплар” эшитиб юради. “Мевали дарахтга тош отилади” деб бекорга айтилмаган-ку!

— Бу тўғри, лекин менимча... Эркин акани бадном қилиш учун интернет орқали хатарли «тош»лар ҳам отилаётганидан хабарларингиз борми? Ўқиб, одам ишонгиси келмайди. Бу интернет “сайти” хабари дегани газета ёки китобда босилиб, бир четда қолиб кетадиган нарса эмас. Майли, бу ҳақида кейинроқ, бафуржা чойлашиб гаплашамиз... Дарвоҳе, мана бу “Қирғиз адабиёти” бўлимида мен учун энг қадрли бўлган, Сизга ҳикоя қилиб берган тарихий “Жамила” китоби сақланади. Ундаги қирғизча-ўзбекча қилиб, муштараклик “тили”да ёзилган дастхатни ўқинг-а...

Шундан кейин “домла” Олжас Сулаймон, Мухтор Шаханов, Евгений Евтушенко, Валентин Распутин каби кўп таниқли адаб ва шоирларнинг имзолари чекилган китобларини кўрсатиб, ҳар бирiga қисқача изоҳ бера бошлади.

Менинг фикру хаёлимни интернетда, ўзим яхши тушувавермайдиган, умуман қизиқиб ҳам кўрмаган “сайт” деган нарса орқали устоз ҳақида қандай бўйтон гаплар ёзилиши, уни кимлар уюштириши мумкин, деган ўй эгаллаб олган, тезроқ шу ҳақда

Билолиддин акадан бирор янгиликни эшишишни хоҳлардим.

Айни шу пайт остоңада пайдо бўлган уй соҳибаси Harriet (“ўзбекча” Ҳуррият) хоним:

– Дастанхонга қўйилган овқат билан чой совиб қолди. Мехмоннин чарчатиб қўймай, сухбатни ичкарида бафуржга ўтириб, давом эттирангизлар бўларди, – деб қолди.

Оқатланиб, қаҳва, унинг кетидан “ўзбекчаси”га чой ҳам ичиб, юмшоқ оромкурсига ўтирдик.

Гурунгимиз ҳозирги Ўзбекистондаги адабий жараён, мисли кўрилмаган ўзгаришлар, етмиш йиллик шўро даврида ҳам ҳеч кимнинг хаёлига келмаган қурилишлар, тарихий обидаларнинг тикланиши, Бухоро, Самарқанд, Тошкент шаҳарлари қай дараҷада таниб бўлмас бўлиб, ўзгариб кетгани, ҳатто ёзнинг айни қовун пишиғи палласи Бешариқа бориб, район раҳбари Салимжон Марасуловницида меҳмон бўлганимизда “амиркалик одам кепти” дея, Шаварда чўли ичкарисидаги қишлоқдан бир нечта от минган қариялар “қани кўрайлик-чи”, деб келиб, “ўзимизга ўхшаркан-ку, тилимизни ҳам биларкан, ё пирай”лаб бир-бирларига бош чайқаб, қараб қўйишганингача эслашиб ўтирдик.

Мавзу Америкага кўчганда, мезбон бироз юрагини бўшатиб олди:

– Ҳа, ҳозир Ўзбекистон таниб бўлмас даражада ўзгариб кетганини тасаввур қилиб турибман. Ўтган йили талабаларимиздан уч нафари ёзги икки ойлик таътилни сизларда ўtkазиб қайтишди. Шундай таассуротлари кўпки, ҳаммага мақтаниб, гапириб юришибди. У ёғини сўрасангиз, ўн йилча олдин

ўзбекистонлилар Америка ҳақида қандай тасаввурга эга бўлишса, бизда ҳам ахвол шу эди. Аввалги сафарингиз чоғида кўришганимизда “Афғонистон”, “Покистон” ҳатто, “Тожикистон”данмисиз, деб савол беришгани ҳақида қуюниб, гапириб бергандингиз. Демак, икки мамлакат ўртасида ўзаро борди-келди қилишни, асосан туризмни йўлга қўйиш керак. Сизлардаги жаҳоннинг ҳеч қаерида йўқ қадимий тарихий шаҳарлардаги обидалар битмас-туганмас бойлигингиз. Ҳали улар очилмаган олтинга тўла сандиқлардай захирада турибди. Бу захира пахтанинг ўзидан келадиган бойлиқдан кўра бир неча баробар ортиқ, десам ишонаверинг. Энг қувонарлиси, ҳозир бизда ҳам қадимий мамлакатингизга қизиқиш йил сайин ортиб бормоқда. Телевизорда тез-тез кўрсатувлар намойиш этиб, саёҳатга чорлаб турилибди. Бироқ, виза масаласи қийин. Элчихонага яқинлашиб бўлмайди, дейишади. Олдинги элчи анча жонкуяр эди. Ҳатто, университетимизга келиб, талабалар билан сухбат ўтказиб, ўзбек тили ва адабиётининг ўқитилиши билан қизиқкан, кутубхонамиз учун кўплаб тилшуносликка оид журнал ва бадиий китоблар жўнатганди. Газеталар олиб турардик. Ҳозир ҳаммаси тўхтаб қолган. Бу масалада Қирғизистон, Қозоғистон, ҳатто Тожикистон элчихона ходимлари анча фаол. Йилда бир адабий кечалар уюштириб, ёзувчи, шоирларини таклиф этиб туришади. Энди, биз ўзимиз ташаббус кўрсатиб, Эркин Вонходов билан учрашувни ташкил этиш масаласида элчихонага мурожаат қилмоқчийдик, фойдаси йўқ, дейишди... Чунки, шундай улуғ, катта шоирга нис-

батан қандайдир “ишончсизлик” пайдо бўлганмиш. Авваллари ҳам бундай гаплар қулоққа чалиниб турарди. Ишонмагандим. Кейин билсам, Илза хоним ҳам... у кишидан ўзини четга тортаётганмиш... Баъзи танишларим анчадан бери интернетда “Эркин Воҳидов” сайти орқали тарқалаётган “хабар”ларга бир кўз ташлаб қўйишимни айтишди. Аслида, интернет дегани ғийбатнинг уяси, унда ёзилганларга ишонавермайман. Қарашга вақтим ҳам йўқ... Лекин Эркин ака “ёзган”, “айтган”лардан келтирилган “парча”ларни ўқиб, ёқамни ушладим. Наҳот, шулар рост бўлса, деган савол кўпдан бери мени қийнаб юради. Мана, келиб қолганингиз айни муддао бўлди, – деди-да, “домла” ўрнидан туриб, тортмадан бир нечта варақ қофозни менга бераркан, таъкидлагандек, – ёзилганларнинг қанчаси тўғри, қанчаси нотўғрилигини яхшилаб ўқиб, аниқлаб берасиз. Энди Сизни холи қолдираман. Кеч ҳам тушиб қолибди. Ана, бемалол ётиб, дам олишингиз учун каравот ҳам тайёр. Эрталабгача хайр, – дея хайлрашиб, хонадан чиқиб кетди.

“ДУШМАНФУРУШЛАР”

Билолиддин ака менга берган варагарнинг биринчи бети юқорисига катта ҳарфлар билан ёзилган “ЭРКИН ВОҲИДОВ” сўзига кўзим тушди.

Унинг остида “Ўзбекистон қаҳрамони, Халқ шоири” жумлалари ҳам бор эди.

Шундан кейин қарийб ўн сахифадан иборат “сайт” Эркин ака “ёзган” ёки қаердадир “айтган” сўзлардан қисқа ва лўнда қилиб келтирилган “иқтибослар” билан тўла эди.

Бу “иқтибослар” қаердан олинган, қайси жойда, қачон айтилганлиги ҳақида бирон маълумот берилемаган, ҳатто йили, ой, куни ҳам кўрсатилмаган фирт “информацион бузғунчилик”нинг ўзгинаси бўлиб, “парча”ларнинг кўпидан ҳозирги мустақил Ўзбекистонда юритилаётган сиёsat ҳамда у ердаги тузумдан норозилик аломатлари аниқ сезилиб туради.

“Сайт”даги ёзувларни қайта-қайта ўқиб, англайдимки, улар Эркин аканинг қачонлардир шўро даврида эълон қилиниб, сўнг китоб ҳолида чоп этилган “Изтироб” публицистик мажмуасидаги мақолалардан “юлиб” олинган ёки тўғридан-тўғри нотўғри талқинда “кўчирилган” эди.

Ҳатто, улар ичида мустақиллигимизнинг дастлабки йиллари ёзилган энг долзарб мавзудаги “Ташриф. Тарих. Тақдир”дан келтирилган “мисоллар”да ҳам нохолислик ҳиди анқиб туради.

Ундан кейинги “сайт” саҳифасида кутилмаганда номим ярқ этиб кўзга ташланиб қолди.

Ўзим мутлоқ бехабар ҳолда, бу “сайт” орқали мен ҳам анча-мунча нарсаларни “ёзиб”, “айтиб” юборган эканман. Тўғри, бу “парча”лар саксонинчи йиллардаги экологик муаммолар, айниқса “Ошкоралик”дан руҳланиб, Бўстонликқа оид ўта эҳтирос билан ёзилган, турли даврий матбуот саҳифаларида эълон қилинганд “жанговар” руҳдаги мақолалардан “кўчириб” олинган бўлиб, ҳозирги кун “ўлчами” билан ҳисоблаганда, камина “шўро даври”нинг эмас, ҳозирги мустақил Ўзбекистондаги тузумнинг фирт “мухолифатчи”си бўлиб гавдаланиши ҳеч гап эмасди.

Бу ҳам ҳолва экан. “Сайт”нинг алоҳида саҳифасидаги ҳозирги раҳбарларимиз шаънига “айтилган сўзларим”га кўзим тушиб, ўзимни йўқотиб қўя ёздим. Кейин бир дақиқа ўйлаб, бу “сўзлар” айтилган эмас, “ёзилган”ини эсладим.

Ўша пайлар, эндиғина мустақилликни қўлга киритган Ўзбекистонда эркинлик тамойиллари асосида ўтказилаётган сайлов қизиган пайт эди. “Ўзбекистон адабиёти ва санъати” газетасининг бош муҳаррири ҳузурига шошилинч суратда чақириб, олдимга беш саҳифали қўллэzmани қўйди. “Бугунги газеталарни ўқигандурсиз... “Юқоридан” буйруқ бўлиб қолди. Мана шундан бир қатор сўзни ҳам оширмаган ҳолда иккинчи номзод ҳақида ўз фикрингизни ёзиб берасиз. Эртага эрталабгача муҳлат Сизга”.

Қайсиdir Вилоятдан “Районо” мудирининг Биринчни номзодни қўллаб қувватловчи мақоласини ўқиб чиққач, мен ҳам шунга “муқобил” тариқасида

ўзимиздан чиқкан “ёзувчилар вакили”ни ёқлаб, роппа-роса беш саҳифадан иборат ўз “тавсия”мни ёздим. Индинигаёқ газетада эълон қилинди. Бу ўша кунларнинг тақозоси бўлиб, оддийгина ҳол ҳисобланарди. Қолаверса, мақола президентликка номзод ҳурматли кишининг Тошкент авиазаводида ўз сайловчилари билан бўлган учрашувда матбуот органи вакилларини қаттиқ танқид қилиб: “Нега булар фақат мени мақташ билан овора, демократия қани? Ахир менинг рақобатчим ҳам ёш, навқирон йигит, яхши сиёsatчи, обрў-эътиборли ижодкор-ку! Бундай бир ёқламаликка чек қўйиш керак!” дея юқори минбардан туриб, чин маънодаги холисоналик билан айтган гапларига жавоб тарикасида ёзилганлигини ҳамма билади. Мен ҳам ўз фикримни холисона баён қилиб ёзганим ўша пайт кўпчиликка маъқул бўлган, у расмий, “норасмий”-лар томонидан мақталганди ҳам...

Мана энди мен қачонлардир эълон қилинган “даъватнома” мақоламдан келтирилган иқтибосларга кўра ҳамон “иккинчи номзод”ни “қўллаб-қувватлаш-у улуғлаш билан оворалигим”ни “ўз сайтим” орқали кўриб, ёқамни ушлаб ўтирибман. Қўрқиб ҳам кетдим.

Чинданам бу “интернет” дегани арзимас “ўзгартириш” орқали сенга нисбатан ишинчсизлик уйғотиб, ғаламис, сотқин, мухолифларнинг ашаддий ҳимоячиси, ҳатто айғоқчисига чиқариб қўявериши ҳеч гап эмас экан.

Яна мен, энг охирги қисқагина “Маълумотнома”-да ёзилишича, хорижда қочиб юрган қайсиdir ватан хоинининг китобига “Сўзбоши” ёзиб, хомийлик

ҳам қилган эмишман. Балки, Покистон назарда тутилаётгандир!

Нима бўлганда ҳам, ҳукуматимизга минг раҳмат. Баралла овоз билан “Давлат душмани” деб, эълон қилинганимга қарамай, хоҳлаган жойга бориб, айтадиган гапимни айтиб, қўлимдан келганича Ўзбекистонимиз мавқеини кўтариб юрибман.

Ҳа, ишонаверинг, ҳамон камина “Давлат душмани”.

Уйқу қочгач, хаёл одамни ҳар қаёққа етаклайди. Бирдан бундан тўрт йилча аввал рўй берган, бошимга вақти-вақти билан ёғилиб турадиган “сен фалончининг айғоқчисисан, раҳбаримизга қаршисан, анаву гурухбознинг одамисан” каби маломатларнинг ибтидоси бўлиб янграган, тавқиляънатнинг энг қашқатгич зарбасига учраган куним кўз олдимда гавдаланиб кетди. Балки, ўшанда бу гапларни ўз қулоғи билан эшитмаганлардан бошقا биронтасига айтсам, ҳеч ким ишонмаган, устимдан кулган ҳам бўларди.

Лекин ҳозир “Сайт” жумлаларини ўқиб, менга қўйилган “айбнома”лар “бежиз” эмаслигига ўзим ҳам ишониб қолгандай бўлдим.

Ўшанда Уюшма шаҳар марказидаги кўпқаватли бинолардан бирига кўчиб, раҳбар ўзгарган, “маликүшшуаро” жуда ҳам тушкунликка тушмасин деийищими, “фахрий”лик мартабаси билан сийлаб, “тахт”нинг пастроқ погонасидан жой беришган, ҳатто хизмат машинаси ҳам унинг тасарруфида қолдирилганди.

Илк маротаба янги Уюшма қароргоҳига, яқинда сайланган раисни лавозим билан табриклиш учун келгандим, котиба қиз “ҳозиргина бир иш би-

лан чиқиб кетдилар”, деб қолди. Йўл-йўлакай, шу маҳкамада кўпдан бери ишловчи, яқин таниш бўлган ходима аёлларга кўриниш бериб, янги идора қароргоҳи билан табриклаб ўтиш учун бешинчи қаватга тушдим. Улардан иккитаси “Кадрлар бўлими”да ўтиришган экан, салом-алик қилиб кўришдик, бироз гурунглашгач, ташқарига чиқдим-у, бошқа жой қуриб қолгандек, шундок рўпарадаги хожатхона эшиги очилиб, қаршимда “фахрий” пайдо бўлса бўладими! Салом бермоқчи бўлгандим, унинг важоҳати “алик” оладиган даражада эмас, афтини буришириб, менга ғалати қарашиб қилиб қўйганини сезиб, олдинга қараб юрдим.

Шунда у мени кузатмоққа шайланган ходималарга қараб бор овоз билан бақира кетди.

– Давлатимиз душмани бу ерда нима қилиб юрибди? Нега қараб турибсанлар? Милиция чақирмайсанларми? – деди-да, йўлак этагидаги эшиги устига зарҳал ҳарфлар билан ўз номи-ю лавозими ёзиб қўйилган пешлавҳали хона ичига кириб кетди.

Шу дақиқаларда орқасидан бостириб кириб, қўлимдаги китоб солинган оғиргина папка билан башарасига туширай дедим-у, ўзимни босдим. Тўғриси, ўзимни эмас, болаларим, набираларимни ўйладим. Қолаверса, ўзбекчилик...

Яна шу топда мен ҳам овозимни барапла қўйиб, “Ҳой инсон, шунча йиллардан бери қилиб келган ҳақоратларинг, кимсатишларинг етар, энди! Болалик дўст-қадрдоним тобути устида унинг руҳини чирқиллатиб, қанчадан-қанча одам олдида мени маракадан ҳайдаб чиқардинг, индамадим. Қарийб

эллик йилдан ортиқ вақт давомида мен учун энг қадрли саждагох бўлиб қолган устоз Абдулла Қаҳҳорнинг ҳамма учун очиқ бўлган қутлуғ дарвозаси ёнига Зоҳид деган бир пиёниста кимсани қоровулликка қўйиб, ўша даргоҳ соҳибаси бўлган Нодирахон кўз олдида куракда турмас ҳақоратли сўзлар айттириб, ичкарига қадам бостирилмадинг, чидадим! Устоз Эркин Воҳидовдай ҳар доим босиқ ва оғир бўлишга ҳаракат қилиб, аламимни ичимга ютиб келдим. Энди бу ҳақоратингга тоқат қилолмайман. Қани, “Давлат душмани” эканлигими ни исботлаб берасан, деб ёқаси аралаш, қилтириқ бўйнидан олай дедим-у, ўзимни босиб, шайтонга ҳай бердим....

Аслида-ку, бу одам ҳамон аламидан тушмаган экан, қўлидан келган ғайирликни қилаверади, худо уни шундай феъл-автор билан яратган. Дарвоҷе, яқин дўст –“адаши” бир пайтлар ғазаби жунбушга келиб, айтиб юборган гаплари қанчалик тўғрилигига ҳозир, шу дақиқаларда яна бир бор тушуниб етандай эдим...

Мана шундай ўйлар оғушида йўлак бўйлаб, лифт томон кетиб бораarkanман, беихтиёр кўз ўнгимда “Кадрлар хонаси” эшиги остонасида фаромуш бир ҳолатда, андургумон бўлиб турган аёллар гавдаланиб кетганди. Уларга қийин, энди очиқдан-очиқ (негадир “халқ” эмас), “Давлат душмани”га чиқарилган мендай нотавон одамга бирон илиқ сўз айтиб, кўнгилни кўтаришдан ҳайқишиларини яхши англардим. Чунки, эгардан тушган бўлса-да, ҳамон оёғи узангизда турган анави кимсанинг шундоқ рўпарасида ишлашади...

Девордаги соат кечки тун 12 га занг уриб, хаёлларим бўлинниб кетди.

Ўйқум қочди.

Қўлимга беихтиёр “Сайт” варакларни олиб, қайта кўздан кечириб чиқдим.

Азонга яқин кўзим илиниб қолибди. Шу бўйи соат ўнларда бошимни кўтардим.

Энди ювениб бўлгандим, “Билолиддин домла” аста эшикни очиб, ичкарига кирди, саломлашган бўлди-да:

– Сездим, анчагача ухлолмадингиз. Сайт хабарлари таъсир қилди чоғи? – деб савол назари билан қараб қўйди.

– Булар “хабар” эмас, душманфурушлар учун тайёр “қурол!” – дедим.

– О, “душманфуруш!” Бу сўзни биринчи бор эшишим. Ҳатто, менинг китоб жавонимда турган икки жилдлик “Ўзбек тилининг изоҳли луғати”да ҳам йўқ. Балки, Олмаотада чиқсан ўн тўрт жилдлик “Қазақ тилининг тусунтирма создиги”да бордир... Мен бир нарсага ҳайронман. Эркин ака битта “қуёш” сўзининг ўнта синоними бор бўлса, бошқа “улуғ” тилларда улар уч-тўрттадан ошмаслигини айтиб, ўзбек тили қанчалик бой тиллардан бири эканлигини исботлаб бергандилар. Наҳот, ўзбек тили қозоқ тилидан ҳам шунчалик “қамбағал” бўлса?!

– Ўша ўн тўрт жилдлик “Тусунтирма создик”ни мен ҳам домла Носир Фозилов уйларида кўриб, ҳайратланганман. Энди, биз ўта камтар ҳамда антишалик халқлигимизни ўзингиз яхши биласиз. Шу боис, “бошқалар”дан ўтиб кетмаслик учун тилимизни ҳам “қисиб” юрамиз-а!

– О, бу фарғонача асқия гап бўлди. Қойил, – дея кулиб юборди Билолиддин ака.

– Энди, “душманфуруш”ликка келсак, мана бу Сиз берган “Сайт”даги Эркин ака номи остида келтирилган “иктибос”ларни тарқатган ким, ўзи?

– Би-Би -Си ва бошқа радиостанция тўлқинлари орқали тарқаган.

– Булар, ўша шўро даврида ёзилиб, газеталарда эълон қилинганд, сўнгра у кишининг “Изтироб” деб аталган публицистик мажмуалар китобида босилган мақолалардан “юлиб-юлқиб” олинган бўлиб, на ўша мақоланинг номи, на ёзилган йили кўрсатилган. Буни, ҳозирги мустақил Ўзбекистонда юритилаётган сиёsatдан норозилик белгиси, деб талқин қилавериш мумкин. Тарқатилаётган бу “парча”лардан баъзи ғаламис “душманфуруш”лар кўпдан бери фойдаланиб келаётганга ўхшайди. Афсус, буни фош қилувчи ўша “Изтироб” китобидан Сизда йўққа ўхшади. Кеча қараб кўриб, кўзим тушмади.

– Биздаги факултет кутубхонасида ҳам йўқлиги-га ишонаман. Ўша китобдан қандай топса бўлади?

– Менда, уйда бор. Тошкентдан келтиришиш иложини қиласмиш. Энг қулай йўли – Америка элчихонасида ишлайдиган укамиз Аъзамхон Обидов билан телефон орқали боғланамиш.

– Агар ўша китоб келиб қолса, далил-ашъёлар билан “душманфуруш”ларга ҳомийлик қилаётганларни судга бериш орқали ўзим шуғулланаман, – деди мезбон қатъий қилиб.

Американинг ўзидан чиқиб, ёлғон-яшиқлар билан дунё аҳли олдида ўз мамлакати шарманда-

сини чиқарғанлар күп бўлган. Шулардан бири НАСА илмий марказида ишлаб кетган таниқли олим бўлиб, у: “Америка фазогирлари ҳеч қачон Ойга биринчилардан бўлиб қўнмаган. Буни давлат байроғининг ҳилпираб турганидан билиш мумкин. Ойда умуман ҳаво бўлмагандан кейин, қандай қилиб у ҳилпираши мумкин” дея, йирик журналлардан бирига интервью беради.

Бу АҚШни кўролмайдиган “рақобатчи” давлатлар учун айни муддао эди. Уни “илмий қаллоблик”да айблаб, ҳамма ёққа жар сола бошлайдилар. Матбуот ва телекранлардан хиёл “қимирлаб” турган Америка байроғи тушмай қолади. Кўпчилик қатори бизлар ҳам ўша давр лаҳжаси билан айтганда “Океан орти империалистларининг ойни эгаллаш” борасидаги “ёлғон”ларига чиппа-чин ишониб қолгандик.

Америкага қилган биринчи сафарим чоғида шунга қизиқдим. Бир неча гектар жойни эгалланган “Авиация ва космонавтика тарихи музейи”га олиб боришли. У ердаги маҳсус залда бир неча минут давом этадиган астронавтларнинг “ойдаги саёҳатлари” ҳақида олинган ҳужжатли фильмни намойиш этиб туришаркан. Ўшани тамоша қилдик. Байроқ у даражада ҳилпирагани ҳам йўқ.

Мен мезбонлардан:

- Бир пайтлар катта олимнинг Америка ойни биринчилардан бўлиб забт этгани ёлғон, ҳақиқат эмас, дея берган интервьюси кенг тарқалган эди. Унинг гаплари ғирт нотўғри экан-ку! Олим шу ёлғон гаплари учун жавобгарликка тортилганми?
- деб сўраганимда, улар оддийгина қилиб жавоб қайтаришганди:

– Нега жавобгарликка тортиларкан. У ўз фикри ни айтган-қўйган-да. Бизда демократия!

Мен бундай одамни ҳайратга соладиган “демократия”ни мамлакатнинг кўп жойларини айланиб, гувоҳи бўлгандим.

Шулардан хулоса чиқариб, номимизни рўкач қилиб, бўлмағур “хабар” тарқатганлар “ёзганларингиз асосида ўз эркин фикримизни баён этдик, холос”, дея туриб олсалар-чи деб, ўйланиб қолдим.

Бироқ, Билолиддин акага бериб қўйган ваъдамнинг устидан чиқишим керак эди.

Америкадан туриб, дунёнинг исталган бурчи билан алоқа боғлаш жуда осон. Сув текин ҳам. Индианада кундузги соат 11 лар атрофида бўлса, Тошкентда ҳозир кечки соат 10.

Ўғлим Рустамжон дарровгина гўшакни кўтарди.

– Китоб жавонидаги Эркин aka асарлари ичидан “Изтироб” китобини олгин-да, Аъзамхон қайда туришини биласан, тезда унга элтиб бер. Бу ерда керак бўлиб қолди, – дедим, гапни қисқа қилиб.

Орадан икки соат вақт ўтар-ўтмас, ён телефоним овоз чиқариб, қандайдир шошилинч хабар келганидан огоҳ этди-да, кичкина экран юзи ёришиб, унда қуйидаги сўзлар пайдо бўла бошлади: “Эркин аканинг “Изтироб” китобларини олдим. Эртага кечаси учадиган самолёт рейси билан “Диппочтa” орқали жўнатаман. А.О.”

Мен кунма-кун тузилган режа бўйича эртага Нью-Йорқда бўлишим ва ўша ердан Жон Стейбек йўлга тушган маршрут бўйича ижодий сафаримни бошлашга тайёргарлик кўришим керак эди.

Бу режамдан Абдулла Хўжа aka билан биз ўзбек ижодкорларига кўпдан бўён яхши таниш, йилда

бир-икки бор Тошкентга келиб, мөхмонимиз бўлиб кетадиган, Бўтакўз тахаллуси билан ижод қилувчи (Тошкентда саксон йиллик мусофиrot баёни – “Бўтакўзнома” китоби босилиб чиқсан) Жўра Қори aka ҳам яхши хабардор эдилар.

Хозир бу одам тўқсон ёшдан ошаётган бўлсада, тиниб-тинчимас, Нью-Йорқдаги кўпчилик ватандошларнинг бошини қовуштириб юрувчи маслаҳатгўй отахони ҳисобланади. Яна шуниси ҳам борки, Американинг энг катта бу муаззам шаҳарига ташриф буюрган бирон ўзбек зиёлиси Қори аканинг уйларида бўлиб, бир пиёла чой устида суҳбатини олмасдан қайтмайди. Эркин aka ҳам у кишининг “ўзбекона” хонадонига ташриф буюрганларини барча оила аъзолари ғурур билан эслаб юришади.

Телефон жиринглаб, отахоннинг беозоргина овози эшитилиб қолди:

– Бизларни бутунлай унутиб юбордингиз чоғи. Ҳикматуллажон икки кундан бери йўқлади. Номингизга ҳавоий жаҳоз учун чипта буюртма бермоқчи. Қачон йўлга тушмоқчисиз?

– Овора бўлмасинлар. Бугун кечки пайт штатлар бўйлаб қатновчи автобусда йўлга тушаман. Биласиз-ку, мақсадим Американи осмондан туриб эмас, ердан юриб, кузатиш!

– Мана бу ҳақиқий ижодкорнинг гапи бўлди. Автобус қачон Нью-Йоркка етиб келишини интернет орқали аниқлаб, ўша пайтда Сизни кутиб, оламиз.

Қори aka бир неча йил аввал Нью-Йорқда ўрта миёна катталиқдаги биноларни таъмирлаш ишлари билан шуғулланувчи “Ўзбегим” номли компаниянинг бошлиғи ҳисобланувчи Ҳикматилла деган

киши марҳум отасининг васиятига кўра, икки ма-
ротаба Тошкентга келиб, Эркин акани учратолмай
қайтгани ҳақида гапиравкан:

– Учрашиб, сухбатини олсангиз, бир китобга мавзу
бўлади, – деб қўйганди.

Билолиддин ака, Назиб Шаҳроний яна бир
нечта “ўзбек тили” муаллимлари кичик бир рес-
торанда зиёфат дастурхони ёздилар ва кечга то-
мон ичи худди самолёт салонига ўхшаш ҳамма
шарт-шароитлари муҳайё автобусда мени кузатиб
қўйишиди.

Билл ака билан телефон орқали мунтазам ало-
қа қилиб турадиган бўлдик.

ЭРКИН АКАНИ ИЗЛАБ ЮРГАН КИШИ

Автобус мамлакатнинг барча худудини бир-бири билан боғлаб турувчи “федерал трасса” бўйлаб (Чикаго шаҳри орқали) Оҳайо, Пенсильвания штатларини ортда қолдириб, Нью-Йоркка кириб келганида қуёш шафак нурларини осмонўпар иморатларнинг ялтилловчи, баланд ойнаванд пештоқларига сочиб, ажиди шакл – шамолда товланаётган оқшом яқинлашиб келаётган пайт эди.

Иккинчи қаватга жойлашган кенг ва ёруғ бекатнинг автобусимиз келиб тўхтайдиган жой рақами ҳам мезбонларга олдиндан маълум эканми, улар шундоқ пастга тушишим биланоқ таниш чехра Жўра Қори ака билан баландбўй, патила-патила соchlари ҳурпайганроқ, сарғишдан келган киши рўпарамда пайдо бўлди. У ёш жиҳатдан ўзим қатори кўринса-да, жўшқин ва серҳаракатчанглиги шундоқ юз-кўзларидан билиниб турарди.

Отахон:

– Ҳикматилла, қачондан бери йўқлаб юрганингиз – Эркинжоннинг укалари мана шу одам бўлади, – дея менга ишора қилиб қўйди.

– Сизни нега Тошкентга биринчи боргандаёқ излаб топмадим-а, – деб Ҳикматулла қучоғини кенг очиб, мен билан сўраша кетди.

Қори ака:

– Вақтики, барманаст, яъни ҳар нарсанинг ўз вақт-соати бўлади, – дея янги танишимга қўл ишо-

раси қилиб қўйди. Сўнг менга ўгирилди, – энди Ҳикматулланинг тузган режалари бўйича бугун-эрта яхшилаб дам оласиз. Гурунг қиласиз. Сизга сал учини чиқарганимдек, бу одамнинг тарихи жуда қизиқ, айниқса шоиру замон Эркинжонга боғлиқлиги билан. Эртага кечга томон “Лаззат” ресторанида учрашиб, Сизнинг Беруниёна ижодий сафарингиз ҳақида гаплашиб оламиз. Энди менга рухсат! – деди-да, Жўра ака эпчиллик билан нарироқда турган машинага чиқиб, ўт олдирди.

Бизда ёш сал “ўтиңқирадими” бас, машина ҳайдаш “ноқулай” бўлиб қолади. Америкалик қари-қартанглар учун эса, улов – ҳаётий зарурат, ҳаракатнинг ососий воситаси ҳисобланади. Бир пайтлар ёзгандим: ҳасса ёки икки ғилдиракли “тиркама”га суюниб, аранг қадам босаётган кампиршо ёки мункиллаб қолган қария бир амаллаб “паркинг” майдонидаги машинасига ўтириб олса бўлди, варанглатиб, ҳайдаб кетаверади. Айниқса, Жўра акадай “зуваласи пишиқ”лар шахсий самолётчасини ҳам бошқариши оддий ҳодиса ҳисобланади, бу ерда.

Нью-Йорк кўчалари эрталаб, айниқса кечки пайт дунёning ҳамма йирик шаҳарларида гидек, одам билан тирбанд бўлиб кетишининг бир неча бор гувоҳи бўлганман. Кўриб, ваҳимага тушасиз... Шундай бир пайтда “қайнаб” ётган сон-саноқсиз кўчалардан машинада йўл топиб юриш, қанчалик азоблигини айтмай қўяқолай. Ҳамма нинанинг тешигидай жойдан ҳам уловини ўтказиш пайидан бўлади.

Ҳозир Ҳикматулла билан йўлга тушдиг-у, бир пайтлар Покистоннинг Карачи кўчалари бўйлаб

Ўткир Ҳошимов, Иброҳим Ғофуров, Аҳмаджон Мелибоевлар билан “сайр” қилганларимиз эсга тушиб кетди. Қарийб бир соатга чўзилган ўша пайтдаги “ҳаёт-мамот” сафаримиз ҳақида ёзилиб, «ЎзАС» газетасида босилган мақоламиз Ўткир aka ибораси билан: “Бу шаҳар кўчаларида машинада юриш, қутурган буқанинг киндигига бигиз тикиб, ёввойи дарахтзор – жунглида сайр қилиш билан баробар...” деган сўзлар билан бошланган эди. Раҳматли ёзувчимиз ҳаёт бўлганида Нью-Йорк кўча ҳаракатига қандай “баҳо” беришини тасаввуримга сифдиролмайман... Ҳарқалай, бу ерда анча-мунча тартиб-интизом борга ўхшарди. Кара-чидагидай (биздагидай ҳам) у ёнингдан-бу ёнингдан қувалаб, олдинга ўтиб оладиган “учар”лар мутлоқ кўринмасди. Ўз «қатори»дан ярим қарич ҳам “чет”га чиқмай, уловининг силжишини сабртоқат билан кутиб турувчи ҳайдовчиларнинг сабртоқатига қойил қоласан, киши.

Ҳикматилланинг бор диққат-эътибори чумолидай “оқим” ҳосил қилган машиналар оломони орқасидан ёриб, қандайдир бир “очиқпик”ка чиқиб олишга қаратилган, миқ этмас, мен ҳам ерга қулаб, судралиб бораётган, ҳали замон ағдарилиб тушиши муқаррар самолёт салонида ўтиргандай, юрагимни ҳовучлаб борадим. (Дарвоҳе, яқин атрофдан бир парракли кичик самолётлар учиб, ўтиб қоларди. Кейинроқ маълум бўлдики, булар ҳам сармоядорроқ кишилар томонидан шахсий улов сифатида фойдаланиладиган йўл транспорти турига киаркан.)

Ниҳоят, икки соатча вақт мобайнода йўл юриб, юқори этаги паға-паға оқ булутлар билан қаърига

кириб кетган баҳайбат осма күприк қаршисидан чиқдик. У бўйлаб икки чақиримча юқорига кўтарилиб, сўнг “чўққи”ни забт этиб, пастлаб борганимиз сари кўз олдимиизда узоқларга чўзилиб кетган гўзал бир манзилгоҳ номаён бўла бошлади.

Унга яқинлашиб, атрофга шох ташлаб ястаниб ётган осойишта ва саришта кўчаларни кўриб, ё, тавба, худди биздагига ўхшаш шаҳар атрофидаги маҳаллаларнинг ўзи-ку, деб юборгингиз келади.

Чинданам, йўлларнинг икки томонига қаторлаштириб қурилган олдидаги яланглик гулзор ва кўкаламзор, орқаси дарахтзор икки қаватли иморатлар худди ўзимиздаги манзарани эслатарди. Ҳатто, менга ёшлигим ўтган Тошкентдаги Кўкча маҳалласини кўз олдимда гавдалантиргандай ҳам бўлди.

Ҳикматулла ниҳоят тилга кирди.

– Мана, бизнинг ҳовлига етиб келдик.

Қаршидаги шоҳона уйга кириладиган икки қанотли эшик очилиб, гиламча тўшалган пойгоҳ яланглигига ёши ўтганроқ бўлиб кўринса-да, табассумидан нур ёғилиб турган аёл пайдо бўлиб, бизга пешвоз чиқди.

– Хуш кўрдик, меҳмон! – дея, оҳиста таъзим қилиб қўйди.

Ҳикматилла овозини кўтариброқ:

– Тошкентлик келин қани, ҳамشاҳрини кутиб олмайдими? – дейиши билан аёл ёнида атлас кўйлак кийиб, бошига харир рўмол ташлаган йигирма ёшлардаги келинчак пайдо бўлиб, қаддини букканича менга илтифот билан “салом” берди.

Биз ўзимизни қанчалик дунёдан ажралиб қолгандай ҳис этмайлик, мана шу оддийгина ман-

зара масофалар қанчалик опис бўлса ҳам чегара билмаслиги, одамлар шу қадар бир-бирига яқинлигининг ёрқин ифодаси бўлиб, кўз ўнгимда гавдаланиб кетди.

Хонадон соҳиби келинга ишора қилиб, менга ўгирилди:

— Раҳматли отамизнинг қилган васиятларидан бири — Она юрт билан риштани боғлаш эди. Мана энди Тошкентнинг ота-боболаримиз ўтган Чифатой маҳалласидан келин тушириб, елкадаги учинчи қарзни адо этдим. Ўртадаги иккинчи қарзни амалга оширишда Сиз ёрдам берасиз! — деди-да, қўшиб қўйди. — Келинимиз яхши китобхон. Сизнинг Америка ҳақида ёзган катта китобингизни ўқиб чиқиб, варақма-варақ бизларга ҳам гапириб берган.

Мен учун иккинчи қаватдаги алоҳида хосхонадан жой ҳозирлаб қўйишган экан. Ёзув-чизув стодидан тортиб, бемалол ҳордиқ чиқарса бўладиган барча шарт-шароитлар муҳайё эди. У ерга жойлашиб, бироз дам олдим.

Пастдаги меҳмонхонага тузалган дастурхон атрофида ўтириб, Ҳикматилла иккимиз кечки овқатни бирга тановул қилдик. Аёллар суюқ-қуюқ, яъни аввал “тошкентча” мошхўрда, сўнг палов билан бизни сийлашди.

Хонадоннинг тўнғич фарзанди оиласи бидан Канадада яшаб, бизнес билан шуғулланаркан. Унинг ўғли “куёвтўра”, яъни Ҳикматилланинг набираси иш юзасидан бир неча кунга Дубайга кетган экан.

Автобусда узоқ йўл юриб, хийла чарчагандим.

Буни сезган Ҳикматилла:

— Яхшилаб дам олинг. Эртага бафуржа гурунглашамиз. Сизга айтадиган гапларим бор. Янги Аме-

рика ҳақидаги китобингизга “бир ўзбек боласининг бошидан кечиргандар” деб, қўшиб юборсангиз, ажаб эмас! – деб қўйди.

Тиниқиб, тўқиз соатча ухлабман. Ташқаридан эшитилаётган қандайдир овоздан уйғониб кетдим.

Кенг дераза пардасини хиёл очиб қарасам, Ҳикматилла пастда, унча катта бўлмаган боғ ичидагулида белкурак билан шигил меваларга бурканган олма туплари остини юмшатмоқда.

АҚШнинг одамни ҳайратга солувчи кўпдан-кўп, чек-чегараси йўқ боғли жойларини кўп кезганман. Бироқ, ҳозир негадир шундоқ Нью-Йорқдай шаҳарнинг ёнгинасида олмазор бўлиши менга ғайритабиийдай бўлиб туюлди.

– Хорманг, боғбон! – дедим деразанинг бир кўзини каттароқ очиб.

– Бор бўлинг. Яхши ухлаб турдингизми?

– Келганимдан бери бунчалик мириқиб, узоқ ухламаганман.

– Пастга тушинг, нонушта тайёр

Соатга қарасам, эрталабки 7. Ювиниб-тараниб тушгунимча 8 бўлди.

Мен Америкага бундан тўқиз йилча аввал қадам ранжида қилганимда, бу ерга тақдир тақозоси билан келиб қолган миллатдошларимизнинг кўпи билан гурунглашиб, улар бошидан кечган воқеаларни иложи борича дафтарга тушириб борганман. Аксар воқеалар бир-бирига ўхшаш, зерикарлироқ ҳам. Қаердадир ўқиган, кимдандир эшитгандай бўлаверасан.

Ўшанда менга энг таъсир этгани Америка-Туркестон дўстлик Ассоциацияси президенти Абдул-

ла Хўжа ака билан “буюк муҳожир” Рўзи Назар отанинг узоқ гурунг асносида ўз бошларидан му-софиричиликда кечирган воқеалар тафсилотини ҳикоя қилиб берганлари бўлган, мен уларни Америка ҳақидаги биринчи китобимда алоҳида боблар орқали тасвирлашга ҳаракат қилганман.

Бугунги қаҳрамоним Эркин аканинг “ота мерос” ашаддий муҳлиси Ҳикматилла мен учун кутилмаган топилма бўлди. У билан нонушта қилиб бўлгач, икки соатгина гурунглашдик холос.

Тошкентнинг Чифатой мавзеидан чиқиб, Бухоро томонларда ҳам донг таратган машҳур заргар отабоболари шажарасини худди китобларда ёзилганидек муҳтасаргина таъриф этиб, энди буёғи ўзингизга ҳавола дегандай бир лаҳза жимиб қолар, сўнг янги мавзу саҳифасини очарди.

Суҳбатдошимнинг қандайдир шоирона шавқ билан ҳикоя айтишидан шеър ҳам ёзиб турса керак, деган хаёлга келиб қолгандим, тахминим бошқачароқ бўлиб чиқди. У гарчи Нью-Йорқдай катта шаҳарда қурилиш-таъмир ишларини бошқарса-да, маърифатли, адабиётни юракдан ҳис этувчи, мутолаага чанқоқ, куюнчак одам экан.

Кўп мусофиrot азобларини чекиб, оғир-енгил кунларни ўз бошидан кечирган алномиш келбат бу кимсанинг юрагидан жой олган мавжли ҳистийуларнинг калити ҳам очилди...

“БИР ЎЗБЕК БОЛАСИННИНГ БОШДАН КЕЧИРГАНЛАРИ”

Уста Музаффар Тошкентнинг эл оғзига тушган заргарлар сулоласидан бўлиб, ота-боболари Бухоролик “ҳамкасблари” билан ҳам яқин алоқа боғлаб келишган. Эски Жўва бозоридаги каттагина дўкон, ҳамда зибу зийнат ясадиган икки устахона уларга қарашли бўлган.

Хонадоннинг якка-ю ёлғиз ўғил фарзанди Мардонбекда “ота касб”ни давом эттиришдан, унда авлоддан-авлодга ўтиб келаётган касбни эгаллашдан кўра билимга, китобхонликка қизиқиш устунроқ эди. Буни сезган Уста Музаффар ўғлини мадрасага, таниқли мударрислар қўлига ўқишга берди. Ёшгина йигитча таҳсилдан қайтиб ҳам китобдан бош кўтармас, баъзан ярим тунгача қироат билан машғул бўларди.

Бундан таъсирланган Уста баъзан хотинига:

– Билим ҳам китоблардан олинадиган олтин мисқолларидай дур-гавҳар. Ўғлимиз шунга меҳр қўйган экан, бу ҳам худонинг инояти, – деб қўярди.

Ёшгина йигит Мардонбек номлари анча тилга тушиб қолган Тошкент адабий муҳити вакиллари Каримбек Хислат, Тавалло, Тўйчи Ҳофиз, Мискин каби қалам аҳли йиғиладиган давраларнинг бир четида ўтириб, ўртада қизғин давом этадиган Навоийхонлик, Бедилхонлик ҳамда Машрабхонликка уланиб кетувчи мушоираларни кузатиб, бир олам

шавқ-завқ оларди. Юрагида ҳам ижодга ошуфталик майли туғён урарди. Лекин қоғозга бир нарсалар туширишга журъат этолмасди.

Уларнинг Чигатой маҳалла гузарига яқин ерда жойлашган каттагина ҳовлиларига киравериш дарвоза ёнбошида чиройликкина меҳмонхона бўлар, у ерда баъзи-баъзида отаси яқин дўст-ёрларини чақириб, гурунг ўюштириб турарди.

Мардонбек кўнглига устозлардек яқин бўлиб қолган ахли шоирларнинг латиф гурунгини шу кичик гўшада ўтказиш нияти борлигини отасига айтганди, у қувониб кетди. Ҳатто, бундай маърифатли кишилар ташрифига аatab, бозордан семиз қўй ҳам олдириб келтирди.

Кўп ўтмай, маҳаллада Мардонбекнинг меҳмони бўлиб, шаҳарнинг беш-олти шоирлари келишгани, ҳатто улар ичида Тўйчи Ҳофиз ҳам борлиги ҳақида гап тарқалди.

Бухордан кўп йиллик таниш, “ҳамкор” бўлиб қолган Фазлиддин заргардан хабар келиб қолди; у Уста Музаффарни отасининг пайғамбар ёши муносабати билан ўтказиладиган маросим тадбирига таклиф этди.

Уста ҳам ўғлини Бухорои шарифни бир зиёрат қилдириб келиш ниятида юрарди. Анча-мунча совға-салом билан ота-бола йўлга тушдилар.

Ўша маросим куни Мардонбек учун кутилмаган бир воқеа рўй берди: меҳмонлар ичида Садриддин Айнийга кўзи тушиб, у кишига эргашди, лутф билан салом берди-да, қўлларини олиб сўрашди. Буни отасига ғурурланиб, гапириб ҳам берди.

Эртасига эса, бутун ақли ҳушини олиб, хаёлларини ағдар-тўнтар қилиб юборадиган ҳодиса рўй

беришини билмасди. Йигит барвақт туриб, ҳовли этагини қоплаган сўлим боғ ўртасидаги катта ҳовуз бўйида қад ростлаган беш қиррали шийпон шифтларига чиройли қилиб ёзилган байтларни яна бир бор ўқиб, дафтарга кўчириб олиш мақсади-да, боғ эшиги остонасига қадам қўйди-ю, кутилмаганда бир пари-пайкарга рўбарў бўлди. У аввал ҳурккан охудай камон қошларини бир чимириб қўйди-да, кейин бошидаги ҳарир қийиқни сал юзига тортиб, шундай табассумли қараш қилиб қўйдик, агар шу топда шийпон томондан аёл кишининг “Гулбиби, қаёққа кетдинг, келақолсанг-чи” деган овози эшитилиб қолмаганда ўртадаги вазият қай ҳолатда якун топарди, билмасди. Ҳар тугул ҳушёр тортиб, эсанкираб қолмади... Қиз келган йўлига қайтаркан, Мардонбек томон яна бир бор сирли нигоҳ ташлаб қўйди.

Йигит Бухоронинг катта ва ғала-ғовурли бозорлари бўйлаб китоб расталарини айланаркан, ўзига ёқадиган китобларни излаб топар, сотиб оларди-ю, хаёли паришон, ўша қиз томон кетиб қолаверарди. Уни бундан ўн йилча олдин онаси билан Тошкентга – уйларига меҳмон бўлиб кетган пайтда кўрганини эслар, наҳотки ўша кичкина қизалоқ, соchlари жамалак Гулбиби бўлса, деган ўй қайта-қайта миясида айланаверарди. Арзимас йиллар ичida шундай дуркун, қўхлик қиз бўлиб улғайганига ишонмагандай бўларди.

Сирасини айтганда, “гулни баҳона қилиб, қиз кўргани келганмиз” деганларидаи, Уста Музаффар ҳам совға-саломни бекорга расаматини келиштириб, бу ерга ташриф буюмаганди.

Бу ҳақда сўз очилишига Мардонбекнинг қадоматига қараб туриб:

– Оба, азамате-й! Яқинда борганимда бола эдинг. Энди номингга яраша Алпомишдай йигит бўлиб қолибсан-ку! – дея, Фазлиддин айтган гап баҳона, Уста Музаффарга ҳам айни муддао бўлди.

– Нимасини айтасиз! Мана, қизингизни ҳам мен таниёлмай қолдим. Энди гапнинг индаллосини десам, аввал Сизга айтганимдек, ўғлим китобдан зарқидиради. Ўқиб, ўргангани-ўрганган. Уй тўла китоб. Бу ердан ҳам сотиб олганлари бир сандққча бўлиб қолди-ёв! Ҳа, миллатимизга бундай “заргар”лар кўпроқ зарур. Шунинг учун бор шарт-шароитни яратиб қўйибман. Энди ягона ўғлимиз учун битта камчилик бор. Бу ҳаётий масала. Икковимиз биргалиқда уни ҳал этмоғимиз ҳам қарз, ҳам фарз!

– Гапингизга тушундим. Лекин бу аёллар иши. Улар ҳал қилишлари керак.

– Биз келтирган сеп наҳотки, Сиз учун камлик қилаётган бўлса!

– Қизи борнинг нози бор, дейдилар-ку!

Ўртада енгил қаҳ-қаҳа кўтарилди.

Бу гурунг қатнашчилари ҳозир аллақаерда сипогина бўлиб ўтирган бўлажак куёвтўра уч кун аввал Лаби-ҳовуз ёнидаги китоб растасидан сотиб олган Машраб қуллиёти зарварағига “Гулбибига, девонаи Машрабдан” деган ёзув билан хуфя равишда қизга энг қимматбаҳо “сеп” ўрнида тортиқ қилганидан бехабар эдилар.

АЁЛЛАР ИШНИ ТЕЗГИНА ҲАЛ ҚИЛИШДИ

Бухородан Чигатойга Гулбиби келин бўлиб тушди. Ўртада бир тинчлик ҳукм сургандай бўлди-ю, шўро ҳукуматининг яна зулми зўрайиб, жон сақлаб қолган “бой”ларнинг қолган-кутган мол-мулкини ҳам мусодара этилиб, ўзларини узоқ совуқ юртларга бадарға қилиш авжга чиқа бошлади.

Худди ана ўша кунлар Уста Музaffer ёстиқдан бош кўтара олмай, каттиқ бетоб ётарди. Умри поёнига етаётганини сезди шекилли, ўғли билан келинини ёнига чақирди:

– Болаларим, – деди уларга маъюс қараб, – бу большавойлар аввалги ўрис босқинидан ҳам ўтиб тушадиган иккинчи маротаба қатлиом уюштиришга киришган чоғи. Аввал Бухородай шаҳри азимни айрипплонлардан бўмба ташлаб вайрон этиб, у ердан вагон-вагон олтинларни олиб чиқиб кетгани етмагандай, энди аҳолидаги қолган-кутган бойликларни ҳам мусодара этиб, ўзларини одам яшаб бўлмас, қаҳратон қишли жойларга бадарға этаётганмиш. Ўша томонлардан ҳам хунук хабар келди. Энди нима қилиб бўлса-да, энг керакли нарсаларни ҳозирлаб, эртага кечасига тайёр бўлиб туринглар. Сизларни “ҳукумат одами” Чинозга олиб бориб, ишончли кишилар қўлига топширади. Улардан хавотир олманглар, ўзимизнинг одамлар. Бир амаллаб “ташқари”га чиқиб кетиш учун имкониятларинг бор. Мана бу мўлтиллаб қараб турган икки жужукларни эҳтиёт қилинглар.

Бу Уста Музаффарнинг сўнгги сўзлари эди.
Эрталаб жаноза ўқилди.
Марҳум майити Чифатой қабристонининг ота-
оналари ётган ерга ёнма-ён қилиб дафн этилди.

Эр-хотин икки фарзанд билан Ватандан олис-
даги Афғонистоннинг ўзбеклар яшайдиган олис
минтақасидан бошпана топдилар.

Ҳар қандай жойда ҳам илми бор одам хор бў-
майди, деганларидек, Давронбой тезда ўз қадрини
топди. Яқин-атрофдаги бешта қишлоқнинг илмга
ташна болалари учун қўлбола мактаб очиб, саво-
дини чиқара бошлади.

Орадан кўп ўтмай, Гулбиби қизлар мактабини
“очди”.

Давронбой Тошкентдан мерос мулк деб олинган
энг керакли бир нечта тахлам (улар ичида Гулбиби-
га совға қилган Машраб куллиёти ҳам бор бўлиб,
ниҳоятда асраб-авайларди) китоблар билан яна
оғиргина нимадир солинган тахта сандиқчани ҳам
доим эҳтиётлаб, кўздан панароқ жойда сақлар,
ҳатто туркман қишлоғи оқсоқолидан сотиб олган
қўшофиз инглизлар милтиғини кўринмас қилиб,
унинг ёнига суяб қўярди.

Давронбек Тошкет-Бухородан бирон янгилик
эшитиш учун кўп ҳаракат қилиб кўрди. Натижа
чиқмади. Бир куни у Бобораҳим Машраб қабри бор,
деб эл орасида тарқалган овоза бўйича йигирма
чақиримча йўл юриб, зиёратга бориб келган киши-
дан ўша ердаги кичкина қишлоқда Маҳмуд Чифатой
деган киши истиқомат қилишини эшитиб, катта
ўғли билан сахар мардонлаб йўлга тушди. Авва-
ло, олтмиш ўшлар чамасидаги у одам “Чифатой”

деган жой борлигини, нима учун ҳам номига қўшиб айтилишини билмас экан. "Шундай деб қўйишганда, ман қайдан билай", деб айтди. Кўримсизгина "шоир қабри"ни эса "бир девона кўмилган гўр" деб, кўрсатиб, тик туриб олганича тиловат қилди. Отабола зиёратчилар удумига кўра Маҳмуд Чифатойга назр-ниёз бериб, орқага қайтишди.

Кўп ўтмай "шўро-гирмон" уруши бошланиб, анча йил давом этди. Турмуш қийинлашиб, одамлар ночор бўлиб қолдилар. Қашшоқлар кўпайди. Кечалари қишлоқларга тўсатдан от чоптириб келиб қоладиган босқинчи қароқчилар сал ўзига тўқроқ, яхши яшайдиганлар мол-мулкини талаб кетарди.

Бундан хавотирга тушган Мардонбек ичкари уй ўртасидан одам бўйи ўра кавлаб, сандиқчани ўша ерга кўмди. Тупроқни яхшилаб лўмбозлаб, устидан шолча, кўрпачалар ташлаб қўйди.

Энди инглиз милтиғининг фойдаси на атроф қўни-қўшнилар, бутун қишлоққа тега бошлади. Бир марта босқинчилар пайдо бўлганда, ўқ ёғдириб, улардан иккитасининг оти ер тишлатилганди, тунги қашқирлар қайта қорасини кўрсатмайдиган бўлди.

Уруш тугагач, ҳаёт қийинчиликларига бардош беролмай шаҳар томонларга бош олиб кетган ёшяланглар анча "маданийлашиб" ўзгариб қолган, қўлларида соат таққан ҳолда қишлоққа – ота-оналаридан хабар олгани келиб, кета бошладилар. Бу албатта "ўз уйим-ўлан тўшагим" деб, кичик бир муҳитга ўралашиб қолган ёшлар кўзини оча бошлади.

Мардонбекнинг анчагина ёши улғайиб, йигит келбат бўлиб қолган икки ўғли ҳам мусофиричи-

ликни синааб кўриш учун ота-оналаридан рухсат сўрашди. Заминдорлар ерида корандада бўлиб ишлаб, “қорин тўйдирис”дан бошқа ташвиши йўқ бу жойларда қачонгача бировнинг хизматкори бўлиб юриши мумкин, деган ўй Давронбекни қийнаб келарди.

У катта ўғилни ичкарига бошлаб кирди.

– Биласан, биз заргарлар авлодиданмиз. Ҳалол топган барча бойлигимизни шўро ҳукумати олиб кўйиб, ўзимизни ватангадоликка маҳкум қилган. Бироқ, ўша ҳалол ўз мулкимизнинг кичкина бир қисмини санлар қийналиб қолмаларинг, деб ма-на бир неча йилларки, онанг билан тишимиз кавагида сақлаб келамиз. Манаву, ўшанинг кичкинагина бир қисми. Онанг тикиб берган шу чарм ҳамёнчада авайлаб сақла. Сен энди аччиқ-чучукни кўрдинг, катта йигитсан. Қулоғингаянашу гапларимни қўйиб ол, болам. Қаерга бормагин, қишлоқдан ташқари ҳамма катта-кичик шаҳарларда заргарлик дўйонлари ё кичик устахоналари бўлади. У ерда нозик дидли бизнинг касбдошлар ишлашади. Зарурат туғилиб қолган пайтда ҳамёнчадаги зийнатлардан узукнинг кўзидай кичик бир бўлагини кўрсат. “Бу ҳақиқий соф, ноёб нарса” деб, айтса, билгинки ўша, имон-эътиқодли, ҳалол одам. Унга ишонавер. Мушкулингни осон қилади. Буни фақат қийинчилик кунларингда ишлат. Иймоним комилки, уканг икковларинг қаерга борсаларинг, ҳалол тер тўкиб, меҳнат қилиб, кам бўлмайдиган болаларимсанлар. Лекин, бу кунлар ҳам ўтиб кетар. Иншооплоҳ, ўз юртимиз, ўзбеклигимизга қайтар кунлардан умидим бор. Уканг доим ёнингда, ҳамроҳинг бўлсин.

Тақдир тақозоси билан, икки ака-ука Кобулнинг катта бозорида ширинликлар билан савдо қилувчи дўкондор назарига тушиб, у ўзига хизматкорликка олди. Қиласидаги ишлари шаҳардан четроқда жойлашган омборда қоровуллик қилиш, ҳар икки кунда бир файтонга ўхшаш аравачада дўкон сотувчилариға мол етказиб бериш эди. Ётиб-туриш каби бошпаналик вазифасини омбор ичидаги кичкина ҳужра бажаарди.

Дўкондор қашқарли бўлиб, ширинлик солинган картон идиш, қопчиқлар ўша томондан келиб турарди.

Бир йил мабайннида йигитлар ҳўжайинга маъқул тушиб, ёрдамчиси билан олисдаги қандолат ишлаб чиқариш корхонасиға ишга жўнатди.

Мардонбек тўрт йил деганда ўғилларидан хабар олгани келди. Ишларидан кўнгли тўлди. Ҳатто кичикроқ ҳовли сотиб олишлари учун оз-моз пул ҳам берди.

Орадан бир йил ўтар-ўтмас улардан хат келди: “Қандолатчилик фабрикаси ёниб кетди. Биз бошқа жойдан иш топдик. Ҳовлини сизларга қолдириб кетяпмиз. Ўзингиз кўрганингиздек, бу ерда уйғурлар билан ўзбеклар ҳам кўп. Келинглар. Яхши кутиб олишади. Маҳалла оқсоқолига учранглар. Даҳлиз эшигини очишларинг билан Ҳикматиллага аталган совға – ўйинчоқ-тойчоққа кўзларингиз тушади”.

Чинданам аввал Мардонбек келиб, бир ҳафтача туриб кетган жой вилоят марказидан четроқ шаҳарча билан катта қишлоқ оралигидаги маскан эди. Бу ерда, айниқса ўрикзор боғлар, серҳосил далаларнинг кўплиги учунми, одамларнинг яшаш

шарт-шароити ҳам анча яхши эди. Айниқса, улар келиб тушган маҳаллада ўзбеклар билан уйғурлар ёнма-ён яшаширади. Лекин, тиллари бир-бирига жуда яқинлиги учунми, шундай “чатишиб” кетишганки, ораларида фарқ йўқдай.

Бир ёшга тўлмай “оёғи чиқиб” чопқиллаб, юриб кетган Ҳикматулла ҳам маҳаллий болалар билан тезда тил топишиб олди.

У мактабга қатнай бошлагандага гавдаси анча “салобатли” бўлиб, ўз тенгдошларидан икки-уч ёш каттароқ кўринарди.

Бир куни Мардонбек хотинига:

– Биби, Ҳикматилла кўринишидан бобосининг отаси “Маллавой заргар”га тортди деб, ўйласам, у кишининг баъзан завқи жўшиб, тўй-томушаларда кураш тушиш одатлари бўлган. Энди ўғлимиз қонида полвонлик сиёғи ҳам борга ўхшайди. Буни мактаб бошлиғи Рўзи Охун англаб, маслаҳатга чақирди. “Туманимиз бадантарбия бўйича анча орқада. Шунинг учун болангизни сал олдинроқ бўлса-да, мактабга олайлик. Кураш сирларини анати муаллим, машҳур Ҳожи Муқомнинг шогирдларидан бўлган Сарсонбой ўргатсин. Зора биз ҳам ҳозир кенг урф бўлиб кетган спорт мусобақаларида қатнашиб, юзимиз ёруғ бўлса”, деб қолди. Тўғриси, кувониб кетдим. Олдинлари Ҳикматулла ҳам афғон болаларидан чаласавод бўлиб қолишидан хавфсираб юрадим. Худога шукур, ўғлимизнинг зеҳни ўткир, ҳали мактабга бормасидан олдиноқ сабоқ бердим, қўлига тушган китобга “тиши” ўтадиган бўлди.

Рўзи Охун мумтоз адабиётдан яхши хабардор бўлиб, ёшлигидан ғазалгўйликка ишқибозлиги бор

одам эди. Ҳатто ўсмир йигитлик чоғида Қашқарга бориб, шоир Фурқат билан учрашганини ҳануз эслаб юради.

“Зар қадрини заргар билади” деганларидек, шундоқ мактабдан сал нарироқдаги ҳовлида истиқомат қила бошлаган бир мусофири кишининг ўзи билан олиб келган нодир китоблари ҳақидаги гап Рўзи Охун қулоғига чалиниб, унинг эшигини қоқиб келди. Чинданам токчага териб қўйилган бир нечта туркий ҳамда форсий китобларга кўзи тушгач, авайлаб қўлига олди. Айниқса, уларнинг айримлари Бухородан эканлигини эшитиб, ҳайратланди.

Шундан кейин китоб баҳона ҳар икки нафосат ва маърифат шайдолари орасида яқин дўстлик ришталари боғланди. Ҳатто кўп вақт ўтмай, Рўзи муаллим Мардонбек оиласига бироз моддий мадад бўлсин, деб уни мактаб кутубхонасига ишга ҳам олди.

Шу билан Мардонбек дам олиш кунлари бир чақиримча нарида жойлашган доим одам билан гавжум бўладиган каппон бозоридаги “касбдош” заргар усталар билан танишиб, гурунглашиб қайтадиган бўлди.

Оиланинг тўнғич фарзанди кўмир конида ишлаб, топиши яхшигина эди. Бот-бот она-онасидан хабар олиб туради. Лекин Кашмирдан бошпана топган ўртанча ўғилдан анча вақт дарак бўлмади.

Ҳарҳолда, вақт ўтгани сайин Мардонбек оиласидаги ҳаёт аввалгиларидан анча ўзгариб борар, мусофириликни унугтандай, башқалар қатори кун кечиришарди.

Ҳикматилла Алпомиш келбат бўлиб, бутунлай ўзгариб кетган, энди у кураш соҳаси бўйича эмас,

бокс сирларини ўрганиб, устозлари дикқатини ўзига торта бошлади.

— Ўн тўрт ёшимда, — дея ҳикоясини давом эттириди гурунгдошим, — бокс бўйича ўсмирлар ўртасида ўтказилган мусобақада аввал туман биринчилигини олдим. Бир йил ўтиб, мутлоқ вилоят ғолиблигини кўлга киритдим. Обрўйим ошгандан ошиб борар, бутун мактаб ва туман мен билан ғурурланарди. Мактабимизга Пекиндан янги тренер келди. У бир пайтлар мамлакат чемпиони деган шарафли номга эга бўлган машхур боксчи бўлиб, менга устозлик қила бошлади. Жуда қаттиққўл ва талабчан одам эди. Мактабда дарс тугагач, то қоронғи тушгунича машқ ўтказар, баъзан шанба, якшанба кунлари ҳам тиним бермасди.

Келаси йил қўшни давлатда ёшлар ўртасида ўтказиладиган Халқаро бокс мусобақасида чимпионликни қўлга киритиб, мамлакат шаънини ҳимоя қилиш менинг ҳам зиммамга тушиши кўп ўтмай маълум бўлиб қолди. “Рақиб”ларимни кетма-кет ҳолдан тойдирадим. Лекин ўзим ҳам зарбдан қуруқ қолмасдим. Икки марта кўздан, уч марта бурундан айрилиб қолай деганман.

Ниҳоят, Халқаро Чемпионатда қатнашиш учун сараланган номзодлар ичидан танлов конкурснинг биринчи босқичи Қашқарда ўтаётган пайтда кутилмаган фожиа рўй берди. Ўзим тенги йигит билан рингда олишаётиб, ён бўйнига урилган зарбдан у боши билан ерга қулаб тушди. Докторлар қанча ҳаракат қилишмасин, ҳушига келмай, жон берди.

Аслида рақибим ўзини ҳимоя қилмоқчи бўлиб, тажрибасизлик орқасида чап бўйинни ўзи зарбга

тутиб берган, бу ерда менинг ҳеч қандай айбим йўқ эди.

Бироқ, у вилоятда анчагина обрўли одамнинг фарзанди экан, судялар барча айбни менга тўнкаб, энди мен бокс билан шуғулланмаслигим ҳақида хукм чиқардилар. Маломат тошлари остида қолдим. Ҳатто менинг устимдан жиноий иш кўзғашлари мумкинлиги ҳақида ҳам гап-сўзлар тарқаб қолди. Бу кўргилик ҳам камлик қилгандай, Қашқардан хунук хабар келди. Катта акам ишлатётган кўмир конида ўпирилиш рўй бериб, ҳалок бўлган кўпчилик ичида у ҳам бор экан.

Бир кечада онамнинг соchlари оқариб кетди.

Отам бу дарду аламга чидолмай, кўрпа-ёстиқ қилиб ётиб олди. Узоқ ётди. Орттирган таниш-билишлари доктор ва табибларга қаратсалар ҳам фойдаси бўлмас, бечора бузрукворим кун сайн ёниб, тугаётган шамдай сўниб борарди.

Бир куни ярим кечада онам дахлизига чиқиб, мени уйғотди. Хира чироқ шуъласи атрофни аранг ёритиб турган ичкарига бошлаб кирди. Отам беҳолгина қўллари билан ишора қилиб, ёнидан жой кўрсатди.

– Болам, ёлғизим! Тақдир экан, Ватанга қанча кўз тикмай, у ернинг тупроғига қадам қўйиш насиб этмайдиганга ўхшайди. Буни мен сезиб турибман. Афсусланишдан бошқа илож йўқ. Лекин инсон яхши кунлар орзуси билан яшаши керак. Сен шунга интилиб яша! Йўллар очилишини, Ватан тупроғига қадам қўядиган кунлар келишини худодан илтижо қилиб, яша! Яхши ният албатта ижобот бўлади. Иншооплоҳ, сен ана шу кунларга етишасан. Энди гапларимни қулоғингга яхшилиб қуйиб ол; ни-

ятингга этиб, Ватан остонасига оёгинг тегса, энг аввало Тошкентнинг авлод-аждодларимиз киндик қони томган Чифатой маҳалласига бор. У ердаги қабристонни зиёрат этиб, менинг отам, яъни сенинг бобонг, кўпчиликка номи таниқли бўлган Уста Музаффар заргар ором топган жойни аниқлаб, бир кафт тупроқни олгин -да, менинг қабрим устидан сочиб юбор. Иккинчи илтимосим: Чифатой кўп қадими маскан. Қатор мамлакатларда истиқомат қилувчи машхур кишилар шу кутлуғ жой ҳурмати ўз номлари ёнига “Чифатой” сўзини бекорга қўшиб айтмайдилар. Шунинг учун менинг беғубор болалигим ўтган ўша маҳалла билан қариндош-уругчилик ришталарини боғлашга ҳаракат қилгин. Энди сўнгги илтимосим, – дедилар-да, отажоним ёстиқлари ёнида тахлоғлик турган китоблардан бири – бутун хонадонимиз учун энг қимматбаҳо ва муқаддас бойлик ҳисобланувчи, менга яхши таниш, зарварағига онагинамнинг номлари битиклик Машраб куллиётини аста олиб, менга тутдилар, – мана шунинг зарварағи орасига солинган бир қасида бор. Олинг-да, ўқинг! – дедилар негадир “сиз”лаб.

Бир нечта варақ тахлоғлик хитойи фаранг қофознинг биринчи бетига араби ҳарфда каттароқ қилиб “Ўзбегим” деб ёзилган сарлавҳага кўзим тушди. Бу мактабимиз ўқувчилари орасида кейинги пайтлар янги урф бўлган қўшиқдай кенг тарқалиб кетган, маъноси-ю оҳангида қандайдир ботиний яқинлик сехри борлиги учунми, айниқса ўзбек-уйғур қизлари оғизларидан тушмай қолган шеър эди.

Мен қасидани ўқигач, охирига бунинг муаллифи номи ёзилган жумлаларга кўзим тушди. Бу “Эркин Воҳидов” эди. Қасиданинг матни бошдан оёқ чиройли қилиб кўчирилганидан бу дадамнинг “дастхати” эканлигини дарров тушундим.

У кишининг кўзларида ёш милтилларди.

Нима дейишга ҳайрон бўлиб тургандим, ўзлари гап очиб қолдилар.

– Рўзи Охуннинг гапларига қараганда, шу шеърни Масковда ўқиган бир талаба йигит олиб келиб, тарқатганмиш. Ҳозир ҳамма ўқиётганмиш. Ҳатто, бир тўйда ҳофизлардан кимдир қўшиқ қилиб айтибди ҳам. Буни ёзган шоир ўзимизнинг Тошкентдаги Чифатой маҳаллага яқин жойда тураркан. Агар Ватанда бўлганимда эди, унинг қўлларини олиб, тавоб қилиб қўйган бўлардим. Шу орзуимни ҳам Ҳикматилла болам, амалга оширанг, сендан мингдан-минг рози бўлардим, – деди-да, отам бирнеча оғиз калима келтириб, омонатни топширдилар.

Отамдан айрилиб ҳам, кичкина оиласиз бошидан ташвиш аримади.

Унинг устига, марҳум “рақибим”нинг ота-онаси ҳали-вери тинчимайдиган чоғи, қора чарм папка кўтарган амалдорнамо киши келиб, мени тергаб, нималарнидир ёзиб кетди.

Ўша куни ҳали кеч тушмаган, атроф ёп-ёруғ пайт эди. Ҳикматилла бир гуруҳ тенгдошлари билан ҳовлиларидан сал нарироқдаги мактаб стадионида футбол ўйнашарди. Кутимаганда нигоҳи отасининг заргар танишларидан бирига тушиб қолди. У ҳовлига кириб кетди-да, тез қайтиб чиқиб, кўздан ғойиб бўлди.

Орадан кўп ўтмай увада латта-путталарга ўралган тугунча кўтариб, онаси қаршисида пайдо бўлди;

– Ҳикматилла, манавини ҳов уйиб қўйган гуваллар остига босдириб қўйгин-да, тўпингни тепавер. Лекин ўзинг ҳеч қаёққа кетиб қолма.

Баъзан болалар футбол ўйини пайтида “дарваза чегараси”ни белгилаш учун тош, синиқ ғишт ёки гувала қидириб юришарди. Ҳикматилла ва унинг ўртоқлари хаёлида кампир шуни ташвишини чекиб юргандай бўлиб туюлди. Унинг устига, Ҳикматулла “дарвозабон” эди.

Кеч тушиб, атрофни ғира-шира қоронғилик қоплай бошлаган пайт бир гуруҳ миршаблар тушган машина пайдо бўлди-да, Ҳикматиллалар ҳовлисига ёпирилиб кирди.

Йигит хаёлида худди уни қўлига кишан солиб, олиб кетишга келишгандай туюлди. Лекин ўзини бирон жойга панага олиш бефойдалигини тушундида, ўйинни давом эттираверди.

Бир соатлар чамаси вақт ўтгач, маршаблар машинаси кўринмай қолди.

Ҳикматилла чопиб ҳовлига кириб келганида ҳамма ёқ, ҳатто ҳовли этагидаги ҳожатхона ҳам ағдар-тўнтар қилинган, онаси худди савдойи бўлиб қолгандай оппоқ соchlари ёзилган бир ҳолатда дахлиз остонасида ўтиради.

Бир пайт копток ўйнаётган болалардан бири увада тугунни олиб келиб, Ҳикматиллага берди. Буни кўрган она бирдан ҳушёр тортди, ўғли қўлидан тугунни юлиб олди-да, дахлиз ичкарисига отиб юборди.

Энди улар бу ерда тинч яшай олмаслигига кўзи етган Рўзи Охун истаб-сўраб ўртанча ўғилнинг

яшаш манзилини аниқлади. Ахволни тушунтириб, хат йўллади. Кўп ўтмай, жавоб ҳам келди. Ҳовлини маҳалла оқсоқоли билан келишиб, Ҳикматилла номига расмийлаштирилган ҳужжат қофозлари тайёрланди. Узоқ сафарга чиқишдан аввал Гулбиби кўп йиллардан бери яхши-ёмон кунларига яраб, озгинаси қолган авлоддан “мерос” тиллонинг ярим қисмини каппон бозоридаги эрининг таниш оғайниларига икки-уч дину диёнатли оқсоқоллар шафеълигига “омонат”га қолдирди.

Она-болани Кашмир чегарасигача кузатиб қўйиш зиммадорлигини олган Рўзи Охуннинг ишончли одами ҳамроҳлигига йўлга тушдилар.

Ўртанча аканинг яшаш шарт-шароити унча кўнгилдагидай эмас экан. Эр-хотин икки фарзанд билан бир амаллаб кун кечиришлари маълум бўлиб қолди. Ҳикматилла ўзлари билан олиб келган “маблағ”нинг бир қисмини сарфлаб, онасига алоҳида хосхона қуриб берди, акаси турадиган уйни ҳам маҳаллий усталарни чорлаб, таъмирдан чиқарди.

Бундок ўйлаб қараса, атрофи фақат тоғ-тошу ўрмонлардан иборат бу томонларда дурустrox иш топишнинг ўзи маҳол. Нонхўрак бўлиб юравериш куч-қувватга тўлиб турган навқирон йигит Ҳикматилланинг ҳамиятига тегиб, ҳарқалай шаҳарда кўча супуриб ҳам кун кечирса бўладиган иш топилар деб, ўйлаб, анча наридаги кичкина фермер хўжалиги бор насронийликка эътиқод қилувчи “инглиш” кишидан каттагина жомадон сотиб олди-да, унга отасидан қолган асосий бойлик – Машраб кулиёти билан барча нодир китобларни жойлади. Па-

дари бузрукворининг “шулар доим ёнингда бўлса, ҳеч қачон кам бўлмайсан, хор ҳам бўлмайсан”, дея айтган ўгитлари доим қулоги остидан нари кетмасди.

Гулбиби кўзларида ёш билан дуолар ўқиб, кенжака ўғлини олис шаҳарга кузатиб қўйди.

“ЙИГИТ РИЗҚИ – КҮЧАДА”

Қадимий халқ ҳикматига кўра, бу “рисқ”ка ҳар ким ўз толеига қараб мұяссар бўлади. Кимдир кўп қийинчиликлар билан, кимдир иши ўнгидан келиб, омад кулиб боққанидан... Ҳикматилла ўз бошига тушган маълум ҳаётий муаммолар синовидан ўтиб бўлгани учунми ёки отасидан ўрганган китобга, мутолаага меҳр сабаблими, ҳарҳолда мусофиrottинг янги босқичи унинг учун омад дарвозаларининг бирин-кетин очилишидан бошланди.

Равалпинди Покистоннинг аҳолиси кўплиги бўйича Карадидан кейинги ўринда турадиган ғалажовурли, шунингдек “ҳаммабоп” улкан шаҳар ҳисобланади. Унда яшовчиларнинг миллати, элати, қавмини санаб, ҳисобига етолмайсиз. Азалдан ўз юртига сиғмаганлар шу ердан паноҳ топган. Бир пайтлар “Қочоқлар шаҳри” деб ҳам аталган.

Бу масканнинг олис бир четида катта “ўзбек маҳалла”си бор бўлиб, улар асосан “аффон”, “хитой”, шўро тузуми зулмидан Ватанини ташлаб чиқиб кетган ўзбеклардан иборат. Бу ҳақда Ҳикматилла аввалроқ эшитганди. Шунинг учун “маҳалла”ни осонгина топиб келди. Чойхонада бир-икки кун туриш учун рухсат сўради. Унинг эгаси анча қизиқувчан одам экан, йигитнинг забардастгина қаддиқоматию, бир бурчакка жойлашиб олиб, китобхонликка берилгани диққатини тортди.

- Нима ўқяпсан, ўғлим?
- Машрабни.

– Девонаи Машраб-да! Ўқишни биласанми?

– Биламан.

– Мулло йигитман, дегин. Отангга баракалла!

Ҳикматилла ёши анчага бориб қолган, ўзига қандайдир меҳр билан тикилиб ўтирган одамга кўз ташлади-ю, раҳматли отаси айтган гаплар бежиз эмаслигига яна бир ишонч ҳосил қилди.

Чойхона эгаси сўзида давом этди:

– Маҳалламиизда бир Ҳофиз Бобо бўларди. Асли Бухоролик. Тўйларда, мана шу ерда бўладиган йиғинларда Машрабдан кўп қўшиқлар айтарди. Нафаси ўткир эди. Уни эшитиб, одамлар кўзларига ёш оларди. Раҳматли бир йилча олдин вафот этди.

Ўша куни алламаҳалгача йигит кўзига уйқу келмай, ўз сўнгги манзилини Ватандан айрилиқда топган отасини, Ҳофиз Бобони ўйлаб чиқди.

Шундай қилиб, “таги-тахти” Фарғона томонлардан бўлган Муҳаммад Фозилнинг “мулло йигит”га меҳри тушиб, уни ўзига ёрдамчи қилиб, ишга олди. Кейинчалик “ишбоши”ликни унга топширди.

Йил ўтгани сайин Ҳикматилланинг омади юришиди. Чойхона орқасидаги ташландик майдончани текислаб, шинамгина уйча қурди. Унинг токчалири китобларга тўла борди. Шу орада икки-уч бор онасидан хабар олиб келди. Ғулжага ўтиб, отаси қабрини зиёрат қилди. У ердаги ҳовлиларини сотди, загарлар билан ҳисоб-китоб қилди. Анчагина бойлик билан қайтди-ю, афсус, улар онасига насиб қилмади. У юрак хасталиги билан Ҳикматилланинг қўлида жон берди.

Ҳикматилла отадан мерос бойликнинг teng ярмини дехқончилиқдан анча иши юришиб қолган ака-

сига қолдирди-да, Равалпиндига қайтиб келди. Харжатни аямай, “кулба”сини кенгайтириб, маҳалла болалари учун сабоқхонага айлантириди. Киравериш девор юзига катта оқ картонга йирик ҳарфлар билан ёзилган “Ўзбегим” қасидасини осдириб қўйди. Келган-у кетган қаршидаги стол-стулларга ўтириб олиб, ҳарфларни бир-бирига “уриштириб” “Ўзбегим”ни ўқиш билан савод чиқаришарди.

Бу янгилик “ташаббуси”дан хабар топган шаҳар маориф шуъбасидигилар “Мактаб-кутубхона”ни кенгайтириш учун маблағ ажратдилар.

Шу орада Равалпинди марказида Америка қурилиш компанияларидан бири томонидан бунёд этилган янги меҳмонхонанинг очилиш маросимида қатнашиш учун келган таъсисчилардан бирининг қулоғига “Ўзбек маҳалла”да очилган “Мактаб-кутубхона” ҳақида гап чалиниб қолди-да, кечга томон у ерга ташриф буюрди. Ҳурматли меҳмон шу маҳаллада истиқомат қилувчи машҳур Бобо Ҳофизни яхши билар, аввалроқ у кишини зиёрат қилиб кетганди. Оқсоқолдан Ҳофиз вафот этганлиги ҳақида хабарни эшитиб, қуръон тиловат қилди, хонадоннинг ёлғиз соҳибаси бўлиб қолган кекса онахонга ҳадя инъом этди.

“Мактаб – кутубхона”да Ҳикматулло билан бўлган қисқагина суҳбат чоғида айтилган “Сиз миллатимиз учун бу ердан кўра бошқа жойда кўпроқ зарур одамсиз”, деган сўз унинг ҳаётида бутунлай бурилиш ясад юборишини у мутлақо ҳаёлига келтирмаганди.

Нью-Йорк ўзбеклари ичida маърифат ва ўзбекона урф-одатлар ҳамда миллий тил тарғибот-

чиси сифатида ном таратган Жўра Қори Бўтакўз учун айни Ҳикматиллага ўхшаш йигитлар зарур эди. Уни ўзи билан олиб кетди. Фарзандлари қатори табиялаб, АҚШнинг қурилиш-муҳандислик соҳалари бўйича иқтисослашган олий ўқув юртларида ўқитди.

Ҳикматилла ўта ҳаракатчан, тиниб-тинчимас, куиди-пишди кишилар тоифасидан эмасми, америкаликларнинг ўзига хос иш юритиш тизимини дарров ўзлаштириб олди. Бир йилда улар билан басма-бас гурунглашиш ҳадисини олди. “Тиллашиш” бобида ўзбек, уйғур, хитой, урду, ҳинд, қозоқ, қыргиз, туркман-у туркни кўяверинг, испан тиллилар, ҳатто корейс, въетнамлилар билан ҳам бемалол ҳазил-мутоиба аралаш мулоқот қила оладиган бўлди. (Мен бунга кейинчалик ўзим гувоҳ бўлиб, ҳайратланганман.)

Шундай қилиб, Ҳикматиллага омад кулиб боқаверди. Аввал қурилиш таъмир ишлари олиб борувчи кичик фирма очди. Сўнгра катта компанияга айлангач, унга юрагига орзу қилиб тугиб қўйган “Ўзбегим” номини берди.

Бунга қасида муаллифидан рухсат олиш ҳамда у киши олдидағи отасига берган ваъдасини адо этиб қўйиш учун икки марта Тошкентга келиб, шоирни топа олмади. Биринчисида Эркин Воҳидов “ижодий сафар”да эканлар. Иккинчи маротаба бориб, шу баҳонада шоирни Чиғатойдаги набирасини уйлантириш тўйига таклиф этмоқчи бўлганди, ўчиккандай, чет элда даволанаётганликларини айтишди.

Нью-Йорк билан унга құшни Нью-Жерсида асо-сан “шўро даври” ўзбеклари истиқомат қилиб кели-шади. Уларнинг оилалари, айниқса, кейинги авлод болалари ўзларини “ўзбек” деб аташса-да, тилни яхши билмайдилар, урф-одатдан йироқлар.

Айниқса, Ўзбекистон мустақилликка эришиб, йўллар кенг очилгач, “Грин карт” деган ўйин чикди-ю, Нью-Йоркда “янги ўзбек”лар ниҳоятда кўпа-йиб кетди. (Ҳатто, мамлакатнинг пойтахти Вашингтонда фақат Тошкент шаҳрининг ўзидан бўлган ўн беш оила истиқомат қилишини эшитиб, бўлмаган гап, деб туриб олдим. Бироқ улар мени ўз “Маҳалла” жамоаларига таклиф этиб, биргаликда “эсдалиқ” суратига тушгач, ишонишдан бошқа ило-жим қолмади.)

Дарвоқе, гап энг ачинарли ҳолат – ҳамюртлари-миз болалари Америка тупроғига қадам қўйгач, ўз она тилларини унутиб, тезгина “америкалаша бошлаганликлари” ҳақида кетаётганди.

Очиғини айтадиган бўлсак, олтмишинчи йилла-ри Москва томонидан “интернационаллаштириш” авжга чиққан пайтлар унинг аччиқ мевасини ўз юр-тимиз – Ўзбекистонда тотиб кўрганмиз.

Ўша пайтлар шоиrimiz Эркин Воҳидов бежизга тилимиз ҳимояси учун бекорга жон куйдирмаганди.

Ҳозирга келиб, шу муаммо хориждаги Ватан-дошларимиз олдида пайдо бўлаётган экан, бунга бефарқлик кечирилмас хатолигини кўпчилик мил-латдошларимиз тушуна бошладилар. Айниқса, кекса авлод Жўра Қори ака, Абдулла Хўжа ака сингари “оқсоқол”лар буни турли йиғин –учрашув-ларда таъкидлаб турибдилар. Лекин натижা сезил-маяпти.

Тўғри, бунинг олдини олиш йўлини бошида дўп-пи билан эгнига чопон кийиб, шоҳи белбоғ боғлаб, “Ўзбек” рақами (Америкада шахсий уловингиз учун давлат рақамидан ташқари ўзингиз истаган “ном” – рақамини ҳам олишингиз мумкин) машинасида Чикагодаги Ватандошлари эшигини ҳассаси билан қоқиб, “ўз уйларингда она тилида мулоқот қилинглр”, дея уқтириб турадиган оқсоқол Сирожиддин ҳожи ота қўллаб, анча натижаларга эришиб турибди. Бироқ Нью-Йорқдай катта шаҳарнинг ҳар даҳаларига тарқаб кетган қўпсонли миллатдошларга бундай “йўл-йўриқ”нинг фойдаси кам.

Шундай бўлгач, нима қилиш керак, деган муаммонинг ягона ҳал этиш чорасини “ота-бола” Жўра Қори aka билан Ҳикматиллалар ўйлаб топиб, бир қарорга келишган. Яъни, шаҳарнинг гавжум жойларидан бирида миллий анъаналар русумида чойхона, кутубхона, катта учрашувлар ўтказиладиган зали ҳамда иккинчи қаватда меҳмонхонаси билан “Ўзбегим” маданият Марказини барпо этиш. Ва шу ерда маърифий-маданий тадбирларни, энг асосийси, тез-тез Нью-Йоркка ташриф буюриб турадиган Ўзбекистоннинг санъаткор-артистлари, шоир-ёзувчиларини бир пиёла чойга таклиф этиб, Ватандошлар билан “Дийдорлашув кечалари”ни ўтказиш. Кейинроқ “Ўзбек тили мактаблари” ташкил этиб, Тошкентдан ўқитувчи-муаллимлар чақириш ниятлари ҳам йўқ эмас. Зеро, бундай миллий “Марказ”лар Нью-Йорқда анчагина.

Айниқса, икки йилча олдин Болтиқ Бўйи мамлакатлари халқларига қарашли “Марказ”ни таъмирлаш чоғида Ҳикматилла у ердаги шарт-шароитни

кўриб, ҳаваси келган. Дарс ўтиладиган иккита синф, катта кутубхона, Ватандан таклиф этиб туриладиган машҳур ёзувчи, шоир, санъат арбоблари билан учрашувлар ўтказишга мўлжалланган катта зал. Буларнинг ҳаммасини ўзбекона услубда амалга ошириш ниятини кўнглига тугиб юради, кутилмаганда Нью-Жерсидаги Ассоциация биносига элчи жаноб билан бўладиган учрашувга уни ҳам таклиф этиб қолишиди.

Элчи жуда содда, камтарин одам экан, ҳамма билан очиқ мулоқот қилди. Кимнинг фикр-мулоҳазаси бўлса, тинглаб, жавоб қайтарди, ўз фикрини айтди. Хусусан, Ҳикматилланинг фикрлари элчини қизиқтириб қолди. “Тахмин қилишларича, Нью-Йорқда ҳозир юз мингдан ошиб қолган Ватандошларимиз учун бундай маърифий “Марказ” зарур. Бу ҳақда алоҳида маслаҳатлашамиз” деди.

Чинданам элчи жаноблари орадан кўп ўтмай, Жўра Қори ака, Абдулла Хўжа ака билан Ҳикматиллани ўз ҳузурига чақириб, хайрли режани қўллаб-қувватлашини айтди. Модомики, бу “иншоот” машҳур шоиримизнинг шоҳ асари номи билан узвий боғлиқ экан, у киши билан бамаслаҳат иш юритиш лозимлиги ва бу масалада ўз ёрдамини аямаслигини ҳам қўшиб қўйди.

Бироқ, орадан кўп вақт ўтмай, элчи ўзгарди-ю, алоқалар узилиб қолди. Мустақил ҳаракат қилишга тўғри келди.

Шаҳарнинг ўзбеклар кўпроқ истиқомат қиладиган худудидан қурилиш учун ер танлаш масаласи бир йилчадан бери чўзилиб келаркан. Менинг ташрифим айнан шу муаммони узил-кесил ҳал

этиш учун “оқсоқол” отахонлар бошлиқ маслаҳат йиғинига түғри келиб қолганди.

Кечга томон Ҳикматилла хонадони бекалари билан хайрлашиб, унинг машинасида ҳарқалай якшанба – дам олиш бўлгани учунми, кўчаларда бемалоллик экан, ярим соатлар ичида Нью-Йоркнинг Мантхеттин даҳасида жойлашган пештоқига катта ҳарфлар билан “LAZZAT” деб ёзиб қўйилган ресторан қархисига келиб тўхтадик. Ёзувга қарадим-у Тошкент марказида қад ростлаган “Ёзувчилар уйи”га қўшни ресторан пешлавҳаси кўз олдимда гавдаланиб кетди. Беихтиёр хаёлимдан “бу атами-ни “қўчирғанлар” 70- йиллари пойтахтдаги “энг катта, намунали янги ресторон”га муносиб ном топиш бўйича “ижодкорлараро” ўtkазилган конкурсда Эркин Воҳидов ғолиб топилиб, шаҳар ижрокомининг совринига сазовор бўлганлигидан хабардормикан, деган фикр ўтди.

Бизни атрофдагилардан “бошқачароқ” ўзбекона услубда қурилган шу бинонинг эгаси, юзида кулгичи бор, норғулгина 60 ёшлар чамасидаги Абдумалик деган киши билан Жўра Қори акалар кутиб олиб, ичкарига бошлашди. Тўрда Нью-Йоркдаги бош консулимиз Зафар Қобулов, Абдулла Хўжа ака, Фарруҳжон Қори ҳамда ўзимиздан чиққан машҳур ҳофиз Изро Малаков (мен “Номаълум Америка...” китобимда бу кишининг қўшиқчилик маҳоратига алоҳида боб бағишлиғанман) яна ёши “улуғроқ” отахонлар билан икки-уч савлатдоргина ўрта яшар кишилар ўтиришарди. Мен уларнинг кўпчилиги билан Нью-Жерсида яқинда бўлиб ўтган тадбирларда кўришиб, салом-алик қилгандим.

Жўра Қори ака салгина олдин менга ресторон бошлиғи номини айтиб таништирган бўлса, энди батафсилроқ қилиб:

– Ўшдан. Шавкатжон Раҳмоннинг ҳамишлоқ, мактабдоши. Ўзбекистоннинг “Лаззат”ини бу ерга олиб келиб, ҳаммани баҳраманд қилиб юрибди, – деди.

Мен Абдумаликка ўгирилдим:

– Бу “Лаззат” Тошкентда ҳам борлигини биласизми?

– Нега билмас эканман. Ўша номни Эркин ака қўйиб берганларини Шавкатжондан эшишиб, у кишини икки-уч бор ўз “Лаззат”ларига меҳмонга чақирганмиз. Қаранг, мен ҳам шундай бир жой очсан, деб орзу қилгандим...

– Демак, – дедим бир унга, бир атрофдагиларга қараб, – мана шу ерда ўтирганлар гувоҳ, энди Эркин ака номларидан Сизга қиладиган даъвоимиз йўқ. Аввало, бу номга “муаллифлик” хуқуқи у кишида эканлигини мардона тан олдингиз. Қолаверса, зиёфат ҳам қилиб бергансиз. Аслида-ку, Америка қонуни бўйича “патент” шоиришимиз қўлида. Майли, сир-сирлигича орамизда қолақолсан. Ҳикматилла “Марказ” қурилиб битгач, унинг очилишига Эркин аканинг ўзларини таклиф этмоқчи. Ўшанда бир эмас, иккита “патент” «сири» очилиши мумкин.

Кимdir луқма ташлади:

– Нега иккита бўларкан? “Ўзбегим” қурилиштаъмирлаш компанияси”ни ҳам қўшиш керак!

– Бу масалани шоиру замоннинг ўзларига қўямиз!
– босиқлик билан гап мавзунин асосий йўналишга бурди Жўра ака. – Ҳозирча “Марказ” қурилиши учун Ҳикматилла мўлжаллаб қўйган учта жой бор

эди. Биттасига масжид қурмоқчи бўлаётганлар давогарлик қилишаётганмиш. Бизлар ҳам энди ишни чўзавермай, бугун бир тўхтамга келиб олишимиз лозим.

Маълум бўлишича, “Марказ” қурилиши ҳақи-даги маслаҳатни Ҳикматилла кўпчилик билан мухокама қилиб юрган бир пайтда, яқин-атрофда бир нечта масжидлар бўлишига қарамай, кимдир биз аввалио “ўз” масжидимизни қуришимиз керак, деб гап тарқатибди. Ўртада “бўлиниш” пайдо бўлиш хавфи бормиш. Афтидан, Абдулла Хўжа ака Фарруҳ Қорини ўзлари билан бекорга олиб келмаганга ўхшарди...

Хуллас, масала осонгина ҳал бўлди: йигилгандар “Марказ” қурилишига ҳозирлик кўриш ҳақида бир тўхтамга келиб, қуравериш керак, деган қарорга келди.

Менинг қаршимда ўтирган йигитлар бу ерда кўпдан бери тижорат ишлари олиб бораётган ўзларига ишонган кишилардан эканми, Ҳикматиллани қўллаб-кувватлагандай:

– Мана, биз ёнингиздамиз, ака, – деб қўйишиди.

Хуллас, “Жон Стейбек изидан...” бошланадиган сафаримнинг етти куни Рамазон Ҳайити билан уланиб кетган Мустақиллигимизга бағишланган тадбирлар билан ўтди. Айниқса, «Сайт»даги кўнгилхириаликни ҳисобга олмагандა, Эркин ака “номи” билан боғлиқ одамда ғурур уйғотадиган хайрли ишларнинг гувоҳи бўлганимдан хурсанд эдим.

Лекин, шу «қизиқарли» ўтган вақтимнинг салкам уч кунини ҳали узоқ вақт афсус-надомат билан эслаб юрсам керак. Нега дейсизми?..

АҚШ га қиладиган сафарим арафасида элликка яқин кишини чорлаб, ифторлик дастурхони ёздим. Мөхмөнлар ичида шоир-ёзувчи устозлар, чет элларда узоқ вақт турли лавозимларда ишлаб келган таниш-билишлар, ҳатто ҳиндистонлик, покистонликлар ҳам бор эди.

Дастурхонга фотиҳа ўқиларкан, устоз Эркин Вонхидов шундай дедилар:

– Энди Сиз узоқ тайёргарликданг сүнг Америкага навбатдаги катта ижодий режалар билан кетмоқдасиз. Аввало, у ердаги Ватанимиз байроғи остида хайрли ишларни амалга ошираётган дипломат дүстларга саломимиз ҳамда кетма-кет яқынлашиб келаётган икки қутлуғ байрам муносабати билан йўллаётган табрикларимизни етказиб қўйинг. Ва уларни амалга оширмоқчи бўлган хайрли режаларингиздан албатта, хабардор этиб қўйинг!

Шоир сўзларига Ташқи Ишлар Вазирлигимизда “ўринбосарлик” лавозимида ишловчи мөхмон қўшимча қилди:

– Элчихона ўзингиз билган, тадбирларда кўп қатнашган ўша-ўша жойда. Ҳеч иккиланмай кириб бораверинг. У ердаги элчи “ҳамкасб” – шарқшунос укаларингиздан.

Нью-Йоркка келиб тушган куннинг ўзида, яқинлашаётган Рамазон байрами муносабати билан ҳам вақтдан ютқазмай, ҳам устозларнинг омонат табрик сўзларини эгаларига етказиб қўяй, деб Вашингтонга келдим.

Биринчи қўнғироғимга дарров таниш овоз жавоб қайтарди. Бу ўша бир неча йил олдинги элчимиз ёрдамчиси Сайдали эди.

Салом-алик билан узок ҳол-аҳвол сўрашишдик.
Ниҳоят, мақсадимни айтдим.

Сайдали:

– Элчи ўзларида, ҳозир улайман, – деди-ю анча вақт жимиб кетди.

Сўнг бироз ҳафсаласизлик билан:

– Ҳозир вақтлари йўқ экан, – деди.

Эртасига ҳам икки марта қўнғироқ қилдим.

Жавоб ҳудди аввалгидай бўлавергач, бироз жаҳлим чиқди:

– Мусулмончилиқда, бундай қутлуғ айём кунлари ёвлашиб, юз-кўрмас бўлиб кетган кишилар ҳам бир-бирлари билан саломлашиб, гина-кудуратни унутиб, биродарлашиб кетадилар. Наҳот шу оддий инсонпарварлик удумидан “шарқшунос” укамиз бехабар бўлса! Қолаверса, унинг олдида менинг гуноҳим нима?

Ёрдамчининг:

– Қабул қилинг, деб мажбур қилолмайман-ку, ахир, – деган сўзи эшитилди.

Шундан кейин ўйланиб, жаноб элчи менинг “гуноҳим” сабабини қандай изоҳлашини билмас-да, бир масалада аниқ тасаввурга эга экан-лигимни ҳис этдим: салгина олдин АҚШга даволаниш учун келиб кетган, тиниб-тинчимас, доим менинг “ташвишим”да юрадиган, бу дунёю у дунёда ҳам ёқалашишдан қайтмасликка онт ичган “Фахрий”нинг бу даргоҳга ҳам қадам ранжида қилиб, “огоҳлантириш”лар бериб кетгани аниқ эди.

Дарвоқе, мендан АҚШдаги Ҳиндистон, Покистон элчихона ходимлари хабар топиб, ҳол-аҳвол сўрашар, меҳмонга таклиф этишарди. Ҳатто ҳиндистонликлар Аляскага қиладиган сафаримдан ха-

бар топиб, у ердаги «Мириотти» мөхмөнхонасининг нозири жаноб Амит Қҳаннага қўнғироқ қилиб қўйишиган экан, у киши Анкориж шаҳар аэропортида мени кутиб олди.

Энди бироз чўзилган Эркин ака билан боғлиқ “Америка мавзуи”га якун ясашдан олдин, иккита янгиликдан ўқувчиларни хабардор этиб қўймоқчиман; кўп қўлайликларга эга чой, қаҳва қайнатиб берадиган ускуналаридан ташқари юхонасида совутгич, овқат иситгичи ҳам бор, узоқ сафарга мўлжаллаб жиҳозланган енгил автомашинага эгаман. Албатта, бу катта пул сарфлаб Жон Стейбек жаноблари томонидан ясаттириб, Афандинамо Дон Кихотнинг захматкаш оти шарафига “Росинант” деб аталган, ичида чўмилиш, ҳожатхоналари ҳам бор тўрт ғилдирак устида ҳаракатланувчи “кошона” автобусдан анча фарқ қиласди. Унинг ойлик кира баҳоси жуда арzon. Ҳикматилланинг айтишича, арзимас пул.

Дарвоқе, машҳур ёзувчи Нью-Йорқдан йўлга чиқиб, узоққа чўзилувчи сафарини шу азим шаҳарнинг бир ёнбошидан бошланувчи бешта штатни айланишдан бошлаган. Ҳикматилла айнан менинг шу штатлар бўйлаб қиласди сафарим давомида “хизмат”да бўладиган юқорида таъриф этганим – уловни ҳозирлаб қўйган экан, қўярда-қўймай, калитини каминага топширган.

Сафарни АҚШнинг Канадага чегарадош Миносета штатидан бошлаб, унинг ўрмон ва бепоён боғроғу картошка экиласди гаплалари оралаб кезиб юрадим.

Бир пайт телефон жиринглаб, Билолиддин ака “Изтироб” китобини олганини хабар қилди.

– Мен “сайт”да тарқатилган “хабарлар” билан китобда ёзилганларини бир-бирига солиштириб, ҳайрон қоляпман.

– Бирон натижа чиқиши мумкинми? Ортиқча вақтингиз кетганига ачинмайсизми?

– Ташвиш чекманг. Эркин акадай устозни қандайдир “душманфуруш”лардан ҳимоя қилолмасак, биз бу ерда нима қилиб юрибмиз!

Хуллас, орадан кўп ўтмай, сентябр ойининг 12-санасида Билолиддин акадан “Сайт”ни тарқатганлар “ахборот”ни “лўнда, ихчам” ҳолида узатиш мақсадида “йўл қўйилган хатоларликлар”ни тан олиб, йўллашган “Кечирим хати” нусхасини олдим. Шундан сўнг кимларгадир “айблов” дастаги бўлиб хизмат қилган ўша, Эркин ака иккимизга “қарашли” “сайт”лар тезда “ўчириб” ташланган экан.

Энди иккинчи янгилик ҳақида гапирадиган бўлсам, бу менинг Аляскага бошланадиган сафаримдан икки кун олдин, яъни 2014 йилнинг 7 ноябр санасида бўлиб ўтди.

Ҳикматилла ўша “Лаззат” ресторанида катта дастурхон ёзиб, бизнинг тил билан айтганда “Узбегим” Маданият Маркази қурилишини бошлаш муносабати билан “элга ош берди”. Ташириф буюрганлар Нью-Жерсидан Абдулла Хўжа ака бошлиқ, Чикагодан Сирохиддин бобо бошлиқ, Нью-Йоркдан Жўра Қори ота бошлиқ, Вашингтон-у Сиэтлдан яна кимлардир бошлиқ кўплаб ватандошларимиздан иборат кишилар эди. Ундан ташқари, улар ичидаги Нью-Йорк даҳаларида ўзбекларга қўни-қўшни бўлиб яшовчи қирғиз, қозоқ, уйғурларни ҳам учратиш мумкин эди.

“Түйбоши” Ҳикматулла, “түйхона” соҳиби Абдумалик ёнма-ён туриб, меҳмонларни кутиб олишар, айниқса Ҳикматилла ҳар кимнинг ўз она тили билан муомала қилиб, тавозени хўп жойида қўярди.

Бир пайт ёшгина қизалоқни етаклаб, ўрта ёшлардаги эр-хотинлар келиб қолишиди. Ҳикматилла қизчани даст кўтариб олди-да, чуғур-чуғур қилиб, уни эркалай кетди. Меҳмонлар назокат билан қадларини букиб, бизларга “салом” бераркан, мезбон билан нимадир ҳақда сўзлашишиди.

Улар орқасидан қараб, мен Ҳикматиллага дедим:

– Бу, ўтган сафарги биз харидорлик қилган машинларни кирага берувчи “ҳамюртингиз” – хитойга ўхшатдим-у, гаплашишни бошқачароқ оҳангда қилдингиз!

– Ҳа, эркак япон. Ҳамкорим. Ёнидаги корейс, хотини. Тилини билмасангиз, муомалага киришиш қийин. Тилларини ўрганиб олганман.

– Қизча билан қайси тилда гаплашдингиз? Роса қиқирлаб кулишига қарагандা...

– Онаси билан отасининг тилида.

Худди шу пайт озғиндан келган, паст бўйли, ўрта яшар яна бир “японнамо” келиб, томоғидан узуқ-юлуқ ғарфара овоз чиқаргандай Ҳикматиллага “мупозамат” қила кетди. Узоқ гапирди. Кейин мезбондан ҳам худди ўзиникига ўхшаш “оҳангли” сўз эшитиб, ичкарига йўл олди.

Ҳикматилла менинг саволимни кутмай, тушунтириш берди:

– Вьетнамлик. Сартарош. Қўли гул баччағарнинг. Доим сочимни шунга олдираман.

– Ҳаммасининг тилини ўрганиб оларкансиз-да!

– Ўрганиб оламан-у, лекин ўзбек тилини ўргатолмаяпман-да, буларга! Ҳай, майли, ҳеч бўлмаса, ўзбеклар кимлигини билиб қўйсин, деб ошга айтганман.

Абдумалик гапга қўшимча қилади:

– Ҳикматиллани тил ўрганиш бўйича чимпион деявериш мумкин. Агар чулчит тили бўлганида, эринмасдан уни ҳам ўрганаради. Нью-Йорк полициячилари, айниқса қораҷадан келган хонимлари жуда жиддий бўлишади. Бу ака ўшаларни ҳам бир-пасда испанчалаб “аскиялар” айтиб, ўзига оғдириб олганини кўрсангиз эди...

Ичкарида залнинг ҳар томонига қўйилган кенг экранлар орқали “Ўзбегим” қўшиғи садоси остида Эркин аканинг баҳорий бир кайфиятда Фарғона Водийсига қилган сафари тасвирга туширилган фильм намойиш этилар, ҳамманинг қалбида сурурли бир кайфият ҳукмон эди.

Бир пайт мусиқа оҳангига аста пасайиб, тўрдаги кичик саҳнада Абдулла Хўжа ака билан Жўра Қори отахон пайдо бўлишди.

– Бугун бу ерга йиғилиб, жамулжам бўлиши-мизнинг сабаби шуки, Нью-Йорк шаҳридаги қарийб юз мингга яқинлашиб қолган миллатдошларимиз учун янги бир маърифат кошонаси қуриш ҳаракатини бошлаган миллатпарвар, хўп зиёли оиланинг фарзанди Ҳикматилла Мардонбекнинг хайрли ишларидан ҳаммани хабардор қилиб қўйишидир. Маълумки, у киши ҳаммамизнинг ғуруримиз бўлмиш Эркин ака Воҳиднинг оталаридан мерос бўлиб қолган энг содиқ ва фидойи мух-

лисларидан ҳисобланади. Шунинг учун ҳам шоиримизнинг буюк асари бўлмиш “Ўзбегим” номига эҳтиром келтириб, ўзи бошлиқ компанияния атамасини “Ўзбегим” деб қўйганлигини ҳаммамиз биламиз. Энди Ҳикматиллахон сизу бизларнинг қўллаб-қувватлашимиз билан яна бир маърифат кошонаси қуришни бошламоқчилар. Бизлар албатта бу хайрли ишни қўллаб-қувватлаймиз ва ҳар томонлама кўмак беришга тайёрмиз.

Микрофонни қўлга олиб, сўзни Жўра Қори отахон давом эттирди:

– Мен кўп вақтингизни олмоқчи эмасман. Сизни энг қувончли бир воқеадан хабардор этиб, шуни маълум қиласманки, Ҳикматиллахон ниҳоят, узоқ йиллардан бери орзу қилиб юрган ўз ниятларига эришдилар. Бугун эрталаб шоиру замонимиз Эркинжон Воҳидов билан телефон орқали мулокот қилиб, оталарининг васиятлари баёнини айтдилар. Ва бу ерда амалга оширилмоқчи бўлган хайрли ишлар учун оқ фотиха олдилар. Иншооплоҳ вақтлар ўтиб, улуғ шоиримиз билан мана шу кошонада дийдор қўришув ҳаммамизга насиб этсин.

Бутун зал бўйлаб машҳур ҳофиз Шерали Жўраев ижро этган тантанавор “Ўзбегим” қўшиғи янграб, ҳамма ўрнидан турди.

Шундан кейин Изро Малаков, Мұхаббат Шамаевалар бошлаб беришган Эркин Воҳидов шеърлари билан айтиладиган қўшиқ ва лапарлар узоқ давом этди.

Мен шоиримизга кўрсатилган бу эҳтиром завқини то Американи тарк этгунимча эслаб юрдим.

ЯШИРИН ЎКИНЧ

Эркин ака биринчи сонли давлат сиҳатгоҳига навбатдаги муолажага ётган, кейинги пайтлар аҳволлари анча оғирлашиб, уйқусизликдан кўп шикоят қиласдилар.

Навбатчи шифокорлар кечки пайт “яқин”ларга бир-икки соат гурунглашиб ўтиришга ижозат беришарди, холос.

Бир куни менга ўгирилиб:

– Мана бу дориларни қаранг. Санаб-саноғига етолмайсиз. Шу бир-икки ой орасида бир қопини ичиб юборган бўлсам керак. Ибн-Сино табиий дорилар ҳақида кўп ёзган. Айниқса, қовун ва қоқи ҳақида ҳам таъриф қилган дейишади. Дала-боғ полизининг Покистон раҳбарларига юбориб, улардан таҳсинли хатлар олган қовунларингиздан қолганми?

Сезяпманки, кўнгиллари шуни тусаяпти.

Бироқ, Гулчехра келинойи:

– Ҳозир қиши охирляяпти-ку, қовун қоптими! – деб, гапнинг очиғини айтдилар-қўйдилар.

– Қовун бор, – дедим, тўла ишонч билан опахонга қараб, – фақат акам уни егулари келаётган бўлса, ҳар доимдагидай “бу қайси бозорники” деб, боғини суриштирмасалар бўлди!

– Ҳа, шунчаки айтдим-қўйдим, – дедилар Эркин ака ботиний бир жилмайиш билан. Бундай ҳолатни кўпдан бери кузатмагандик.

Соатга қарасам, вақт кечки түққизга яқинлашыпти.

– Айтилган гап – отилган ўқ, – дедим-да, ўрнимдан турдим.

Олтиариқ бодринги билан машхур бўлса, Бешариқ туманидаги Капаянги қишлоғиликлар ўз қовунлари билан Водийда донг таратган. Ўша ерлик Аҳаджон деган Алломишкелбат йигит билан кўп йиллардан бери танишлигимиз бор. Дала-боғдаги қўлбола полизчилигимиз бўйича “штатсиз” агрономимиз ҳам ҳисобланади.

Аҳаджонни бир неча йиллардан бери “Қо-вун бизнеси”га жалб этган ўзим. Энг яхши қовунларни саралаб, ажратиб қўяди-да, янги йил арафасида бир машинага босиб, Тошкентга олиб келишдан аввал ишончли кишиларга телефон қилиб, огохлантириб қўяди. Капаянги қовунини бир марта тотиб кўрганлар доимий мижозга айланади қолади. Ҳозир улар сони беш юзтага яқинлашиб қолганини айтади Аҳаджон.

Ўтган йили янги йил арафасида Эркин aka билан Анвар Обиджонни машинага ўтқазиб, Аҳаджоннинг “Қовун сайлиси”га олиб келганман.

Ўшанда Анваржон йигитни четга тортиб, қувлик билан:

– Ҳа, энди машинанинг нўмири ўзимизнинг Фарғонанини экан, қовунлар ҳам Олтиариқники, деб қўяверинг. Устознинг кўнгиллари кўтарилади, – дея шипшиётганини эшитиб қолиб, оббо-о, бу ёғи энди қанақа бўларкин, дея бошим қотиб турганди, Аҳаджон ҳам Бешариқликлар анойи эмаслигини намойиш этиб, машина бортидаги бўлиқ қишки қовунлардан бирини олиб Эркин акага кўрсатаркан:

– Чорбоғда эккан ёзги қовунларимиздан Бешариқнинг Капаянгисида ётиштирилган бу “Қирқма”лар ҳам қолишмайди. Анваржон ака икки йилдан бери байрам дастрхонига деб, шундан оладилар, – деса бўладими...

Хуллас, ҳозир феврал ойининг охирлари. Ишқилиб, уялиб қолмай, дедим-да, ташқарига чиқиб, Аҳаджоннинг телефон рақамини тердим. Дарров жавоб берди. Муаммо ҳам тезда ҳал бўлди:

– Ҳар эҳтимолга деб, сақлаб қўйганларимиздан бор-да, ака! Ўтган йилги учрашувда Эркин аканинг дуоларини олган жияним Абдурауф бугун аzonда Тошкентга йўлга тушмоқчи эди. Пешинга қолмай, етказади.

Эркин ака қовундан икки-уч карж еб кўраркан, нарироқдаги стол устига қаторлаштириб териб қўйилган бир неча хил дориларга ишора қилиб:

– Анавилар дунёning турли бурчакларидан келтирилган кимёвий дорилар. Бу эса ўзимизнинг минг йиллик табиий шифобахш қовун, – дея, менга ўгирилиб сўрадилар, – Ҳар қалай, дала-боғники эмасдур?!

– Ҳа, Бешариқники ҳам, Олтиариқники ҳам эмас. Ўтган йил «Қишки қовун сайли»да ўзингиз тотиб кўрган Капаянгиники!

Ўртада енгил кулги кўтарилиди.

Эркин аканинг икки-уч кундан бери кайфиятла-ри яхши эди.

Шундан фойдаланиб, устознинг саккиз жилдлик асарлар мажмуасини тартибга солиш билан овора Мирза Кенжабекнинг китоб мундарижаси билан боғлиқ саволлари борлигини айтгандим:

– Нега келавермайди, – дедилар.

Бу хабарни тезда Мирзавойга етказдим.

Кечга томон борадиган бўлдик.

Ўша куни кўпдан буён танишим, матбуот дўкони сотувчиси Муроджон деган йигит:

– “Муштум”да Эркин аканинг зўр шеърлари чиқибди, – дея олдимга журналнинг янги сонини қўйди. Унда устознинг сурати билан икки саҳифани тўлиқ эгаллаган ҳажвий шеърлар туркуми кўзга ташланиб туради.

– Қолган иккитасини ҳам беринг. Бугун кечга томон устознинг олдиларига ўтмоқчи эдик, – дедим.

У:

– Соғлиқлари яхшими? Анча мазалари йўқ, деб эшитамиз, – деди-да, қўшиб қўйди, – бир муҳлис укангиздан салом, деб қўйинг.

“Асарлар”нинг босмага топшириш арафасида турган навбатдаги жилдларга оид “муаммо”лар тезгина ҳал бўлди.

Кейин “Муштум”даги “янгилик”ни айтиб, улардан бирини қўлларига тутдик.

Устоз:

– Журнал илгариги ўз ҳолига қайтиб, қаддини ростлаб бораётгани дуруст, – дея ўзларига бағишлилаган “саҳифа”га югурик кўз ташлаб олдиларда, варақлаб, сўнгги ички бетдаги фамилияни ўқидилар ва ярим жилмайиб, – Хайрият, мана шундай Носиржонга ўхшаш йигитлар “Муштум”га “урив” бўлса ҳам, “бор”лигимни билдириб туришибди. Омон бўлишсин, – дея қандайдир ўкинчли паст овозда қўшиб қўйдилар, – негадир баъзи укалар номимдан ҳайиқадиган бўлиб қолишган...

Устознинг бу сўзлари қанчалик беозорликка йўғриб айтилган бўлмасин, унинг замирида ботиний мунг сезилиб турар, “укалар” деганда кимлар назарда тутилаётгани ҳам аниқ эди.

Бу инсон бирордан гина ёки салгина бўлса-да, шикоят қилиб айтган сўзларини бирон марта эшитмаганман. Буни бошқалар ҳам яхши билишади. Афсус, баъзи шогирд-“ука”лар мана шундай бир пайтда...

– Эркин ака, – деди Мирзавой орага чўкиб қолган бир лаҳзалик жимликни бузиб, – Сизнинг халқ қалбидан жой олган ардоқли номингиз борлиги ҳаммага аён. Уни ҳеч ким юлиб, олиб ташлолмайди. Шуни хаёл қилаётгандарнинг ўзига худо жазосини беради. Давраларда доим “Эркин Воҳидов” жаранглаб турибди. Мана, саккиз жилдлик асарларингиз ҳам кетма-кет бўлиб, чиқиш арафасида. Яқинда халқ қўлига тегади.

– Тегармикан?..

Қандайдир ноумидлик билан айтилган бу сўзлардан вужудимда ички бир пинҳний оғриқни сезгандай бўлдим...

Хайрлашар эканмиз, сал кўнгилларини кўтармоқ учун:

– Қалай, Капаянгининг қовуни? – деб қўйдим.

– Қовун есанг – сахар е, сахар емасанг – заҳар е”, деганлариdek тамадди қилиб турибмиз. Ўзи ҳам бир маҳаллага етгудай экан, кўпчиликнинг оғзи тегди.

– Шифокор отахон Шаботхон ака “Ҳар қандай дори-дармондан, кўнгил тусаган луқма яхшироқ”, деганлари рост-да, ўзингизни тутишингиздан сезилиб турибди.

– Демак, ҳали яшашдан умид борга ўхшайди, – деди Эркин aka бошларини қимирлатиб.

Машинани ўт олдирапканман, ҳамроҳим:

– Сиз доим мақтаб юрадиган бош муҳаррир синглимиз адабий газетасида устоз ҳақида бирон нарса берса-чи... Ахир шу газетанинг чиқиши учун устознинг ўзлари сабабчи бўлган дейишади-ку.

– Гапингиз тўғри. “Лекин”и ҳам бор. Эркин aka-нинг ҳазил, аслида таги “зил” қилиб ёзган машҳур шеърларини яхши биласиз. Ҳозир худди шундай бўлиб, газета “хузури”ни “бели оғримаганнинг нон ейишини кўр” дегандай, бир-иккитаси кўрмоқда. Ўша синглим олдига кўп маротаба кирдим. Хўп-хўп, ўйлаб кўрамиз, дейди холос. Яхши эсимга солдингиз, бугуноқ яна бир олдига кириб кўраман.

Мирзавойни у яшайдиган уйга яқин бекатда қолдирдим-да, машинани тўғри Навоий кўчаси томон ҳайдадим.

УСТОЗ ВА ШОГИРДЛАР

Уловимни катта йўлдан елдириб кетяпман-у, қулоғим остидан устознинг “баъзи укалар номимдан ҳайиқадиган бўлиб қолишиди” деган сўзлари нари кетмасди.

У киши ғоят шогирдпарвар, назари тушиб, кўнглига ўтирган ёш ижодкорни дарров бағрига (керак бўлса ҳимоясига) олиб, ўз меҳрини аямайдиган оқибатли одам эди.

Мен бунинг кўп гувоҳи бўлганман.

Устоз билан суҳбатлашиб, икки оғиз маслаҳатини олиш илинжида юрган ёшлар анчагина эди. Шунга яраша кўпчилик шоир билан учрашишга юраги дов этавермасди. Бироқ Эркин ака уларни ўзига чорлар, ижодида “йилт” этган учқунни сезса, албатта қўллаб-қувватларди. Ҳеч қачон “ҳаваскор”нинг кўнглини ўкситадиган гап қилмасди.

Олтмиш саккизинчи йиллар эди, назаримда. Хадрадаги ўша, Миразиз Аъзам бошлиқ келажакда “ўзбек адабиёти бешигини тебратишга” астойдил бел боғлаганлар йифиладиган гўша – каминага қарашли ижара уйга соchlари жингалак, биздан сал нари, Эски Жўва бозорига туташ Ачавот маҳалласи боласига ҳам ўхшаб кетадиган, бақалоқдан келган йигитча кириб келиб, ўзини “Хуршид Даврон” дея танишитирди. Бу ном жўжа-хўрозларнинг қий-чувидай баъзан бу ерда бўлиб турадиган эҳтиросли адабий тортишувларда қулоққа чалиниб қолар, лекин ўзини биринчи бор кўришим эди.

Танишиш гурунги асносида у бир жуфт шеър ўқиди.

Учинчисини ўқишга қўймадим.

Чунки, иккинчи шеърда бир пари пайкар аёл образи шундай нафис, шундай мафтункор, қаёққадир яширинганд, кўринмас бир қушчанинг чурқ этган ногаҳоний овозидан ҳушёр тортиб, ҳаёнинг ҳарир либоси билан бутун қадди-қоматига инъом этилган илоҳий ҳусни жамолини бегона нигоҳдан яшираётгандай қилиб тасвирланган эдики, кўз ўнгимда пайдо бўлган бу ёрқин тасаввурга бирон ортиқча “ғубор” соя ташламаслигини истардим... Дарвоқе, худди ўша пайтлар Ўзбекистон тасвирий санъатининг бебаҳо дурдоналаридан ҳисобланувчи Беллолинининг машҳур асари 1966 йилги зилзиладан сўнг сирли суратда “ғойиб бўлиб қолиши” ҳақида “Чўмилаётган аёл” сири” қиссамни ёзиш билан банд бўлиб, бутун хаёлимни шу буюк санъат асари қоплаб олганди. (Ҳатто, “Гулистон” журналида бир саҳифа қилиб босилган шу гўзаллик тимсолидан нусха чизиб, илҳом парисидай ёзув столим қаршисида сақлардим.) Назаримда, ёш шоир менинг “Чўмилаётган аёл”га бахшида уринишларимни чиппакка чиқариб, бир вараққина қофозга тўкилган ёрқин бўёқлар билан шундай тасвирлаб қўйгандики, унга ортиқча шак келтиришнинг иложи йўқдай.

Мен шу дамларда гарчи ўзим расмлар чизиш ишқивози бўлсан-да, гўзалликни назокатта ошуфта қилиб, одамлар қалбига етказишда барибир мусаввир мўйқаламию шоирона ташбех олдида насрнинг кучи ожиз эканлигини англаб етдим.

Ўша кундан эътиборан Хуршид Даврон Эркин аканинг энг яқин шогирдлари қаторидан ўрин олди.

Наманганга боргандик. Вилоят газетасида бо силган бир шеър кутилмаганда устоз дикқатини ўзига тортди. Газета таҳририятига қўнғироқ қилиб, шоирни йўқладилар. Ёшгина Ёқубжон Аҳмаджонов деган йигит районда яшаркан. Эртасига шоир ҳузурига етиб келди. Фоят тортинчоқлик билан янги шеърларидан ёд ўқиди. Улардан бир нечтасини Эркин ака танлаб олдилар.

Бундан “илҳомланган” Эркин акамнинг бир неча ийллик мухлис-мезбони Содиқжон укам ҳам Уйчи район газетасини келтириб, акахонга бераркан:

– Бу йигит гапдонроқ бўлса ҳам, анча-мунча ёзиб туради. Бир кўринг-чи, ака, пичоқقا илинадими? – деди-да, сал овозини чиқариб, кўшиб қўйди, – Келинингиз Мунаввар билан бир мактабда ўқиган, синфдоши!

Эркин ака жилмайиб, оҳиста дедилар:

– Демак, таниш-билишлик қиларканмиз-да!

– Ундай бўлмаслиги керак, ака! Ҳаққоний баҳони ўзингиз бераверасиз, – деди Содиқкон.

Орадан кўп вақт ўтмай, республиканинг икки обрўли органи бўлган газета ҳамда журнал саҳифаларида Эркин аканинг “Оқ йўли” билан наманганлик икки ёш шоирнинг шеърлари босилиб, кўпчилик оғзига тушди.

Шундан сўнг Ёқубжон устознинг ишончини оқлаб, қатор шеърий тўпламлар эълон қилди. Хассос ижодкор сифатида элга танилди.

2012 йилнинг айни баҳорида Эркин ака Наманганга ташриф буюрганларида устоз-шогирд учрашиб, анча гурунг қилишиди.

Афсус, бу уларнинг охирги учрашувлари экан.

Устоз қайғули хабарни эшитиб:

– Яқин шогирдлардан айрилиқ юракка оғир ботаркан, – дегандилар афсус оҳангидга.

Аммо, кейинги пайтларда устоз шогирдлардан “тириклиги”даёқ айрилиқ унданам оғирлиги ҳақида ҳеч нарса демасдилар.

Қарангки, “келинимиз Мунаввархоннинг синфдоши” – уйчилик шоир ҳам Эркин ака яхши ниятлар билан ижодига “юксак парвозлар” тилаб ёзганидек, устоз ишончини оқлади. Шу билан жонни жабборга бериб, амалдорлик шоҳсупасига ҳам интилиб, иккинчи “парвоз”ни баланддан бошладио, “аввали устоз”ни унутди-қўйди. Ҳатто, у киши қаттиқ бетоб бўлиб ётганда ҳам бирон марта эслаб қўйишни ҳаёлига келтирмади. Ялтоқлик билан қўлидан келадиган барча “ҳиммат”ни “фойдаси тегадиган” – янги “устоз”дан аямади.

Мен ушбу жумлаларни ёзиш билан бундай ноқаслар устоз ҳурматини жойига қўймади, дея афсус чекаётганим йўқ. Зеро, буюк шоир бу кепата ипирисқиларнинг қандайдир “эътибори”га мутлақо муҳтоҷ ҳам эмас. Фақат мақсадим, одамларни ўз атрофида “ЗИЁлиман” деб юрганларнинг асл қиёфасидан воқиф этиб қўйиш, холос.

Ҳа, шогирдлар турли бўлгани билан устоз ўша-уша, улар учун жонкуяр ва меҳрибон, ҳатто бирон муаммо туғилиб қолган пайтда ўз номини “кафиллик”ка қўйишга ҳам тайёр одам эдилар.

Юқорида эслатиб ўтганимиздек, Шодмон Отабек “ҳангома”лари мисолида кўп гувоҳ бўлганман.

Бир куни Рустам Мусулмон Сирожиддин Сайдининг биринчи шеърлар китоби қаттиқ танқид остига олингач, унинг ёзганларини биронта матбуот босмасдан қайтараётгани, энди ўртоғи тушкунликка тушиб, қишлоғига “бош олиб” кетиб қолмоқчи бўлиб юргани ҳақида куюниб, гапириб қолди.

Бундай “савдо”лар Эркин ака Воҳидов билан Абдулла Ориповлар бошига ҳам тушгани, ўшанда Абдулла Қаҳҳор адабиётимизнинг келажаги бўлган ҳар икки шоирга “балогардонлик” қилиб, улар номларини “оқлаб” берганини кўпчилик яхши билса керак.

Бир куни гапдан-гап чиқиб, устозга шуни эслатдим-да, мавзуни муддао томонга буриб, Сирожиддиннинг ҳозирги “аҳволи” ҳақида гапириб бердим.

– Келсин тезда менинг олдимга, – дедилар.

Одатда, ўша пайт журналлар ойда бир марта бо силар, топширган қўллэзмангиз чиқишини узоқ вақт кутишга тўғри келарди. Кўнгли ғаш тортиб юрган ёш шоирнинг “Янги шеърлар туркуми” эса, Эркин Воҳидов бош муҳаррир бўлган, бир неча юз минг нусхада босилиб, бутун республикада донг тарашиб турган “Ёшлик” журналида ярим ойга етмасдан чоп этилди.

Бундан Сирожиддин ўз хурсандчилигини яширолмай, йиғлагудай бўлиб, “устоздан умрбод қарздор, минннатдор” эканлигини ҳаммага айтиб юрди. Ҳатто у кишига бағишлов шеър ҳам ёзди.

Орадан бироз вақт ўтгач, Эркин ака унга лутфли “жавоб” қайтардилар.

Битта шогирдга меҳр-оқибат бўлса – шунчалик бўлар-да!

Эркин аканинг ўзига хос фазилатларидан яна бири шогирд укалар билан муомала қилиш маданиятининг ўзига хослигида эди. У киши ҳеч қачон устозларга хос ўзини “билағон” тутмас, гурунгдошининг сўзларини сабр билан тинглаб, сўнг ўз фикрларини айтарди. Бирон марта ўзидан “кичик”ка қўйолпроқ гап айтганини эшитган эмасман.

Айниқса, ҳар қандай шогирд бирон нозик ибора билан у кишининг кўнглига йўл топа олдими, бас, устозга ўз “хукми”ни ўтказа оларди.

Шанба куни эрталаб вақт соат ўнлар эди.

Эркин ака кўчага чиқиб, машина келишини кутиб турган экан шекилли, шошиб улов эшигини очиб, ёнимга ўтиридилар.

– Вақтида келиб қолдингиз, радио томонга кетдик. Кеча, бугун “ўтиришимиз” борлигини билмай, ваъда бериб қўйган эканман, студияни тайёрлаб, кутиб ўтиришганини ҳозир айтиб қолишди. Қисқа муддатга бўлса ҳам бориб-келмасак, бўлмас эмиш. Тезроқ ҳайдайверинг. Ўчиқкандай бугун соат бирда Раҳматилланикода “гап”имиз бошланади. Ўтган сафаргидек, бу гал ҳам кечиксам, унга худо беради. Одатдагидек “Биз билан шахмат суришга юраклари дов бермай, акангиз қаерларда қочиб юрибдилар”, дея Сизга қўнғироқ қилишдан бошлайди …

Эркин аканинг яқин шахматчи дўстлари билан ойда бир йигилиб турадиган, аслида қизғин шахмат “мусобақаси” руҳида ўтадиган “гап”да ҳар қандай зарур ишни ташлаб бўлса ҳам, қатнашиш одатлари бор эди. Ўша ўтиришдаги “беллашув” чоғида у кишига асосий “рақиб” бўлиб майдонга чиқкан Раҳматилла аканинг баъзан кеч, вақт алламаҳал бўлганда, телефон қилиб, шавқ-завқ билан айта-

диган сўзларини эшитиб, қолардим: “Акангизга қўнғироқ қилиб, ҳол-аҳвол сўраб қўйинг. Дабдала қилдим. Ҳозир подвалга тушиб, кўкракни зах ерга бериб ётган бўлсалар, ажаб эмас!” Албатта, Эркин акадан бир хил жавобни эшитардим: “Ишониб ўтирибсизми, умуман шахмат ўйнашни Сизчалик ҳам билмайди. Ўн марта ютқазиб, бир марта аранг “дуранг” бўлганидан хурсанд бўлиб юрибди”.

Хуллас, бугун “ўйин” айниқса, Раҳматилла аканида бўладиган бўлса, у кишини “ғалаба” билан ҳозирданоқ табрикласам бўлаверади...

Соат ўн иккига яқинлашар, “ичкари”га кириб кетган Эркин акадан ҳали дарак йўқ эди.

Бир маҳал икки оғиз сўзи “зарур” бўлиб турган устозлар шарпасини эшитган заҳоти ўша атрофда ўралашиб қоладиган энг чақон, ўз касбининг фидойиси, шоир ҳамда адабиётимизнинг “минг йиллик” радиотарғиботчиси Берди Раҳмат чопиб олдимга келди.

– Акахон, ҳали чиқмадиларми?

– Чиққанлари билан бирон нарса ундиrolмайсиз. Ҳозир катта бир йиғилишга етиб боришлари керак. Вақтлари тиғиз! – дедим.

– Иложини қилсан-чи? – қув қарашиб қилди у.

– Овора бўласиз. У, Сиз ҳоҳлаганда – бориб, ҳоҳламаганда – бормай юраверадиган Чорбоғдаги дала-боғ мажлиси эмас.

Худди шу пайт шошиб, Эркин ака кела бошлади.

Берди Раҳмат у кишининг истиқболига пешвоз чиқиб, одоб билан салом берди-да, муддаога ўтди:

– Билиб турибман, шошиб турибсиз, устоз! Ана-ви биринчи қаватдаги студия тайёр. Икки оғиз сўзингизни ёзиб олсак.

– Ука, шундоғам кечикяпман. Дўстлар кутишяпти.
Шунда шогирд кутилмаган гап айтди.
– Бугун ҳазрат Навоийнинг туғилган кунлари.
Наҳот, у кишидан ҳам эътиборлироқ кишилар бор,
устоз?

Эркин ака Берди Раҳмат юзига бир лаҳза қараб
қолди-да, унинг елкасига қўл қўйиб:

– Қани, кетдик ўша студиянгизга, – деди.

МЕҲНАТНИ КИМ ҚИЛИБ, ҲУЗУРИНИ КИМЛАР КҮРАДИ

Мирзо Кенжабек айтганидек, бир неча йилдан бери «синглим» бошқараётган адабий газетанинг пайдо бўлишига қаршилик қилишган бир пайтда, Эркин ака ўртага тушганининг ўз тарихи бор эди: хорижий тилга ихтисослаштирилган маҳсус мактабда ўта тиришқоқ, аълочи ўқувчим бўларди. У чет тилини яхши ўзлаштиргани боис, ёшлигиданоқ болалар газета-журналларида ўз таржималари билан қатнашиб туради. Олий ўқув даргоҳини битириб, шу соҳанинг пухта мутахассиси бўлиб етишиди. Шаҳардаги йирик кутубхоналардан бирида бошлиқ бўлиб ишлаш билан бирга таржимонликни давом эттириб, катор китоблар чиқарди. Биз Эркин ака икковимиз у раҳбар бўлган кутубхонанинг кенг ва ёруғ ҳамда осойишта ўқув залига тез-тез бориб турадик.

Мустақилликка эришганимиздан сўнг нашр ишларига катта эътибор қаратилиб, турли мавзудаги газета-журналлар ташкил этиш оммавий тус олди. Бир куни ўқувчим менга ўша пайт учун энг зарур бўлган, ҳар ойда турли нашриётларда чоп этиладиган энг сара бадиий китоблардан кўпчиликни хабардор этиб туришга мўлжалланган янги газета чиқариш ниятидалигини айтиб, дизайн чизмалари ни кўрсатди. Унга кўра, янги китоб ва муаллиф сурати берилиб, қисқа маълумот ҳамда асарнинг энг

қизиқарли жойидан “парча” эълон қилиниши кўрсатилганди.

Китобхонларга хабарнома шаклида босиладиган газета Эркин акани ҳам қизиқтириб қолди. Ноширлиқдан яхши хабардор одам эмасми, қўшимча маслаҳатлар берди.

Лекин бу “янгилик” Уюшма остонасидан қайтарилиди. “Маслаҳат” олиш учун келган аёл “Яқинда “Ёзувчи” деганидан қутулгандик. Энди буниси чиқдими? Ҳамма учун битта “Адабиёт” газетаси бўлиши керак. Қани айт-чи, ёзувчиларни иккига ажратиб юбориш учун қилинаётган бу ҳаракат устида қайси гурӯҳвоз турибди?” деган таъқибга учраб, аранг қочиб қутулди.

Собиқ ўкувчим Эркин акага мурожаат қилганди, ўша куниёқ уни етаклаб, тўғри Матбуот қўмитаси раиси ҳузурига олиб кирди.

Шундан кейин иккинчи адабий газета бир неча йил зиё даракчисидай чиқиб турди. Сўнг молиявий тақчиллик бошланиб, тўхтаб қолди. Икки-уч ҳомий уни «тикламоқчи» бўлди. Урунишлари зое кетди.

Ниҳоят, газетага ишни кўзини биладиган тадбиркор йигит топилди. Газета номи ўша-ўшалигигча қолгани билан шакл-шамойили, мундарижаси ўзгарди.

“Таҳририят аъзолари” бошида эса, ўқлоғдай бўлиб, бир пайтлар шу газетанинг чиқишига мутлоқ қарши бўлган одамнинг исми-шарифи пайдо бўлди.

Бора-бора газета тўхтовсиз... биринчи бетда шу одамнинг “анонс” қилиб берилган “реклама” сурати-ю кейинги саҳифалар ҳали сиёҳи қуримаган

“ижод намуналари” билан тўлиб-тошиб чиқадиган “даракчи”га айланди.

Эркин акага ҳам унда-мунда камтар киши пана-да деганларидек, навбат тегиб турарди. Кўпчилик таҳририят аъзолари қаторида “Эркин Воҳидов” ҳам бўлишлигини қанча илтимос қилмасин, бош муҳаррир бу масала гўё Олий Мажлис депутатлари томонидан ҳал этилишини кутгандай, “ўйлаб кўрамиз” дея пайсалга солгани-солган эди.

Булардан ҳам ҳайратланарлиси, Эркин акадай инсон шаънига кўпчилик олдида ҳеч тортинаасдан шалоқ гаплар айтаверадиган (бир куни “Ўзбегим” қўшиғи ёзилган кассетани юлиб олиб, ҳақоратли сўзлар билан бир четга улоқтирганида бу имонсизни машинамдан ҳайдаб туширишимга оз қолган, иккинчи уни уловимга яқинлаштириладиган бўлганман), ҳамманинг жонига теккан, ёзувчина-мо бир кимса “асарлари”ни шапалоқдай тиржай-иб тушган сурати билан кетма-кет босиб, (хатто унинг ёзганларига тақризлар эълон қилиб) “до-имиий муаллиф”га айлантириб олганига ижодкор аҳли ҳайрон. Яна денг, куни-кеча газетанинг кўримли сахафасида унинг китоби чиққани ҳақида худди адабиётда оламшумул янгиликдай рангин безаклар билан хабар эълон қилинибди. Анчагина аввалроқ Эркин аканинг яқинлашаётган кутлуғ саксон ёши муносабати билан чоп этилган “Инсон” номли бир жилдлик асарини котиба қиз орқали “Янги китоблар” рукни остида эълон қилиш учун ташлаб кетгандим. Сингилнинг ҳамон унга қарашга вақти топилмаган кўринади... Хуллас, ўша-ўша гап: роҳатни бошқалар кўраверар экан-да!

Шу хаёллар билан “Муштум”ни кўтарганимча газета таҳририяти жойлашган иккинчи қаватга чиқиб келдим. Бош муҳарир ўз хонасида экан.

Одатдагидай очиқ чехра билан кутиб олди.

Кўп йиллардан бери борди-келди қилиб, қадр-донлашиб кетган уйдагиларнинг ҳол-аҳволини сўради.

Ўзи ҳам менга яқин синглим қаторида бўлиб қолганди.

Шунда у ўтирган столнинг нарироқ томонида олтиндай ёзувлари ярқираб турган “Инсон” ҳамда унинг устига ташлаб қўйилган “доимий муаллиф”нинг унча катта бўлмаган китобчасига кўзим тушди.

Бир ғалати бўлиб кетдим, лекин сир бой бергим келмай, гапни индаллосидан бошладим:

– Мана буни қаранг, устозимизнинг муборак номлари журналда ҳам чиқиб турибди. Ҳозир кўриб, анча хурсанд бўлдилар. Хаста одам кўнглини кўтариш – ярим соғлик баҳшида этиш билан teng деганлар, қадим замон табиблари. Энди, кейинги бир йил давомида у кишининг номини қанча илтимос қилмайлик, “таҳририят аъзолари” қаторида ҳам “эслаб” қўймадингиз. Ҳеч бўлмаса, Эркин аканинг қутлуғ ёшга тўлаётганлиги муносабати билан чиқарилган ёнингиздаги китоб ҳақида муҳлисларга хабар бериб қўйиш шунчалик қийинми? Ўзбекистоннинг энг номдор нашриёти томонидан оммавий нусхада босиб чиқарилган-ку! Ҳозир ҳамма ўқимоқда... Нима десам экан. Ҳеч бўлмаса, Сиз ҳозир бошлиғи бўлиб турган шу газетани “йўқ”дан “бор” қилган устоз ҳурмати... – дейишим билан у сўзимни шартта бўлди:

– Бир-икки бор буни гапиргансиз. Биламан.

Дашномлироқ оҳангда айтилган бу гап менга қаттиқ ботди.

Ўзимни тутолмадим:

– Билсангиз, сингилжон, – дедим унинг юзига тик қараб, – яна гапимнинг қўшимчаси ҳам бор. Шуни ҳам билдириб қўяй: эслайсизми, устоз Эркин Воҳидовни бир кўриш орзусида эканлигингизни кўп гапирав эдингиз. Мен, бир куни қизингиз ҳам шеърлар ёзишини айтиб, у кишини уйингизга олиб бордим. Хурсандчиликдан кўзингизга ёш олдингиз. Янги чиққан китобингизга “Ҳурматли устоз! Дунёда Сиздай улуғ инсонлар бор экан, яшагинг келаверади”, деган дастхат ёзиб, тавоб қилгандай топширдингиз. Ўша шеърий мажмуангиз ҳозир устоз хонадонидаги китоб жовонининг шогирлар асарлари орасида энг фахрли ўринни эгаллаб турибди... Вақт ўзгариб, сиз устоз дея, анаву нурафшон – ёрқин нурли китоб устига қора кўланкадай соя ташлаб турган “асар” муаллифини танлаган кўринасиз... Майли, бу сизнинг таъбингиз бўлса, нима ҳам дея олардим. Энди сизни бирон илтимос билан безовта қилмаслигимга ишонаверинг! Ҳозир эса, ўтиниб сўрайман; улуғ шоирнинг покиза юрак қўри билан битилган инсонийлик қасидаларидан иборат ана бу, устоз китобини менга қайтаринг. У ножоиз жойда турмаслиги керак. Раҳмат, синглим. Ўзи бугун кайфиятим ёмонроқ. Шунинг учун қаттиқроқ оҳангда айтиб юборган гапларим учун минг бора узр! Баъзан одам вужуди вулқондай оташ даражасига келиб қолган пайтларда, ҳадди сиққан энг яқинларидан бирига “ёрилиб”, юрагини

бўшатиб олади-ку! Нозик дидли шоира сифатида буни яхши англайсиз. Хайр, омон бўлинг.

БЕШИНЧИ ЎРИНБОСАР

Ҳар кимнинг яхшими-ёмонми ўзига яраша бир одати бўлади. Менда ҳам қўндоқда теккан шу қусур йўқ эмас. Яъни, бирон нарсадан қаттиқ таъсирлансан, ўшани охирига етказмасдан қўймайман. Уйкум қочади. Бирон ишга қўлим бормайди. Ҳатто, ёзувчиувга бўлган майл ҳам сўниб қолгандай бўлади.

Эркин ака “яқин укалар” деганда беихтиёр кўз ўнгимда кўнглимга яқин олиб юрадиган Сирожиддин гавдаланиб кетганди.

Уни мен ҳазиллашгандай “бешинчи ўринбо-сар” деб атардим.

Дурустгина раҳбарлик лавозимини эгаллаб турган шу йигит ҳузурига кейинги пайтлар бир неча бор киргандим. Лекин хушламайроқ қилған муомаласи мени ўзидан бездирганди.

Мана, бир неча кунки, уни яна эслаб қабулига киришни хоҳлаб қолдим.

Ахир, авваллари оддийгина укалар қаторида эди-ку! Наҳот, амал одамларни бир-биридан шунчалик ажратиб ташласа!

Беихтиёр унинг дастлабки лавозимга қўтарилиш пайтини эслаб кетдим. Бундан ўн йилдан зиёдроқ вақт аввал собиқ раис, ҳозирги “фахрий”га навбатдаги “бешинчи ўринбосар” бўлиб сайлангач, боши тошдан экан, худо ўз паноҳида асрайверсин, ҳозиргача тўрт мучаси соғ-омон, ишлаб келмоқда.

Ундан олдингилар эса... сўзлаш анча ноқулай бўлса-да, ҳаммаларининг жойлари жаннатда бўлсин, бироз улар ҳақида тўхтаб ўтаман.

1996 йилнинг бошларида Уюшмада “ўзгариш” бўлиб, янги раис амалнинг дулдул отига миндирилгач, ёзувчиларга кўмаги тегадиган, анчагина сармоядор (бу, ўша пайтнинг талаби эди) бир саҳоватли кишини унга биринчи ўринбосар қилиб сайлаб қўйишди-ю, бир йилга етмай бечоранинг майитини Қашқадарёдан олиб келишди.

Эркин аканинг яқин шогирларидан бўлган, менинг ён қўшним, қалби ёниқ шоир укамиз “ўринбосарлик”нинг иккинчи йилига етмаёқ Қорақалпостонга бориб, ўша ерда жон берди.

Болалик дўстим Ҳожиакбар Шайхов ҳақиқий фантастларга хос фикр доираси кенг, шу билан ўта хаёлпараст, ўзига ярашган соддалиги ҳам бор ижодкор эди. “Паралел – муқобил дунё” сир-синоатларини ўрганиш билан жиддий шуғулланар, баъзан аниқ фактларга асосланган қизиқ-қизиқ воқеалар ҳақида гапириб, биз даврадошларини ҳайратга соларди.

Бу ҳайрат муштарийларни ҳам, шубҳасиз, қизиқтиrsa керак деган умидда, дўстимнинг ажойиб, ўз асарларига хос илмий салоҳияти ҳақида тўхталиб ўтаман. У айтиб берган ғаройиб ҳикояларидан бири ҳамон эсимда қолган: 1939 йилнинг 15 апрел куни Бразилия пойтахти Рио-де-Жанейродан Бого-тага учайдган самолёт тўсатдан “йўқолиб” қолади. Ва орадан роппа-роса 55 йил ўтгач, мўлжалдаги манзилга келиб қўнади. Аэропорт ходимлари самолёт эшигини очиб, биринчи навбатда штурвалда

ўтирган икки учувчи скелетига, сўнгра салондаги 36 йўловчининг қовжираб қолган суюкларига кўзлари тушади. Қаҳвага тўла финжонлардан буғ чиқиб туар, чекилмай қолиб кетган сигареталар ҳали ўчмаган, ундан ҳам ҳайратланарлиси, 1939 йил, 15 апрел куни Рио-де-Жанейрода чоп этилган газеталар энди босмахонадан чиққандек яп-янги эди. Бу ғаройиб ҳодисани Ҳерман Гевара бошлиқ 100 кишидан иборат йирик мутахассислар обдан ўрганиб, бир овоздан “самолёт муқобил олам чоҳига тушиб қолган”, деган фикрни тасдиқлайдилар. Бу ҳақда дунё матбуотида кўп ёзилган, китоблар чоп этилган... Яна дўстим ҳиндларнинг руҳий ҳолат билан боғлиқ, одамлар ва табиий муҳит орасидаги салбий ҳамда ижобий қарама-қаршиликлар ҳақида менга кўп саволлар берарди. Шунда мен уни “Ўзбек ҳиндшуносларининг устози”, Дехли университети профессори, Беруний ёзганидек, “Ҳиндларнинг ақл бовар қилиб-қиласвермас, ажойиб ва ғаройиб хусусиятлари”дан яхши хабардор доктор Қамар Раис домламиз билан таништириб қўйдим. Тез орада апоқ-чапоқ бўлиб кетишди. Баъзан улар орасида бўладиган мулоқот мавзуи ҳар ким ҳам тушуниб етавермайдиган кенг ва ноанъанавийлигидан ҳайратга тушардим. Айниқса, Қамар соҳиб тирик организмдай инсонни ўзига маҳв этиб, ақлдан оздирадиган “қарғиш теккан” кўхна хароба қасрлар Ҳиндистанда кўплиги, улар одамларнинг азобукубати, нолаю фифонлари эвазига қурилганлиги боис, ҳеч қачон яхшиликка хизмат қилмаганлиги ҳақида гапирса, беихтиёр кўз олдимда Рабин-дранат Тагорнинг “Ташна тошлар” ҳикоясидаги

тахликали воқеалар гавдаланиб кетар, девона Магар Алининг қўхна қаср харобазорлари оралаб юрганича айтаётган “ишонманглар, ҳаммаси ёлғон, ҳаммаси ёлғон” деган фарёди қулоқларим остида эшитилиб кетгандай бўларди... Ҳожиакбарнинг эса инсон ақл-заковатининг маҳсули бўлмиш “Қарғиши теккан” асарлар ҳақидаги гапи ундан ҳам ўтиб тушарди. Михаил Булгаков “Уста ва Маргарита” романини ёзиб тугатади-ю, ақлдан озади. Китоб бир неча маротаба саҳналаштирилади. Унинг режиссёрлари асар намойиш этила бошлаган кундан этиборан бир ойга қолмай ўладилар. Романинг асосий уч қаҳрамони бошига ҳам шу қора кунлар тушади. Машҳур киноусталари “Уста ва Маргарита” ҳақида фильм яратмоқчи бўладилар. Ҳаммаси ўлим билан тугайди. Ҳатто режиссёр ва асосий ролни ўйнаганларнинг оила аъзоларига ҳам омон-лик бўлмайди. Энг қизифи, сўнгги бор лаънатланган “Уста ва Маргарита” бирон фавқулодда ҳодисасиз тўлалигича экранлаштирилади. Бироқ, фильм на-мойиши бошланиши билан унда асосий ролларни ижро этган машҳур рус киноактёрлари К. Лавров, А. Абдулов, И. Олейников, В. Галкин, В. Золотухинлар арзимас вақт мобайнода бирин-кетин бу ёруғ дунёни тарқ этадилар. Ер юзи бўйлаб “Лаънатланган асарлар” рўйхатида биринчи Шекспирнинг “Макбети” бўлса, иккинчиси “Уста ва Маргарита” ҳисобланади... Шулар ҳақида баъзан бизницида, баъзан ёнгинамда қўшни бўлиб турадиган Қамар соҳибницида баҳслар қизиб турган бир пайтда Ҳожиакбарни яқинда вафот этган Мұҳаммад Юсуф ўрнига Ёзувчилар Уюшмаси раисининг навбат-

даги ўринбосари лавозимига тавсия этилаётгани ҳақидаги хабар қулоғимга чалиниб қолди.

Қамар соҳиб билан унинг катта анҳор яқинидаги ҳовлисига бордик.

Устоз дўстимга “тинчгина” ижод билан шуғулла-нишни маслаҳат берди.

Бироқ у “сухбатдан ўтгани, қарор чиқариб қўйилгани”ни айтиб:

– Бир “тажриба-синов”ни бошимдан ўтказиб қўрмоқчиман, – деди.

Қад-қомати тоғни урса толқон қилгудай забар-даст ва соғлом-бақувват дўстим Ҳожиакбар бир ярим йилга етар-етмас “синов” вақти ичида қаттиқ касалликка чалиниб, ёстиқдан бош кўтаролмай қолди. Узоқ ётди. Икки кечаю кундуз оиласи, ўғилқизлари, ака-сингиллари бошида мижжа қоқмай ўтириб чиқдик. 2002 йилнинг айни баҳори – 24 май, тун соат 12 лардан ўтганда қўлимда жон берди. (Бу ҳақда, умуман дўстим билан бошдан ўтказган кўп кечинмалар ҳақида “Осмоннинг кўз ёшлари” эссэ-қиссада батафсил ёзганман.)

Бу жудолик ҳақида ўша заҳотиёқ ҳамма ёққа ха-бар бердик.

Үюшма Раиси Қорақалпоғистонда экан, эрталабки самолётда учиб келганини эшиштан Нор-мурод Нарзуллаев уникига йўл олди. Кўп ўтмай, қайтиб келди. “Ўзим етиб боргунча кутинглар”, дебди. Кейин Номурод ака бошини сарак-сарак қилиб, қўшиб қўйди: “Фирт. Қачон ўзига келиб, қачон етиб келишини худонинг ўзи билади”.

Ҳазрат Анваржон қори Турсунов барваҳт келиб, жаноза Ҳастимом масжидида пешин номози пай-

тида ўқилишини ҳаммага маълум қилиб, соат 12 ларга келишларини хабарлаб кетгандилар.

У киши белгиланган вақтда келди. Лекин, Раисдан дарак бўлмади. Дафн маросими номаълум вақтга кечиктирилди.

Бундай пайтда майитни айтилган вақт-соатда ўз ором жойига қўймай, зўриқтириб қўйиш катта гуноҳ саналади.

Ниҳоят, Раис кечки соат 4 ларда, шаррос жала қуиб, бўрон заптига олиб, ҳамма ёқни айқаш-уйқаш қилиб турган бир пайтда етиб келди.

Етиб келди-ю, марҳум тобутидан ўн қадамча нарида туриб:

– Қани айтинглар-чи, Ҳожиакбарнинг энг яқин дўстларидан ким бор? – дея жамоага юзланди.

Бир тўп кишилар орасида турган маҳалланинг кекса нуроний оқсоқолларидан Абдулазал ота мен томон ишора қилиб;

– Энг яқин дўсти мана шу одам бўлади. Хабаримиз бор, доим бошида турди. Марҳум бандаликни бажо келтиргани ҳақидаги хабарни бизга етказган ҳам шу киши! – деди.

Раис ўзини эшитмаганга солди:

– Ҳожиакбар Шайхов ҳукуматга кўп хизмати синг-ган расмий раҳбар. Яъни, Ўзбекистон Ёзувчилар Уюшмаси раисининг биринчи ўринbosари. Унинг дафн маросими билан боғлиқ бундай ишларга ҳар хил тасодифий шахсларни аралаштирмаслигимиз керак. Марҳум дўстимизнинг келажагини ҳам ўйлашимизга тўғри келади... Қани, Нормурод ака Нарзуллаев, менга яқинроқ келинг...

Шу кундан бошлаб, Шайховлар оиласи билан боғлиқ бўлган қарийб эллик йиллик ришталарга (хо-

надон соҳиби Ислом ота мени ўғиллари қаторида кўрар, ҳатто, “саккизинчи ўғлимиз” деб атарди) чек қўйилиб, узид ташланди. Оила аъзоларидан кимлардир дўстгинам номини “абадийлаштириш”, яна номзодини қандайдир ҳукумат мукофотига тавсия этиш (аслида ҳеч нарса қилинмади) да мен “халақит беришим мумкин” лигига чиппа-чин ишониб, мени кўрганда тескари ўгирилиб ўтадиган бўлдилар. Марҳумнинг бирон маракасига ҳам тақлиф этишмади.

Ҳатто, Ҳожиакбарнинг 60 ёшга тўлиши муносабати билан дала-боғда ўтказилган камтарона тадбирда ҳам ёзувчининг яқинларидан ҳеч ким иштирок этмади.

Энди, навбатдаги Фарғонадан чақирилган “ўринбосар” ҳақида гапирадиган бўлсам, у киши Водийнинг эрка ижодкори сифатида ўша томонларда обрўйи чакки эмасди.

Пойтахтга келди-ю Раиснинг югурдагига айланиб, “Дон Кихот” лақабини орттириб олди. Ўзи ҳам кап-каптта “улуг” ёши билан бўлар-бўлмасга Раис атрофида парвона бўлаверар, костюми елкасидағи йўқ чангни силаб-сийпаб, қоқиб қўйишга ҳаракат қилар, ҳатто, эрталаб ишга “хўжайн”дан яrim соатча аввал келиб олиб, Уюшма эшиги ёнида безовта қушдай типирчилаб, кутиб тураг, қора “Волга” пайдо бўлиши билан “Улуғим-улуғим”лаб, машина эшигини очиб, Раиснинг қўлтиғидан оларди.

Кошки, “Улуғ” бу иззат-икромлар қадрига етса! Бироқ, ўринбосар акахон жуда ҳам анойилардан эмасди. Буни ўзи ҳам яхши тушунар, баъзан менга “Шунчалик яхшилик қиласман-у, хурсанд бўлмайди.

“Сен анаву Эркин акангни агентисан” дейверади”, дея ҳасрат қилиб қоларди-ю, унинг соясидек орқасидан эргашиб юраверарди.

Охири, “тўртингчи ўринбосар”нинг шу қилиқлари ўзининг бошига етди: обрўли идорада учрашув режалаштирилган эди. Шоир ярим соатча кечикиб, шу билан анчагина кайфи тароқ ҳолда келди. Таомилга кўра “ўринбосар” қисқача “таништирув нутқи” сўзлай бошлаганди, “хўжайин” унинг оғзига ургандай “Хой, оқсоқол! Бу ердагилар шеър эшитишга йиғилишган. Гапни бас қилинг, ўтиринг жойингизга!” деди. Ва бежороқ қадам ташлаб, минбарга чиқиб, шеър ўқий бошлади. Ўқиб туриб... у ёғи ёзишга муносиб эмас...

Дунё-дунё бўлиб, шеъриятдай покиза бир издиҳом бу даражада шармандаликни бошидан ке-чирмаган бўлса керак. Яна, қайди денг, жуда катта мўътабар ҳукумат даргоҳи ходимлари кўз ўнгида...

Тадбир тўхтади. “Ўринбосар” одатдагидай хушёрлик қилиб, “раҳбар”ни ёш болани овутгандай “Улуғим-улугим”лаб қўлтиқлаб, ташқарига олиб чиқа бошлади.

У “Улуғ”ни гилам тўшалган йўлакка тўғриланган машина ичига бир амаллаб киритди. Аммо, акашак бўлгандай, ташқарида қолган оёқлар қимир этмасди. Шунда “ўринбосар” силаб-сийпалаб уларни сал кўтармоқчи бўлганди, яна бир уятли ҳодиса рўй берди: ўзини бошқариш ҳолатини йўқотган “хўжайин”:

– Мунча менга ёпишаверасан. Мен бу ерга шеър ўқиш учун келганман. Қаёққа жўнатмоқчисан? Тур йўқол! – деди-да, “ўринбосар”нинг кўкраги аралаш

елкасига бир тепди. У орқаси билан қалқиб, ерга ўтириб қолди. Қаеридир қаттиқ лат еди.

Шу-шу ишга қўлтиқтаёқда, ҳатто бъязи “зарурроқ” ийғинларга “халқ хизматида бўлишимиз керак-ку, ахир” дея, замбилда келадиган бўлди. Лекин, узоқ яшамди, анча қийналиб бандаликни бажо келтирди.

Рустам Мусулмон ҳали ёш “шоирча” эди. Бир куни ўзи тенги найновгина йигитни менга рўпара қилиб “шеърини тинглаб кўринг, ака” деди. Ўзим шеъриятдан йироқ бўлсам-да, йигитнинг ўқиганлари менга ёқди. Ўшанда “Сквер” деб аталувчи қалин дарахтзор хиёбон марказидаги емакхонада кичкина “зиёфат” қилиб ўтирганимиз.

Шундан сўнг учовлон “ака-ука” тутиниб, ботбот учрашадиган, Рустамнинг таъбири билан айтганда “Ака билан ўтириб, бир гап-гаштак қилиш – камбағал учун катта тўй” бўладиган кунни кутадиган бўлиб қолгандик.

Бу укаларнинг иккови ҳам иқтидорига яраша ижод бобида ўз ўрнини топиб, оғизга тушди. Обрў-эътиборга сазовор бўлди.

Бир куни Рустам Мусулмондан ўртоғи “кўтарилимоқчи” эканлиги ҳақида хабарни эшишиб қолдим-да, у билан учрашиб, шундай дедим:

– Шайхлар авлодидан бўлган Ҳожиакбарнинг аҳволини кўрдинг. Сен “Сайд”лардансан. Чидаш бера оласанми?

– Ҳаракат қиласман, ака!

Юзларига қараб билдимки, “ўсмоқчи”, амалга ишқибозлиги бор.

Бундай пайтда ҳар қандай одам шаштини қайтариб бўлмайди.

Шундай қилиб, “бешинчи ўринбосар” лавозимга ўтирди. Бир ойга етиб-етмай, қандайдир касаллик унинг ҳиқилдоғидан тутди.

Ёзувчи ахли таҳлиқада. Лекин бирон сўз айтишдан ўзини тияди.

Шу орада миш-миш ҳам тарқаб қолди: раис янги ўринбосари ётган шифохонага икки-уч марта келиб кетганмиш. Ман-ман деган шифокорларни оёққа қалқитганмиш.

Айни ўша пайтлар кутилмагандан, “миш-миш”-ларга ҳамоҳанг бўлиб, кўпчилик орасида одамларнинг суратига қараб, узоқ масофадан туриб “ташҳис” қўйиш ҳамда “даволаш” борасида ном қозона бошлаган шоир Йўлдош Эшбекнинг “башорати” тарқаб қолди: шоир йигитнинг йигирма ёшлик пайтида олиниб, китобида эълон қилинган суратидан маълум бўлишича, у беш ойлик муддатни соғ-омонлик билан ўtkазади, ана ундан кейин иши ривож топиб, ижоди ҳам юқори поғоналарга кўтарилармиш... Бироқ, “ҳозирча унга бирон гап айтишдан тийилиб турмоқ лозим”, әмиш.

Қарангки, Машрабмижоз шоирнинг “табиблиқ” бобида унчалик иши юришмаган бўлса-да, мана шу айтганлари ҳақиқат бўлиб чиқди: ўн йиллардан ошяптики, “Бешинчи ўринбосар”нинг иши, ижоди баравж. Ёзувчи аҳлининг Бош газетаси “Ўзбекистон адабиёти ва санъати”га бош муҳаррирлик ҳам унинг елкасида.

Хуллас, икки амалнинг бошидан тутган бу “ўринбосар” билан анчадан бери учрашмаган, бунақа бузук кайфиятда ҳузурига киришни хаёлимга ҳам келтирмаган эдим.

Вужудимни қоплаган қандайдир туғёнданми ёки ҳамон ўзимни “ака”лик мақомида, деб ўйлаганим учунми, унга гапнинг очиғини айтишдан бошладим:

– Газетани ҳам сенга топширишгач, аввалги “ҳамкасбинг” ишини давом эттириб, доим “Устоз-устоз” деб, юрадиган Эркин Воҳидовдай одам номини, мана шу қўлларинг билан “ўчиравериш” жонингга тегмадими? Менинг иккита мақоламни юзимга қараб-қарамай “бўлмабди бунингиз” деб қайтариб бердинг. Меники “бўлмаган” бўлса, устознинг яқинлашаётган муборак ёши муносабати билан адабиётимизнинг забардаст отахон мунаққидлари ёзиб келган мақолаларни нимани рўкач қилиб қайтармоқдасан? Ҳой, менга қара, ука, яқин-яқинларгача кўзингда ёш билан “Биринчи китобим қаттиқ танқидга учраб, номим матбуот саҳифаларида кўринмай қолганда, Эркин акам менинг бир туркум шеърларимни журналда бостириб, юзимни ёруғ қилгандилар”, деб юрганларингни унутдигми? Келиб-келиб, энди ўзинг юзиқаролик қилиб, у одам номини “ўчириш” йўлига ўтиб олганингни қандоқ тушунса бўлади? Ҳа, устоз ҳозир қаттиқ бетоб ётибдилар. Яқинда сиҳатгоҳга кўргани борибсан. Юзларига қандай қилиб, тик қарай олдинг? Сенда ўзи бет деган нарса борми?..

Охирги бу сўзларим унга қаттиқ таъсир қилди шекилли, ўрнидан туриб кетди. Юзларида бирдан ўзгариш рўй бериб, раҳбарларга хос қошларини чимириб, жиддий қараш қилди.

– Қаерда ўтирганингизни биласизми! Бу давлат идораси. Мени суд қилишга келмагандурсиз?

– Дарвоҷе, сен раҳбарсан. “Бешинчи” эмас, “Биринчи ўринбосар!”. Устозларингдан олган сабоғу бу

важоҳатинг билан кимдир орқангдан қўллаб юборса, раис ҳам бўлиб қолишинг мумкин. Қабулингга билмай кириб қолганим учун узр, – дедим-да, ўрнимдан туриб, хонадан чиқиб кетдим.

ЯНГИ ТАНИШ ОҒАЙНИМ

Билиб турибман – турли-туман тафсилотлар, билиб-бilmай, баъзан ошкора қилинадиган “беозоргина” хиёнатлар Сизни анча фаромуш этди, чоғи. Тўғриси, буларни Абдулла Қаҳҳор таъбири билан айтганда “темир қўлқоп кийиб” бўлса ҳам қофозга тушириш қанчалик азоб бўлганлигини билсангиз эди... Бироқ, вужудингда ўзинг жонли гувоҳ бўлган, юрагингни ўртаб юборадиган хотиротлар бош кўтаргандан кейин дардингни қалам орқалигина ёзиб, таскин топишдан бошқа илож қолмас экан.

Шунинг учун китобнинг янги сахафаси орқали диққатингизни бошқа томонга тортмоқчиман. Ҳа, амалга ҳеч кимни бир умрли қилиб, боғлаб қўйиб бўлмаганидек, Уюшманинг “янги” раиси ҳам ўзгарди. У кишининг ўрнига аввал назмда от суриб, сўнgra наср “майдони”да шиддат билан улоқ чоптириб юрган Муҳаммад Али бўлди. Айтишларича, “фаҳрий” бошидаги қўп ийллик “дорул салтанат тожи”ни энг содик, “яқин”ларидан бўлиб қолган шу одамга кийдиришга анча-мунча ҳаракат қилган-уни нияти амалга ошмай қолган экан. Энди кўнгли ўрнига тушганмиш.

Навбатдаги раҳбар “тахт”га ўтирган кундан бошлаб, қошлирини чимириб, Темур бобоча шиддат билан иш бошлади. Ёш хотин эркакни ёшартиради, деганларидай юқори лавозим ҳам ундан қолишмас экан. Мен буни ўз кўзим билан кўриб, ишонч ҳосил қилганлигимдан айтаяпман.

Шунинг учунки... менга кўп йиллик қадрдон бўлган бу ошнамга кўча-кўйда “ёши анча ўтиб қолган”лик қусурини қўйиб “шу ёшга кириб, ишни эплай олармикан”, деб юрганлар эшитиб қўйсин, деб айтаяпман.

Мана, энди бутун бошли Уюшма раислиги мартабасида турган одамга ҳазилт-хузул гап айта олишим боисини тушуниб етгандирсиз! Буни одобсизлик эмас, яқинлик аломати дейиш мумкин. Катта давлат арбобларининг ҳам “бир кўрпада тепишиб” катта бўлган болалик дўстлари бўлади-ку!

Тўғри, биз Муҳаммад Али билан “болалик”дан эмас, ёшимиз анчага бориб, овозларимиз дўриллаб қолган “йигитлик”дан дўст эдик. Буни, ҳамма ёш, навқирон ижод аҳлига ҳомийлик қилиб, уларни бир бирига аҳиллик ришталари билан улаб юрадиган беназир инсон Шухрат aka билан боғлиқлик томони бор. Ўшанда устоз кўп жилдлик “Танланган асарлар” китоби зарварафига “Ўғлим” деб бошланувчи дастхат ёзиб (уларни домла тақдим этган кўплаб асарлари қаторида китоб жавонимда асраб-авайлаб сақлайман), бераркан:

– Москвада ўқийдиган сенга ўхшаш шогирд ўғлим бор. Оти Муҳамадали, яхши шоир! – дея таъкидлаб қўйгандилар.

Шухрат домланинг ажойиб инсоний фазилатларини таъриф этиб, кўп ёзганман. Яхши одамлар ҳақида қанча ёзсанг, шунча оз. У кишининг нурли қиёфаси кўз олдимда янгидан номаён бўлаверади. Шухрат aka ўта қўли очиқ, меҳр-оқибатли, шу билан нозиктаъб инсон бўлиб, биз “мусоифир” ёшларнинг бошини силаб, кўп яхшиликлар қилган, елиб-югу-

риб, тўйларимизни ўтказиб берган. (Айтишларича, А.Қаҳҳор ўлимни-дан олдин биз қатори яна биринки қаламкаш номини тилга олиб, “Шуҳрат, шулар ота-онасидан йироқ, бир нарсалар қоралай олади. Бевош бўлиб кетмасин, хабардор бўлиб туринг”, дея васият қилган экан.) Баъзан “ишлатиб туравер, катта одам бўлганингда қайтарарсан, ҳозирча менда бори – сеники” деб чўнтакка пул ҳам солиб қўярдилар. (Бундай одат у киши ғоят ҳурмат қиласидиган, баъзан “авлиё” деб атайдиган буюк мусаввир “рассомларнинг Абдулла Қаҳҳори” Чингиз Аҳмаровда ҳам бор эди.) Аҳён-аҳёнда “устозлардан мерос мана шу рўшнолик сабоқларини “катта одам” мартабасига эришиб, ҳеч бўлмаса заррача қисмини бошқаларга раво кўряпмизми”, дея ўзимча ўйланиб қоламан...

Дарвоқе, “москвалик ўғил” ўзим қатори бўлса керак, уни зукко устоз ғойибона бўлса ҳам бекорга таништирганликлари аниқ... Хат ёзай десам, адреси йўқ. Устоздан сўрашга, журъат қайда, денг.

Шу орада Москвада тасвирий санъат сирлари ни ўрганаётган, Чингиз домланинг ўзимиз қатори шогирдларидан бири Шуҳратжон Абдурашидов (раҳматли адабиётга қизиқар, оз-моз ижод қилиб ҳам туради) ёзги таътили тугаб, ўқишини давом эттириш учун Москвага кетадиган бўлиб қолди. Айтишича Муҳамадали билан икки-уч бор учрашган, ётоқлари ҳам яқин жойда экан.

Янги чиққан китобимга қўшиб, у томонларда анча тансиқ ҳисобланувчи битта “Қирқма” қовун ҳам бериб юбордим.

Орадан бир йилча вақт ўтгач, Муҳамадали билан Шуҳрат домла ҳовлиларида, у кишининг оналари-

га бахшида қилиб ўтказилган маракада учрашдик. Бирга “самоварчилик” қилиб, келган-кетганларга чой ташидик.

Назаримда, бу танишим озми-кўпми “Москва таълими”ни олган бўлишига қарамай, ўша содда, бўш-баёв “бўз бола” лигича қолгандай туюлди.

Биз тез-тез учрашиб турардик. Байрам кунлари албатта, телефон орқали бир-биримизни табриклардик.

Кейин Тошкент марказидаги “Ёзувчилар уйи”да бир муддат ёнма-ён қўшни бўлиб яшаб, янада яқинлашиб кетдик.

Оғайнинг омади юришиб, катта бир нашриётга салкам раҳбарлик вазифасига кўтарилди. Бунга албатта “Эркин ака Воҳидовнинг устозларча қилган ёрдами сабаб бўлган” лигини кўп гапирав, анчагача шу сўзни кўпчилик олдида ғуурлангандай қайтариб юарди ҳам.

Кетма-кет китоблари чиқа бошлади. Шубҳасиз, ҳар бир “янгиси”дан таҳсинли сўзлар билан дастхат ёзиб, тақдим этарди.

Энди “Муҳаммадали” эмас, “Муҳаммад Али” дейдиган бўлдим.

Бир куни мактабда у билан ўн йил ёнма-ён ўтириб сабоқ олган яхшигина ижодкор билан Дўрмондаги “Ижод Уйи”да кўришиб қолдик.

– Биз, ўзимиз қатори деб юрсак, учар чиқиб қолди-ку бу синфдошим. Охири бахайр бўлсин! – деди у ҳазилга яқинлаштириб.

Чинданам бу гапда жон бор экан. Оғайнимиз ўзининг бир жилдлик асарлар китобини энг қиммат турадиган ялтироқ қофозда хўп зеб-зийнатлар билан

чиқарди-ю, Алишер Навоийдек зот ғазалларини энг паст навли “газета қоғози”да чоп эттириб, ўта кетган нокамтарликка йўл қўйгани ошкор бўлиб қолди. Рона адабини еди. Турли идоралардан кўп даккилар эшилди. Ишдан кетиши аниқ бўлиб турганда, Эркин аканинг ўзи ҳар бир сўзи қиличдай кескир “опахон” олдига кириб, “қутқариб” қолганини мен яхши эслайман.

ЭСКИ ҲАММОМ – ЭСКИ ТОС

Шўро сиёсатининг сал шашти пасайиб, илиқлик шабодалари эса бошлагач, Эркин ака Воҳидов бир неча бор Америка сафарида бўлиб келди ва қаламни қизил таёққа эмас, ҳақиқат қуролига айлантириб, у мамлакат ҳақида ўз кўрганларини қандай бўлса, шундайлигича баён этиб, кўзларимизни очди. Биринчилардан бўлиб, Ўзбек адабиётида холисоналилкка йўғрилган Америка мавзусини кашф этди, десак хато қилмаймиз. Бари-бир Совет даврининг зуғуми ўз кучида турган ўша пайтлар бундай “қалтис” ишларга қўл уришга ҳар кимнинг ҳам юраги дов беравермасди.

Айниқса, шоир АҚШнинг Сиэтл шаҳридаги Вашингтон университетида ўзбек тили ўқитилиши ҳақида матбуот, телевидение ва радиода чиқиш қилгач, кўпчилик ҳаяжонланди.

Кўп ўтмай, бизнинг она тилимизни мукаммал биладиган аёл Илза хоним Эркин аканинг шахсий меҳмони сифатида Ўзбекистонга ташриф буюрди. Шоирнинг “Илза хонимга” деган бағишлов шеъри матбуотимизда босилиб, ҳамма ёққа тарқади, Америкагача бориб етди.

Сиэтлдаги мамлакатнинг йирик олий ўқув юртларидан бири ҳисобланувчи Вашингтон университети маъмуриятининг расмий таклифига биноан, Эркин Воҳидов икки ой давомида мумтоз ўзбек адабиёти ҳақида кенг қамровли лекциялар ўқи-

да. Бу университетнинг шарқ классик адабиёти бўйича тадқиқот ишлари олиб борувчи профессор ўқитувчилари орасида катта қизиқиш уйғотди.

Яна шуни алоҳида таъкидлаб ўтмоқ керакки, Сиэтл билан Тошкент шаҳарлари орасида ўзаро биродарлик ришталарини боғлаш ҳақида таклиф ўша пайтлар Эркин Воҳидов томонидан ўртага ташланган эди.

Орадан озгина вақт ўтгач, Илза хоним шоири-мизга “профессор”лик унвони билан йилда икки ой давомида маъруза ўқиш “Таклифнома”сини олиб, яна Ўзбекистонга ташриф буюрди.

Бироқ, Эркин ака Ўзбекистон Олий Кенгashi қўмитасида масъул вазифада ишлаётганлиги сабаб, бундай имкониятдан фойдаланишга вақти йўқ эди.

Шунда Илза хонимга “ишончли номзод” таклиф этилди. Бу Муҳаммад Али бўлиб, тайёр “марта-ба” билан Америкада дарс бера бошлади. Арзимас вақт ичида бутунлай ўзгариб кетди. Энди унинг “даврабоши”лари ҳам бошқа бўлиб, “янги устоз”нинг этагидан маҳкам тутган, “эски”ларидан юз ўғирганди.

Бир неча йил тузини ялаб, нонини “туя” қилиб келган Америкага ҳам вафо қилмади бу дўстимиз. У ердаги китобхонлик, аҳоли яшайдиган ҳар мавзедаги маҳобатли кутубхоналар ҳақида ҳавас билан гапирсангиз, Сизга шубҳа билан қараб, “шўроча” танбеҳ берадиган бўлди.

Илза хоним бир-икки бор Тошкентга ташриф буюганида Эркин акани йўқлагани ҳақида эшитиб қолардик. Лекин излаб топгунимизча опахон кетиб қолган бўларди.

Бир куни Илза хоним Андижонда, Бобурга багишланган анжуманда қатнашаётганлигини эшишиб қолдик. Шоир дўстим Абдулҳай Носир иккимиз довон ошиб, Бобур юртига етиб бордик. Хоним билан учрашдик. Лекин “вақти йўқроқ” эканми, ёки биз ҳақимизда бирон “нохушроқ” гап эшитганми, унча рўйхушлик бермай, таниб-танимагандек сухбатлашди.

Тошкентдан Эркин аканинг “саломи”ни айтдикда, ўша заҳоти орқага қайтдик.

Шундан кейин Илза хоним билан алоқалар буткул узилиб қолди.

Фақат унинг номини Мұхаммад Алининг янги раислик лавозими билан табрик ва унинг “сермаҳсул” ижоди ҳақида ёзиб, Америкадан жўнатилган мақтovli мақолалар остида кўриб қолардик, холос.

У ёғини сўрасангиз, бир пайтлардаги ошначилигимиз ҳурмати мен ҳам уни амалдорлик мартабаси билан табриклаб қўймоқчи бўлдим. Ахир ўзим ҳам қарийб 68 ижодкор аъзоси бўлган Бўстонлиқдаги “Озод Шарафиддинов номидаги Ёзувчи далабоғи” раисиман-ку! Телефон қилгандим, ҳар тугул кўтарди.

– Ширкатимизнинг алоҳида ажратилган полиз пайкалида етишган хўй, Москвага юборганимдек “қирқма” қовундан иккитасини олиб, йигирма минутлар ичида етиб бораман, – дедим-да, йўлга тушдим.

Данғиллама қилиб қурилган ҳовлисининг дарвазаси олдида кутиб турган экан, қовунларни мендан олди, ёнидаги ўсмир йигитга берди.

Ичкарига киринг ҳам демай, хайр-маъзурни на-

сия қилиб, йигитча орқасидан йўлга тушганди, бетни қаттиқ қилиб:

– Ҳой, ўртоқ раис, – дедим, – анави дала-боғ қовунларини бекорга келтирганим йўқ. Шуларнинг ҳаққига кўчада эмас, ичкарида айтадиган икки оғиз гапим бор. Кошонангизга кирсам бўладими?

– Бўлади-бўлади, қани юринг! – ўзини ўнғайсизроқ тутиб, ғудранди у.

Олди очиқ айвондаги диванга ўтирдик. Ёшгина қизалоқ чой келтирмоқчи эди, керакмас дея, муддаога ўтиб, дала-боғ Уюшма орқали олинмаган бўлса-да, унинг барча аъзолари ёзувчилар эканлигини унутмаслик, йилда бир-икки бор меҳмонга бориб туриш кераклигини айтдим. Матёқуб ака, Озод акалар “энди орамизда йўқ”ликлари ҳақида гапириб, “Устоз” Эркин Воҳидов тез-тез чиқиб туришларини таъкидлаб ўтдим.

Бу гапларимни у бепарволик билан тинглаётгани шундоқ сезилиб турарди. Айниқса, Эркин ака номини эшигтгач, юпқа лаблари бир-бирига ёпишиб, тиришиб кетгандай бўлди.

Шу ҳолат амалдорлик расаматини хўп жойига қўйиб, менга сўррайганича совуқ назар билан қараб турган рўпарамдаги кимсага қаратса аламлироқ гап айтишимга туртки бўлди:

– Анави, “фаҳрий” бўлиб ҳам, амалнинг қирчани эшаги узангидан оёғини чиқармай келаётган собиқ раис-устозингиз бизларни нуқул “гуруҳбоз”га чиқариб, у ерга бирон марта қадам босмаган эди. Сиз ҳам бирровга бўлса ҳам чиқмагансиз. Бугун олдингизга келишдан мақсадим – ҳаммага баробар раис сифатида устоз “Озод Шарафиддинов номи-

даги Ёзувчи дала-боғ"имизга ташриф буюрсангиз, бир чўқим ош билан кутиб олишга қурбимиз етишини билдириб қўйиш эди. Яна, унугиб юбормаган бўлсангиз, аввалдан таниш-билишлик ҳурмати бир нарсани айтиб қўяй: бу амал дегани "тахти равон" курсисида, тўғрироғи, асов жонивор қоринбоғига боғлаб қўйилган эгарда ўтирган одам учун бир шаталоқ билан қаерга бориб тушиши номаълум, омонат нарса. Ўша, вақтингчалик амалдан фойдаланиб, кимки Эркин акадай одам номига дахл қилса, бир кунмас бир кун шармандаси чиқиб, ўзи хор бўлиши аниқ. Гапим шу! – дедим-да, ўрнимдан турдим.

У мени бирон гап айтмай, совуққина кузатиб қўйди.

Шундан бери муносабатларимиз яхши эмас.

Дарвоқе, янги раис ўз иш фаолиятини бу ерда учтўрт йил ичида "ўралашиб" қолган "ишончсизроқ" кишиларни бирма-бир бўшатиб, ўзига "яқин"ларни атрофига тўплашдан бошлади. Бош маслаҳатчиси "фаҳрий" эди.

Камтарлиknи ҳам аввалгидай йиғишириб қўйганди.

Барчага мана, қўриб қўйларинг, дегандай раисликнинг дастлабки ойларидаёқ "Мен ўзим, ўзим" деган номда каттагина китоб нашр эттириди-ю, фақат "ўзи"ни ўйлайдиган одат чиқарди. Кўпчилик ёзувчилар (камина қатори) 15-20 йиллар давомида лоақал битта "расмий" суратда асарини бостиrolмай, овора-ю сарсон бўлиб юрган бир пайтда, у ўз китобларини жилд-жилд қилиб, қайта бостириш билан овора бўлди. Сал кам бир йил давомида гиштдай-ғиштдай, тўққизта китобини чоп эттириб,

дўкон пештахталарини тўлдириб ташлади. Вилоят “бўлим”лари орқали олий ўқув юртлари, коллеж, мактабларга тарқаттириди. Албатта, “текин”га эмас. Адабий газеталар авваллари эътибор ҳам берилмаган “ўртамиёна” асарларини кўкларга кўтариб, тақриз босиш билан овора.

Юшманинг катта залида ўтказилган проза муҳокамасига бағишлиланган йиғилишга узоқ йўл босиб, атайин вилоятдан келган шекилли, туппа-тузук мунаққид минбарни гулдиратиб “Раисимизнинг шу йил мобайнида ўқувчилар ҳукмига ҳавола этган барча (9 та) асарларини (!) “Мустақиллик даври адабиётининг олий даражадаги энг яхши китоблари” деб эълон қилинишини сўрайман” деса, шу ердаги янги лавозимга яқинда тайинланган ходим “Раҳбаримизнинг ҳар бир асари келинлар сепига қўшиб берса арзийдиган дурдонадир. Буни анъана даражасига кўтариш керак”, деб бор овоз билан гапирди.

Шубҳасиз, бошқалар ҳам қараб туришгани йўқ.

Бундай, қуруқ аравани олиб қочишидай мақтовлар садоси Чигатой қабристони сал яқинроқда бўлиб, у ерга етиб борганида Абдулла Қаҳҳор гўрида тик турган бўларди. Дарвоҷе, бир пайтлар тили “аччиқ” шу одам бундай “пахта қўйиш”да ҳеч нарсадан тап тортмайдиганларни “Қўйиб берсанг, жунини тескари қилиб юборишдан тоймайдиган ялоқи” дея таърифлагани кўпчиликка яхши маълум.

Адабий “салоҳият” бобида гўшанка остонасида турган куёвни қўяверинг, келинчаклар ақли-хушини олиб, Навоий, Қодирий каби барча даҳоларни бир чўқишида четга чиқариб қўйган Раис жаноблари-

нинг шу йиғилишда савлат тўкиб ўтирганини бир кўрсангиз эди... Қани, давринг келди, суриб қол, Муҳаммад Али, дейдиган бир мард топилса!..

Шу ерда камтарлик бобида Қаҳҳор домла номи билан боғлиқ бўлган ибратли бир воқеани эслатиб ўтишга тўғри келади; Ҳожиакбар Шайхов янги очилган “Адид” нашриётига раҳбар этиб тайинлангач, Эркин Аъзам учовлашиб, устознинг рафиқалари, онахонимиз, кўп доно аёл Кибриё (Қаҳҳорова) хузурларига “оқ фотиҳа” олиш учун боргандик. Ўшанда опахон “Ҳожиакбар ука, Абдуллажон акангиз Ёзувчилар Уюшмасига раис этиб сайланган куннинг эртасига нашриётларга бориб, одамлар “китобини чиқариш учун раис бўлишни кутиб турган экан-да”, деган хаёлга бормасин деб, янги қўлёзмаларини қайтариб олиб келганлари эсимда. Сиз ҳам, мана шу томонларга эҳтиёт бўлиб, ўзингизни камтар туting”, дегандилар.

Камтарликнинг пайи қирқилиб, ман-манлиқ, ялтоқилик авжга чиқкан жойда аҳиллик бўлмайди, хусумат авж олади, ҳар қандай яхшиликка йўғрилган эзгулик маҳв этилади, деганларидек, Уюшмада яна аввалги “Эски ҳаммом – эски тос” “даври” бошланган эди.

ПИНҲОНИЙ ТАЗИЙҚЛАР

Эркин ака тилимизнинг ўта жонкуяри, ҳатто кўпчилик гурунгларда шу соҳанинг пешқадам мутасаддиларини ҳам лол қолдирадиган даражада фикрлаш доираси кенг одам эди.

Буни Индиана университетининг профессори Билл Фирман (Билолиддин Фармон) домла айтган гаплар яна бир бор исботлаб турибди.

Устоз Ўзбек тилининг “буюк тиллар”дан не чоғлиқ бойроқ эканлигини қатор жонли мисоллар орқали исботлаганларида, ҳар қандай “тилчи” бирон ортиқча сўз айтишга журъят этолмай қоларди.

Шоирнинг яқин дўстлари, шу соҳага дахлдор кўпчилик олимлар “давраларда куюниб айтадиган сўзларингизни қаламга туширинг” дейишса, ҳазил аралаш “Ҳозирча нонларингни яримта қилмоқчи эмасман, вақт-соати келса, бир гап бўлар”, деб жавоб қайтарганларини кўп эшигтанман.

Ниҳоят, “Сўз латофати” бошқа бирон газетада эмас, кутилмаганда “Китоб дунёси”да кетма-кет босилиб чиқа бошлади. Бу кимларнингдир ғашига тегди, албатта. Таҳририятга қўнғироқлар бўлди. (Балки, бош муҳаррир синглимиз ана ўшандан сўнг юрак олдириб қўйгандир!)

Барибир яхши нарса, яхши-да! Кўп ўтмай “Сўз латофати” китоби “Ўзбекистон” нашриёти томонидан китоб ҳолида чоп этилиб, дунё юзини кўрди.

Илмий-бадиийликни бир-бирига боғлаб, лутф услубида ёзилган бу асар “шоҳу гадони ҳам” деганларидай, ҳаммани маҳлиё қилиб қўйди.

Кўпчилик илм аҳли бир овоздан тилемизга оид Маҳмуд Қошғарийнинг “Девону луғотит-турк”, Алишер Навоийнинг “Муҳокамат ул-луғатайн”дай чўнг рисолаларидан кейин Эркин Воҳидов томонидан уларнинг бардавоми қилиб, “Сўз латофати” яратилганини тан олдилар.

Ҳар беш юз йил орасида пишиб, етилиб сайқал топган туркий, яъни ўзбек тили қадр-қиммати, бойлиги, салоҳиятини намойиш этиб турувчи мумтоз асарлар қаторига киритдилар.

Таниқли академик олимларимиздан бири юқори минбардан туриб, “Сўз латофати” тилемиз қадрини яна бир юксак поғонага кўтарадиган “академик асар” бўпти. Шунинг учун Эркин Воҳидовни бемалол ўз сафимизга олсак бўлаверади”, деб айтгани ҳам шуни исботлаб турибди.

Шундай таҳсинлар баҳона Уюшма масъулларидан бир-икки ходим ҳамда китобни чоп этган нашриёт ҳамкорликда ижодкорлар даргоҳининг “Катта мажлислар зали”да “Сўз латофати” тақдимотини ўтказиш ҳақида бир фикрга келдилар. Тақдимот ўтказиладиган куннинг вақт-соати ҳам белгиланиб, кўпчиликка эълон қилинди.

Айни ўша кун биз Уюшма биносига яқинлашганимизда Эркин ака уловни йўл бўйидаги чойхона-қаҳвахона қаршисида тўхтатишни сўрадилар.

– Ҳали, ярим соатдан зиёд вақт бор экан. Биз Анваржон (Обиджон), Хуршидjon (Дўстмуҳаммад) лар билан чойлашиб ўтирамиз. Сиз тепага кўтарилиб, аҳаволни билиб чиқинг-чи! Яна, аввалгидай “кел” дейдиган одам йўқ аҳволга тушиб ўтирмайлик.

Устоз бу билан нимага ишора қилаётганини дарров сездик.

Ха, ўшанда, Мұхаммад Юсуф яшаган бинога ёдгорлик пешлавҳаси очилиш пайтида йиғилғанларни ҳайратта солған хунук воқеа рўй бериб, барчанинг ғазабини қўзғаганди.

Эркин ака бироз бетоброқ эдилар. Уюшмадан котиба қиз яна қайта қўнғироқ қилиб, албатта бугун соат 11 да бошланадиган шоир Мұхаммад Юсуф “тадбири”да қатнашишлари зарурлигини таъкидлади.

Албатта, бу ҳақда менга ҳам “хабар” етказишганди.

Устоз Гулчехра келинойининг монеъликларига қарамай, бунақа маросимларда кўпдан бери қатнашолмаётгандиллари (аслида таклиф этилмасдилар), қолаверса, Мұхаммад Юсуф яқин шогирдларидан эканлигини айтиб, кийина бошладилар.

Шаҳар марказидаги Дарҳон мавзеида шоир бизга анча вақт қўшни бўлган. Икки кунчадан бери у яшаган бинога ёдгорлик пешлавҳаси ўрнатиш ишлари олиб бориларди.

Биз сал барвақтроқ етиб келдик. Ҳали кўпчилик йиғилмаган экан. Эркин ака қисқагина нутқ сўзлаб, ёдгорликни очилиш маросимини бошқаришлари ҳақида маълум қилишгани учун мендан шоир бу ерда қачондан бери неча йил яшаганлиги ҳақида қўшимча маълумотлар сўраб, ёзиб олдилар.

Ниҳоят, Уюшма раҳбари билан унинг атрофида-ги икки-уч ходимлар келишди.

Раиснинг кўзи бир нечта ижодкорлар қаторида турган Эркин акага тушди. Бироқ эътибор бермай, “юқори”га қўйилған микрофон олдига келди. Кимдир “Эркин ака шу ердалар” деган овоз берди.

Аҳмаджон Мелибоев ҳам “бешинчи ўринбосар”га яқинроқ келиб, шуни тушунтирган бўлди. Аммо, “раҳбарият”нинг иккови ҳам қулоги том битгандай ўзини эшитмаганга солди. Раис, пешлавҳани очилишига бағишланган тантанали йиғинни “очик” деб эълон қилди ва ўзи охиригача бошқарди. Тўғри, бир-икки шоира қизчаларга навбат берилиб, улар шеърлар ўқишиди.

Шу билан тантанали маросим тугади.

Ўйга қайтарканмиз:

– Жуда ғалати бўлди-да, ака! – дедим-у, у кишининг юзига қараб, ҳеч қандай афсус ёки тушкун кайфиятни кўрмадим.

– Бизга нима. Шуни ҳам ташвишини чекамизми! Шоҳ Машраб айтганлариdek, “ўша, бозордаги гап – гап!”... Яхши кўшиқ янграйяпти. Навоий ғазали. Радио қулогини сал бураб қўйинг, – у кишининг овозида юморга хос сокин майинликни туйгандай бўлдим.

Шулар ҳақида ўйлаб борарканман, лифт олтинчи қаватга кўтарилиб чиққанини сезмай қолибман.

Узун йўлак тўридаги мажлислар залига киравериш кенг ялангликка анчагина одам йиғилган. Лекин ичкарига кириладиган икки қанотли “Мажлислар зали”нинг катта эшиги берк эди.

Ҳамма кимнингдир келишини кутарди.

Ниҳоят, бу даргоҳнинг чаққонгина ходимаси сифатида кўпчиликнинг назарига туша бошлаган ўрта ёшлардаги шоира хоним, қўлида дафтар, қалам тутган ҳолда фойега кириб келди. Ҳамма унга қаради.

Аёл худди ўта муҳим расмий хабарни эълон қилаётгандай қатъий оҳангда:

– Уюшма раҳбарига аввалроқдан маълум қилиб қўйилмаганлиги сабаб, тақдимот қолдирилади. Зал банд. Муҳим йиғилиш ўтказилади, – деди-да, дафтар-қалами билан зиппиллаганича қадам ташлаб, бир лаҳзада кўздан ғойиб бўлди.

Йиғилганлар ичидан университетдан, тилшунослик институтидан таниқли олим ва ўқитувчи-домлалар ҳам кўпчиликни ташкил этарди. Ҳамма ноилож тарқала бошлади.

Мен ҳам уларга эргашдим.

“Чойлашиб” ўтирганларга воқеа тафсилотлпарини қисқача баён қилиб, “Ўша, бозордаги гап – гап”, деб қўйдим.

Кейин, охирги шу сўзни айтганимдан бироз афсусландим. Устоз хомуш тортиб қолгандилар. Буни Анваржон, Хуршид уччаламиз сезиб турардик.

Анча йиллардан бери давом этиб келаётган зимдан амалга оширилувчи бундай пинҳоний тазийк ва хуружларга қайси юрак бардош бериши мумкин.

Ҳа, устозни юрак оғриғи қийнар ва сурункали тус олиб бораради. Бунга ўзлари ҳам сабабчи эдилар. Баъзилар каби қаериданdir пинҳоний ел чиқиб кетса ҳам,вой-додлаб, шаҳар, Уюшма, ҳатто туман “Шошилинч тиббий ёрдам” ходимларини бошига йиғиб олишни, ойлаб олий даражали, беминнат ҳукумат шифохоналарида ётишни хаёлга ҳам келтирмас эдилар. Бирон марта Эркин ака ҳовлиси олдида “Тез ёрдам” “навбатчилик”да, ёки “шунчаки” турганини кўрган эмасман. “Ҳозир шифокорлар ёрдамига мухтожлар кўп. Шундай пайтда улар вақтини олиш зарурмикан” деган гапни кўп айтардилар.

ГУМРОХ

Бир куни устоз тоғ ҳавосидан мириқиб нафас олгилари келаётганини айтиб, Бўстонлиқни эслаб қолдилар.

Чинданам ҳозир айни баҳор пайти бўлиб, тоғларга зумрад ўтлоқлару лола-гуллар ўз пояндозини ёйган палла эди.

Эртасига эрталаб икки ойчадан бери ёстиқдан бош кўтармай ётган одам янги костюм-шим кийиб, галстук тақиб, кўркли бир ҳолатда мени кутиб ўтирган эканлар.

Гулчехра келинойи орқамиздан бизни кузатиб қоларкан:

– Акангизни “куёв тўра” қилиб, яна Наманган томонларга олиб кетиб, толиқтириб қўйманг. Тезроқ қайтинглар, – дея ҳазиллашиб қўйдилар.

Йўл-йўлакай Иброҳим Faфуроғни ҳамроҳ қилиб олдик. Бўстонлиқнинг унча узоқ бўлмаган Майдонтол тоғ этакларини айланиб, тип-тиниқ сувли булоқлар атрофини қоплаб ётган чучмомагул, қоқигул, зумрад баргли ялпизу тоғ райхонларининг ёқимли бўйларидан тўйиб-тўйиб нафас олдик. Гиламдай кўм-кўк қир-адирлар бағрида оловдай товланаётган лолақизғалдоқларга завқланиб боқдик. Қозоқ овулидан қимиз сотиб олдик.

– Яна кўрсатадиган нималарингиз бор? – дедилар Эркин ака завқиёб бир кайфиятда.

Машинани тўғри Паркент томон ҳайдадим. Сўқоқ ва Намданак қишлоқларига элтувчи йўл атрофла-

рида бодомзор, ўрикзор боғлар борлигини билардим. Чинданам шу боғлар чамандай гулга бурканниб ётарди. Икки оқсоқол ҳамроҳим бодомзордан ичкарилаб, пушти ғунчаларини ёриб, энди гуллай бошлаган ўрик дараҳтлари оралаб кетишиди. Эркин ака ер бағирлаб ўсган йўғонгина бир ўрик танасига ўтириб, гулга бурканган нозик навдачалардан бирини ўзлари томон эгганча ҳидладилар ва мен томон қараб одатдагидай устимдан “шикоят” қила кетдилар:

– Ҳамма қилган иши яхши! Лекин доим бир камчилиги бўлади. Иброҳимжон, қаранг, шу укангиз ўзи билан битта фотоаппаратни олиб юрса, бўларди-ку!

Мен ўзимни оқлаган бўлдим:

– Бир ҳафтадан кейин бу ўрикзор ёппасига гулга бурканади. Ўшанда биргина фотоаппарат тугул, киноаппаратни ҳам олиб чиқаман.

– Қани қўрамиз, – деб қўйдилар Эркин ака ва қўл соатларига қараб, – сафаримиз анча чўзилиб кетганга ўхшайди, энди қайтсан бўлар, – дедилар.

– Мен Маҳмуд Тоирга телефон қилиб, йўл-йўлакай қўришиб кетишни мўлжаллаб тургандим. Энди у киши хафа бўладиган бўлди-да!

– Эзгуликнинг кечи йўқ, янаги сафар келганда, баҳорий кайфиятдаги суратга ҳам бирга тушамиз, – деди Иброҳим ака беозоргина товуш билан гапимни бўлиб.

Чирчик шаҳри орқали Қиброй марказига кириб келганимизда бирдан Эркин ака ўзларини ёмон ҳис эта бошладилар.

Туман “Тез ёрдам” маркази шифокорлари у ки-

шини шошилинч равишда Тошкентдаги республика кардиология Маркази томон олиб кетишиди.

У ерда зудлик билан иирик мутахссислар иштирокида консилиум ўтказилиб, қўйилган таҳхис аҳвол анча жиддийлигини кўрсатди. Тезда Истроилга олиб борилмаса бўлмайдиган ҳолат. Чунки, юрак “стимулятори” бир неча йил аввал Тел-Авивда қўйилганди.

Шанба-якшанба кунлари элчихоналар ишламайди. Барча катта-кичик ходимлар дам олади.

Нима қилмоқ керак!

Шундай пайтларда орамизда фидойи, яхши инсонлар борлигига шукроналар қилиб, улар ҳаққига минг бора таҳсинлар айтгинг келади.

Мамлакатимиз Ташқи Ишлар Вазирлигининг масъул ходими, анча яқинлигимиз бор Илҳомжон Неъматовга телефон қилдим. У киши зудлик билан кардиология Марказига етиб келди. Вазият анча жиддийлигини кўргач, вақт ярим тун бўлишига қарамай, Истроил элчихонаси билан боғланиб, у ердаги масъул ходим билан “норасмий” учрашув ўтказди.

Мисли кўрилмаган тез фурсат ичida барча ҳужжат-қоғозлар тайёрланиб, бемор азонги самолёт рейси билан Тел-Авивга учирилди.

Ўз касбининг моҳирлари бўлган исроиллик шифокорлар бир неча соатли умри қолган шоиримизни ўлим чангалидан кутқариб қолишиди.

Каттаю кичик барча ижод аҳли, узоқ-яқиндан келган биродару муҳлислар Эркин акани омонлик билан қутлаш учун зиёратга келдилар.

Улар шунчалик кўп эдики... беморни толиқтириб

қўймаслик чораси кўрилиб, фақат маълум муддатдагина у киши билан кўришиш вақти белгиланди.

Шоирни сиҳатгоҳда ҳам ором олиб, соғлигини тиклашга қўйишмас, бир дақиқа сухбатини олиб, дийдорлашиш илинжида юрганлар кўп эди.

Бир кун устоз кутилмагандан менга:

– Уюшма борми? У ерда ишлар қалай? – деб қолдилар.

Билдимки, бу гапни нимадандир умидворлик билан эмас, янги бошлиқ тинчми, омонми деган манода айтиётган эдилар.

– Ҳа, у ердаги Сизни доим “устозим” деб юрадиган ҳозирги раҳбар соғ-омон. Чопқиллаб, ишлаб юрибди, – дедим-да, кутилмагандан оғзимдан, – Сизни сўраб туради. Бир куни бу ерга келган экан, навбатчи реанимацияда эканлигингизни айтиб, киритмабди, – деган ёлғон сўз чиқиб кетганини сезмай қолибман.

Ўша куниёқ “ёлғоним”ни оқлаш мақсадида, унга телефон қилдим.

Эркин аканинг Истроилга бориб келганликлари, ҳозирги аҳволлари ҳақида муҳтасаргина “тушунтириш” бериб:

– Бу билан учинчи марта илтимос қилишим. Олдингизга кириб, гапирдим ҳам. У кишидан бир хабар олиб қўйсангиз, яхши бўларди. Бир пайтлар “устозим” деб, атардингиз. Яна, катта-кичик барча ижод аҳлининг бошлиғи – раиссиз! Бу Сиз учун лозим, – дейишим билан, совуққина, дашномли қилиб:

– Беш юз минг ёрдам пули билан ходимимни юбордим-ку! Яна нима керак, у одамга? – деса бўладими...

“Сендей нонкүр гумроҳдан ҳеч нарса керак эмас”, дея авра-астарини чиқариб, адабини бермоқчи бўлдим-у, бирдан йигирма йилча аввал ҳозир устози бўлмиш “фахрий” тилка-порасини чиқариб юборадиган гаплар айтганим ва ўшалар азобини ҳамон тортиб келаётганим эсимга тушиб кетди-да, жаҳл билан гўшакни жойига қўйдим.

КИТОБДАН ЮЗ ЎГИРГАНЛАР

Устоз умрининг саксон йиллик қутлуғ санаси яқинлашиб келарди. Бундай пайтда ҳамма жойда улуғ ёшни қаршилаётган, айниқса эл назарига тушиб, унинг фахрига айланган ҳар қандай кишининг ҳурматини ўрнига қўйиб, эъзозлаш, муборакбод этиш қадим-қадимдан бор анъана. Уни ҳеч ким таъкиқламаган, таъкиқлай олмайди ҳам.

Муборак ёш арафасида ҳамон соғлиги ёмонлашиб бораётган қадрли инсоннинг бир гурух дўст-биродарлари ва биз шогирдлари томонидан устоз кўнгилини кўтариб, руҳий мадад бериш мақсадида “Замондошлар нигоҳида” рукни остида, тўёна китоб чиқаришга аҳд қилинди.

Одатда, шундан кейин ким ёзиб бераркин деб, кўпларга мурожаат қилиш бошланади. Аммо, бизда бу муаммо туғилмади. Эркин aka ҳақида ёзилиб, турли газета-журналларда эълон қилинган, адабиётшуносликка оид ўнлаб китоб саҳифаларидан ўрин олиб, у кишига ташланган “нигоҳлар” шунчалик кўп эканки, бир нечта жилд залворли китобга жо бўлгудек.

Шунга қарамай, адабиёттимизнинг турли бўғин авлодига мансуб вакиллари Эркин аканинг устозлиқ, одамийлик ва ибрат бўларли кўпдан-кўп фазилатлари ҳақида ёзиб кела бошладилар. Улар ҳам бир-бирини қайтармас қизиқарли мавзуларда бўлиб, салмоқдор бир китобга етарли эди.

Зукко мунаққид Иброҳим Ғафуров бошчилигига адабиёттимизнинг таниқли вакилларидан иборат нуғузли ҳайъат тузилиб, бир неча юз муаллифдан 80 кишининг ёзганлари “танлов” асосида китобга киритиладиган бўлди.

Улар орасида нафақат “адабиётчилар”, илму нужумнинг турли соҳалари бўйича таниқли намоёндалар, дину диёнат пешволаридан уламолар, чет эллик олимлар, шоирнинг мухлислари ҳам бор эди.

Китоб шоир сатри “То қуёш сочгайки нур” номи остида тайёр ҳолга келтирилди.

Бу хайрли ишдан Уюшма раисининг хабардор этиб, иложи бўлса, икки оғиз “сўзбоши” ёздириб олиш мақсадида китоб мұхаррири унинг ҳузурига кирди-ю, раҳмат ўрнига дағдағали дашномга учради.

– Ҳозир бундай китобларни Уюшмадан беруҳсат босиб, тарқатиш таъқиқлаб қўйилган. Хўш, бу ўзбошимчалик билан ким шуғулланяпти? Қайси нашриёт босмоқчи? Билсак бўладими?

Яхши ниятлар билан кириб, кутилмаган бундай зуғумга учраган бечора мұхаррир укамиз нима жавоб қайтаришини билмай, “китоб ҳали тайёр эмас, маслаҳат учун олдингизга киргандим, холос” дея кутулиб қолди.

Шундан кейин кўпчилик, ҳатто Уюшманинг мастьул бир-икки ходимларидан “гуруҳ” тузилиб, китоб учун “жавобгарлик”ни Иқбол Мирзо ўз зиммасига олган ҳолда раисдан “яширин” ҳаракат бошланди.

“То қуёш сочгайки нур” ўз салмоғига яраша энг салобатли, қандайдир ҳалқаро китоблар танловига тақдим этиладигандай, олтин ҳарфлар билан (худди бир пайтлар Лаҳорда босилган ҳазрат Навоий

куплиётидек) жилоланган, ярқ этиб, кўзга ташлана-диган ҳолда катта нусхада босилиб чиқди.

Бунинг учун устозга ўзининг фидойи шогирдлик бурчини садоқат билан адо этган ношир укамиз Ашу-рали Жўраевга минг тасаннолар айтгимиз келади.

Китобнинг иккита намуна нусхасини Эркин ака ётган сиҳатгоҳнинг алоҳида бўлмасига олиб бордик.

— Хайрият, — деб, турдилар-да, ярим жилмайиш билан, — бу китоб “Замондошлар хотирасида” эмас, “нигоҳида” бўлиб чиқсанига шукур, — сўзини айтиб, бироз сукутдан сўнг менга қарадилар, — бунинг ҳам тақдимотини ўтказамиз, деб ортиқча ташвиш орттириб олманглар!

— Энди, ёқалашиб бўлса-да, аввалгидай уялиб қолмаслик учун биринчи тақдимотини ўтказиб, иккинчисига ўзингизни таклиф этамиз. Ҳали бу китоб қўлма-қўл бўлиб кетади, — дедим.

“Фахрий”нинг ўшандаги (балки, кайф устида) мени “Давлат душмани”га чиқариб айтган сўзларидан сўнг анча вақт Ююшманинг янги биносига қадам босмай кетгандим. Лекин нима тадбир бўлса, котиба қиз менга телефон қилиб, Эркин ака иккимиз қатнашишимизни сўрарди.

Мұҳаммад Али раис бўлганидан кейин ҳам шу давом этди. “Қора рўйхат”дан ўчганимиз ростмикан десам, ҳамон бирон газетада ёки журналда (“Муштум”ни ҳисобга олмаганда) номимиз кўринмайди, Бу менга алам қила бошлади.

Ююшма фақат “фаҳрий гуруҳи”дан иборат эмаску, нима тили қисиқлик жойим бор дея, унинг устига

йўлимни тўсадиган қоровул ҳам йўқлиги сабаб, бу даргоҳга тез-тез келиб турадиган бўлдим. Айниқса, кўнглимга ёқсан бирон тадбирда қатнашишни канда қилмасдим.

Кечакотиба қиз бугун соат 14 да “Танқидчилар кенгаши”нинг йиғилиши бўлишини айтганди.

Бу соҳанинг одамлари “қизиққонроқ” бўлади, бирон “янгилик” эшитсам керак, деган ўйда Эркин ака ётган муолажаҳонадан чиқдим-у йўлни Үюшма томон солдим.

Залда жим-житлик, ҳеч ким йўққа ўхшарди. Эшикни қия очиб, ҳар тугул йиғилганлар борлигига ишонч ҳосил қилдим. Сал кечикканим маълум бўлди. Аста ичкарига кириб, мажлисгоҳнинг “томушабин”ларга мўлжалланган олд қатордаги бўш стуллардан бирига ўтиредим.

Тўрда, яқинда ўриндоши курсисини эгаллаган “Танқидчилик бўлими” сардори, худди эски даврдаги пахта дала-шийпонига аъзоларини йиғиб, мажлис ўtkазишга шайланган бригадир сингари янги лавозим кайфини сураётгандай елка ташлаб ўтирибди. У ёқ-бу ёққа сарфиш қошларини чимириб, кўз ташлаб қўяди. Залда ғинг этган товуш йўқ. Фақат минбарга чиқиб олган ўттиз ёшлардаги аёлнинг (қайсиdir олий ўқув даргоҳи аспиранти бўлса керак) қофоздан кўз узмай ўқиб берадиган бир маромдаги шикаста овози эшитилиб турибди, холос. Демак “тадбир” яхши ўтмоқда. Буни мажлисбошининг аҳён-аҳёнда ёнверидагиларга ҳазилномо гап ташлаб қўйишидан билса бўлади.

Унинг ўнг томонига яқинроқ қилиб, кўндалангига қўйилган юмшоқ чарм курсида “раҳбарият”дан икки вакил, яъни яқинда раис китобларининг “сепчиси”

бўлиб танилган 60 ёшлардаги бароқкош масъул ходим ҳамда ярим йилчадан бери Уюшмада “бош иш юритувчилик” вазифасида ишлаётган ўша, ҳаммага танилиб бўлган ўрта яшар хоним ўтирибди. Негадир унинг қарашлари бежо, қошлари чимирилган. Қўлидаги қалам билан дафтарчага нимадир ёзиб қўяди.

Мажлиснинг асосий – бошқа қатнашчилари ҳақида ҳам гапирадиган бўлсам, “масъуллар” учун мўлжалланган узунчоқ доира шаклидаги ўринидикларда бугунги мавзунинг кўзга яқинроқ, таникли намоёндаларидан биронтаси кўринмасди. У ердан жой эгаллаганларнинг кўпчилиги шу “соҳа” атрофифида ўралашиб юрадиган 15 киши атрофидаги “ёзувчиномо” (бундайлар ҳозир жуда кўпайиб кетган) лардан иборат эди.

Кўрмай қолибман, шундоқ рўпарамда номдор академик домла ҳам ўтирган эканлар. Гарчи адабиётга тааллуқли бугунги мавзедан сал йироқ бўлсалар-да, бу ерга ташриф буюрганларининг ўзи, йиғилишга анча кўрк бағишлиётгандай эди.

Ўзим қатори ўтирганлар ким эканлигини билмоқ учун, аста орқага назар ташлаб қўйдим. Кўзим ўринидикларнинг тўрт-беш қаторини ола-куроқ бўлиб тўлдирган қиз-йигитларга ҳамда улар рўпарасида қаддини ғоз тутиб ўтирган, ранг-рўйи мўътадил Африқо иқлимида ўсиб-улғайган хабаш йигитларига сал ўхшаб кетадиган домла Баҳодир Каримга тушди. Албатта талабаларни шу киши бошлаб келгани аниқ.

Чамаси бир соатларга чўзилган нутқ тугагач, мажлисбоши уни ўқиб эшиттирган аёлнинг илмий фаоллиги бунданам юксак бўлишига тилаклар

билдириб, навбатда турган воизлар номини бирмабир ўқиб эшиттирди. Улар кўпчилик эди. “Беш минутдан ошмаслик” шарти қўйилди.

Нотиқларнинг айтадиган гапи бир-бирига ўхшаш – қайтариқдан иборат эди.

Охири, “бригадир”нинг тоқати-тоқ бўлди шекили, ҳамманинг диққатини қўлидаги соатга қаратиб “Мажлислар зали”дан фойдаланиш муддати тугаган”лигини эълон қилди-да, “Кимда нима таклиф бор? Қани, айтиб олсин”, деди.

Мен ўрнимдан туриб:

- Таклифим бор, – дедим.
- Хўш?

Қўлимдаги “То қуёш сочгайки нур”ни баланд кўтариб, ўтирганларга кўрсатдим.

– Мана бу китобнинг ҳали тафти босилмаган, тандирдан янги чиқандай намуна нусхаси. Эркин aka Вохидов ҳақида республикамизнинг қарийб саксон кишидан иборат алломалари, машҳур кишилари юрақдан чиқариб ёзган қалб сўзларидан ташкил топган. Ҳозиргина бу китобни сал наридаги сиҳатгоҳда даволанаётган шоир қўлларига етказилди. Фоят хурсанд бўлдилар. Келинглар, шунинг ёнига яна бир хурсандчилик қўшайлик. Бирор кунни белгилаб, озгина вақт ажратиб, мана шу китоб тақдимотини ўтказайлик. Ўтган сафар “Сўз латофати” тақдимоти қолдирилиб, бироз хижолатчилик бўлганди.

Шу сўзни айтишим билан, хоним ўрнидан шартта туриб, қўлидаги қаламни мен томон силкитганича димоғдан чиққан дашномли товуш билан бақира кетса бўладими:

– Бу айтилган гаплар ёлғон. Уюшмага тұхмат! Ўша китоб тақдимоти Миллий кутубхонада катта йиғилиш қилиб, үтказилған... Бугун бу ерга танқидчилигимизга оид масалаларни ҳал қилиб олиш учун түппланғанмыз. Мавзуни чалғитишдан мақсад нима?...

Яна бу аёл бидирлаб, нималардир дея, мени лойга қоришириб ташлагудай гаплар айтди. У, шу ахволда әдіки, бирон “ортиқча” гап айтишнинг иложи йўқдай... “Ўша тақдимот Миллий Кутубхона жамоаси билан китобни чоп этган “Ўзбекистон” нашриёти ҳамкорлигига үтказилған. Сиз шунчаки “кузатувчи” сифатида қатнашгансиз, холос” деганимда борми... мени юмдалаб ташлашдан ҳам тоймас важоҳатда эди.

Яқиндагина ҳар кўрганда икки қўлини қўксига қўйиб, “Устоз-устоз” дея букилиб, салом бериб ўтадиган аёлнинг ахволини қаранг! Худди бир пайтлар ҳаммамизни дағ-дағ титратган “опахон” Раъно Абдуллаеванинг ўзгинаси-я...

Бундан ҳам мени ҳайратга солған нарса шу бўлдики, доира стол атрофида ўтирганлар ҳамон жим-жит. Лоақал биронтаси бошини хиёл кўтариб, жилоланиб турган китоб томон қараб қўйса-чи... Анаву, калта соқол “академик”ку, ҳамон калласини тиззалари қўзига ҳам қилганича ўтириби. Гўё «кўрмайин ҳам, куймайин ҳам» дегандай! Буларга нима бўлған ўзи...

Худди шу пайт беихтиёр, бир пайтлар Эски Жўва қассоблари билан бўлған “учрашув” кўз олдимда гавдаланиб кетди. Ҳа, ўша пайтлар бу хилдаги “маърифий-адабий” тадбирлар үтказиш кенг

урф бўлган, ҳар соҳанинг мутасаддилари бунга эътибор қаратишарди.

Миразиз Аъзамнинг қўшниси, машҳур бозордаги гўшт расталарининг бошлиғи бўлиб ишловчи киши, кўпдан бери режалаштириб юрган “Тарбиявий соат” гурунгига бизни таклиф этиб қолди. Зоҳир Аъламни олиб, уч кишилашиб бордик. “Раста”лар орқасидаги мўжазгина ҳовли ўртасига қурилган шийлонформа айвонга ўн бешга яқин ёш-яланг ҳамда ўрта яшар кишилар йиғилишди. Ким қандай китоб ўқиши ҳақида гурунг қилдик. Миразиз ака шеърлар ўқиди. Мен ҳам ёзувчи устозлар ҳақидаги бир-икки қизиқ воқеалардан ҳикоя қилиб бердим.

Навбат Зоҳир Аъламга келганда доим ўзи билан олиб юрадиган бўз халтасидан бир нечта китоб чиқариб:

– Мен ортиқча гапириб, вақтларингни олмайман. Мана бу “Афандининг қирқ бир пашшаси” деган китоб яқинда чоп этилди. Зерикканда, ўқирсизлар. Лекин гўшт ўрашга ишлатиб юборманглар, – дея олдинги қаторда ўтирганларга узатди.

Ўшанда китоб қўлма-қўл бўлиб кетганини, ҳамма унга ҳавас билан қараб, вараклаётганини кўриб, бизлар ҳам ўз китобларимиздан олиб келмаганимиздан афсуслангандик...

Ҳозирги манзара эса... Бу ўтирганларни нима жин урган ўзи? Ҳукумат адабиётга катта эътибор, ёзувчиларга яхши шарт-шароит яратиб бераётган бир пайтда кунимиз мана шуларга қолдими?! Ё, кимдир бирон кор-ҳол рўй беришини олдиндан сезгандай, буларнинг ақли ҳушини зирҳлаб, яна қаеринидир “бураб” қўймадимикан?

Худди шу фикр хаёлимдан ўтиб турган пайт Баҳодир домла чопиб олдимга келди-да, китобни авайлаб қўлимдан олиб, “чиқдими, хайрият” дея, юзига босди. Унинг ёнига қизлар, йигитлар чо-пиб келишди. “То қуёш сочгайки нур” худди ёрқин ёруғлик шуъласи янглиғ улар ўртасида қўлма-қўл бўлиб кетди.

Узоқдан мажлисбошининг бўғиқ овози эшитилди:

– Бўлди, бўлди. Мажлис тугади. Ҳамма тарқал-син.

ЭҲТИРОМ

Наманган вилоят ёзувчилар бўлими котиблигиги-
ни ўта жонкуяр, ижоди ҳам жўшқин йигит ўз елка-
сига олди-ю, узоқ йиллар давомида биқиб ётган у
ердаги ижодий муҳит кўтаринки бир даврни бош-
дан кечира бошлади.

Ўзбек адабиётининг кўплаб таниқли намоён-
далари учун “йўллар очилиб”, улар тез-тез таш-
риф буюрадиган, мушоира ва адабий учрашувлар
ўтказиш анъана тусини оладиган бўлиб қолди.

Бундан уч йилча муқаддам вилоят ҳокими те-
атр залини тўлдириб ўтирган одамлар олдида
Эркин акага қарата катта олқишлиар билан кутиб
олинган, “Энди Сизнинг номингиз билан боғлиқ би-
ронта тадбир бизнинг Намангандан бошланмаса,
хафа бўламиз”, дея айтган сўзлари масъул котиб
қулогига қуюлиб қолган эканми, Устозни ҳар йили
Наманганга таклиф этиб, телефон қиласи, ило-
жини топса, албатта, ўзи келиб-кетади. Тўғрироғи,
Эркин ака “номи билан боғлиқ” нима тадбир бўлса,
Намангандан бошланишини истайди.

“То қуёш сочгайки нур” китоб дўконларига тар-
қаб, сотила бошлагач, котиб унинг илк тақдимо-
тини ўзларида ўтказиш режасини туза бошлади.
Айни шу пайтлар президент Ислом Каримовнинг
“Ўзбек тили ва адабиёти университети” ташкил
этиш ҳақидаги тарихий қарори чиқиб қолди. Бу, ўз
йўлида икки муҳим мавзуни бир-бири билан ўзаро

боғлаган ҳолда кенгроқ қилиб ўтказиш имконияти-
ни яратди.

Наманганлик масъул котиб мўлжалдаги бу тад-
бирдан Уюшма раҳбарларидан бири Иқбол Мирзо-
ни хабардор этди. Эркин ака хузурида бўлиб, китоб
тақдимотига оқ фотиҳа олди.

Таникли адабиётшунос олим Иброҳим Ғафу-
ров, шоир Анвар Обиджон, Шодмон Отабеклар
бу тадбирда иштирок этадиган бўлдилар. Ҳатто
Уюшма (мендан ташқари) уч кишига “пулли йўл-
ланма” берадиган бўлди... Бироқ, ишбоши хоним
қулоғига, янги чиққан президент қарори билан
Эркин акага “тааллуқли” китоб тақдимоти ҳам қў-
шиб ўтказилиши ҳақидаги хабар чалиниб қолган
эканми, йўлга тушадиган кунимиз, “кассада пул
йўқ” лигини баҳона қилди, оддийроқ, расмий қоғоз
ҳам ёзib беролмаслигини айтди.

Наманганликларни биласиз, меҳмон кутишни
жойига қўйишади. Биз хаёлимизга келтирмаган
шод-хуррамлик, мусиқа садолари остида бола-
лар қўшиқ айтиб, рақс тушиб (ичимизда уларнинг
машҳур шоир ва ёзувчиси Анвар Обиджон ҳам бор
эди-да) кутиб олишди.

Вилоят телевизорчилари шайланиб туришган
экан, зукко мунаққид олимимиз Иброҳим Ғафуров-
ни дарров студияга олиб кетишди. Президентимиз
томонидан чиқарилган энг муҳим, катта аҳамиятга
эга қарор ҳақида ҳар томонлама таҳлил этилган
интервьюни ёзib олдилар. Ва ўша куннинг ўзидаёқ
эфирга узатиб, экран орқали намойиш этдилар.

Биз меҳмонхонага эмас, ука-жиянларим ав-
валдан ҳозирлаб қўйишган “Эркин аканинг хосхо-
налари”га бориб жойлашдик.

Алоҳида шарт-шароит яратиб, жиҳозланган кенггина, нурафшон бу хонанинг ўзига хос тарихи бор. Раҳматилла Иноғомов учовлашиб ҳар Наманганга келганимизда, шоир шу ижодхонага ўрнашар ва аввалдан тузиб, келинойимиз бошлиқ уч киши томонидан имзо чекиб, “тасдиқланган” “Кундалик режа” (уларнинг айрим нусхаси ўзимда сақланади) бўйича фақат “ёзув-чизув” билан машғул бўлардилар. Анча-мунча сара асарлар шу ерда қоғозга туширилганлигининг биз кўп гувоҳи бўлганмиз.

Яна шуниси ҳам борки, Эркин акага “қарашли” шу файзли “хонақоҳ”га бир пайтлар хорижий қалам аҳли Файз Аҳмад Файз, Азиз Несин, Ғулом Раббоний Тобон, Картал Синг Дуггал, Авасти каби машҳур Ҳиндистон-Покистон, Туркия ижодкорларининг ҳам қадам пойлари теккан.

Биз тўкин дастурхон атрофида мана шуларни эслаб, Эркин ака қулоқларини анча “қизитдик”.

Эртасига Наманган шаҳридаги энг катта, қарийб 1600 дан зиёд ўқувчи таълим оладиган, бир пайтлар Эркин ака билан учрашувга тайёргарлик кўриб, маълум сабабларга кўра қолдирилган Абдулла Қаҳҳор номидаги 26- мактабнинг катта мажлислар залига шаҳар ҳамда вилоят мактаб адабиёт ўқитувчилари, Наманган университети ва бошқа олий ўқув юртларидан профессор-олимлар жамул-жам бўлган йиғилиш “Адабиётга эътибор – манавиятга, келажакка эътибор” шиори остида ўтказилиб, уч соатча давом этди.

Иброҳим Ғафуров яқинда чиқарилган президент қарори ҳақида тўхталиб ўтаркан, адабиётни тарғиб

қилиш, ўзбек тилини ривожлантириш янги босқичга кўтарилиши ҳақида сермазмун нутқ сўзлади.

Олим ўзига берилган кўпдан-кўп қизиқарли саволларга жавоб қайтарди.

Зални тўлдириб ўтирганларнинг кўпчилиги қўлида “То қуёш сочгайки нур” китоби ҳам бор бўлиб, улар Эркин Воҳидовнинг соғлиғи, ҳатто нега биз билан келмаганилиги ҳақида сўрашар, биз имкон даражасида бу саволларга жавоб берар, бироз бетоб ётган шоир бизга оқ йўл тилаётиб, Намангандини соғинганликлари ва қизғин салом айтганликларини муҳлисларга етказишга ҳаракат қилардик.

Бир пайт нуроний отахон саҳнага яқинроқ келиб, шундай деди:

– Биз ҳар куни маҳалла масжидидаги номоз пайти шоиримиз тезроқ соғайиб кетишлиарини худодан тилаб, дуо-фотиҳа қиласмиш. Шу тилак ва саломимизни Эркинжон акага ҳам етказиб қўйинглар.

Шундан кейин ҳофизлар Эркин Воҳидов шеърлари асосида қўшиқ ижро этдилар, Анвар Обиджон шеърлари янгради.

Жажжи болалар ансамблининг чиқишлиари йиғилишга бошқача файз киритди.

Намангандикларнинг эл ардоғидаги шоирга бўлган ҳурмат-эътиқодлари қанчалик баландлигини яна бир бор гувоҳи бўлган терансўз Иброҳим Гафуров қайта минбарга чиқиб:

– Бундай бахт, бундай эҳтиром фақат Эркин Воҳидовга ярашади. Сизларга минг бора ташаккур! – деди, зални тўлдириб ўтирганларга қаратади.

Шу тадбирдан сўнг Анвар Обиджон бир кунлик зарур иши борлигини айтиб, Олтиариқقا кет-

ди. Шодмонбекни ҳам эртага янги китоби бўйича телевидениега берадиган интервьюси бор экан, ўғлининг машинасида Тошкентга кузатиб қўйдик.

НОХУШ ХАБАР

Биз Иброҳим ака билан кечга томон Тошкентга қўнғироқ қилиб, Эркин аканинг аҳволи анча жиддийлиги ҳақида хабар эшилди.

Оромимиз бузилди. Туни билан ухлолмай чиқдик.

Эртаси эрталаб, соат ўнда вилоят телевидениесига бориб, “То қуёш сочгайки нур” китоби ҳақида давра сұхбати ўтказиш режалаштирилган эди. У ҳам юракка сиғмади. Саҳар мардонлаб йўлга тушдик.

Беш саотлар чамаси вақт мобайнида Тошкентга кириб келдик.

Сиҳатгоҳнинг навбатчи шифокорлари шоир ке-
часи билан безовта бўлиб чиққанликлари, ҳозирча
халақит бермаслик ҳақида гапиришди. Яхшиси,
кечки пайт келганларинг маъқул, дейишди.

Эркин аканинг ўғиллари Хуршидjon билан те-
лефонлашиб туришимизни айтиб, хайрлашдик.

Иброҳим ака анча толиққандилар. Уйларида қол-
дириб, Шодмон Отабекка телефон қилдим. Кечки
пайт устоз ётган сиҳатгоҳда учрашадиган бўлдик.

Гарчи туни билан мижжа қоқмай чиққан, путури
кетиб қолган довон йўлидан анча қийинчиллик би-
лан машина ҳайдаб, толиққан бўлсам-да, чарчоқ
сезилмас, кўзимга уйқу ҳам келмасди.

Юрагим ғаш. Ўзимни қўйишга жой тополмасдим.
Негадир кечаги учрашув таассуротларини кимлар-

гадир сўзлаб, ўзимни овутгум, юрагимни ёзгим келарди.

Уюшмада Эркин аканинг яқин шогирдлари, у кишини ғоят хурматини жойига қўядиганлар кўп. Яна, Иқбол Мирзо ўзида бўлса керак. Ҳеч бўлмаса, Турсунбой оға Адашбоев билан гурунглашарман деб, ўша ёққа қараб йўлга тушдим-у, негадир сиҳатгоҳга кириб ўтгим келиб, машинани ўша ёққа бурдим.

Шифокорларнинг кайфияти ва менга қилган муомалаларидан кўнглим баттар ғаш тортди.

Агар шу дақиқаларда бирон нохуш хабар эшиладиган бўлсам, ўзимни тутолмай қолишимни ҳис этиб, бу даргоҳдан тезроқ нари кетишга аҳд қилдим.

Уюшмага келсам, яна бир нохушлик; “Тушуммайман. Нега шу даражада фиску фужур. Хусумат. Бугун бориб, Эркинжонни кўролмасдан келдим – реанимацияда экан, аҳволи оғир, дейишиди. Шу одам ҳеч қачон бирорвга ёмонлик қилганми? Бирор ҳақида салгина бўлса ҳам ёмон гап айтганми? Нега бундай қилишади?!?” деди, кўзида ёш билан Эркин аканинг салкам тенгдоши бўлган кекса шоир Турсунбой оға.

Маълум бўлишича, Уюшма (тўғрироғи раис) “бехабар” бўлган китоб тақдимоти “норасмий” ҳолда Наманганга борган кишилар томонидан ўтказилганлиги, ҳатто вилоят телевиденияси орқали бу ҳақда бир неча бор хабар тарқатилганлиги кимдир томонидан тезда Уюшмага етказилган. Ана шундан сўнг йўриқчи хонимнинг тинчи бузилган. Намангандаги масъул котибга дағдаға билан қўнғироқ қилиб, бу “ўзбошимчалик” ҳақида зудлик билан “тушунириш” ёзасан деб, вилоятдаги шу

ишларга дахлдор ходимларга ҳам раис номидан танбех бериб, уларни оёққа қалқитганмиш...

Бу энди ростманасига “Пичоқ бориб, сүякка етди” дегани эди.

Котиба қизнинг “ҳай-ҳай”ига қарамай, Мұхаммад Али ўтирадиган “Қабулхона” эшигини зарб билан тортгандым, очилмади. Қулф экан.

Нарироқдаги қарши хонадан ҳозирги раиснинг “биринчи”, энг аввалгисининг “бешинчи” ўринbosари чопиб чиқди:

– Хўжайин йўқлар. Нима керак, ака?

– Хайрият, “ака”нгни унутиб юбормабсан. Айнан ўзинг кераксан, ҳозир, менга, – дея унинг орқасидан эргашдим.

– Вилоятдаги адабиётнинг жонкуяри бўлган бир котиб йигит амалга ошираётган таҳсинли ишлар учун раҳмат дейиш ўрнига, уни сиқиққа олишдан мақсадларинг нима? Хўш, буюк шоир ҳақида давлат нашриёти томонидан чиқарилган китоб тақдимотини кечагина ўтказиб келдик. Бунинг нимаси ёмон? Ҳозир устоз қаттиқ бетобликларини биласанми? Ҳеч бўлмаса, мана шундай пайтларда у кишини тинч қўйларинг. Ўша раисинг бошлиқ сенларда инсоф борми, ўзи!

Ўринbosарнинг жиддий тус олиб турган қиёфаси бирдан юмшагандай бўлди:

– Энди ака, Сизга аввал айтганимдек, бизга ҳам қийин-да! Кечаги тақдимот ҳақида гапирадиган бўлсак, ҳар ким ўзича ҳар қаёққа бориб, мажлис ўтказиб келаверса, биз хабардор бўлмасак, Уюшма нима қилиб ўтирибди деб, сўрайдиганлар борку! Адабиётга тааллуқли ҳар бир “тап” мана шу расмий идора орқали бўлиши керак-да!

– Ҳа, қойил. Устозингга балли. Бу унинг менга қўлинни бигиз қилиб, йигирма йилча олдин айтган сўзлари. Ҳали ҳам унинг “буйруғи” амалда турган экан, нима ҳам қила олардик. Бошқа сенга гапим йўқ, омон қол.

ТО ЮРАК СҮНГГИ ЗАНГИН ЧАЛГУНИЧА...

Сиҳатгоҳнинг “жонлантириш” бўлимиға киравериш йўлагида Аҳмаджон Мелибоев ва Шодмон Отабеклар ўтиришган экан. Улардан бирон нарса сўрашга юрагим журъат этмади.

Шодмонбекнинг ўзи гапириб қолди:

– Телестудияга чақирган одам кутиб ўтирган экан, ёзув студиясида китобим ҳақида гапиратуриб “бу асарга илк сўзбошини Эркин Воҳидовлар ёзиб берганлар...” дейишим билан у “стоп, стоп. “Эркин Воҳидов” номини айтиш мумкин эмас”, деб қолса бўладими!..

– Нима дедингиз?

– Айтганини қилишга мажбур бўлдим.

Ўзимни тутиб туролмай “Нега мумкин эмас? Бу гапни сенга қайси ғаламис айтди? Эркин Воҳидов кимлигини биласанми, ўзинг?!» дея ёқасидан олмадингизми?” деб, уни саволга тутмоқчи бўлиб тургандим, Иброҳим ака келиб қолди.

Хуршиджоннинг ранги оқариб кетган бир ҳолатда ичкаридан чиқиб, ёнимизга ўтирди.

Иброҳим ака унинг елкасига қўл қўйиб:

– Қалайлар? – деб сўраганди:

– Ҳа, энди ўзгариш йўқ, – деди.

Кутиш хонаси анча иссиқ эди.

Шифохонанинг салқин йўлаклари бўйлаб анча кезиб юрдик.

Бир маҳал буюк шиор бандаликни бажо келтирганини айтиб, Гулчеҳра опа телефон қилиб қолдилар.

Бу, 2016 йилнинг 30 май санаси, оқшом соат 18:00 дан 12 дақиқа ўтганда рўй берди.

Соат кеч тўққизларга яқин Анваржон қори Турсунов бошчилигига марҳумни Ҳувайдо мевзеидаги уйларига олиб келдик.

Бутун маҳалла оёққа қалқди. Ҳаммаёқ одамга тўлиб кетди.

Ёзувчилар Уюшмасидан на сиҳатгоҳда, на шир хонадонида бирор раҳбарнинг қораси кўринди. Ҳатто «бир умрга қарздор» «шогирд»нинг ҳам!

Ноҳуш хабар яшин тезлигига ҳамма ёққа тарқаб бўлган эканми, вилоятлардан қўнғироқлар бўла бошлади.

Ҳатто, ён телефоним жиринглаб, АҚШдан Америка-Туркистон Ассосацияси президенти Абдулла Хўжа аканинг мунгли овози эшитилди.

– Буюк шоиримиздан айрилиб қолибмиз-да. Марҳум акамизнинг барча оила аъзоларига бизнинг ҳамдардлигимизни етказиб қўясиз... Ёнимда ҳофиз Изро акангиз ҳам турибдилар. Телефонни у кишига бераман. “Укажон, мен Исройлда эканлигимда Эркин акамнинг у ерда даволанаётганликларини эшитиб, кўргани боргандим. Соғайиб кетинг, албатта Тошкентга бориб, Сиз яхши кўрадиган “Қурбон ўлам” ашуласини айтиб бераман, дегандим. Нима қиласиз энди, бандачилик. Акамизга берган ваъдани бажаришга ҳаракат қиласман”. (Чинданам, орадан уч кун ўтгач, ўзимиздан чиқкан машҳур ҳофиз Изро Малаков Америкадан келиб, келинойи, Ҳуршиджонларнинг кўнгилларини кўтариб, таъзия изҳор этиб, фотиха ўқиб кетди.)

Ёзувчилар Уюшмасидагилар эса, ҳануз қулоқлари том битган-у, ўзларини ҳеч нарсадан бехабар тутишарди.

Кейинги кунлар ичида Хуршидジョンни ғам-андуҳ анча эзиз, айниқса бугунги айрилиқ унинг қаддини букиб қўйгандай эди.

— Ўзингни тут, ука! Энди хонадоннинг ягона эркагисан, Худо бор, ҳаммаси яхши бўлади, кўзингда ёш кўрмай, — деб тургандим, маҳалла раиси Абдукарим aka мени аста тутиб:

— “Катта”лар келишяпти, — дея, ўн-ўн беш қадам наридаги кишиларга ишора қилиб қўйди.

Мен улардан Хайриддин Султоновни танирдим, холос.

— Булар кимлар?

— Ўртадагиси Бош Вазир, — деди паст овоз билан маҳалла оқсоқоли.

Яшириб нима қилдим; ўзим, шўро даври республика Бош Вазири ҳамда шу мақомдаги хорижий мамлакатларнинг анча-мунча юқори мартабали арбоблари билан (Олий Мажлиснинг Қонунчилик палата раиси бўлган Хуршид Дўстмуҳаммаднинг ўзи гувоҳ бўлиб, айтиб юрадиган гапларига қараганда) улар эшигини “оёғим билан очиб кириб, гап-гаштак қилиб чиқиш” мавқеига эга бўлсан-да, ҳозирги, ўзимизнинг Бош Вазиримиз ҳақида тасаввурим анча бошқачароқ эди. Эшитганларим, айниқса “қаламкашлар”нинг ўз “касб”ларига монанд айтадиган “ташбехлари” бўйича бу раҳбар кўз опдимда анча “қаттиққўл”, эшиги тугул ўзига унча-мунча одам зотини яқинлаштиравермайдиган бўлиб, гавдаланаарди.

Худо ҳаққи, ҳозир рўпарада хаёлларимнинг буткул тескари акси – келишган қад-қоматли, файзиёб чеҳрали, кўринишидан муомаласи лутфу карамга мойиллиги шундоқ сезилиб турган баркамол бир инсон турганини ҳис этдим.

У ҳаммамиз билан қўл олишиб сўрашди. Сабртоқат қилишдан бошқа иложимиз йўқ дея, кўнгилларимизга таскин бахш этди. Хуршиджонни бағрига олиб, елкаларидан силаб, кўнглини кўтарди... Айниқса, хонадон соҳибаси Гулчехра опага тавоб қилгандай ҳамдардлик изҳор этаркан, бу раҳбарнинг кўзларида ёш кўрдим.

Бу одам чин манода Навоиймонанд шоир руҳини шод этиш учун унинг хонадонига Оллоҳ томонидан юборилган ҳақиқат маёғининг посбони бўлган элчининг ўзгинасини эслатарди.

Ҳа, Худо таоло бор, у ҳамма нарсани кўриб-билиб, кузатиб тургучидир.

Шоир ҳовлиси атрофида қурилишлар кетар, ғишт, қум, шағал уюмлари ивирисиқ ҳолда сочилиб ётарди. Бир соатга етар-етмас вақт мобайнинг бутун маҳаллани шаҳар Ободонлаштириш Бошқармасининг ишчи-хизматчилари босди.

Йўллар атрофи қурилиш “чиқиндилари”дан тозаланиб, тартибга келтирилди. Керакли жойларга асфальт ётқизилди. Қўчаларнинг икки четини қоплаб ётган дов-дараҳтларга шакл берилди. Йўллар атрофи чароғон бўлиб, маҳалла чиройи ўн чандон очилиб кетгандай бўлди.

Буларнинг ҳаммасини Бош Вазир устида туриб, амалга оширди. У киши ҳаққига дуолар қилиб, қўл

очганлар кўп бўлди.

Мана шундай пайтда биз унча эътибор беравермайдиган Шахснинг роли, айниқса, унинг юксак салоҳият мезони кўпчилик манфаати учун қай даражада аҳамиятли эканлиги яққол кўзга ташланиб қоларкан.

Айни шу дамларда эл ардоғидаги шоирни имижимида “дафн маросими”ни ўтказиб қўяқолиш режасини тузиб қўйганлар ҳали ғафлат уйқусидан кўз очганларича йўқ эди.

Бир маҳал эрталаб соат тўқизларда ён телефоним жиринглаб, «биз уюшмаданмиз. Раисимизга Эркин Воҳидовнинг аниқ манзили керак» деган котиба қизнинг таниш овози эши билда.

Чидаб туролмадим. Асабим қўзғаб:

– Айтинг ўша одамга: Эркин ака манзиллари энди керак бўлса, ўзи топиб олсин, – дедим гапни қисқа қилиб.

Ёнимда турган Аҳмаджон Мелибоев ҳушёр тортиб:

– Кимга айтаяпсиз, бу гапни? – деди.

– Гап эгасини топади, дейдиларку! Ана ўшанга...

Дафн маросими белгиланган пайт-вақт пешиндан ўтганда, бутун маҳаллани тумонот одам босиб кетди.

Шоир мангу уйқуда ётган тобут ҳовли рўясидаги ялангликка чиқариб қўйилди.

Шу пайт не кўз билан кўрайки, устига зар духоба ёпилган майитнинг шундоқ нариги томонидаги таниш қиёфага кўзим тушди. У раис бўлиб, худди кандайдир махлуқ каби, тобутга қапишиб турарди. “Сен, сен шу кунни кутган экансан-да?” дея олдинга интилмоқчи бўлдим-у, қаршимда зич бўлиб тур-

ган ёш-яланглар сафини бузиб, ўтолмаслигимни сезиб, ўзимни босдим.

Кутилмаганда нарироқ томондан “Ё, тавба, ё тавба” деган овоз эшигилди. Ўша ёққа ўгирилдим-у, дард-алам билан андухли фарёд соглан кекса ва эъзозли олимимиз Умарали Норматовга қўзим тушди. У киши расо қаддини буқканича оломон оралаб, нарироққа кетиб борарди.

Домла тўғри қилган экан. Энг шармандали ҳол ана шундан кейин бошланди.

Уюшма раисининг “қилмишлари”дан бехабарликми ёки синаб кўрмоқ учунми, навбатдаги сўз унга берилди.

Агар шу одамда, озгина виждон, ҳамият бўлганда эди, салгина ўзини тортиб, марҳум олдида юзим шувут, умрининг сўнгги дамларигача анави, ҳозир қаердадир юрагини чанглаб ётган “устоз” ва яна кимларнингдир қутқуларига учиб, “гуруҳлашиб”, шу зотга қарши курашдик-ку! Энди, сўнгги манзилга кузатиш пайтида руҳини чирқиллатиб, мен гапирмай дея, мардона гапни айтган бўларди.

Ваҳоланки, ундей қилишни ҳаёлига ҳам келтирмади. Қаддини расо тутганича, марҳум ҳақида ҳамду саноли сўзлар айта бошлади.

Худди шу пайт дарвоза ичкарисидаги ҳовлида бўзлаб турган аёллардан кимдир қарғанди. Бу, шубҳасиз “воиз”га қаратилган эди. Аммо, у худди Муҳаммад Юсуф ёдгорлик пешлавҳаси очилиши пайтидагидек, парво қилмади. Мушт бўлиб тугилган қўлларини силкитиб, сўзлашда давом этди. Бу мушт кимнинг азиз боши устида ўйнаётганини сезгантлар бўлди, сезмаганлар ҳам.

СҮНГ СҮЗ

Худди мана шу пайт қаттиқ бетоб ётган устоз А. Қаҳхорнинг яқин дўстлари – академик М. Ўрзобоев, М. Мирзаевларга айтган қуйидаги сўзлари эсимга тушиб кетди: «Мана, шифокорим, Шоботхон олдидা бир гапни айтиб қўяй. Ўлимдан қўрқмайман. Фақат тобутим устида муттаҳам Шевердин туриб олиб, нутқ сўзлашидан қўрқаман, холос»

Ҳаётнинг қизиқлигини қарангки, буюк ёзувчининг дафн маросими куни айнан Шевердин у кишининг майити устида туриб олиб, нутқ сўзлаганди.

Орадан кўп ўтмасдан, Ойбекдай забардаст инсонни тилсиз, мажруҳ этиб, ўлимига сабаб бўлган кимсалар Зарифа опани қон-қақшатиб, “марсиябоз”лик қилганди.

Шу кеча-кундузда Юшма раиси йигинларда минбарларни гулдиратиб “Эркин ака менинг энг яқин устозларимдан эдилар. У киши менга кўп яхшиликлар қилганлар. У киши олдидা бир умрли қарздорман”, дея воизлик қилиб юрганига, унинг ишбошиси “жангари” хоним шоир хонадонига “Во-ой-дод, устоздан айрилиб қолдик, энди нима қиласиз” деб, уввос солиб, кириб келганига нима дейсиз!

“Устоз” сўзи баъзи бетайин, иккюзламачилар олдидা шунчалик бозори касод, сийқаси чиққан сарик чақа тангага айланиб бораётгани одамга алам қилмайдими!

**30 май – 19 июл,
2016 йил.**

МУНДАРИЖА

МУАЛЛИФДАН.....	5
СҮНГГИ НИДО	7
ШОИР ВА ЭЛЧИНинг БАШОРАТЛАРИ	15
УЗОҚ ВА ЯҚИН ПОКИСТОН	21
“ОЛТИН ДЕВОР” ШАРОФАТИ	24
ХАЙРЛИ ИШ ЖОНКУЯРЛАРИ	29
ХАЙРЛИ ИШГА ТҮСИҚ	33
“ОЛТИН ДЕВОР” ЖАМОАСИ	39
ЖИДДИЙ СИНОВ КУНЛАРИ	45
ОЙБЕКНИ КҮРГАН КИШИ	48
ОҚСОҚОЛ “ОТДАН” ТУШДИЛАР	54
КАТТА СИНОВ ОЛДИДАН	58
ШОИРНИНГ ТАШРИФИ	66
ЮРТ СОФИНЧИ	72
КҮНГИЛДАГИ РЕЖА.....	75
КУТИЛМАГАН УЧРАШУВ.....	79
ЮЗМА-ЮЗ	83
ҲАВАС ВА ҲАСАД	86
ҚҮНИ-ҚҮШНИЧИЛИК	97
ЯХШИЛИК ВА ЁМОНЛИК	100
ХУДБИНЛИК ГИРДОБИ	109
ТАЪҚИБ АЛОМАТЛАРИ	115
“БИР КУНЛИК ХАЛИФА”	120
НОМ ЎЧИРИШ ПОЙГАСИ	123
“ПОЙГА”НИНГ ЯНГИЧА УСЛУБИ	129
КИМДАН НИМАНИ ЎРГАНИШ КЕРАК?	140
“ГУРУҲБОЗЛАР”	144
БЕЗОВТА ЮРАК	153
МАВЗУНИНГ ТУҒИЛИШИ	161
ҚОРАҚҮЛ ТЕЛПАГИ	166

ЯНГИ ТАШВИШ ШАРПАСИ	170
АРАВАНИНГ БЕШИНЧИ ФИЛДИРАГИ	177
“БИЛОЛИДДИН ДОМЛА”	185
ИНДИАНАГА ТАШРИФ	193
МЕҲМОНДОРЧИЛИК	196
“ДУШМАНФУРУШЛАР”	201
ЭРКИН АКАНИ ИЗЛАБ ЮРГАН КИШИ	213
“БИР ЎЗБЕК БОЛАСИННИГ БОШДАН КЕЧИРГАНЛАРИ”	220
АЁЛЛАР ИШНИ ТЕЗГИНА ҲАЛ ҚИЛИШДИ	224
“ЙИГИТ РИЗҚИ – КҮЧАДА”	238
ЯШИРИН ЎКИНЧ	255
УСТОЗ ВА ШОГИРДЛАР	261
МЕҲНАТНИ КИМ ҚИЛИБ, ҲУЗУРИНИ КИМЛАР КЎРАДИ	269
БЕШИНЧИ ЎРИНБОСАР	275
ЯНГИ ТАНИШ ОҒАЙНИМ	287
ЭСКИ ҲАММОМ – ЭСКИ ТОС	292
ПИНҲОНӢ ТАЗИЙ҆ЛАР	299
ГУМРОҲ	304
КИТОБДАН ЮЗ ЎГИРГАНЛАР	309
ЭҲТИРОМ	318
НОХУШ ХАБАР	323
ТО ЮРАК СҮНГИ ЗАНГИН ЧАЛГУНИЧА	327
СҮНГ СҮЗ	333

Дадаҳон НУРИЙ

ИЗТИРОБ

(Маънавий-ахлоқий
бадиа-роман)

Муҳаррир ҳамда
саҳифаловчи **Фирдавс Дўстматов**.

Абдуғани Жумаев фотоларидан
фойдаланилди.

Шахсий кутубхона учун.

Қоғоз бичими 84x108 1/32.
Arial гарнитурасида чоп этилди.
Шартли босма табоғи 23,0.
Нашр босма табоғи 22,5.
Адади 50 нусха.